

II or 128 fra

SIGISMUNDI STORCHENAU

I N

ACADEMIA VINDOBONENSI

LOGIC. ET METAPH.

PROFESSORIS PUB. ORD.

INSTITUTIONES

LOGICÆ.

Editio Altera.

AB AUCTORE EMENDATA.



VENETIIS

1816.

Soc. Typ. Pasquali, et Curti.



PROLEGOMENON

I N

PHILOSOPHIAM.

§. I.

Philosophiam sapientiæ studium; sapientiam vero ex mente veterum rerum divinarum, & humanarum, caussarumque, quibus hæ res continentur, scientiam esse ex Tullio novimus. Veteres igitur ad philosophiam retulerunt omnia ea, quæ sive de Deo, sive de spiritibus, sive de mundo corporeo & rationis ductu, & sensuum experientia cognosci possunt: quæ opinio a veritate profecto aliena non est; etsi, qui hodie obtinuit mos, eidem haud suffragetur. Nostro nimirum hoc tempore naturales scientias ob amplissima, quibus jam auctæ sunt, incrementa ita partimur, ut sub philosophiæ ambitu duntaxat logica, metaphysica, mathesis, physica, atque ethica contineantur, reliquis in diversas iterum classes distributis. Origo nominis si quæritur, ea modesto Pythagoræ responso debetur; „ omnes enim, qui in rerum contemplatione studia ponebant, sapientes, σοφοί, & habebantur, & nominabantur: idque eorum nomen usque ad Pythagoræ manebat ætatem; quem, ut scribit auditor Platonis, Ponticus Heraclitus, vir doctus imprimis, Philiumtem ferunt venisse, eumque cum Leonte Principe Phliasiorum docte, & co-

Quid
Philosophia?

De off.
l. 2. c. 2.

Cic. 99.
Tusc. 6.
s. 6. 3.

BIBLIOTECA NAZ.
ROMA
VITTORIO EMANUELE.

„ piose disseruisse quædam: cujus ingenium,
 „ & eloquentiam cum admiratus esset Leon,
 „ quævisse ex eo, qua maxime arte confi-
 „ deret; at illum: artem quidem se scire
 „ nullam, sed esse γηλοσφω. „ Scientia por-
 „ ro ipsa varias omnino ab orbe condito vicis-
 „ situdines experta est, ut enim certum est eam
 „ in primo generis humani parente fuisse cu-
 „ mulatam admodum, atque perfectam, cum
 „ ipse cum Auctor supremus insigni exornave-
 „ rit sapientia, ut Ecclesiasticus testatum fecit:
 „ ita dubitari vix potest, eam labente tempo-
 „ re, & succrescentibus inter homines vitiis ita
 „ concidisse, ut paucissimi numerarentur, qui
 „ ad eam aut condiscendam; aut excolendam
 „ operam conferrent aliquam.

C. 17. v.
 s. 6.

Quæ phi-
 losophia
 Chaldæo-
 rum?

II. Non ita tamen pulcherrimum hocce sa-
 pientiæ studium ex orbe exsulavit, ut non
 quavis ætate diversis in nationibus fuerint
 nonnulli, qui eruditionis magis conspicuæ fa-
 mam adepti fuissent. Ut de antiquis Hebræo-
 rum Patriarchis taceam, prima omnium gen-
 tium, in qua philosophicæ disciplinæ sensim
 efflorescere cœperunt, quantum quidem ex
 veterum monumentis colligi potest, fuit Chal-
 dæa Babylonis pars, cujus incolæ Chasdim,
 seu Chusdim a Chuso Chami filio compellati
 fuerunt; etsi enim Ægyptii hanc sibi gloriam
 olim vindicare conabantur, contententes,
 Chaldæos ex colonia Ægyptiaca prognatos es-
 se, inter eruditos tamen, ut vult Stanlejus,
 jam fere certum est, Persarum Magos, qui
 omnem suam eruditionem a Chaldæis mutua-
 ti sunt, ipsis Ægyptiis longe antiquiores es-
 se; neque alia fuit ipsius Tullii mens Chal-
 dæos antiquissimum doctorum genus compel-
 lantis. Viri præ reliquis inter Chaldæos ce-
 lebres fuerunt Zoroaster, qui ex mente S.
 Epiphanii Nimrodi ætate floruit. Belus rex
 auctor, ut fertur, astronomiæ circa annum

De di-
 vin. l. 1.

mundi 2682. cujus manibus a superstitioso populo in Deorum numerum relatis Semiramis ejus filia templum media in Babylone extruxit, quod non minus ab arte, & splendore inclaruit, quam ex eo, quod suprema ejusdem pars Chaldæis, magisque aprissimum ad contemplandos siderum cursus præberet locum: Berosus denique, qui ab historia, quam, Ptolomæo Philadelpho imperium tenente, in lucem emisit, illustre sibi nomen comparavit, quique primus Chaldaicas disciplinas in Græciam intulit, statua propterea auro obdûta ab Atheniensibus honoratus, ut Plinius refert. Præcipuus Chaldæorum in excolenda astronomia erat labor, quæ tamen brevi in astrologiam, aliasque turpissimas superstitiones degeneravit, unde factum est, ut omnem fere eruditionem suam ad vanas divinationes, somniorum interpretationes, artesque magicas referrent. Hujus porro eruditionis partes in diversas familias erant distributæ (nec dum enim publice docendi mos obtinuerat), atque ipsum familiæ caput in id curam intendit, ut scientia sua ad nepotes, ac posteros propagaretur, atque augeretur etiam. Quæ ejusmodi erant familiæ, propriam sibi in provincia sedem deligebant, immunitateque a publicis oneribus, ac vectigalibus gaudebant.

III. Philosophia Chaldæorum per finitimam brevi Arabiam, Persiamque propagata est; in hac rursum Zoroaster quidam (nomen hoc viris magna eruditione conspicuis videtur id temporis fuisse commune) memorandus est, qui religionem meliorem in formam redigendo, ac populares suos erudiendo effecit, ut major litteris honos haberetur, quarum deinde cultores usitato inter Persas nomine Magi appellati sunt: tum Hystaspes, & Ostanes, qui Persicas scientias in Græciam primus invexit. In Arabia, ea præcipue, quæ

Quæ
Persarum?

Quæ
Arabum?

Sabæa dicitur, parte quis prior litteris operam dederit, inter eruditos adhuc disceptatur; complures tamen fuisse scientiæ naturalis, & astronomiæ peritos vel ex Jobi, amicorumque disputationibus patet.

Quæ In-
dorum?

Quæ
Phœni-
cum?

(a) L. 3.

(b) Comp.

Plat. &

Arist.

Quæ Æ-

gyptio-

rum?

Macro-

b. somn.

Scip. l. 1.

c. 10.

IV. Sed neque aliis tum quidem notis gentibus viri a doctrina illustres defuerunt: celebratur in India Buddas cum Gymnosophistis; in Sinis Fohi gentis conditor; tum Confucius; in Malabarica Bramines; in Mauritania Atlas; in Britannia, Gallia, Germania Druidæ; in Thracia Orpheus, & Zämolxis; in Scythia Anacharsis, qui ipsis Græciæ sapientibus adnumeratus est. In Phœnicia Pherecydes Pythagoræ magister; Mochus, vel Moschus, aut etiam Ochus doctrinæ de atomis, ut Strabo opinatur, auctor; Sanchoniathon Berytius, qui ante Trojana tempora floruisse fertur; Cadmus denique dux Coloniarum in Græciam deductæ, ex qua subinde celeberrimus ille inter Græcos philosophus Thales Milesius ortus est. Horum sapientium studio, tum & characterum, ac nauticæ inventionem Phœniciæ gentis gloria plurimum crevit; illam Lucanus (a) eidem attribuit: hanc Rapius (b): „astronomiam primum a Phœnicibus navigationi fuisse accomodatam, tam, stellamque polarem viæ ducem delictam, quod omnes deinceps gentes adoptarunt.“ Prætereunda non est hoc loco Ægyptus, mater artium nuncupata, in qua derivatæ ex Phœnicia liberales artes, ac mathematicæ disciplinæ maxima obtinuerunt incrementa; ac geometria quidem cumprimis, cujus excolendæ necessitatem propemodum Ægyptiis imposuerunt annuæ Nili exundationes, & quæ inde consecutæ sunt, limitum, agrorumque confusiones. Præcipuum philosophiæ Ægyptiacæ lumen fuit Athotis, sive Hermes, vel Mercurius, qui populares suos

geometriam, astrologiam, ac theologiam do-
cuisse fertur: ejus doctrinam in Sacerdotibus,
Prophetis, & Magis aliquandiu conservatam,
demum vero collapsam restituit Siphos, al-
ter Mercurius dictus, qui Trismegisti quo-
que cognomentum tulit. Moyses ipse Hebræi
populi dux, curante Pharaonis filia, erudi-
tus est omni sapientia Ægyptiorum, quæ ab
ipso in subjectum sibi populum facili nego-
tio promanavit, quamque aliquo post tem-
pore Salomon rex divino munere inter mor-
tales sapientissimus mirum in modum pro-
vexit.

Vid.
Lexicet
Meth.
pour l'
stud. l'hi-
st. t. 2.
p. 39. &
ss. Ath.
c. 7. v. 22.

V. Nascentem fere tantum adhuc spectavi-
mus philosophiam; adolescentem jam, ac la-
tius in dies se se in Græcia explicantem con-
sideremus. Occurrunt primum hic illi, qui
ob insignis eruditionis famam, communi qua-
si suffragio, specioso Sapientium titulo con-
decorati sunt, quod anno tertio Olymp.
498æ, qui est annus ante Servatorem 580.
contigisse Laertius cum Plutarcho testatur.
Septem, quibus id honoris obtigit, existe-
runt: Thales Milesius, Solon Atheniensis,
Chilon Lacædemonius, Pittachus Mitylenæus,
Bias Priæus, Cleobulus Lindius, & Pe-
riander Corinthiorum tyrannus; verum po-
stremi duo non merito, sed astu, ac vi etiam
aperta; decoram hanc nomenclationem sibi ar-
rogarunt; ac deinceps usurparunt, convoca-
tis ad se reliquis, nec resistere tum quidem
ausis, qui tamen ubi libertati pristinae sunt
restituti; Apolini Delphico litteram ε (quæ
Græcis quinarium indicat) dicarunt, hoc fa-
cto contestati in suo sapientium ordine non
contineri, nisi quinque. Nonnulli his præte-
rea adjiciunt Anacharsim Scytharum regis fra-
trem, Mysonem Chenæum, Epimenidem Cre-
tensem, ac Pherecydem ex Cycladum insula
Syro oriundum. Porro sapientes hi politicam

Quæ
Græco-
rum?

Quæ in
iis sa-
pientes?

potissimum philosophiæ partem excoluerunt, condendis nempe sapientissimis legibus, stabilendis rebus publicis, & informandis hominum moribus unice intenti; solus Thales ad geometriam quoque, in qua complura theoremata invenit, astronomiam, in qua eclipsium causam, ac modum eas præ sagiendi detexit, & demum ad naturam corporum perscrutandam animum convertit, aliosque instituere cœpit: quo suo conatu id effecit, ut ingens philosophandi amor, disputandique de rebus obscuris fervor in popularibus suis accenderetur. Atque inde factum est, ut novelli hi philosophi pro diversis, quas tuebantur, sententiis in diversas quoque partes abirent, ac varias sectas (collectionem hominum uni magistro adhærentium intelligo) constituerunt, quæ jam breviter referendæ sunt.

Quæ su-
starum o-
rigo?

Quæ di-
visio?

VI. Celebriores Græcorum philosophorum sectæ ad duas, ex quibus veluti fontibus reliquæ profluxerunt, præeunte Laertio referri possunt. Prima harum est Jonica, quæ Thaletem: altera Italica, quæ Pythagoram fundatorem veneratur.

Quis
Thales?
*Herod.
Clius P.
43.*

VII. Thales Mileto Joniæ urbe oriundus, postquam ob ingentem doctrinæ famam, quam sibi diuturna per Asiam, Phœniciam, Ægyptum, & Cretam peregrinatione, & arctiori cum eorundem locorum eruditissimis, ac præcipue sacerdotibus consuetudine comparavit, sapientis, ut dictum est, compellationem obtinuit anno ætatis suæ 59, ludum aperuit, haustamque scientiam cum aliis communicare aggressus est. Orta inde secta, quæ Jonicæ nomen tulit. Inter discipulos præ reliquis eminuit Anaximander Mileti quoque natus, qui eidem demortuo in regenda schola successit, ejusque doctrinam, licet in Phisicis, non nihil immutatam propagavit. Anaximandrum excepit Anaximenes; hunc Ana-

Quæ se-
cta Joni-
ca?

*Cic. 44.
de l. 4.*

xagoras Clazōmenius *τησομικροτερος* subinde a Lucretio decantatæ auctor; clarus is erat genere, & opibus; at earumdem contemptu multo clarior, agros enim, & patrimonium reliquit, discendi, quærendique causa, di-
 „vinæ oblectationi toto se animo ut dede-
 „ret: “ hunc denique Archelaus *Physicus* dictus, quod primus physicam ex Jonia Athenas invexerit. In hoc Jonica secta, ac naturalis simul philosophia desiit.

Cic. qq. tusc. l. 5.

Cic. l. 6.

VIII. Socrates enim ejus discipulus, ac successor neglecta physica totum se ad moralem doctrinam expoliendam, ac in ordinem redigendam applicuit. „Primus a rebus oc-
 „cultis, & ab ipsa natura involutis, in
 „quibus omnes ante eum philosophi occu-
 „pati fuerunt, advocavit philosophiam, &
 „ad vitam communem adduxit, ut de vir-
 „tutibus, & vitiis, omninoque de bonis re-
 „bus, & malis quæreret “ præclarissima prorsus præcepta statuens homini, vel secundum se, vel ut patrifamilias, vel ut membro reipublicæ spectato observanda; atque hac ratione novam sectam a se Socraticam appellatam fundavit. Erat porro Socrates omnium eruditorum testimonio, totiusque Græciæ judicio, cum prudentia, & acumine, &
 „venustate, & subtilitate, tum vero elo-
 „quentia, varietate, copia, quam se cum-
 „que in parte dedisset, omnium facile prin-
 „ceps. “ Singularem in docendo æque, ac disputando tenebat methodum, quærens multa, asserens pauca; frequenter etiam se nihil scire professus. „Hic ita disputat, ut
 „nihil affirmet ipse, refellat alios, nihil se
 „scire dicat, nisi id ipsum: eoque præsta-
 „re ceteris, quod illi, quæ nesciant, scire
 „se putent, ipse se nihil scire id unum
 „sciat. “ At verisimillimum est, id eum non ex animi scientia fecisse, verum, ut sapien-

Quis Socrates.

Cic. qq. ac l. 5.

Ejusque secta?

Cic. de orat. l. 3.

Id. qq. ac l. 5.

ter observavit Verulamius, „ per ironiam, &
De augm. scient. l. 5. c. 2. „ scientiam dissimulando simulasse, renun-
 „ ciando scilicet iis, quæ manifesto sciebat,
 „ ut eo modo etiam, quæ nesciebat, scire
 „ putaretur; “ Natus fuit Socrates Athenis
 anno 4^{to} Olymp. 77^{mæ}, & quidem ut Stan-
 lejus rationes supputat, 30. Maii die Jovis
 anno ante Christum 467^{mo}: mortuus anno
 ætatis 70. completo, hausto in carcere ve-
 neno, ubi prius egregie de animæ humanæ
 immortalitate, deque futura bonarum men-
 tium beatitudine cum discipulorum suorum fide-
 lissimis, Platone præcipue, Critone, Simmia,
 ac Cebete disseruisset. Id nempe probitatis,
 doctrinæque suæ ab iniquissimis iudicibus, ad
 quos variorum criminum causa per invidiam
 nonnullorum delatus erat, præmii denique
 retulit. Præcipua accusationis capita fuerunt:
 Socratem contemtis Diis popularibus novos
 introducere, ac juvenes a parentum obser-
 vantia abstractos ad se pellicere. Neque ve-
 ro difficile fuisset Socrati aut accusationem
 diluere, aut aliis quoque viis capitis sentien-
 tiam declinare, noluit tamen, atque magna
 animi constantia amicis & lytrum, & fugæ
 occasionem offerentibus reposuit: timere mor-
 tem haud decere philosophum; sat diu se in
 corpore peregrinatum esse; cupere jam bea-
 torum sedes ingredi.

Qui Phi-
 losophi
 Socrati-
 ci?

IX. Socratis auditorum, qui Socraticorum
 philosophorum compellationem sortiti sunt,
 triplex est genus: alii, ut Crito, Chærephón,
 Xenophon, Æschynes, Simmias, Simo, Ce-
 bes, Glauco, & Terpsion doctrinam ejus
 amplexi, nulli, ceteroquin sectæ se addixe-
 runt; alii præceptis morum egregie ab eo
 imbuti alia deinceps in republica munia su-
 sceperunt, quales fuerunt Critias, Alcibia-
 des, Pericles orator apud Athenienses cele-
 berrimus; alii denique diversa ex defuncti

magistri disciplina apprehendentes capita in
dissentientes inter se familias abierunt, no-
vasque sectas constituerunt. Sed & sectarum
iterum diversa fuit ratio, aliæ exiguo vigne-
runt tempore, vel „ reliquarum vi, & di-
„ sputationibus fractæ, & extinctæ “ vel
quod in obscuris orbis partibus plantaræ æta-
tem ferre non potuerunt, quales erant Cy-
renaica, Megarica, Eliaca, & Eretrica;
aliæ in florentissima totius Græciæ urbe At-
henis fundatæ longissimo temporis spatio per-
durarunt: erant hæc Academica, ex qua su-
binde Peripaterica exorta est; & Cynica, ex
qua labente tempore Stoica prodivit. Illas
primum: has postea referemus.

Quæ in-
de novæ
sectæ?
Cic. de
orat. l. 3.
c. 17.

X. Aristippus sublato e vivis Socrate Cy-
renen Africæ; quæ ipsi patria erat, se con-
tulit, ibique doctrinam magistri sui male in-
tellectam propagare nitens sectam erexit;
quæ a loco quidem Cyrenaica, a doctrina
vero Hedonica ab ἡδονῇ dicta est; sublato
enim omni bonum inter, ac malum discrimi-
ne finem hominis, perfectamque felicitatem
in sola voluptate sitam esse docuit, atque
fœdissimam hanc doctrinam luxuriosa etiam
vivendi ratione, quæ a Socratis præceptis
prorsus deflexit, egregie comprobavit. Suc-
cessorem habuit Aristippum ex filia Arete ne-
potem, qui a teneris annis ab ipsa sua pa-
rente institutus inter discipulos suos numera-
vit Theodorum quempiam, a quo nonnulli
sectam Theodorianam derivant. Erat vero Theo-
dorus homo impius, Deorum contemptor, &
acerrimus existentiae Numinis impugnator,
ἀθεός propterea cognomento dictus. Resipuis-
se tamen morientem, ac superstitiosa etiam
ligamenta sibi applicari voluisse ajunt. Theo-
doro Antipater, huic Epitimides, tum Pa-
ræbata, ac tandem Hegesias cum Anniceri-
de successerunt: duo hi postremi, cum non-

Quæ Cy-
renaica?

Quæ
Theodo-
ria?

Quæ He-
gesiacæ,
& Anni-
ceriana?
Quæ Me-
garica?

nulla de propriis adderent, novas sectas He-
gesiacam, & Annicerianam paullo post ite-
rum interituras condiderunt.

Cic. de
div. 1. 2.

De fat.
c. 5.

Quæ E-
liacæ, &
Eretrica?

Quæ, &
quotu-
plex A-
cademi-
ca?

XI. Euclides Megaris ortus (alius ab eo,
qui post 95. annos in geometria excelluit)
audito Athenis Socrate, cum disputationum
litigiosarum plus æquo amans esset, novam
in patria sectam constituit, quæ primum a
loco Megarica, tum ab indole contentiosa
Eristica, & demum Dialectica audit, quod
quæstionibus, ac responsionibus eorum dis-
cursus absolverentur. Philosophicæ eruditio-
nis tanto ferebatur desiderio, ut cum sub
pœna capitis sancitum fuisset, ne quis Me-
garensium civium pedem Athenas inferret,
ipse habitu muliebri, quo facilius lateret,
rectus, singulis noctibus 1020. passibus con-
fectis ad Socratem itaret. Successores in scho-
la nactus est Eubulidem Soritis inventorem,
qui Demosthenem instruxisse, & pronuncia-
tionem τὸν docuisse fertur; Alexinum, Eu-
phantum, Apollonium Cronum, Diodorum,
Ichtyam, Clinomachum, & Stilponem egre-
gios sophistas, & clamorosos disputatores. Stil-
po tamen inventionem etiam, ac eloquentia ex-
celluit, dictus propterea a Cicerone „ homo
acutus, & probatus “.

XII. Phædo Eliensis Socratis primum au-
ditor, eique præ reliquis carus scholam de-
mum in patria aperuit, quæ inde Eliaca; po-
stea vero a Menedemo Eretriensi, qui secun-
dus ab ipso (Plistanus enim intercesserat)
eamdem rexit, Eretrica dicta est. Menede-
mum excepit Asclepiades, quocum hæc secta
interiit. Jam ad alteram divisionis (§. 9.)
propositæ partem transeamus.

XIII. Academica secta, quæ præ reliquis
magnam nominis celebritatem consecuta est,
nomen tulit a loco quopiam nemoroso in su-
burbio Athenarum sito, qui a possessore suo

Hecademo primum Hecademia, tum vero Academia dictus est. Longissimo cum floreret tempore hæc schola, fieri non potuit, ut non quædam in doctrinam mutationes sæpius irrepererent; orta hinc Academicæ partitio in veterem, mediam, ac novam, quibus aliqui quartam etiam, & quintam addunt.

XIV. Verus Academia auctorem habet Platonem Athenis anno primo Olymp. 88^{væ}, 11^{ma} Junii secundum rationes a Stanlejo subductas, ante Christum 426^{to} prognatum. „ Divinus hic philosophus, & philosophorum „ Deus, “ ut illum Cicero frequentius appellat, octo primum annis, cum ætatis vigesimum attigisset, Socratis convictu usus est, haustaque ab ore magistri præcepta litteris consignavit, quamvis multa quoque de suo addiderit: eo vero vita functo primum quidam Megaras ad Euclidem, tum ad dispersos per Italiam Pythagoræos, Cyrenas ad Theodorum Mathematicum, Tarentum ad Eurytum, & Archytam, & denique in Ægyptum ad sacerdotes profectus est; iturus etiam ad Indos, & Persarum Magos, nisi bella Asiatica obstitissent, qua in peregrinatione in physicis præcipue, & geometricis plurimum profecit; nec vana est suspicio, eum in Moysis libros incidisse, multaque inde in suam philosophiam transtulisse: ut videre est apud Eusebium (a), Josephum (b), & Clementem Alex. quo referente Numenius philosophus dicere consueverat: „ quid est „ Plato, nisi Moyses atticissans? “ Redux tandem Athenas in Academia docere aggressus est, sicque sectam Academicam instituit, dogmata Heracliteorum, Pythagoræorum, & Socraticorum commiscendo, illos in *sensibilibus*: hos in *intelligibilibus*: postremos denique in *politicis*, & *moralibus* secutus. Discipulos & copiosos admodum, & præclaros

Quæ Academicæ
verus?
Quis
Plato?

(a) præp.
evang.
præp. 9.
(b) Conc.
sæc. 1.
pion. 1. 2.

nactus est, Speusippum ex sorore nepotem, Xenocratem Chalcedonium, Aristotelem, Dionem Syracusanum, Demosthenem, & Isocratem Oratores, aliosque complures, quos tamen geometriæ præceptis jam antea imbutos voluit; quod, ut omnibus notum fieret, scholæ foribus inscripsit: *ἔδης ἀγεσσι τῆς γεωμετρίας*.

*De acad.
l. 5. 6. 8.*

*Laert.
l. 3.*

*Tusc. l.
1. 6. 34.*

*Acad. l.
1. 6. 8.*

*Quæ A-
cademia
media?*

*L. contra
Acad.*

nemo geometriæ expertus huc intret. Placita sua; quorum generale quasi compendium nobis Tullius reliquit, in dialogos 56. digessit, quibus vel Socratis, vel alterius philosophi celebrioris nomen præfixit: in eo, qui Phædo inscribitur, animæ humanæ immortalitas tanta verborum copia, & argumentorum pondere demonstratur, ut cum illum quondam publice legeret, ingens in auditoribus commotio secuta fuerit; Cicero addit Cleombrotum Ambraciotam ex eorum numero mortalis vitæ tædio correptum se se ex muro præalto in mare præcipitasse. Platone anno ætatis 81mo completo, ipsoque natalis sui die defuncto, scholæ in Academia ordine præfuerunt Speusippus, Xenocrates, Polemo, Crantor, Crates, qui omnes cum doctrinam magistri sui illibatam conservarent, id effecerunt, ut Academia vetus haud mutata persisteret, quæ ipso Ciceronis iudicio *Dogmaticis* (ii intelliguntur, qui se in pluribus veritatem assecutos esse asseverant,) accensenda est, cum ea, quæ intellectu percipiuntur, scientia vera teneri posse docuerit.

XV. At vero Arcesilans, seu ut passim Cicero, Arcesilas, qui Crateri in regenda schola successit, doctrinæ formam immutando Academiam mediam inchoavit. Quid eam novandi occasionem præbuerit, refert S. Augustinus. Zeno Stoicorum caput, Polemonis quondam auditor, & in doctrina Platonica enutritus secessionem fererat, multaque in deteriorem sensum detorta docuerat: quam

novam doctrinam latissime disseminari cum adverteret Arcesilaus, prudenti quadam œconomia, usus Academiæ placita dissimulare constituit, ne Platonis mysteria publicata, vulgigue notitiæ exposita vilescerent: eam in rem occultatis Platonis dogmatibus, & cum iis solum, qui in Academia consenescere decreverant, communicatis, impugnando aliorum, & præcipue Zenonis sententias, voluit potius dedocere male doctos, quam docere eos, quos dociles, non arbitrabatur, „ negans esse quid-
 „ quam, quod sciri possit; ne illud quidem,
 „ quod Socrates sibi reliquisset, se nihil sci-
 „ re. “ Inde intulit, nihil omnino affirmandum esse, neque in tanta rerum ἀνταρδιᾳ, seu *incomprehensibilitate* aliud sapienti relinqui, atque ἐποχὴν id est assensus, ac iudicii retentionem: dictus propterea cum suis assentibus *Acatalepticus*, seu *Ephecticus*. Arcesilaum secuti sunt Lacydes, Evander, & Egesinus, in quo Academia media expiravit.

XVI. Carneades siquidem, qui secundum eum scholæ curam suscepit, Novam instituit, asserendo eam *incomprehensibilitatem* non rebus ipsis, aut earum natura contineri, sed esse in iis omnino aliquid, quod verum sit, aut falsum: apparere tamen falsa ita finitima veris, ut ea inter se sine erroris periculo discerni prorsus nequeant. Aiebat proinde, nihil omnino esse, quod percipi possit, ne hanc quid enunciationem: „ nihil est, quod percipi valeat. „ Verum ut fuerit acerrimus ἐπὶ ἀκαδημαϊκῆς defensor, indulgit tamen, ut sapiens quandoque assensum præstet iis, quæ non percipit, id est, ut opinetur; modo simul se opinari advertat, quandoquidem multa verisimilia sint. Carneadem excepit Clitomachus; hunc Philo, qui cum bello Mithridatico Romam venisset, sermonum excellentiæ, & morum suavitate magnam sui apud

Quæ Academia nova?
 Cic. qq. acad. l. 1.

De nat. Deor. l. 1.
 c. 3.

omnes admirationem excitavit, ipsumque Ciceronem in discipulis numeravit. Philoni successit Antiochus Ascalonita; qui „evidentia, ac sensum causam suscipiens,“ ut ait Lipsius, ad Stoicos defecit, atque in media Academia Stoicam philosophiam professus est: at denique ubi consenuit, ad veterem Academiam rediit; cuius rei testem habemus Tullium, qui eum quoque a se Athenis auditum esse, licet novam ejus doctrinam quam maxime improbareret, refert.

*Manud.
ad Stoic.
philos. l.
2. diss. 3.*

Acad. l. 4.

XVII. Hæc de secta Academica, quæ cum vel maxime ad summam nominis sui celebritatem contenderet, efficere non potuit, ut non ex proprio gremio alia, sibi que adversa enasceretur, quo tantus gloriæ splendor non parum obumbrabatur. Platonis videlicet discipuli post magistri sui mortem in duas abierunt partes; una remansit in Academia, altera, duce Aristotele Lycæum (locum in Athenarum suburbio situm, atque a Pericle ad exercitationes militares conditum) magistratu non invito occupavit, novæque sectæ initium fecit, quæ a *περιπατητικῆς* Peripatetica appellata est, eo quod auditores cum magistro suo ombambulando philosophari consueverint.

*Quæ secta
Peripatetica?*

*Quis
Aristoteles?*

XVIII. Natus erat Aristoteles Stagytæ in Thracia, anno primo Olymp. 99^æ, qui est ante Christum 382^{us}, patre Nicomacho celebri medico; annorum cum esset 17, liberalibusque artibus jam egregie excultus, Athenas se contulit philosophiæ addiscendæ causa; inde Platone prius per 20. annos audito, cui ob ingenii, ac industriæ excellentiam ita se commendavit, ut ab eo *mens, anima* suæ scholæ vocaretur, in Macedoniam ab rege Philippo evocatus, filioque ejus Alexandro magister datus est. Munere hoc per 8. annos ita præclare functus est Aristoteles, ut

omnibus, ac præcipue ipsi Alexandro quam maxime probaretur, qui dicere deinceps solebat; „ se a patre, ut viveret: ab Aristotele, ut bene viveret, habere “. Ex Macedonia Athenas ubi rediit, Xenocrate in Academia præidente, ipse in Lycæo novam scholam instituit, eamque 13. annorum spatio non sine magna sapientiæ fama gubernavit. At denique inimicorum calumniis appetitus, diversorumque criminum, & præcipue impietatis, quodque opiniones Atheniensium sacris contrarias foveret, postularus, clam Chalcidem profugit, ibique fatis cessit annum agens. *63tium* designato prius, cum instarent discipuli, Theophrasto, qui & librorum ab ipso exaratorum hæres, & in regenda schola successor foret: hunc ordine insecuti sunt Strato ob præclaram in physicis eruditionem *Physicus* dictus, Lyco, Aristo, Critolaus, ac denique Diodorus; omnes tamen cum ducis sui libris, qui a Theophrasti morte testamentario ad Neleum pervenerunt, destituerentur, ejus mentem in suis prælectionibus parum feliciter assecuti sunt.

XIX. Conscripsit vero Aristoteles ingentem librorum copiam, si fides habenda est Laertio prolixum eorum catalogum texenti, in quibus omnes philosophiæ partes complexus est, novisque inventis illustravit: in logica syllogismos, eorumque figuras, ac modos primus pertractavit; in excolenda physica nactus est adiutorem longe nobilissimum, ipsum videlicet Alexandrum M. qui ei collecta magnis sumtibus omnis generis animalia submitit, quo eorum naturas, ac proprietates perscrutaretur. Neleus porro Aristotelicos libros secum Scepsin in patriam deportavit, moriensque hæredibus suis reliquit. Magna hi cura eos asservarunt, ita plane, ut timore Attallicorum regum Pergami bibliothecam instru-

Qui ejus libri?

nium eos subterranea in specu absconderent, quo factum est, ut magnam partem ab aere, vermibusque corroderentur. Eruti tandem post 130. circiter annos venditi sunt Teio Appelliconi, qui lacunas infelici sollertia sarcians, ut corruptissimi evaderent, effecit. Sed non unicum id erat, quod Aristoteles in suis scriptis accepit vulnus; alterum intulit Romæ Tyrannio Grammaticus; ubi enim Sylla occupatis Athenis hos cum aliis quam plurimis libris Romam deferri curasset, Tyrannio Aristotelis studiosissimus usu eorum obtento reliqua, quæ adhuc deerant, ex propriis supplevit, eosque per homines satis imperitos describi curans id obtinuit, ut ab exemplari suo quam maxime abscederent. Macularos denique hæc ratione Aristotelicos libros Andronicus Rhodius, qui eos a Tyrannione acceperat, primus publicavit, digestis antea in ordinem iis, quæ ad logicam, ethicam, & physicam spectabant; cum vero restarent nonnulla, quæ, quod de ente in genere agebant, ad nullam harum classium referri posse videbantur, ea physicæ subiciens *μετα τα φυσικα* inscripsit. Atque inde *metaphysica* nomen ortum traxit, quod subinde ad Alexandro Aphrodisæo primum usurpatum, Aristoteli vero prorsus incognitum fuit; is enim hanc philosophiæ partem, jam philosophiam primam, jam sapientiam, jam theologiam appellare consueverat.

Quæ se-
ctæ Cyni-
ca.

XX. Ad Socratem tantisper redeamus: erat in ejus discipulorum numero Antistenes Atheniensis, cui præ reliquis magistri sui sermonibus ii ardebant, qui præclara de tolerantia, laboribusque, ac ærumnis fortiter perfrendis monita suppeditabant: hæc ipsi occasio fuit, ut mortuo Socrate a reliquis secederet, novæque sectæ initium daret; Cynosargen locum non procul a portis civitatis

dissitum, quo novam doctrinam excepturi convenirent, selegit. Ejus vero nominis origo hæc est: Didymo Atheniensi domi suæ sacris operanti candidus canis victimam rapuit, eamque eo in loco deposuit; consulitur hæc super re Oraculum; respondet Pythia, templum Herculi sacrum ibidem extrui oportere, quod ubi erectum fuit, *Cynosargis* nomen tulit, quasi dicas: τα κυνος ἀργεον *candidi canis templum*. Inde vero etiam Antisteni, ejusque sectatoribus Cynicorum nomen hæsit, canesque dicti sunt ab iis potissimum, qui eorum institutum non probabant; quamquam etiam canino vivendi genere, & acerbitate illa, qua hominum vitia publice perstringebant, hanc nomenclationem optime promeriti fuerint. Præcipuum ipsi doctrinæ caput erat, virtutem solam ad felicitatem sufficere: hoc nixis principio rejectis omnibus artibus liberalibus, ipsaque adeo dialectica, ac physica ad solam ethicam animum appulit, in qua excolenda omnem modum prætergressus est. Neque vero externa vivendi ratio a doctrinæ severitate ab'usur; abjecta, Quis Antistenes? siquidem tunica, sordido solum palliolo amictus, baculo item ac pera armatus, & promissa barba incessit, vitam agens omnino tennem, ac pauperem, divitiasque, honores, ac dignitates velut mera vitiorum tegumenta abominatus: id quod omnibus deinceps ipsius assecclis in consuetudinem abiit. Antistenem Quis Diogenes? secutus est Diogenes Sinopensis, qui præclare adeo Cynismum condidit, ut etiam magistrum superaret, cubiculo cum destitueretur, in dolio habitare cœpit, sorte sua contentissimus, atque invictum in adversis quibuscumque præ se ferens animum: quo magnam sui apud omnes, & cum primis Alexandrum M. admirationem excitavit, qui eo conspecto dixisse fertur: „ vellem Diogenes es-

„ se, nisi essem Alexander. “ Diogenem excepit Monimus, hunc Onesicritus: hunc Crates Thebanus nobili ortus genere, qui ducentis talentis, quæ ex vendito patrimonio acquisierat, inter cives distributis, addito hoc celebri effato: „ Crates Cratetem liberat pe-
 „ cuniis nolens Cratetem haberi ab istis, quæ
 „ tenet: “ totum se Cynicæ Philosophiæ dedi-
 dit, nactus discipulum, ac successorem Metro-
 clelem. Huic successerunt Menippus, &
 Menedemus, quorum ultimus eo venit de-
 mentię, ut habitu furiarum assumpto circumi-
 ret clamitans: se speculatorem ab inferis ades-
 se, ut delinquentes observet, quæque perpe-
 ram acta viderit, redux iisdem nunciet. In
 hoc Cynicorum successio defecit.

Quis Ze-
 no Citti-
 cus?

XXI. Zeno enim Citticus, cum verecundior
 esset, quam ut Cynicam impudentiam animo
 indueret, complura doctrinæ capita, ac sor-
 didum illud vivendi genus haud parum im-
 mutavit, novamque sectam conflavit. Reli-
 cto, quem aliquamdiu sequebatur, Cratete
 Cynico, Stilponem Megaricum decennio in-
 tegro audivit: ab hoc Xenocratem Platonicum
 adiit; tum a Diodoro Crono in dialecticis
 instructus, demum Polemonis prælectiones ex-
 cepit. Collectam diuturno labore eruditione-
 nem communicaturus *παικίλην σοκo* (porticum
 variam ita a Polygnotti picturis compellatam)
 elegit, ibique scholam, cui 58. annis præ-
 fuit, aperuit, concurrente ingenti auditorum
 numero, qui primum a capite suo Zenonii,
 tum a loco Stoici dicti sunt. Erat Zeno vir
 singulari continentia (unde natum illud: *Ze-
 none continensior*). morum severitate, mira in
 alios facilitate, gloriæ, & ostentationis con-
 temtu insignis: præter ethicam, quam Cy-
 nicorum more imprimis excoluit, logicam quo-
 que in qua multa de suo addidit, & natu-
 ralem philosophiam pertractavit. Præcipuum

Quæ se-
 ctæ Stoica?

ipsi in moralibus dogma: virtutem propter se ipsam expetendam esse, atque in ea sola veram hominis felicitatem consistere, quod omnibus subinde ejus successoribus placuit, etsi ceteroquin in quam plurimis inter se dissiderent: constat enim opinionum dissidium sectæ huic præ reliquis proprium, ac familiare fuisse. Zenoni successit Cleanthes vir insignis tolerantia; cum enim mediis ad vitæ usum necessariis destitueretur, noctu hauriendæ in hortis aquæ, aliisque duris laboribus operam dedit, ut comparato sibi victu interdium philosophiæ vacare liceret. Cleanthem secutus est Chrysippus quam singulari ingenio, & mentis acumine pollens, atque in dialecticis supra modum versatus, tam sui plenus, aliosque omnes præ se superbe despicens: multa propterea in antecessorum placitis innovavit, ac de suo addidit, conscriptis magno numero voluminibus, „ ut nihil „ sit a Chrysippo prætermisum in Stoi- „ cis. “ (a) Chrysippum ordine exceperunt Zeno Tarsensis, Diogenes Seleucensis, „ ma- „ gnus, & gravis Stoicus (b) Antipater Si- „ donius, „ acutissimus. (c) „ Et inter ma- „ gnos Stoicæ sectæ auctores, (d) Panæti- „ us Rhodius „ Stoicorum princeps, „ & Stoi- „ corum gravissimus (e) „ Demum Possido- „ nius Apameæ in Syria natus, qui Rhodi, & reipublicæ, & scholæ præfuit: ab hoc quoque se institutum fuisse refert Cicero. Quin & Pompejum, qui illum, dum e Syria redux ejus visendi causa Rhodum deflexit, acutis- simis licet artuum doloribus cruciatum, nerveose disserentem: „ nihil esse bonum, nisi „ quod honestum sit; “ & audivit, & suscepit. Hucusque pertingit non interrupta Stoicorum successio, quæ secundum ordinem a Diogene Laertio propositum in scholis a Thælete institutis derivatio est postrema. Stoi-

(a) Cic.
de fin. 1.

(b) Id.

qq. tusc.

1. 3.

(c) Id. de
off. 1. 3.

(d) Seneca
ep. 92.

(e) Cic.
qq. ac. 1.

4. & de
off. 1. 2.

De off. 1.
1.

Id. qq.
tusc. 1. 2.

Id. qq.
tusc. 1. 2.



Qui Pharisei? eorum quoque gravitatem, quod præterire hic requeo, in Judæa, quamquam multo tardius, imitati sunt Pharisei: in stabiliendo fato Chrysippum secuti videntur; ita enim illud ad miserunt, ut simul perfectam arbitrii libertatem profiterentur: ut testis est Josephus ipse Phariseus. Etsi porro nonnullam physicæ, & mathesi operam dederint, præcipuum tamen ipsis studium fuit Legis avitæ, quam sputiis traditionibus, & falsis interpretationibus admodum depravarunt. Floruit hæc secta jam Machabæorum ætate, Alexandro Jannæo Aristobuli filio imperium tenente; eversa vero subinde urbe, ac templo & ipsa paullatim concidit.

XXII. Rerum series jam postulat, ut ad sectas Italicam transeamus, quæ in ea Italiæ parte, cui coloniarum Græcarum frequentia magnæ Græciæ nomen imposuit, auctore Pythagora effloruit. Natus erat Pythagoras in insula Samo anno tertio Olymp. 581^æ, ante Christum 564^{to}, singulari morum maturitate, ingenii vi, aliisque non ordinariis animi dotibus, quæ jam in juvene supra vulgarem modum elucebant, a natura instructus. Primum Samii, cum nondum 18^{um} ætatis annum attigisset, præceptorem nactus est Hermodamantem; tum vero Phærecydem Syrum in Lesbo commorantem, Anaximandrum, & ipsum Thaletem Mileti audivit. Non poterat Thales ipsius ingenium, discendique aviditatem pro meritis admirari, auctorque existit, ut in Phœniciam, atque Ægyptum ad sacerdotes præcipue Memphiticos, Dospolitanos, ac Thebanos, a quibus ipse quoque omnem suam hausisset scientiam; se se conferret; quod consilium secutus cum esset, ipsos 22. annos familiari eorum consuetudine usus, atque omnibus Phœniciorum, ac Ægyptiorum sacris initiatus, religionis mysteria

maxime recondita, omniumque Deorum initia, nec non astronomiam, & geometriam pro illorum temporum ratione perfectissime condidit. Deerat adhuc musica, ac numerorum doctrina: in his quoque a præstantissimis Chaldæorum, Persarumque Magis Babylone, quo, subacta a Cambyse Ægypto, una cum reliquis captivis abductus fuerat, institutus est. Inde persoluto a quodam Crotoniatarum Principe redemptionis Iytro in patriam rediit quidem, haud tamen diu in ea commoratus est; cum enim doctrinam de se obscuram, novis insuper numerorum, aliisque symbolis involutam exciperet nemo, unum si demas juvenem, quem ut discipulum haberet, alere quoque cgebatur, novam peregrinationem suscepit, in qua Delphos, Cretam, Spartam, Philiuntem, aliaque invisit loca, & Jovis Cretensis mysteria, datas quoque a Minoe, & Lycurgo leges perscrutatus est. Tandem patriæ prorsus valedicens, quod in eam redux ad suscipiendum reipublicæ gubernaculum a civibus adigeretur, novam sibi sedem in Italia quæsit, atque Crotonæ, urbe in sinu Tarentino sita, summa civium lætitia, ac benevolentia exceptus, publicoque senatus decreto scholam aperire jussus est. Id quod regnante Romæ Tarquinio superbo contigisse refert Cicero.

29. tu-
sc. l. i.

XXIII. Ut primum publice docere aggressus est Pythagoras, nactus est discipulos & copiosos admodum, & sapientiæ fama inclutos, quos inter præcipuo loco nominandi veniunt Empedocles Agrigentinus a duobus, quæ statuit rerum omnium principiis *Amicitia*, & *Discordia*: Archytas Tarentinus a mechanica in formam artis redacta: Timæus Locrus a libro de mundo, ex quo complura in suam Plato philosophiam derivavit, celebris; Alcmaeon denique Crotoniates, Hippa-

Qui ejus
discipuli?

sus Metapontinus, Eudoxus Gnidius, & Philolaus Crotoniates, qui primus annum terræ morum docuisse fertur. Discipulorum vero duplicem classem constituit; prima *Genuinos*, *Acroaticos*, sive *Pythagoreos* complectebatur, quorum sub initium jam 600. concursisse scribit Laertius; communi hi utebantur victu, facultatibus etiam suis in unum collatis, nec umquam, nisi diu probati, ad magistri conspectum admittebantur; sed noctu ejus post velum quoddam latentis instructiones excipiebant, arctissimo insuper silentio per quinquennium integrum adstricti. Docerantur autem primum arithmetica, tum musica & geometria, tandem philosophiam, quæ in duas dividebatur partes, Theoreticam nimirum, & Practicam, quarum hæc elegantissimis præceptis de divino cultu, pietate in mortuos, reverentia erga parentes, observantia legum, temperantia, fortitudine, aliisque virtutibus referta erat, cujus omnis doctrinæ summa aureo Pythagoræ carmine, ut vulgo audit, continetur, quod non ab ipso, sed a discipulorum nonnullis, ut inter eruditos ferre convenit, compositum videtur. Hac porro instituendi ratione ingentem sibi apud discipulos auctoritatem conciliavit, quæ per serpentem inter eos rumorem, eum Apollinem Hyperboreum, vel saltem bonum a Diis submissum genium esse, mirum in modum crevit; unde factum est, ut illius dicta oraculorum instar exciperent, neque aut dubitare, aut quærere quidpiam, aut contradicere fas esse putarent, illud perpetuo occinentes: *αὐτὸς ἔφη* ipse dixit. Ad alteram vero classem *Acusmatici*, seu *Pythagoristæ* spectabant, quibus se se adjungere cuilibet licebat: his in amplissimo quodam *ἑμᾶκω*, quod interprete Clemente Alex. Ecclesiam denotat, convenientibus ipse sapientissima, atque cujusvis

Quæ eorum classes?

Quæ Pythagoræ doctrina?

jusvis conditioni accomodata monita imper-
 tiebat. Obiit demum Pythagoras secundum
 mentem S. Justin. anno 4^{ta} Olymp. 70^{me},
 mortis genus incertum est; cum nonnulli ob
 tyrannidis affectatæ suspicionem occisum esse
 volunt. Successit Aristæus, qui relictam ejus
 uxorem Theanonem præclare quoque philo-
 sophantem duxit, atque duos filios patre vi-
 duatos Mnesarchum, & Telaugen instituit:
 horum prior scholam deinceps regendam su-
 seepit, eamque Tydæ Crotoniatæ reliquit,
 qui paullo post ob publicas patriæ calamita-
 tes marore confectus Pythagoræorum succes-
 sioni finem imposuit, etsi non defuerint, qui
 per plurima dispersi loca hanc doctrinam lon-
 ge, lateque disseminarent. Certe adeo hæc
 secta extincta non est, ut non obscura ejus
 vestigia in Judæa quoque post reditum e ca-
 ptivitate Babylonica deprehendere liceat; mea
 enim opinione Esseni, sive Essæi, nota in-
 ter Judæos secta, ad Pythagoræos propius ac-
 cesserunt, atque, ut nonnulli volunt, ad Cy-
 nicos. Non diffiteor equidem, ipsos adscita
 quadam morum asperitate, & nimia in re-
 prehendis vitiis severitate nonnullam Cy-
 nismi speciem præ se tulisse, longe tamen
 erant a sordido illo, quod Cynicæ philoso-
 phiæ caput fuit, vivendi genere remoti, ut-
 pote iterandis sæpius in die baptismatis as-
 sueti. Id vero cum Pythagoræis commune
 habuerunt, ut silentii, ac solitudinis amore,
 & quadam asceticæ vitæ ratione se se a po-
 pularibus suis separarent, præter ethicæ stu-
 dium singulari industria in artem medicam
 condiscendam incumberent, nativamque her-
 barum, ac lapidum vim sollicitè indagarent.
 Alii urbes incolebant, alii in silvis delitesce-
 bant, nec parvo numero; Josephi siquidem
 ætate amplius quatuor eorum millia per Ju-
 dæam sparsi fuerunt. Ceterum de Deo, ejus

Qui es-
 seni?

*De bell.
Jud. l. 2.
o. 2. & 7.*

*Quæ ex
Italica
oriundæ
sectæ?*

*Quæ se-
ctæ Hera-
clitea?*

*Cic. de
fin. l. 2.*

*Quæ se-
ctæ Elea-
tica?*

*Bayle
diss. cri-
t. X.*

providentia, animæque humanæ immortalita-
te rectas cum Pharisæis opiniones foverunt.

XXIV. Italica hæc secta, quæ, ut vidi-
mus, Pythagoram auctorem veneratur, in
quatuor subinde partes scissa quatuor diver-
sas sectas progeneravit, Heracliteam nimi-
rum, Eleaticam, Pyrrhoniæ, & Epicuream,
quæ nunc ordine referendæ sunt. Heraclitea
& originem, & nomen, & fere etiam inte-
ritum accepit ab Heraclito Ephesio, homine
perquam elati supercilii, aliorumque omnium
contemptore, quorum etiam odio solitudinem
petiit, vitamque in montibus, herbis tantum
& oleribus victitans egit, donec corporis ægri-
tudine in urbem redire compelleretur. Cum
junior esset, se nihil scire: ut vero conse-
nuit, se nihil ignorare dicere solebat: audi-
vit primum Xenophanem, tum Hippasum Py-
thagoræum, quorum placita cum iis, quæ ab
Orphæo mutuavit, commixta in opus quod-
dam digessit, quod in Dianæ fano eo fine
occultavit, ut fortuito invenum sublimissi-
mis mysteriis refertum, ac prope divinum
crederetur; sed fraus ea successu caruit. Se-
ctatores habuit paucos, eosque obscuri nomi-
nis, quod adscribendum videtur tum absurdis,
quas fovebat, opinionibus, tum obscuritati,
quam sive in docendo, sive in scribendo ita
affectavit, ut passim ab omnibus ὁ σκωτῶν
compellaretur.

XXV. Eleatica secta ab urbe Elea, seu Ve-
lia magnæ Græciæ, ex qua præcipui ejusdem
philosophi oriundi erant, nomen: originem
vero a Xenophane Colophonio obtinuit. Cum
contenderet universum hoc æternum esse, ne-
que fieri ulla ratione posse, ut quidquam ex
nihilò fiat, systema male cohærens, ac prorsus
impium contexens, Spinozæ de una to-
tius universi substantia, eaque divina prælu-
sit. Xenophani in scholæ regimine successi-

Parmenides Eleates genere, & opibus clarus; verum clarior eo, quod absurdæ magistri sui doctrinæ aliam indiderit formam; hunc excepit Melissus Samius, quem insecuti sunt Zeno Eleates dialecticæ auctor, ut testatur Aristoteles apud Laertium: Leucippus pariter Eleates, qui antiquam Moschi Phœnicii de atomis doctrinam primus in Græcia suscitavit: Democritus Abderites, Protagoras ob librum, quem his verbis exorsus est: „ de „ Diis quidem statuere nequeo, an sint, nec „ ne? Sunt enim plurima, quæ id scire prohibent: “ ab Atheniensibus exilio multatus, concrematis publico in foro ejus scriptis: & denique Anaxarchus rursus Abderites, ob singularem animi constantiam, & vitæ tranquillitatem *Fortunatus* dictus. Democritus porro ex mente Apolodori ortus est anno primo Olymp. 806, atque inde annis ante Christum circiter 458. Prima litterarum rudimenta Abderæ a Magis, & Chaldæis quos Xerxes ibi reliquerat, accepit, tum aliquo tempore Leucippum, & Pythagoræorum nonnullos sectatus, tandem Chaldæam, Persiam, Indiam, Æthiopiam, ac Ægyptum eruditionis causa peragravit: ubi vero in patriam rediit, sectam Eleaticam, & imprimis Leucippi de atomis systema ad majorem perfectionem adduxit. Vir erat meditationi magnopere deditus, a qua ne tam facile avocaretur, in subterranea quadam extra mœnia specu habitasse, & denique se ipsum oculis orbasse ferunt.

Quis Democritus?

Cic. 44.
tusc. l. 2.

XXVI. Pyrrho Eleates natus anno ante Servatorem 374, primum Anaxarcho magistro usus est; deinde vero novam condidit sectam a se Pyrrhoniā: ab inquisitione veritatis Zeteticam ἀπο τῆ ζήτησις, a suspensione judicii Ephecticam ἀπο τῆ ἐπὶ ἔχειν, a dubitationibus Aporeticam ἀπο τῆ ἀπορίας, ab eo demum,

Quæ secta Pyrrhonia?

quod dispiceret semper, & verum non reperiret, Scepticam ἀπο τῆς σκεπτικῆς dictam. Docuit siquidem nihil omnino comprehendi posse, neque in rerum natura quidpiam esse, quod verum sit, aut falsum, honestum, aut inhonestum, justum, sive injustum; sed ea omnia ab hominum tantum opinione, lege, aut consuetudine proficisci: universim proinde de rebus omnibus dubitandum, nec ullum umquam assensum præstandum esse. Neque vero ab absurda adeo doctrina, vita, moresque abluserunt; ut enim se de rebus prorsus omnibus dubitare comprobaret, noluit umquam currus, equos, aliaque in via occurrentia declinare, passurus certo gravioris detrimenti quidpiam, nisi amici ejus interea saluti prospexissent; quamquam etiam aliquando, sui quasi oblitus, canem in se irruentem fugere sit deprehensus; eam ob causam cum a nonnullis rideretur, reposuit: „difficile est hominem, penitus exuere, sed „contendendum tamen, primum quidem agendo, quantum fieri potest, adversum res, „tum postea ratiocinando.“ Celebriores inter discipulos, quos nactus est Pyrrho, fuerunt Eurylochus, Philo Atheniensis, Hecataeus Abderita, Nausiphanes Tejus, quem Epicurus audivisse fertur, & Timon Philiasius ejus in schola successor, quocum secta hæc penitus periisset, nisi postliminio a Prolemæo Cyreneo fuisset restituta, ut refert

L. 9. Menodotus apud Laertium, qui simul Prolemæi successores longa serie enumerat: sed non attrinet eos hic singulatim referre. Sextus solum Empiricus præteriri non debet; floruit is temporibus Antonini Pii Imp., conscripsitque decem de philosophia sceptica libros, qui hodie adhuc in plurium versantur manibus.

Quæ Epicurea?

XXVII. Epicurea secta auctorem habuit Epicurum Atheniensem, natum patre Neocle

Judimagistro, ut ait Cicero, anno tertio Olyp.
 109na, ante Christum circiter annis 340. Cum
 ætatis ageret annum 14um, philosophicis se
 studiis totum tradidit, in quibus tamen a
 nullo se institutum, sed omnino αὐτὸ διδάσκειν
 esse frequentius gloriari solebat: anno vero
 32do publice docere aggressus est primum qui-
 dem Mitilene, tum Lampsaci, postremo Athe-
 nis, ubi eum in finem hortum quemdam coe-
 merat. Atque inde factum est, ut ejus se-
 ctatores διὰ πόρον τῶν Κηπῶν, ex hortis philosophi-
 dicerentur. Numerum discipulorum nactus est
 prorsus inauditum, quippe cum non modo ex
 Græcia, verum ex Asia quoque, & Ægypto
 frequentissimi confluerent, inter quos præ re-
 liquis claritatem nominis adepti sunt Metro-
 dorus a Cicerone pæne alter Epicurus dictus;
 Polæmus ab ipso moriente scholæ præfectus,
 & Leontius, omnes Lampsaceni. Neque ve-
 ro deinceps ea sectatorum copia imminuta
 est; nam & continua horti, sive scholæ præ-
 fectorum successio, ut Suidas testatur, exple-
 vit spatium 237. annorum ad tempora usque
 Julii, & Augusti Cæsarum, & ea quoque
 ætate inter viros summos, & reipublicæ prin-
 cipes Epicuræ sectæ adhæsisse quam pluri-
 mos, tantaque magistrum suum veneratione
 prosecutos fuisse, ut ejus imaginem non modo
 in tabulis, sed in poculis etiam, & annulis
 insculptam gestarent, ex Cicero palam fit.
 Quin & Palæstinam pervasit hæc pestis; Sad-
 ducæi enim, quod nomen vel a suo capite Sa-
 doc sacerdote, vel a justitia, Hebræis πρῶ,
 cujus eximios sese cultores venditabant, ob-
 tinuerunt, præcipua Epicuræ doctrinæ capi-
 ta amplexi sunt: Dei quippe providentiam,
 animi humani immortalitatem, & reliquo-
 rum spirituum sive bonorum, sive malorum
 existentiam sustulisse feruntur. Epicuri por-
 ro philosophia in tres erat divisa partes. Pri-

De nat.
 D. l. 1.
 c. 6.

Idem De.

De fin.
 l. 2. c. 28.

De fin.
 s. c. 1.

Qui Sad-
 ducæi?

ma, sive ut agebat, canonica, cum de veritate, ejusque criteriis breviter ageret, variosque de *sensibus*, *prænotione*, *voluptate*, ac *vocibus* canones proponeret, logicæ vices subiit: fusiores enim veluti meras sophistarum cavillationes omnino respuebat, quod Cicero in illo reprehendit. Altera continebat physicam, in qua systema Democriti elaboravit, multaque de Deo, & animæ humana impie prorsus effuriit, extrahens, ut ait Cicero, religionem cum Diis immortalibus, re tollens, oratione relinquens Deos. Tertiam demum partem constituēbat ethica, in qua principium, & finem vitæ vere beatæ in voluptate situm esse contendit.

Acad. I. 2.

De nat.
D. I. I.

Quæ se-
cunda Ec-
lectica?

XXVIII. Hæc de antiquis Græcorum philosophorum sectis dicta sufficiant, quæ dum magna animorum contentione sive in ipsa Græcia, sive in Italia inter se confligebant, aliud interea, novumque philosophiæ genus Alexandriæ in Ægypto, imperante Romæ Augusto, caput extulit. Alexandriam quippe omnis generis eruditi id temporis confluxerant, summa ad litterarum studia, opportunitate, quam Ptolemæorum liberalitas & insignis bibliotheca, quæ tum parem in orbe non habuit, suppeditavit, allecti. Ejus doctrinæ summa erat, in nullius magistri verba jurandum, sed veritatem ex omnibus philosophorum sectis conquirendam, nec quidquam, nisi ratione consulta, & maturo judicio recipiendum esse.

Quis ejus
auctor?

Hujus inusitatæ adhuc, licet probatissimæ, philosophandi rationis auctor exstitit Potamon, sectaque ab eo fundata (si tamen secta dici possit) Eclectica ab *εκλεκτικῶν* appellari consuevit: crevit autem plurimum, ubi Ægyptus veræ Religionis lumine collustrata fuit, quod haud longo post tempore evenit; complures enim ex iis, qui hanc methodum

sectabantur, philosophis doctrinam Evangelicam amplexi celeberrimam eadem in urbe pro Christianis scholam erexerunt & gubernarunt etiam, ex qua subinde tot viri & morum integritate, & divina, humanaque sapientia clarissimi prodiverunt, quales fuerunt S. Justinus M., Neapoli Syriæ oriundus, S. Irenæus, atque imprimis illud Alexandrinæ philosophiæ decus S. Catharina, quam Orthodoxi philosophi præsidem hodie suam venerantur.

XXIX. Primus, quantum constat, Christianus philosophus Eclecticus, scholæque rector teste Phil. Sideta fuit Athenagoras, quem secuti sunt Pantænas, & Clémens Alexandrinus, qui hanc philosophandi rationem & fusius declarat, & magnis laudibus effert; postquam enim multa attulisset in philosophiæ laudem, quam divino munere hominibus obtrigisse ait, subdit:

Qui, in
ea Christi-
iani?

Strom:
l. 1. c. 7.

φιλοσοφικὴν δέ, ἣ τὴν στοικὴν λέγω, ἢ δὲ τὴν πλατωνικὴν ἢ τὴν ἐπικυρεῖον καὶ ἀριστοτελικὴν, ἀλλ' ὅσα εἰρηται παρ' ἑκάστης τῶν αἵρεσεων τῶν καλῶς δικαιοσύνην μετὰ εὐσεβείας ἐπιτημῆς ἐκδιδασκούντων, τὸ το σὺμπαν τὸ ἐκλεκτικὸν φιλοσοφικὸν φημι „Philosophiam autem non dico Stoicam, nec „Platonicam, aut Epicuream, & Aristotelicam, sed quæcumque ab his sectis recte „dicta sunt, quæ docent justitiam cum pia „scientia, hoc totum selectum dico philosophiam.“ Mi porro philosophi Christiani, etsi ex diversis sectis, Eclectici cum essent, quidquid castissimæ Religioni non adversaretur, seligerent, nihilominus in moralibus præcipue Stoicos; in dialecticis, & arte ratiocinandi Aristotelem; in doctrina de Deo, genii, animaque humana, & ceteris rebus immaterialibus Platonem sequebantur ducem, ita tamen, ut huic primas in omnibus partes deferrent, putantes ejusdem placita cum veræ Religionis dogmatibus facilius, reliquis.

Lib. de
ver. rel.
c. 4.

componi posse; unde S. Augustinus de veteribus Platoniceis non dubitavit affirmare, „ eos, „ si hanc vitam rursus agere possent, pau- „ cis mutatis verbis, ac sententiis ad Chri- „ stianam Religionem accessurös esse. “ Cle- mentem & audivit, & in scholæ præfectura secutus est celeberrimus ille inter Christianos Doctor Origenes, qui ea sapientiæ laude in- claruit, ut non Christianorum modo juvenes, sed & ipsi gentilium philosophi maximo nu- mero ad excipiendas ejus institutiones con- fluerent. Post Origenem floruerunt Heracla ejusdem successor, S. Anatolius Laodiceæ Episcopus, qui a Platone deficiens primus Aristotelem Alexandriæ prælegit; Arnobius, Lactantius, Eusebius, Synesius, S. Augu- stinus cum plerisque Sanctis Ecclesiæ Patri- bus, qui omnes hanc philosophandi normam tenuerunt. Verum bellorum tumultibus, odiis- que græcos inter, ac latinos ferventibus, ac- cedente denique etiam Leonis Isaurici in Phi- losophos, eorumque studia furore, effectum est, ut jam a sæculo fere sexto omnis Ecle- siæ hujus scholæ splendor deflueret, & in toto pene Oriente sapientiæ studium elan- guesceret, paucis solum relictis, qui clarita- te nominis temporum illorum barbariem illu- strarent; sæculo nimirum sexto Philoponus Alexandriæ mixram ex Aristotelis, & Plato- nis placitis philosophiam professus est, infel- ix subinde absurdissimæ Tricheitarum sectæ auctor: sæculo octavo Joannes Damascenus & sanctitate, & sapientia inclytus: sæculo nono Leo Thessalonicensis Antistes, ac Pho- tius Constantinopolitanus Patriarcha florie- runt. Movebat tum quidem omnia Leo sex- tus Orientis Imperator ob insignem, quam sibi comparaverat, eruditionem, *Sapiens*, ac *Philosophus* dictus, ut rem litterariam eri- geret; votis tamen, & conatibus eventus haud

respondit, non nisi Psello quodam, ac Michaelē Ephesio sapientiæ fama tum quidem inclarescentibus. Sæculo demum undecimo Michael Psellus, conscriptis in Aristotelem commentariis, excoltaque Platonis doctrina viri eruditi nomen promeruit, eo quoque clarus, quod ipsum Imperatorem Constantinum Ducas instituerit, eique tantum litterarum amorem instillaverit, ut palam professus sit, „ Malle se litterarum gloria, quam imperio „ cognosci. “

Zonar.
annal.

l. 3.

Quæ se-

ta Jun.

Plat.?

Quis Am-

monius

eius au-

ctor?

XXX. Eadem cum Clemente Alex. ætate sub finem nempe sæculi secundi, & initium tertii vixit Ammonius cognomento Saccas, Eclecticus licet philosophus, novæ tamen sectæ Juniorum Platoniorum auctor. Natus is erat a parentibus orthodoxis, arque in Christiana philosophorum schola vel ab ipso Clemente, vel a Pantænâ institutus, ubi tamen virilem ætatem attingit, ad avitam idolatriam turpissime defecit, ut testatur Porphyrius, cui præ Eusebio id negante fidem hac in re habendam esse eleganter commonstrat Cl. Laur. Moshemius. Homo hic vaferimus, quo Religioni, quam deseruerat, quibus posset artibus, noceret, eo primum curas intendit, ut, cum ipsi Christiani Platonem ceteris præferrent philosophis, eumque non multum a suis dogmatibus dissidere contenderent, ipse ostenderet, nihil novi a Christo, ac ejus sectatoribus in orbem illatum esse, sed sanctiora etiam Christianorum mysteria jam ab Academia olim & agnita & tradita fuisse: eam in rem ad ineptissimas allegorias, ad violentas verborum explicationes, ad tenebras, nescio quas, confugit, ut Platonis sententiis sensum a catholica doctrina minus abhorrentem appingeret; nec de nihilo est suspicio, eum genuinos Platonis, & Aristotelis textus multis in locis deprav-

Diss. de
turb. per
Plat.
Eccl.

Quæ e-
jus do-
ctrina.

vasse, ut arctissimum, quem volebat, eos inter circa primaria doctrinæ capita consensum exsculperet. Hac quippe duorum ex omni retro antiquitate philosophiæ principum consensione satis occurri putabat Christianorum doctoribus perpetuo occinentibus, Platonem a Moyse, aliisque Judæis plurima hausisse, veritatemque in nulla gentilium schola umquam deprehendi potuisse, id quod tam acre, constansque philosophorum dissidium clarissime testaretur. Atque hac in egregios suos inter assecclas auditores invenit, ac Porphyrium præcipue, qui librum exaravit

*Luc.
Molse-
wius de
vit. &
scrip-
Porphyrus
c. 9.*

περικυρικὸν εἶναι τὴν Πλάτωνος καὶ Ἀριστοτέλους αἵρεσιν,
de Platonis, atque Aristotelis consensu. Denique ex diversis, præsertim vero ex Pythagoricis, Platonicisque placitis monstrosum prorsus philosophiæ corpus confecit, cui nonnulla quoque ex ipsa Christianorum disciplina, quæ ad mores animique cultum pertinent, petita immiscuit, quo palam fieret, nihil in sua desiderari philosophia, nec esse, cur ea rejecta homines ad Christiana sacra convolarent.

Quomodo ea propagata?

Per Italiam?

XXXI. Non poterat angustis Alexandria finibus hæc philosophiæ pestis diu contineri, brevi ad finitimos quoque populos, & quidem Antiochiam, quæ Syriæ caput est, transiit: tum totam Italiam pervasit, ubi Plotinus Romæ scholam aperuit. Fuit Plotinus celeberrimus post Herennium Ammonii discipulus, vir acris quidem ingenii, sed ultra modum fanaticus, nactus & ipse discipulos Amelium Tuscum, qui maluit Amerius nuncupari, Paulinum Scythopoliten, Eustochium Alexandrinum, Zethum Arabem, Zothicum, Castricum, Firmum, Marcellum, Orontium, Sabinillum, & Rogatianum Senatores Romanos, Serapionem Alexandrinum, quorum omnium facile princeps exstitit Porphyrius

(Malchus patria lingua dictus) insensissimus hostis Christianorum, qui pestiferam hanc doctrinam per Siciliam, aliasque Romani orbis provincias partim ore, partim scriptis magistri sui a se emendatis, & in sex Æneadas digestis propagavit. Haud diu post Jamblychus Chalcidensis ex Cælesyria, qui una cum Theodoro Asinensi a Porphyrio institutus est, florere cœpit: cum Ægyptiam, & Pythagoram philosophiam magis excoleret, atque factò ex ea, & Platonica delectu Eclecticam majoribus ornamentis, & firmioribus, ut putabat, contra Christianos armis instruere niteretur, eam sibi doctrinæ famam comparavit, ut passim *magnus philosophus, admirandus, divinissimus*, & a Juliano Imperatore *commune orbis emolumentum* compellaretur. Jamblycho successit Ædesius, ex cujus institutione prodierunt Antoninus, eandem subinde doctrinam Alexandria professus, Chrysanthius, Sardonius Priscus, Eusebius Myndius, & Maximus: horum, ac præcipue quidem Maximi perverſis doctrinis, ac eruditis fraudibus effectum est, ut Julianus imperatoriam, qua fulgebat, dignitatem scdissima defectionis labe commacularit. Sed neque Græcia a venenosis hisce erroribus diu immunis fuit; Plutarchus enim Atheniensis Alexandria, ubi Hieroclem, & Olympiodorum audiverat; Theodosii Imp. ætate, sub finem nempe sæculi quarti redux philosophiam hanc male consarcinatam Athenis publice prælegit, sectatoresque habuit, uti doctrinæ fama, ita acerrimo quoque, quo in orthodoxam Religionem ferebantur, odio longe celeberrimos; Syrianum, Proclum, Marinum, Damascium, Simplicium. Ceterum hæc Juniorum Platonico-
rum, Christianisque adversantium secta, uti sub Juliano Apostata, qui ejus assecclas pri-

*Socras.
hiss. eccl.
l. 3. c. 2.*

Per Græciam?

*Æneas
Gazeus
dial. de
immort.
anim.*

mis in republica muniis admovit; nihilque intermisit, quod ad illius incrementum quoquo modo facere posset, summum splendoris apicem attigisse videri poterat; ita hoc e vivis sublato magnis passibus ad interitum properavit, & jam sub finem sæculi quinti omnis fere Alexandrinæ, Atheniensisque scholæ gloria defloruit; sæculo vero insequente ultimam eidem cladem intulit Justinianus Imp., qui Eclecticis hos philosophos, aut solum vertero, aut Christianam amplecti Religionem jussit.

*Quæ in-
ter Ro-
manos
sectæ?*

XXXII. Eclecticam philosophandi rationem Romam a Plotino inductam fuisse diximus, non tamen propterea illud sectarum studium, quod jam ab eo, quo Græcorum sapientia ad Romanos pertigit, tempore sese explicare sensim cœperat, extinctum est. Atque ut ab origine rem breviter persequamur: primum quidem Romani bellis solummodo intenti, ac philosophiæ cultu animos frangi autumantes non magnum litteris honorem habuere; inde nulli fere sub Regibus: pauci admodum sub Consulibus: complures vero Monarchia jam constituta sapientiæ laude inclaruerunt, qui prout diversas probarent opiniones, diversas quoque sectas excoluerunt: nimirum Academicam M. Brutus, M. Terentius Varro, M. Piso, & M. T. Cicero; Pythagoram Ennius, & Nigidius Figulus; Stoicam Scipio Africanus, Mutius Scævola, Cato Uticensis, L. Annæus Seneca Cordubensis Nerois magister, Epictetus Hierapoli in Phrygia natus, cujus omnis philosophiæ summa his continetur, ἀνεχ*, καὶ ἀπεχ*, *substine*, & *abstine*: Peripateticam Tyrannio cum Andronico Rhodio protractis in lucem. Aristotelis, ac Theophrasti libris, Alexander Aprodisiensis, qui in Aristotelem commentatus est, & primus Romæ scholam

Peripateticam a M. Aurelio, & L. Vero Imp. erectam gubernavit, ac denique Boethius scriptis de consolatione philosophiae libris clarissimus: Epicuream Lucretius, latinis eam doctrinam versibus complexus, Plinius Junior, Lucianus, Laertius: Platonica demum dogmata adoptarunt Trasyllus, Alcinous, Taurus Berytiensis, qui Gellium auctorem noctium atticarum: Apulejus, Atticus; Numenius, Maximus Tyrius, qui M. Aurelium Imp. & Plutarchus Cheronensis, qui Trajanum, & Hadrianum Imp. instruit. Sed neque Romanis diu licuit esse philosophis; cum enim barbarorum incursionibus amplissimum eorum collaberetur imperium, respublica quoque litteraria prorsus concidit; Gothi non in homines modo, urbes, ac ædificia, sed in ipsam etiam antiquam litterarum monumenta ultra modum sævientibus.

XXXIII. Exsul interea Romano imperio philosophia apud Arabes, qui sub finem sæculi octavi, & noni principium latissimum subactis quam plurimis in Africa, Hispaniaque provinciis dominatum adepti sunt, asyllum invenit: Almalmonis tum regni gubernacula tenentis cura, ac sollicitudine effectum est, ut litterarum amor in populo ceteroquin inculto aliquantulum effloresceret. Primi ejusdem fructus extiterunt versiones nonnullæ librorum Aristotelicorum e Græco in Arabicum, quæ tamen ob ignorantiam linguæ Græcæ satis infelicitè cesserunt: alii commentationes suas addiderunt, in quibus, cum auctoris mentem sapissime non assequebantur, proprias opiniones substituerunt, atque hac ratione Aristotelis opera egregia corrupta sunt. Commentatorum horum celeberrimi fuerunt, Averroes Cordubensis, Alpharabius, Jacobus Alkindius, & Avicen-

Quomodo Philosophia in Arabia revixit. Salmasius in præfat. ad tabul. Cebet.

L. antiq. Lect. c. 2.

na, qui præcipue iudicio Rhodigini, Aristotelis textum mutilavit, multæque commentitia intulit: alii demum ipsas & versiones Arabicas in latinum non meliori successu transtulerunt, novumque quasi Aristotelicæ philosophiæ corpus, quale nempe ex lacunis istis, ac ineptis versionibus fieri poterat, confecerunt, quod paullo post in Oxoniensem, tum & in Parisiensem, reliquasque Europæ Academias a Carolo M. jam antea fundatas illatum eum dominatum obtinuit ultra 500. annos duraturum, ut vel latum unguem a prætensa hac Aristotelis doctrina recedere religioni duceretur. Ita mutata repente rerum facie Plato ex Christianis scholis abire, locumque Aristoteli cedere est coactus, quem Oxonii Joannes Scotus, Robertus Pulleinus, Simon Dunelmensis, S. Edmundus Episcopus Cantuariensis, Magister Hugo, Joannes Blond ordine prælegerunt. Occupata subinde anno 1453. a Turcis Constantinopoli complures Græci eruditione conspicui in Italiam confugerunt, alatis secum Græcis Aristotelicorum operum exemplaribus, ex quibus novas, multoque accuratiores versiones procuderunt, id quod ad emendandos, qui in prioribus irrepserant, errores non parum contulit. Interpretum horum præ reliquis famam sibi compararunt Theodorus Gaza, Joannes Argyropylus, Byzantinus, qui Græcorum primus Romæ peripateticam publice professus est, & qui huic successit, Georgius Trapezuntinus, ac demum Gennadius acris, Platoniorum insectator; nam & tum nonnulli, ut Platonis philosophia restitueretur, operam dabant, quos interfuerunt Gemistus, Pletho, Bessarion Trapezuntinus, Romana postmodum purpura insignis, Marsilius Ficinus editis latino idiomate Platonis libris celebris; his adna-

Quomodo
in Italia?

merari meretur Joannes Picus Princeps Mirandulæ, & Concordiæ Comes natus anno 1463., qui ob amplam ingenii vim, ac eruditionem sæculi sui *Phœnix* appellatus est.

XXXIV. Hæc porro Aristotelis philosophia tanto studio, ac feryore propugnata, quoniam fere sola in scholis saltem præcipuis dominabatur, scholasticæ cognomentum obtinuit; cumque contentiosa admodum esset, & dialecticas subtilitates ultra modum promoveret, fieri non potuit, ut diu unanimis persisteret, nec in diversas quoque sectas antiquorum exemplo abiret. Arque ab origine quidem in duas discescebantur partes doctores scholastici; Nominales alii, alii Reales dicti, quod illi universales naturas in vocibus solum consistere, logicamque unice circa vocabula versari: hi reapse exstare, atque res ipsas logicæ objectum esse contenderent. Nominalium princeps exstitit Rucelinus Anglus: verum tum quidem brevi extincta postliminio revixit, schola istæ in Guilielmo Occamo Oxoniensi Professore *Doctore invincibili*, quem insecuti sunt Richardus Suisset, Gregorius de Arimino, Gabriel Biel, Petrus de Aliaco Cardinalis Cameracensis, Joannes Gerson Cancellarius Parisiensis, Realium doctrinam jam olim a Boethio traditam sæc. 12mo suscitavit Odo, seu Oudardus Abbas S. Martini Tornaci, postea Episcopus Cameracensis, hunc secutus est Petrus Lombardus Episcopus Parisinus, Magister sententiarum dictus propterea, quod SS. Patrum antiquorum sententias in ordinem redegit, ac exposuit, in cujus opera commentatus est Alexander Halensis *Doctore irrefragabilis* & *Fons vitæ*. Hos exceperunt B. Albertus M. Ratisbonensis Episcopus, & SS. Thomæ Aquinatis & Bonaventuræ præceptor, qui conscriptis quam plurimis libris

Quæ Philosophia scholastica?

Quæ ejus sectæ?

Morhof. Polyhist. t. 2. l. 1. c. 13.

Ab reg. chron. de Phist. Eccl. tom. 1. dour. Slecl.

Parisiis, & Coloniz Agrippinz docuit; D. Thomas Aquinas Doctor Angelicus, a quo schola Thomistica descendit; S. Bonaventura Doctor Seraphicus, postmodum S. R. E. Cardinalibus adnumeratus; Ægidius Romanus *Doctor Fundatissimus*; Joannes Duns Scotus *Magister subtilis*, qui cum vehementer D. Thomæ doctrinam impugnaret, novam scholam, quæ Scotistica appellata est, erexit. Duabus tamen hisce scholis Thomisticæ nimirum, & Scotisticæ, alii paullo post se opposuerunt, qui Neutrales dicti sunt, quod nulli alioquin parti adhærentes Aristoteli solum placita in plurimis saltem, ac præcipuis defendebant. Infelicius longe Aristotelem propugnavit Petrus Pomponatius Italus vir argutus ceteroquin, at impius, aperta enim in opere a se composito atheismi semina sparsit: ex ejus schola prodiit Jul. Cæs. Vannius extremo ob atheismum supplicio Tolosæ affectus. Atque ab his Hobbesius deinceps, ac Spinoza monstruosa illa abominandæ doctrinæ principia desumissee videntur.

Quomo-
do Philo-
sophia
restaura-
ta?

XXXV. Cum ita maximo animorum æstures Aristotelis in scholis agebatur, parum absuit, quin omnis pene philosophia in interitum rueret, relicta solum egregie de rebus abstractissimis disputandi arte, in quam illa denique desiit. Non potuit ea res non justissimam iis, quibus acrior inerat intelligentiæ vis, indignationem movere; quare complures, dispari tamen successu, in diversis Europæ partibus, qua libris editis, qua novis circa res naturales inventis, iisque publicam in lucem datis in id operam contulerunt, ut philosophiæ laboranti succurreretur: qua demum ratione, accedente etiam summorum Principum cura effectum est, ut illa ad eum splendoris gradum, quem hodie feliciter tenet, tardissimis licet passi-

bus, perveniret. Jam igitur Novatorum in philosophia præcipui sunt promendi.

XXXVI: Etsi jam olim Raymundus Lullius ex nobili inter Majoricanos genere anno 1235. progenitus conscribendo primum novam Logicam sub nomine Artis Magnæ, ejusque dein epitomen Artem Parvam, unde Ars Lullistica, a multis probata, a pluribus rejecta ortum traxit: tum etiam Laurentius Vallā in Italia Aristotelem acerrime impugnando primam Novatorum gloriam quæsierunt, eam tamen Morhosius attribuit Bernardino Telesio Consentino ex oppido Calabriae, qui novem libris de rerum natura secundum propria principia anno 1587. compositis prægrandi Peripateticorum turbæ bellum indixit, ac Neapoli Academiam Consentinam auspicatus est. Eodem quoque tempore floruit Petrus Ramus natus anno 1515. Regius Parisiis eloquentiæ, ac mathematicum Professor, acerrimus omnium veterum insectator, ut nec Cicero mordaces illius dentes effugere potuerit: magno strepitu id egit, ut ejecto e scholis Aristoteli sua ipsius philosophia substitueretur, atque hunc in finem conscripsit tres dialecticarum disputationum libros munus novæ logicæ obituros; tum animadversiones adversus Aristotelis organum, ac denique dialecticam magno ab iis studio apprehensam, qui subinde Ramei, vel Ramistæ dici voluerunt. Verum non diu post philosophia hæc publico Francisci I. decreto ex Galliarum regno exulare jussa est. His accenseri possunt Thomas Hobbesius recentiorum temporum Epicurus, & Theophrastus Paracelsus Pater Enthusiastarum a Morhosio dictus; ille Malinesburi in Anglia anno 1588. prognatus præter logicam, quam computationum titulo edidit, conscripsit elementa philosophiæ in tres partes divisa, de

Qui Novatores in philosophia?

Polyhist.
t. 2. l. 1.
c. 15.

corpore, de homine, de cive; his addidit librum Leviathanis nomine insignitum, in quibus doctrina prorsus virulenta, manifesta- que atheismi, ac tyrannidis principia conti- nentur; hic Eremum B. V. in Helvetia an- no 1493. locum natalem habuit, Salisburgi vero, ubi diutius commoratus est, anno 1541. obiit; studio novandi abreptus mixtum quod- dam ex theologia, ac philosophia chaos con- fecit. Qui ex ejus schola prodiverunt, Chy- mici appellati sunt, eorumque gregem duxit Joannes Espagnet Burdegalensis Curia: Præ- ses.

Qui ejus
Instaura-
tores?

XXXVII. Meliori longe successu in repa- randis litteris elaboravit Franciscus Baco de Verulamio Anglus, regnique Cancellarius vulgato circa annum 1620. novo organo ab adhuc notis & fine, & methodo, & inqui- rendi principiis prorsus diverso, quod Peri- pateticorum logicæ, sicut & instaurationem magnam eorum physicæ opposuit: qua re, tum & muneris dignitate, & doctrinæ ingenti- tis fama sæculi sui eruditos excitavit, ut a- dumbratam ab ipso novam philosophandi ra- tionem, & excolerent magis, & deinceps re- querentur. Id quod egregie præstiterunt Bla- sius Paschalis in Gallia, Galilæus, ejusque discipulus Evangelista Torricellius in Italia, Otto Guerickius in Germania, Robertus Boy- leus in Anglia, alique complures, qui omnes in excolenda philosophia, ac præcipue q̃bi- dem physica non sine ingenti fructu desuda- runt. Atque hac demum ratione effectum est, ut Aristotelis auctoritate in scholis sensim decrescente philosophia novam faciem indu- rit: at quod jam olim ejus incrementis plu- rimum obfuit, ne tum quidem satis præcave- ri potuit, sectarum varietatem intelligo, ea enim invalescente contingit, ut philosophi- quam frequentissime, non quod in quaque re

Quæ no-
væ sectæ
exortæ?

verissimum, sed quod magistri sui placitis magis conformatum videtur, adoptent; neque tam veritatis inquirendæ, quam receptæ antea opinionis tuendæ studiosi efficiantur. Has jam sectas, quas comuni nomine Recentiores, sive Neotericas vocant, breviter attingendas esse res ipsa loquitur.

XXXVIII. Familiam in iis ducit Gassendistica a Petro Gassendo Presbytero Ecclesiæ Diniensis in Gallia Præposito, ac Regio in academia Parisina matheseos Professore, nato anno 1592. Epicuri is partes suscepit, ejusque de atomis systema, repudiatis illis, quæ cum Religione male cohærebant, emendatum, physicæ recentiori accommodavit, quo labore multorum tulit approbationem, nec parvus est numerus eorum, qui eam doctrinam sibi sequendam esse putarunt, quos inter eminuerunt Franciscus Bernerius, Neurzus, Gualterus Charleton.

Quæ
Gassendi-
stica, &
quis Gas-
sendus?

XXXIX. Renatus des Cartes (vulgo Cartesius) Hagæ Turonum anno 1596. ex illustri inter Armoricos genere ortus, aliam sub idem fere tempus sectam exorsus est, quæ ab ipso Chartesianæ cognomentum tulit. Postquam amœniores litteras egregie condidicerat, atque philosophiæ etiam curriculum Flexiæ emensus fuerat, complures annos partim militando, partim per Germaniam, Italiamque peregrinando consumsit; tandem in Hollandiam se recipiens, amplissimis muniis, quibus seu in Anglia, seu in Gallia ornari poterat, rejectis, totum sese meditationibus philosophicis, instituendisque experimentis, ac naturæ effectibus ad leges geometricas revocandis in villa Egmondana tradidit; hic assiduo 25. annorum labore novum philosophiæ systema ab aliis, & methodo, & dogmatibus plurimum discrepans confecit, atque in lucem dedit. Dici vix potest, quanta, quam-

Quæ
Cartesia-
na, &
quis Car-
tesius?

que diversa animorum motione illud fuerit exceptum; obstrepentibus enim aliis, & acerrime novam doctrinam impugnantibus; alii, & longe quidem plures ambabus, ut ajunt, ulnis eam amplexi sunt, quo etiam factum est, ut ea brevissimum intra tempus per totum Belgium, Galliam, Angliam, ac plures Germaniæ partes sese diffunderet, nactaque sit sectatores & quam plurimos, & quam clarissimos: eorum ex numero alii Cartesiana dogmata commentationibus suis illustrarunt, ut Joannes Claubergius, Joannes de Ræy, Thomas Cornelius, Christianus Hugenius, Daniel Lipstorpheus, quibus addi debet Cl. Cordemoy: alii ea in compendio exhibuerunt, ut Silvanus Reginus, Franciscus Bayle, Antonius le Grand, Jacobus Rohault: alii denique nonnullis immutatis suas addiderunt opiniones, ut Robertus Boyle, Henricus Mohre Anglus uterque, Molierius, Hartsækerus, Hamelius, Purchotius, Malebranchius; sed horum postremus modum excessit, & in peculiari suo de ideis systemate, quod Chartesii principiis superstruxit, ab enthusiasmo, & fanaticismo prope abest. Huc quoque referri debet Benedictus Spinoza, qui ubi Judaicam superstitionem, quam materno cum lacte combiberat, natus Amstelodami anno 1632., cum Christianis sacris commutasset, omnem tandem in superos pietatem exuens, Atheus evasit, ediditque principia philosophiæ Cartesianæ geometricè demonstrata, tum Ethicam methodo geometrica demonstratam, tractatum theologico-politicum, aliaque nonnulla opuscula, in quibus omnibus male intortis Cartesii principiis ad stabilendum atheismum abusus est; & ut se genuinum Hobbesii discipulum testaretur, virus illud, quod is aliqua tamen ratione occultare studuerat, aperte evomuit.

XL. At vero non longo post tempore potentem nacta est philosophia Cartesiana in Anglia adversarium Isaacum Newtonum anno 1642. in lucem datum, a quo Newtonianorum secta ortum ducit. Oppositam ille prorsus inivit philosophandi rationem; cum enim Cartesius ad naturalium effectuum examen non descendendum esse, nisi cognitis antea causis, putaret; ipse contra ex effectibus causas inquirendas, docuit, id insuper adjiciens: nullam umquam a philosopho causam assignari debere, nisi cujus veritas aut ratione, aut experimentis liquide demonstrati queat; quo principio fabulosæ Cartesii hypotheses penitus evertuntur. Doctrina hæc, novaque philosophandi methodus partim in opere, quod inscripsit Principia Philosophiæ Mathematica, partim in optica proposita ita eruditis omnibus sese probavit, ut hac, qua vivimus ætate, eorum fere nullus sit, qui eandem non profiteatur. Longum foret enumerare eos omnes viros & a scientia experimentalis, & a geometriæ, algebræque sublimioris peritia clarissimos, qui inde jam ab origine hoc systema, & propugnandum, & doctis suis laboribus excolendum sibi sumserunt, quos inter præcipuum sibi locum vindicant S. Gravesandius, Mussenbroeckius, Clarkius, Keilius, Mac-Laurinus, Jurinus, Desagullierius, Krafftus, & celeberrimi in principia philosophiæ mathematica commentatores Le Seur, & Jacquet. His accensendus est sæculi nostri decus Rog. Josephus Boscovich olim in collegio Romano, dehinc in Regia Ticinensi academia mathematicum Professor, qui tum in compluribus opusculis, tum & præcipue quidem in Theoria philosophiæ naturalis primum Viennæ anno 1758. edita, dein Venetiis anno 1763. recusa Newtonianam Theoriam ita vel deduxit, vel emen-

Que
Newtoniana, &
quis
Newtonus!

Quis
Boscovichus?

davit, ut eam sibi gloriam omni jure vindicaret, quæ systematum auctoribus & sectarum principibus debetur. Elaboratum a Boschovichio systema adoptarunt, & eruditæ lucubrationibus illustrarunt Carolus Benvenuti Romæ, Carolus Scherffer, & Paulus Mako Viennæ, Leopoldus Biwald Græci.

Quæ
Leibni-
tiana, &
quis Lei-
bnitius?

XLI. Quo tempore Anglia suo gloriabatur Newtono, Germaniam nostram Gotosfredus Guilielmus Leibnitius, magnum inter eruditos nomen, illustravit Lipsiæ anno 1646. mundo datus. Scolasticorum ille quidem philosophiam non ex integro repudiandam, in multis tamen emendandam esse censuit; eam in rem obscuras confusasque eorum notiones ad claras, & distinctas reduxit; terminos inanes, quibus illorum scripta scatebant, extirpavit; methodum denique mathematicam in auxilium vocavit. Atque hanc suam mentem tum in Theodicæa, tum in Hypothesi physica nova, tum in aliis compluribus opusculis, quæ actis Lipsiensibus eorum temporum inserta sunt, palam fecit. Hoc porro labore, tum iis etiam, quæ in mathesi sublimiore præstitit, excellentis doctrinæ famam sibi comparavit, nactusque est sectatores in Germania præcipue non paucos, ex quibus Leibnitianorum secta hodie in metaphysicis præcipue florens conflata est. Omnium antesignatus est Christianus Volfius magno editorum voluminum numero clarissimus, quibus omnes philosophiæ partes, ac mathesin universam est complexus: hunc ingens turba comitatur eorum, qui logicam, ac metaphysicam ad mentem Leibnitii concinnarunt; sed non attinet eos nominatim recensere, cum in omnium fere manibus versentur, nec nisi Volfiana premant vestigia. Prætereundus tamen non est Joach. Georgius Daries, qui in Elementis Metaphysices Ienæ anno 1753. recensis

Quia
Volfius?

Leibnitium, Volfiumque ita sequitur, ut vere solam ipsorum methodum retinuisse, cetera de suo attulisse videatur. Ad extremum hic loci dissimulandum non est, Leibnitium, uti eruditis suis laboribus ad logicæ præsertim, & metaphysicæ splendorem plurimum contulit, ita abstractis, quibus plus æquo indulsit, ratiociniis, ad opiniones quasdam non parum absurdas delapsus fuisse; id quod in metaphysica solidis rationibus demonstratum ibo.

XLII. Adnectendi hic forent ii, qui ab eo, quo instauratæ sunt litteræ, ad nostra usque tempora eclecticam philosophandi libertatem secuti, seu privato studio, seu conjuncto cum aliis labore vel philosophiam universam; vel quampiam illius partem nominatim excoluerunt; sed infinitus prope horum est numerus, & longior ne sim, prohibet præstituta operi brevitatis. Quare commemorare nolo Peurbachium, Regiomontanum, Copernicum, & Tychonem Brahe utrumque systematis mundani conformatione celebrem, Keplerum, Hevelium, de la Hirium, Cassinium, Hombergium, l'Emerium, Moriotum institutis de motu, plantis, aquis, coloribus &c. tentaminibus, ac Ottonem Guerickeum inventione machinæ pneumaticæ clarum; tum neque Maraldum, Malaperitium, Lewenhockium, Jalabertum, Noleatum, Bernoullium utrumque, Eulerum. Prætereo quoque complures alios illustres viros: Clavius, Scheinerum, qui primus in sole maculas detexit, Guldinum, Kircherum, Schotum ex Germania: Cabeum, Zuchium, Grimaldum, Ricciolum, „ qui in re „ astronomica præ ceteris omnibus laudatus unus bibliothecæ instar esse potest “ ut ait Morhofius, Casatum, Philippum Bonani, Franciscum de Lanis, cujus fontibus (li-

Qui præterea Philosophia celebres?

Polyhist.
phil. t. 2.
l. 4. §. 1.

bro Magisterium naturæ & artis inscripto) plures recentiorum Physicorum suos hortulos irrigarunt, ex Italia: Fourrierum, Claudium Milliet de Chales, Pardies, Daniel, Tournemine, Regnault, Castel ex Gallia oriundos. Prætereo denique quam plurimos alios, quorum doctis laboribus hodierni eruditi plurimum debent, atque huic prolegomeno finem impono, id solum adjungens: tum demum maxima philosophiæ incrementa accessisse, ubi suam in tutelam summi terrarum Principes eandem susceperunt, ejusque commoda qua erectis Academiis, qua constitutis doctissimorum virorum societatibus promoverunt, summo & litteras, & litteratos homines favore prosequentes; qua in re quid olim Carolus M. in Germania, Gallia, & Italia; quid deinceps in Italia, Paulus II. P. M. & Leopoldus Magnus Hetruriæ Dux, in Anglia Carolus II., in Gallia Ludovicus XIII. & XIV., in Germania Leopoldus M. Imp. Rom., in Borussia Fridericus Rex, in Moscovia Petrus Imp. præstiterint, notum est: quanta vero ab Augusta Magnæ Theresiæ Nostræ munificentia in hanc Academiam profluxerint ornamenta, argumentum est non tam exiguo in opere pertractandum, quam grato omnium nostrum animo recolendum.

PROLEGOMENON ⁴⁹

IN

LOGICAM.

§. XLIII.

Mentem, sive animam nostram facultate cognoscendi pollere, nemo est, qui in se non experiatur. Facultas hæc, etsi per sese ad veritatem tendat, frequenter tamen longo ab ea intervallo aberrat: normam igitur sequatur quampiam, necesse est, qua in operationibus suis dirigatur.

XLIV. Quamdiu naturali tantum prudentia regimur, normam hanc distincte non cognoscimus, neque rogari: cur hoc, vel illud ratiocinium vitiosum sit? rationem clare edicere possumus: fieri tamen interea potest, ut quis per longiorem usum, & exercitationem habitum quendam, sive facilitatem obviam in complutibus rebus veritatem detegendi sibi compareret. Habitus hic ipsa est *logica naturalis*.

Quid logica naturalis?

XLV. Quodsi norma hæc distincte evolvetur, legesque, ex quibus coalescit, deducantur, oritur inde *logica artificiosa*, quæ proinde aliud non est; quam scientia, quæ propositis explicate legibus facultatem cognoscitivam in cognoscenda veritate dirigit.

Quid artificiosa?

COROLL. 1. Logica artificiosa a naturali quoad substantiam non differt; eadem enim in utraque leges obtinent.

COROLL. 2. Leges, quas logica artificiosa perspicue proponit, ex ipsa naturali mentis constitutione desumendæ sunt, quas nimirum ipsum rationis lumen, experientiæ, & observationes, ac denique diuturna meditatio suppeditant.

Storchenau Log.

G

Quæ par-
titio to-
tius ope-
ris?

XLVI. Ex data logicæ artificiosæ defio-
tione palam fit, quid in ea pertractare opo-
teat: agendum nempe est primum de facu-
tate cognoscitiva quæ dirigitur; tum de ve-
ritate, quæ cognoscitur; demum de ipsa ve-
ritatis cognitione, quæ expetitur. Atque hæc
est generalis hujus operis partitio.

Quæ uti-
litas lo-
gicæ ar-
tificiosæ?

XLVII. Utilitas logicæ artificiosæ latissi-
me pertinet; absque ea enim non modo nemo
in scientia quacumque profundam, solidam
que eruditionem obtinere; sed neque in dif-
ficilioribus communis vitæ actionibus sat pro-
vidus, cautusque esse potest; cum, qui soli
utitur logica naturali, & minus a frequent
errandi periculo removeatur, & majori com-
missum errorem emendandi difficultate pre-
matur.

COROLL. Logica igitur primo loco ante om-
nia severiora studia condiscenda est, quod
& inde confirmatur: quia, antequam veri-
tates speciales, quæ in aliis disciplinis oc-
currunt, investigentur, natura veritatis
generatim spectatæ perspecta esse debet.
Actum proinde agunt, qui cum Henrico
Vinklero logicam metaphysicæ postponen-
dam esse in ordinata studendi methodo con-
tendunt.

SCHOL. Logicam maximis passim laudibus ef-
ferri audias. Cicero eam vocat „artem
„omnium maximam sine qua nihil recte
„excogitari, nihil acute dici possit, ve-
„ri, ac falsi disceptatricem, & judicem.”
S. Augustinus: „disciplinam disciplinarum
„scientiarum judicem, atque formatricem.”
Et vero non esse majora meritis hæc præ-
conia vel exinde patet, quod ubi primum
logica magis exulta est, omnes illic
scientiæ reliquæ latius efflorescere cœpe-
runt. Instauratæ porro logicæ gloriam pos-
Laurentium Vallam, Rudolphum Agrico-

Qui In-
staurato-
res logi-
cæ?

Iam, Petrum Ramum, & Verulamium jure sibi vindicant Petrus Gassendus, Renatus Cartesius, auctorque artis cogitandi, quem alii Antonium Arnaldum, alii Nicolaum, alii Trognium, vel complures ex portu regio scriptores fuisse affirmant; hi tamen omnes efficere non potuerunt, ut logica eum splendoris gradum attingeret, ad quem ea subinde doctissimis Nicolai Malebranchii, Joannis Lockii; PP. Buffier, Honorati Fabri, Natalis Regnault, Fortunati a Brixia; Christiani Wolfii; Georgii Dariesii, Antonii Gennensis, aliorumque h'c nostra ætate eruditorum elucubrationibus evecta est.

P A R S I.

L O G I C Æ.

DE FACULTATE COGNOSCITIVA MENTIS HUMANÆ.

§. XLVIII.

Triplici modo mens nostra facultatem cognoscendi, quam habet, circa res cogitabiles exercet; vel enim 1.) rem quampiam sibi duntaxat repræsentat, atque in rei sic repræsentatæ contemplatione quodam modo con- quiescit, cumque ea *apprehendere*, vel *perci- pere*; actus vero ipse *simplex rei apprehen- sio, perceptio*; *idea*, vel *notio* dicitur: ut cum apertis oculis solem intueor: vel 2.) rei ita apprehensæ aliquid per affirmationem addit, aut per negationem demit; tum ipsa *judicat*, actus autem *judicium* nuncupatur: ut cum de sole prius simpliciter apprehenso cogito: *est rotundus*; vel *non est quadratus*: vel 3.)

Quæ ope-
rationes
facultatis
cognosci-
tivæ s

ex facto jam rali judicio novum aliud deducit, & tum ipsa *ratiocinatur*, actus vero *ratiocinatio*, sive *ratiocinium* compellatur: ut cum ex præcedenti judicio infero: *ergo sol est corpus sphericum, sive globus*.

Quæ cogitatio-
num signa?

XLIX. Cogitata nostra cum aliis quoque communicare oportet: istud absque signis sensibilibus, quorum vices potissimum vocabula subeunt, fieri non potest. Idea exprimitur per *terminum*; judicium per *enunciationem*, ratiocinatio per *argumentationem*.

Quod argumen-
tum par-
tis pri-
mæ?

SCHOL. Cum hac in parte de facultate cognoscitiva agendum sit (§. 46.), res ipsa postulat, ut harum trium operationum ab ea facultate elicitarum natura, proprietates, legesque, quibus eæ reguntur, dilucide exponantur, ac suis etiam in locis addantur, quæ ad rectum signorum sensibilibus usum pertinent. Id quod jam ordine exsequemur.

C A P U T I.

DE IDEIS, EARUMQUE OBJECTIS.

Quid
idea?

L. *Idea* est simplex rei cujusdam repræsentatio in mente facta; ut cum mihi simpliciter solem repræsenio, & quasi mente intueor, habeo *ideam solis*.

COROLL. Idea existit in mente: est proinde quid spirituale, seu spiritualis quædam mentis affectio.

Quid e-
jus obje-
ctum,

LI. *Objectum* ideæ est res quæcumque per ideam menti repræsentata. Sic ideæ, quæ mihi solem repræsentat, *objectum* est *sol*.

COROLL. I. Omnis res, de qua cogitari potest, potest nobis per aliquam ideam repræsentari, atque adeo objectum nostrarum idearum est omnis res cogitabilis.

COROLL. 2. Res cogitabilis vel actu existit, & quotn-
 ut *hic mundus*; vel non existit quidem, plex?
 attamen potest existere, ut *mundus alter*;
 hinc objectum nostrarum idearum aliud est
possibile, aliud *existens*.

COROLL. 3. Nihilum, seu impossibile non est res
 cogitabilis; igitur per ideam representari
 non potest, hoc est: *Nihili* nulla datur
 idea.

SCHOL. Nimirum illud tantum percipio, quod
 mihi idea representat, & toties aliquid per-
 cipio, quoties habeo aliquam ideam. Jam
 fingamus, ideam quampiam representare
 nihil; igitur ope hujus ideæ percipio ni-
 hil; si vero hoc; tum nihil percipio, hoc
 est nullam habeo ideam; nam *percipere ni-*
hil, & *nihil percipere*, & *nullam habere*
ideam prorsus idem sonant.

Quomodo igitur, inquires, cogito de ni-
 hilo? Quatenus cogitas de privatione, aut
 ablatione cujuspiam rei: Sic mons sine val-
 le est nihilum, neque illius potes habere
 ideam, & quando cogitas: mons sine val-
 le est impossibilis, idem est, ac si cogita-
 res: mons necessario adjunctam habet val-
 lem.

LII. Nota dicitur id, per quod res una Quid ob-
 differt ab alia, estque vel *constans*, quæ num- jectorum
 quam a re abesse potest; vel *mutabilis*, quæ notæ?
 adesse, vel abesse potest. Constantes porro
 dividuntur in *essentiales*, & *attributa*; illæ
 primo concipiuntur: hæ ex illis profluunt,
 Similiter notæ mutabiles duplicis generis sunt;
 aliæ in ipsa re insunt, proptereaue *inter-*
ne, sive *modi* dicuntur: aliæ extrinsecus tan-
 tum rei cum alia comparatæ conveniunt, &
externæ, sive *relationes* nuncupantur. Sic in
 homine nota essentialis est *vis sentiendi*, i-
 tem *vis ratiocinandi*; attributum *capaci-*
tas eruditionis, modus *actualis eruditio*, re-

latio denique *magnitudo* ipsius, vel *nobilitas*.

COROLL. Quælibet res cogitabilis ab omni alia differt: igitur certæ quædam notæ ei conveniunt; cumque omnis res cogitabilis objectum nostrarum idearum esse possit (§. 51. cor. 1.), idem de quovis ideæ objecto sentiendum.

Quæ &
quotuplex
idearum
Differen-
tia?

LIII. Ideæ inter se comparatæ vel quoad modum repræsentationis, vel quoad objectum repræsentatum differunt. Illa *formalis*; hæc *materialis* audit. Utraque attentionem meretur.

C A P U T II.

DE FORMALI IDEARUM DIFFERENTIA.

Quid
idea cla-
ra & ob-
scura?

LIV. Idea *clara* est, quæ objectum ita dilucide repræsentat, ut illius ope id illico, & omni tempore ab omni alio discerni queat: quæ vero id non præstat, *obscura* dicitur. Sic de *sole* omnes habemus ideam claram; at vero obscuram *plantæ alicujus peregrinæ*, cum dubitamus, num eadem sit cum alias visa.

COROLL. Objecta idearum per certas notas discernuntur (§. 52. cor.); igitur necesse est, ut idea clara notas objecti aliquo modo repræsentet.

Quid
confusa
& distin-
cta?

LV. Notæ objectorum repræsentari possunt vel simul omnes, & quasi in confuso; vel seorsum, & distincte: in casu priori idea clara erit *confusa*: in posteriori vero *distincta*. Sic de *coloribus*, & *odoribus* habemus ideas tantum confusas; sed qui in *sole magnitudinem*, *figuram*, *splendorem*, *distanziam*, *motum* discernit, habet solis ideam distinctam.

COROLL. Idea distincta objecti complectitur in se ideas claras notarum objecti, atque ex iisdem quasi conflatur; sic idea solis distincta constat ex ideis clavis magnitudinis, splendoris, figuræ, distantie, motus solis. Contra idea confusa ex obscuris notarum ideis coalescit.

SCHOL. Qui ideam distinctam alicujus objecti habet, scit per accuratam notarum enumerationem illud explicare; secus, qui ideam habet solum confusam: sic nemo verbis alteri exponere potest, quid sit color albus, aut sonus; neque ulla declaratione ingenerari poterit aut cæco coloris albi, aut surdo soni idea. Patet hinc, quæ sollicitudine philosophus ad comparandas sibi distinctas rerum ideas, ubi id fieri potest, emitti debeat, quodque signum sit manifestum, eum id genus ideas consecutum esse.

LVI. Idea distincta dicitur *completa*, si tot duntaxat notas distincte repræsentet, quot sufficiunt ad objectum ab omni alio discernendum: in casu opposito est *incompleta*. Sic idea auri est *completa*, quæ distincte colorem ejus, & gravitatem specificam repræsentat; his enim duabus solum notis jam aurum ab omni alio metallo discernitur.

LVII. Cum notæ objecti seorsum, ac distincte repræsentantur; tum rursus harum notarum notæ ab se invicem discernuntur; vel non: si in quopiam objecto notæ notarum ab se invicem discernantur, idea distincta, quæ ita objectum repræsentat, est *adequata*; si non, *inadequata*. Sic qui in solis magnitudine, figura, splendore, distantia, motu novæ notas discernit, ideam solis habet adequatam.

COROLL. Idea adequata objecti complectitur in se ideas notarum objecti distinctas, ac ex iis quodam modo componitur. Sic idea

adæquata solis constat ex ideis distinctis magnitudinis, splendoris, figuræ, distantie, motus solis. Contra idea inadæquata ex confusis notarum ideis coalescit.

SCHOL. Facile patet, in ideis adæquatis diversos perfectionis gradus dari; possumus enim ulterius progrediendo novas de notis notarum notas investigare, & sic porro: quæ idearum adæquatarum formatio a philosophis *idearum analysis* nuncupatur. Nec minus perspicuum est, scientiarum incrementa ab hac idearum analysi pendere, ut adeo in id præcipue incumbendum videatur, ut ideæ nostræ magis semper, atque magis adæquatæ evadant. At vero non tam primum est illuc pervenire: quare necesse est, ut antea in clavis, distinctisque ideis efformandis egregie exerceamur: eam in rem non inutiliter observabuntur sequentes.

*Leges de confermandis clavis,
& distinctis Ideis.*

1.) Neque plura objecta, neque plures ejusdem objecti notæ simul contemplandæ sunt; est enim secundum verum illud: pluribus intentus minor ad singula sensus.

2.) Objectum, quod contemplationi obijcitur, illico in suas notas resolvatur, atque in earum quavis novæ ulterius notæ investigentur, quæ actio, quamdiu fieri potest, continuari debet.

3.) Attentioni, quæ requirit, ut mens longiore tempore in uno, eodemque objecto contemplando defigatur, quæque vividis juvenum animis adeo difficilis videtur, omnino assuescendum cavendaque opposita eidem præcipitantia, quæ vel ex naturali quadam levitate, vel nimia ingenii fiducia potissimum oritur.

4.) Adjuvetur, si necesse sit, attentio symbolis algebraicis, aut geometricis, brevi in charra adnotatione, aut etiam imaginibus corporeis per phantasiam effictis, quæ tamen in rebus insensibilibus & rarissime, & cautissime adhibendæ sunt.

5.) Objectum expendendum in omnes partes versetur, compareturque cum aliis aliunde notis, ut quid iis commune, quid diversum, quid cuius proprium sit, acutissime pervideatur.

C A P U T III.

DE MATERIALI IDEARUM DIFFERENTIA.

LVIII. *Determinatum* hoc loco dicitur illud, quod, cum pluribus, iisque diversis modis esse possit, nunc hoc potius, quam alio modo est: sic marmor quoddam potest esse vel existens, vel tantum possibile: quadratum, vel rotundum: album, vel rubrum: in hoc, vel illo ædificio: in hoc vel illo ædificii latere; sit ergo existens, quadratum, album, in fronte palatii locatum: en marmor quoad existentiam, figuram, colorem, & locum determinatum.

Quid determinatum?

LIX. Objectum quoad omnem sui partem determinatum *singulare*, vel *individuum*, uti & idea illud repræsentans *singularis* audit. Sic idea *amici* mecum colloquentis *singularis* est.

Quid obiectum, & idea singularis?

SCHOL. Cogitanti perspicuum est, omnimodam alicujus rei determinationem aliud non esse, quam collectionem certarum notarum, quæ ita eidem conveniunt, ut simul sumæ nulli prorsus alteri convenire queant. Notæ hæc pervulgato illo versiculo

continentur: *forma, figura, locus, tempus, stirps, patria, nomen*. Si jam porro attentionem nostram per res omnes existentes ducamus, nullo negotio deprehendemus, similem notarum collectionem cuilibet, quæ demum cumque ea sit, convenire: omnis proinde res existens singularis est, sive aliquod individuum: ut *Cicero, Cæsar, hoc palatium, hæc mensa, hic liber, hic equus, hic canis*. Atque inde patet, quæ via perveniatur ad ideas singulares; sensibus nimirum percipimus ea, quæ existunt, igitur usu sensuum comparantur ideæ singulares.

Quid ob-
jectum,
& idea
universalis?

LX. Objectum non undequaque determinatum, sive *indeterminatum* est illud, in quo omnes determinationes, quæ sunt, aut esse possunt, non percipiuntur; cumque illud semper pluribus conveniat, *universale*, sive *commune*: ac idea id repræsentans *universalis* audit, v. g. objectum *homo* est quidem determinatum quoad notas (*vita, sensus, ratio*), quæ in eodem percipiuntur, non tamen quoad reliquas, ut *forma, ætas, doctrina, dignitas*, quæ per ideam *homo* non exprimuntur; est igitur *homo* objectum indeterminatum, & quia pluribus, nimirum Cæsari, Ciceroni, Cajo, & ceteris hominibus, convenit, universale, ac proinde etiam idea *hominis* est idea universalis.

Quid ab-
stractio?

LXI. *Abstrahere* dicimur, cum mentem nostram a consideratione aliorum objectorum, vel a contemplatione aliarum partium, sive notarum in eodem objecto avocamus, ut eam in unum aliquod objectum, vel in unam ejusdem partem, sive notam attentius defigamus. Est proinde *abstractio* quasi quædam mentis ab aliis avocatio, ut illa attentius meditemur. Sic dum in serie librorum *unum* præ reliquis considero, abstrahæ a *ceteris*,

quos non considero: hominis mecum loquentis solam *eruditionem* admirans, abstraho ab illius *dignitate, pietate, forma, patria.*

COROLL. 1. Per abstractionem ex objecto singulari, sive undequaque determinato efficitur objectum indeterminatum, ac universale. Abstraho v. g. in objecto singulari *Cicero principatum eloquentie, consulatum Romanum, civem Romanum, etatem, qua vixit, ipsam denique existentiam, & acquiro objectum indeterminatum, ac universale homo.*

COROLL. 2. Igitur etiam per abstractionem ab ideis singularibus ascendimus ad universales; est proinde hoc medium, & quidem unicum comparandi nobis ideas universales.

SCHOL. Universalia non existunt extra mentis nostræ conceptum; quidquid epim existit, singulare est; & undequaque determinatum (§. 59. schol.), estque hoc ita evidens, ut omnis in contrarium disputatio inanis sit, ac inutilis: ubi enim quæso, deprehendes talem aliquem, in quo id solum, quod per vocem *homo* exprimimus. (*vita nimirum; sensus, ratio*), insit, prætereaque nihil? Profecto hæ notæ, etsi insint in unoquoque homine, ita tamen cum aliis, quemlibet determinantibus conjunguntur, ut ab iis realiter separari nequeant: patet inde, quid de secta Realium (§. 34.) sentiendum sit. Neque tamen propterea universalia in intellectus nostri figmentis censenda sunt, etsi enim ut ita abstracta non existant, existunt tamen reipsa in individuis ut conjuncta cum aliis notis determinantibus: usus præterea eorum est ingens, utilitas maxima in comparandis quibusvis scientiis, quæ omnes in veritatibus quibusdam universalibus consistunt. Denique & illud hic monuisse juverit: quæ extra men-

tis conceptum, sive nemine cogitante existunt, dicuntur a philosophis *actu*, *actualiter*, *physice*, *realiter*, vel etiam a parte rei existere; quæ vero soli mentis nostræ conceptui existentiam debent, *logice*, *mentaliter*, aut *ratione nostra*, sive *nostro cogitandi modo* secundum eosdem existunt.

Quid
compositio?

LXII. *Compositio* mentis est ea actio, quæ per omnes objecti notas cogitando progredimur, dum tandem per continuam novarum notarum adjectionem ex objecto indeterminato efficiamus objectum undequaque determinatum, sive individuum. Sic ex objecto indeterminato *homo*, quod menti obversatur, per continuam notarum determinantium adjectionem mente factam (v. g. *existentiam*, *ætatem*, qua vixit, *locum*, *jus civitatis Romanæ*, *consulatum Romanum*, *principatum eloquentiæ*), efficio objectum singulare *Cicero*.

COROLL. 1. *Compositio*, cum via contraria, incedat, directe opponitur abstractioni (§. 61.): sicut igitur per abstractionem ab ideis singularibus ascendimus ad universales (§. cit. cor. 2.), ita vicissim per compositionem ab ideis universalibus descendimus, ac veluti regredimur ad ideas singulares. Hinc *compositio* est via altera obtinendi ideas singulares (conf. §. 59. sch. fin.).

COROLL. 2. Si per compositionem objectum ideæ universalis variis modis determinetur, pervenitur successive ad singula individua, quibus illud objectum commune est, quæ propterea *subjecta* vel *inferiora* ideæ universalis, atque in ea *includi* dicuntur. Sic ideæ universalis *homo* *subjecta* sunt *Cæsar*, *Cajus*, *Cicero*, & quævis individua humana; si enim objectum indeterminatum *homo* variis modis, v. g. per certum *statum*,

tempus, patriam, nobilitatem, eruditionem &c. &c. determinem, veniam successive ad *Cesarē, Cajum, Ciceronem*, & reliqua individua humana, quæ in hac idea universalī includuntur.

LXIII. In qualibet idea universalī duo sunt, Quid i-
dearum
compre-
hensio &
extensio? quæ attentionem merentur. *Comprehensio*, quam constituunt notæ omnes collectim sumptæ, quæ per ideam repræsentantur: sic ideæ universalis *homo* comprehensionem absolvunt hæ notæ: *vita, sensus, ratio*, in ea repræsentatæ. *Extensio*, quam efficiunt subjecta ipsius ideæ simul sumpta, id est, omnia illa individua, quibus notæ illæ repræsentatæ conveniunt: sic ad extensionem ideæ *homo* pertinent omnia individua humana, quibus supradictæ notæ conveniunt.

COROLL. Idea igitur universalis ad ea omnia se extendit, quæ in se includit (§. 62. cor. 2.).

SCHOL. Id nimirum obtinet, si idea universalis secundum se accipiatur, sive ut ajunt, secundum totam suam extensionem; contingit autem frequenter, ut eam solam secundum partem aliquam extensionis usurpemus, ad quod indicandum utimur illis particulis *aliquis, quidam, nonnullus*. Atque idea hoc modo accepta *particularis* audit; particulæ vero illæ dicuntur *signa*, sive notæ *particularitatis*: ut cum cogito: *aliquis homo*, ideam habeo particularem.

Quid idea
particu-
laris?

LXIV. *Comprehensio & Extensio* inter se comparatæ ejus sunt naturæ, ut una aucta minuatur altera, & vicissim imminuta una augeatur altera: sic si in idea *animal*, quæ *vitam & sensum* repræsentat, augeatur *comprehensio*; adjiciendo nimirum notam *ratio*, minuitur *extensio*; nam hæ notæ *vita, sensus, ratio*, solis *hominibus*, & non etiam *belluis*, quæ ad extensionem ideæ *animal* spe-

Quæ
compre-
hensio-
nem in-
ter, ac
extensio-
nem pro-
portio?

stabant, conveniunt; item si in idea *homo* minuatur comprehensio, rejiciendo notam *ratio*, augetur extensio; nam *vita*, & *sensus* non solis *hominibus*, sed *belluis* etiam conveniunt: & ab opposito, si in priori restringi debeat extensio ad solos *homines*, augenda erit ejus comprehensio addendo notam *ratio*, & si in posteriori augeatur extensio, ut nempe ad eam non soli *homines*, sed *bruta* quoque pertineant, minuenda erit comprehensio resecando nimirum notam *ratio*.

COROLL. 1. Si igitur comprehensio augeatur, quantum est possibile, minuitur contra extensio, quantum fieri potest: id fit, cum ex idea universalis per compositionem ad singularem descendimus (§. 62. coroll. 1.). Quare idea singularis habet comprehensionem maximam, omnes nimirum notas objectum undequaque determinantes; extensionem vero minimam, aut quasi nullam, ad unicum nimirum objectum, quod est ipsum illud individuum.

COROLL. 2. Quo magis minuitur comprehensio, eo idea, crescente extensione, fit magis universalis, atque adeo idea, quo magis universalis est, eo pauciores in se notas complectitur: jam vero quo pauciores uno, eodemque tempore notas contempler, eo accuratius eas intueri, ac pervidere possum (§. 57. schol. l. 1.). Patet igitur hinc iterum egregius usus, ac utilitas Idearum universalium in procuranda sibi quacumque eruditione. (conf. §. 61. schol.).

Objectum
universale
de quotu-
plex?

LXV. Objectum universale in tres præcipuas classes distribui potest; est enim vel *species*, vel *genus*, vel *differentia*. Atque hinc etiam idea universalis triplex est: *specificæ*, *genericæ*, & *differentialis*.

Quid species,
ejusque
idea?

LXVI. *Species*, est illa nota essentialis, (seu plures per modum unius considerata),

in qua plura individua inter se comparata perpetuo conveniunt, & idea eandem notam repræsentans dicitur *specificæ*: Sic *Cajus*, *Cicero*, *Cæsar*, & reliqua individua humana, si inter se conferantur, perpetuo in eo conveniunt, quod habeant *vitam*, *sensum*, & *rationem*; quæ vocabulo *homo* exprimuntur: igitur *homo* est species. Item individua brutorum perpetuo in eo conveniunt, quod habeant *vitam*, & *sensum* absque *ratione*, quod per vocem *brutum* indicamus: igitur *brutum* est species.

Quid genus ejusque idea?

LXVII. Genus est illa nota essentialis (seu plures per modum unius acceptæ), in qua duæ vel plures species inter se collatæ perpetuo conveniunt, & idea eandem notam repræsentans est *genericæ*. Sic *homo* comparatus cum *bruto* in eo perpetuo convenit, quod habeat *vitam* & *sensum*, quæ per vocem animal denotantur: igitur *animal* est genus.

Quotuplex genus?

LXVIII. Genera ipsa inter se collata rursus in nota quadam essentiali perpetuo convenire possunt, ea nota constituit genus quoddam *altius*, seu *superius*; est igitur genus *altius*, seu *superius* ea nota (vel plures in unam collectæ), in qua duo genera inter se comparata perpetuo conveniunt: idem de idea eandem repræsentante sentiendum. Sic inventum genus *animal*, seu *vivens sensitivum* collatum cum alio genere *vivente non sensitivo* convenit in eo, quod *vivat*, igitur *vivens* est genus altius, quam *animal*.

SCHOL. 1. Cum eodem modo ex genere jam superiore ad aliud rursus, per collationem nempe generum superiores inter se, deveniri queat, diversæ dantur generum classes, quas ita distribuimus, ut id, quo altius nullum est, *supremum*: id, quod nullum genus infra se habet, *infimum*, vel *proximum*: reliqua, quæ his intercipiuntur.

tur, quorumque semper unum altero est superius, generatim *subalterna*, sive *intermedia* compellemus. Sic genus hominis supremum est *ens*, infimum seu proximum *animal*: *subalterna* directe ascendendo: *vivens*, *substantia*, *existens*.

SCHOL. 2. Genera inferiora respectu superiorum, sub quibus continentur, nonnumquam species: respectu vero inferiorum, quæ sub se continent, genera dicuntur; tum vero ad confusionem evitandam ea species, quæ individua solum sub se complectitur, species *infima* audit. Sic *vivens* respectu *substantiæ* est species, & genus respectu *animalis*: *animal* est species respectu *viventis*, & genus respectu *hominis*: *homo* vero est species infima.

SCHOL. 3. Prout diversorum adjunctorum, ac proprietatum ratio habetur, ita quoque diversa rerum genera, ac species statui possunt. Sic attendentes ad brutorum diversitatemprehendimus classem unam aliquam, quam nomine equi; aliam quam nomine canis; aliam, quam leonis, cervi &c. designamus: erunt igitur species, *equus*, *canis*, *cervus*, *leo* &c., quæ inter se collatæ sub genere *bruti* continentur, ac proinde *brutum* erit genus, quod (§. 66.) pro specie assumimus. Item si in ipsis canibus, equis, &c. diversitates varias examinemus, novas *canum*, *equorum* &c. species inveniemus, quarum respectu *canis*, *equus* &c. erit genus. Similiter bruta possunt dividi in *terrestria*, *aërea*, *aquatica*, quæ singula sunt genera sub genere superiore *bruti* contenta, & alia adhuc genera infra se habentia, ut eorum, quæ quatuor pedibus instructa sunt, quæ repunt &c. Patet igitur in statuendis speciebus, ac generibus plurimum ab arbitrio nostro pendere. Id unum tamen hic monitum velim, ut in subordinandis generibus accurata com-

prehensionis ideæ ratio semper habeatur, atque secundum eam ita disponantur genera, ut quo sunt altiora, eo minorem habeant comprehensionem, & majorem extensionem.

LXIX. *Differentia* est illa nota essentialis, Quid, & quod duplex differentia, ejusque idea? per quam individuum ab individuo: species a specie: genus a genere differt. Prima vocatur *individualis*, seu *numerica*; altera *specificæ*; ultima *generica*. Idea eam notam repræsentans pariter *differentialis* audit. Sic differentiam individualement inter *homines*, constituit notæ illo versiculo contentæ (§. 59. schol.); differentia specifica inter *hominem* & *brutum* est *ratio*, & differentia generica inter *animal*, & *plantam* est *sensus*.

SCHOL. Res dicuntur *toto genere* differre, cum sub eodem genere proximo non continentur; sic *homo* toto genere differt a *planta*, quia ille pro genere proximo habet *animal*, hæc vero *vivens*.

LXX. Quatenus nota cum objecto, Quid concretum, & abstractum? cum conjuncta est, ut conjuncta accipitur, eatenus objectum dicitur *concretum*: ut *marmer rotundum*, *homo doctus*; *abstractum* vero, dum nota absque objecto, vel objectum absque nota, quocum realiter conjuncta est, consideratur: ut *rotunditas*, *doctrina*.

LXXI. In concreto quolibet duo attendenda sunt: *subjectum*, & *nota*, seu ut ajunt, Quotuplex concretum? *forma*, quæ cum illo conjungitur. Et quia tribus diversis modis forma cum subjecto conjungi potest, triplex inde oritur concretum. *Metaphysicum*, quando forma a subjecto non reapse, sed nostro solum cogitandi modo distinguitur, & sic per cogitationem separata eidem quasi inhære a nobis concipitur: ejusmodi sunt omnia genera, & species, ut *animal*, *homo*; nam notæ in iis repræsentatæ reipsa inter se non differunt. *Physicum*, cum forma a subjecto, cui inhæret, potest sepa-

rari: ut *homo doctus*, *corpus rotundum*. *Logicum*, si forma subjecto non inhzreat, sed mente duntaxat nostra ad illud referatur: ut *cognitum*, *volitum*, *desideratum*, *visum*, *audium*; cognitio enim, & volitio menti inhzrent quidem, referuntur tamen a nobis ad rem, quæ cognitione, aut volitione attingitur.

Quid
idea con-
creta &
abstracta?

LXXII. Idea, quæ objectum concretum repræsentat, pariter *concreta*; quæ abstractum, *abstracta* dicitur: sic idea *hominis docti* concreta; *doctrinæ* vero abstracta est.

COROLL. 1. Universum illa idea est concreta, quæ conjunctim exhibet ea, quæ reipsa conjuncta sunt; & abstracta, quæ conjuncta separatim repræsentat.

COROLL. 2. Eadem idea potest sub diverso respectu simul concreta, & simul abstracta esse: sic idea referens *marmor rotundum* concreta est, quatenus *rotunditatem* conjunctim cum *marmore* repræsentat; & abstracta, quatenus *marmor rotundum* ab aliis notis reipsa conjunctis v. g. *magnitudine*, *colore* &c. separat.

COROLL. 3. Omnes ideæ universales (§. 60.) abstractæ sunt; in iis enim nota pluribus communis, ut separata ab aliis, quibuscum reapse conjuncta est, repræsentatur.

Quid
idea re-
flexa?

LXXIII. Sicut res extra nos existentes percipimus, ita pariter ea, quæ intra nos, seu in anima nostra insunt, aut fiunt, idearum nostrarum objecta esse possunt: horum objectorum ideæ, cum reflexione supra nosmetipsos facta obtineantur, *reflexæ* dicuntur. Idea proinde *reflexa*, quæ & *sensus intimus*, & *conscientia* frequentius compellatur, ea est, cujus ope existentiam, ideæ, ceterasque mentis nostræ mutationes, seu affectiones percipimus.

SCHOL. In usu idearum, de quibus hoc in-

capite tractatum est; graviores nonnumquam errores subrepunt, quos ut facilius evites, sequentes te docebant.

Leges de usu idearum singularium, abstractarum, & universalium.

1.) Ideis singularibus, quas per compositionem mentis efformamus (§. 62. cor. 1.), non semper respondet objectum reipsa existens; unde ex eo solum, quod rei alicujus ideam claram, ac distinctam concipiam, inferre nequeo, realiter existere; sic concipio montem aureum, quin is propterea uspiam existat.

2.) Idea abstracta ea separat, quæ reapse conjuncta sunt (§. 72. cor. 1.): igitur ejus quoque objectum ita in se constitutum non est, prout repræsentatur: sic non existit rotunditas sine corpore rotundo, numerus sine rebus numeratis, aut motus sine re mota, ac universe nulla forma sine suo subjecto, quæ in re veteres philosophi admodum hallucinati sunt.

3.) Ideæ abstractæ de se mutuo affirmari nequaquam possunt, cum quælibet idea abstracta necessario sit hæc, & non alia idea: sic, licet cum veritate cogitare queam: *hic doctus est pius*, aut *hic homo est doctus*: nequeo tamen affirmare: *hæc doctrina est pietas*, aut *hæc humanitas est doctrina*. Quod si quandoque contrarium videatur contingere, id inde est, quod idea aliqua abstracta pro metaphysice concreta usurpetur; ut cum genus de specie, vel alio genere affirmatur: verb. grat. *homo est animal*, vel *temperantia est virtus*.

4.) Ut rectus nostrarum cogitationum ordo habeatur, a quo omnis in litterarum studio progressus, & doctrinæ soliditas pendet,

ordinentur ideæ universales in mente secundum maiorem earum universalitatem, hoc est, prior semper locus ei tribuatur, quæ maiorem habet extensionem; tum succedat idea minoris extensionis; sic *urvens* ante *animal*, & *hoc* ante *hominem* concipiatur (conf. §. 68. schol. 3. fin.).

C A P U T IV.

DE IDEARUM SIGNIS.

Quid
vocabu-
lum?

LXXIV. *Vocabula* sunt soni articulata voce prolati, quibus ideas mente conceptas significamus.

Quid
terminus?

COROLL. 1. Unaquæque idea, dum in mente existit, individua, seu undequaque determinata est (§. 59. schol.): igitur quodlibet vocabulum ideam quamdam determinatam, seu, ut loquimur, in individuo denotat, ac veluti determinat. Atque inde est, quod vocabula apud philosophos more recepto *termini* audiant.

COROLL. 2. Ideæ res ipsas repræsentant: igitur termini mediantibus ideis res quoque ipsas secundo denotant.

SCHOL. Patet id ex quotidiana sermonis consuetudine; etenim dum sermocinantem audimus, jure quodam exigimus, ut is & rebus ipsis, & suæ menti congruenter loquatur, eumque, qui in priore deficit, ignorantia: cui in posteriore, mendacii reum agimus. Quod vero ad primam vocabulorum originem attinet; uti dubio caret, primos homines ab ipso auctore Deo ea fuisse edoctos, ita pariter perspicuum est, eorum vocabulorum, quæ progressu temporis obtinuerunt, significationem ab arbitraria, ac libera prorsus populorum institutione,

& retentione provenire; Non moror hic *Lucrēt. de nat. rer. l. 1.* insulsam Epicureorum opinionem, cui homines ex tellure progenitos, prorsusque e-lingues primum statuerunt; tum vero sonos, quos aliunde perceperint, fuisse imitatos, tandem in ordinatos prorupisse, eosque commodi, delectationisque causa perpolivisse subinde, ac multiplicasse. Nec minus a vero aberrant ii, qui cum Psammético Ægypti Rege primos homines lingua quadam naturali, ac vocabulis ipsam rerum naturam exprimentibus usos fuisse autumant, quam linguam etiamnum infantes locuturos contendunt, si ab omni ceterorum hominum commercio remoti educarentur. Nam si id ita habeat, cur non una adhuc etiam inter homines lingua toto in orbe obtinet? cur furdi, quorum ceteroquin lingua præpedita non est, loquela destituuntur? quod demum etiam necessariæ vocabula inter, ac rerum naturas connexionis vestigium deprehendere licet? & nonne naturalem plurimarum rerum constitutionem ignoramus, quas tamen certis vocabulis perpetuo designamus?

Herodot. l. 2.

LXXV. Termini pro diversitate idearum, *Quotuplex terminus?* quas denotant, in diversa genera tribuuntur: est nimirum *singularis*: ut *Cicero*, *hic homo*: *universalis*, isque vel *genericus*, ut *animal*, vel *specificus*, ut *homo*, vel *particularis*, ut *aliquis homo*: *concretus*, ut *doctus*: *abstractus*, ut *doctrina*. Addi etiam potest *simplex*, & *complexus*, ille uno vocabulo, ut *homo*: hic pluribus simul sumtis constat: ut *homo doctus*, *marmor rotundum*.

SCHOL. Contingit videlicet frequentius, ut nos deficiat vocabulum ad ideam mente expressam accurate exprimendam aptum, quo in casu aliud insuper, vel etiam plura in consortionem assumere cogimur, ut ea

randem duorum vel plurium vocabulorum conjunctio exsurgat, qua cogitationem nostram ad amissum cum aliis communicemus. Ea res videtur occasione dedisse Lockio, aliisque, ipsas quoque ideas in *simplices*, & *complexas* distribuendi, quarum illa termino simplici, altera termino complexo exprimeretur, tametsi id pro omni absolute casu necesse non sit; nam cum ex mente Lockii illa idea dicatur *simplex*, in qua ne mente quidem plura discernere licet, ut sunt *ideæ, colorum, odorum, sonorum, gaudii, tristitiæ*, verbo omnium *sensationum* nostrarum; *complexæ* vero, in qua contrarium obtinet, ut *idea solis, ædificii, hominis*, fieri utique, & quidem frequentius potest; ut entia idea complexa unico solum vocabulo accurate designetur. Hanc porro idearum divisionem adeo non improbo, ut eam potius retinendam esse censeam; neque enim in re quidpiam novi continet; si quidem idea simplex cum confusa; complexa vero cum distincta, vel adæquata eadem est, ut expendenti (§§. 55. & 57. cum coroll.) patēbit: quare ipsis hisce vocabulis quandoque in sequentibus utar, ut eo facilius aliorum quoque auctorum, ac præcipue Lockii mentem in opere *de intellectu humano* expressam tiro assequatur. Vide Leibnitium.

Nouveaux Essais sur l'entendement. liv. 2. ch. 2.

Quid terminus materialis, & formalis?

LXXVI. Terminus quilibet duas in mente ideas excitat; alteram sui ipsius, quatenus est sonus articulatus: alteram rei, quam significat. Si primo modo spectetur, sumitur *materialiter*, ut cum dico: *Cicero est vox trium syllabarum*; si altero: *formaliter*, ut cum dico: *Cicero est princeps eloquentiæ*.

Quotuplex terminus formalis?

LXXVII. Terminus formaliter acceptus vel denotat aliquam reipsa ideam. & *positivus*, ut *res, homo Cicero*: vel absentiam alicujus

ideæ, & negativus, ut nihil, ignorantia, sterilitas, tenebræ: vel nullam ullo modo ideam, & inanem dicitur, ut circulus quadratus, mons sine valle, atramentum album, ferrum ligneum, & quæcumque sunt impossibilia, cum impossibilis, sive nihili nulla sit idea (§. 51. cor. 3. & schol.).

SCHOL. Dici nequit, terminos negativos ad nullam ideam proprie pertinere, aut nullam prorsus significare, nam si hoc verum foret, nihil absolute significarent; licet igitur positivam ideam non exprimant, referuntur tamen ad ideas positivas, earumque absentiam designant. Contra terminus, quem inanem dicimus, est revera inanis sine mente sonus; illo enim in tantum utuntur qui dum ideam quampiam sibi habere videntur, reapse nullam habent, apparentem tamen eam ideam, quam Wolfius propterea fallacem, sive deceptivam appellat, aliquo vocabulo exprimere nituntur.

LXXVIII. Terminus positivus, qui constanter eandem ideam invariantam denotat, *fixus* compellatur, estque vel proprius, si uni, eidemque rei significandæ semper inseruiat, ut Cicero, Pluto: vel univocus, si pluribus rebus sub eadem significatione tribuatur, ut homo, animal, & omnia vocabula generum, & specierum. Qui vero non constanter eandem ideam, sed modo hanc, modo illam significat: vagus, vel equivocus dicitur: ut mundus, quæ vox jam solum globum terraqueum, jam collectionem omnium corporum mundanorum, jam totam rerum creaturarum universitatem notat.

LXXIX. Terminus æquivocus vel casui, vel consilio originem suam debet. Casu æquivocus est, cum multiplicis significationis ratio præter arbitrium primorum linguæ institutorum dari nulla potest, ut calx, liber.

Quotuplex terminus positivus?

Quotuplex æquivocus?

Consilio æquivocus est, cum res diversæ, quibus idem terminus tribuitur, aliquam inter se convenientiam, similitudinem, sive, ut ajunt, analogiam habent; unde nominatim hic terminus etiam vocatur *analogus*; ut *ardens*, qui de corpore ignito, & homine irato propter similitudinem agitationis dicitur; *sanus*, qui homini, colori vultus, medicinæ, & pulsui arteriæ tribuitur propter aliquam licet diversam ad sanitatem relationem, item *caput*, *pes*.

LXXX. Dici quoque non absque ratione potest, terminum nonnumquam errore fieri æquivocum; cum nempe ad unam quidem rem significandam a pluribus assumitur, reapse tamen diversas in se res denotat, idque ob erroneam de natura rei significandæ opinionem, qua eo vocabulo utentes imbuti sunt; id genus est vox *Deus*, quam idololatraz ex erroneo circa naturam divinam judicio etiam statuis manufactis; impius vero Spinoza toti mundo aspectabili attribuit; item terminus *vera religio*, cum cujuslibet sectæ homines suam religionem veram prædicent, quod tamen de sola Romano-Catholica ex vero dici potest.

Quas
ideæ vo-
cabula si-
gnificant?

LXXXI. Vocabulis ideas mente conceptas significamus (§. 74.): igitur non sunt signa idearum, quæ in audientium animis existunt; sed earum duntaxat, quas loquens in mente habet, quasque per eadem exprimere cupit.

COROLL. 1. Cum pro diversa cognitione diversæ in diversis hominibus de eadem re ideæ sint, necesse est, ut idem vocabulum a diversis pronunciatum diversum etiam sensum contineat: sic infans in metallo, quod audit *aurum* compellari, nihil observat præter *fulgentem quemdam colorem flavum*; alius præterea *gravitatem specificam majorem*, tertius *malleabilitatem*, quartus *du-*
gili.

Alitatem, quintus solubilitatem in aqua regis, & forte plura ejusmodi cognoscit: omnes hi data occasione pronunciant hanc vocem *aurum*; quare evidens est in cujuslibet ore per idem vocabulum aliam ideam multum discrepantem exprimi; hinc videmus ab infantibus quamlibet rem, quæ simili colore imbuta ipsis occurrit, aurum vocitari.

COROLL. 2. Si igitur verum vocabuli significatum determinare velis, ut aliorum sensa assequaris, noli ea interpretari ex propriis ideis, sed ex scribentis, aut loquentis mente; siq; si audis enunciari vocabulum *Deus*, vide, num is, qui eo utitur, Idololatra? an Spinozista? an Christianus sit?

SCHOL. Verum res hæc multis nonnumquam difficultatibus obsepta est, propterea præcipue, quod ideæ nostræ, dum aliorum vel scripta legimus, vel sermones audimus, latenter subrepuunt, efficiuntque, ut aliorum sensa in nostram sententiam iniquissime detorqueamus. Inde certo evenit, ut passim experiamur, multos etiam ex doctioribus in antiquis philosophorum scriptis ea ad præconceptam suam opinionem stabiliendam invenire, de quibus ii ne somniarunt quidem. Exemplo sit Cudworthus, qui, dum seu pro philosophia, ut ait, corpusculari, seu pro natura genitrice acerrime depugnat, eas opiniones apud omnes Græcorum philosophos se deprehendisse sibi videtur, quod tamen quam falsum sit, C. Mosheimius in eruditissimis suis adnotationibus commonstravit. Curandum itaque, ut animo ab omnibus ideis vacuo ad sermones audiendos, aut legendos libros accedamus, neque alias vocabulis ideas substituamus, atque eas, quas auctorem ipsum in mente habuisse expensis omnibus simil-

D

Storchenau Log.

limum vero est. Sed hac de re in ultima parte plura dicemus.

C A P U T V.

DE VOCABULORUM USU, ABUSU, EJUSQUE REMEDIIS.

Quis vocabulo-
rum usus
compara-
te ad nos?

LXXXII. Vocabula sunt signa idearum, quas mente concipimus (§.74.): hæc porro signa vel ad nos tantum, vel ad alios referuntur. Quatenus ad nos: memoriæ inseruiunt; cum enim a pueritia assueverimus suam cuilibet vocabulo ideam affigere, nexus hic ideam inter, ac vocabulum, licet arbitrarius sit, labente tamen tempore ita invalescit, ut in naturalem prope abeat. Hinc fit, ut numquam fere sine vocabulorum usu etiam taciti cogitemus, & frequenter vocabula prius animo occurrant, quam ideæ ipsæ.

SCHOL. In hoc vocabulorum usu non est magnopere laborandum circa eorum delectum neque metuendum, ne iis male utendo in errorem prolabamur; cum enim nobis, non aliis loquamur, omnesque soni æque indifferentes sint, quodlibet vocabulum aptum erit ad ideam, quam cupimus, in memoriam revocandam, si modò id observemus, ut constanter eandem eidem vocabulo subjiciamus.

Compara-
te ad alios?

LXXXIII. Quatenus hæc signa ad alios referuntur, communicationi inserviunt: sermones enim instituendo per vocabula alie cogitationes nostras manifestamus. Est porro

Quotum-
plex sermo?

sermo noster vel *civilis*, quem in usu quotidiano, & ordinario cum hominibus commercio adhibemus, ut negotia nostra petramus, & reliqua vitæ civilis commoda procuremus: vel *philosophicus*, quo in scientiis

utimur, dum vel veritatem ipsis quaerimus, vel inventæ jam alios quoque participes efficere studemus, vel æstheticus, quem amœniores litteræ deprecantur.

SCHOL. Civilis sermo magnam accuratorem haud postulat; facile enim intelligimus alios, & intelligimur, cum de rebus ad communes vitæ usus necessariis agitur. Leges, quibus æstheticus adstringitur, separata ejusdem nominis disciplina subministrat. Restat igitur, ut vitia, quæ in philosophico potissimum sermone cavenda sunt, non nihil expendamus, ac opportuna simul remedia suppeditemus.

1.) Nonnulla ex naturali vocabulorum imperfectione ortum ducunt; ipsa quippe eorum natura efficit, ut plurimorum significatio valde dubia, ac incerta evadat. Et primum quidem, cum vocabulorum numerus relate ad ideas, quas mens humana sibi comparare potest, admodum exiguus sit, necessitate quadam compellimur, ut diversas, ac multum etiam discrepantes inter se ideas una, eademque voce exprimamus. Deinde vero, ut loquentis sermo rite intelligatur, requiritur, ut ideam, quam vox quælibet significat, accuratissime concipiamus, ac mente retineamus: id vero est, cujus exsecutio quandoque difficillima evadit, ac præcipue quidem in tribus casibus. 1.) Quando ideæ per voces significandæ admodum complexæ, & ex quam plurimis partialibus quasi compositæ sunt; inde sæpius contingit, ut vix duo homines eandem prorsus, invariataque de eadem re ideam habeant, etsi eodem utantur vocabulo: tot, tamque diversæ populorum opiniones in rebus quam plurimis, præsertim moralibus, id luculente evincunt, ut cum quaeritur, *quid justum, injustumve sit?* 2.) Quando ideæ partiales, ex quibus una com-

Quæ in
eo vitia,
& quomo-
do vitan-
da?

plexa consurgit, seu quando notæ illæ, quæ distinctam objecti ideam efficiunt, absque naturali inter se connexionē prorsus ex arbitrio, atque sine respectu ad objectum reipsa existens colliguntur, sicque collectæ certo designantur vocabulo; sicut enim hæc idearum colligatio sine certa lege fit, ita pronum est, ut termini eandem denotantis significatio diversa sit in diversis mentibus: ejusmodi sunt termini *honor, gloria, gratitudo*. Atque inde est, quod veterum scripta tantam quandoque obscuritatem præseferant, quam doctorum commentationes adeo non tollunt, ut etiam augeant. 3.) Quando significatio vocis refertur quidem ad objectum reapse in natura existens, cujus tamen interna, ac realis constitutio nos latet; id contingit vocabulis fere omnibus, quibus corpora naturalia exprimimus: sic quis determinet, quam accurate ideam terminus *aurum* designet? an in ea solus color cum soliditate reſuceat? an etiam ductilitas? gravitas? malleabilitas? solubilitas in aqua regis? num aliæ præterea proprietates solis fortasse chemicis notæ?

Huic porro obscuritati ex naturali vocum imperfectione oriundæ ex parte medemur, si vocabula, quibus utimur, accurata definitione declarem, atque hac ratione eorum significatum determinemus; si enim notæ omnes, quas una idea complecti volumus, enumerentur, evanescet difficultas prope omnis, quam nos audiens experitur in eo, ut tot solum ideas partiales, nec plures, nec pauciores, has & non alias in unam complexam componat: sic non est timendum, ne ænuncians vocabula, *gloria, honestas, aurum* non rite intelligar, si enumerando notas omnes quamlibet ideam his terminis subjectam distincte declarem. Quodsi talis notarum enumeratio fieri nequeat, ut contingit in omnibus ideis.

confusis, sive simplicibus, obscuritas tolletur quandoque adhibendo vocabulū synonymum, quod vulgo notius esse solet; semper vero, & certius vel designando aliquod subiectum auditori alioquin non incognitum, in quo obiectum illius ideæ simplicis deprehendatur: vel ponendo etiam ante sensus ipsum illud subiectum, quod sua impressione eam in alterius mente ideam excitet: sic si quis ignoret, quis sit *color caruleus*, iubendus est de die, tempestate admodum serena cælum intueri, vel vero corpus aliquod eo colore imbutum ante ipsius oculos ponendum.

2.) Alii vocabulorum abusus partim ex voluntaria socordia, partim ex neglectu debitæ attentionis, partim aliis etiam ex causis proficiscuntur. Abutimur nimirum vocabulis, cum iis claram, aut distinctam ideam non affigimus, aut, quod deterius est, prorsus nullam, ut termini enunciati sint inanes sine mente soni. Vitium hoc ex eo potissimum oritur, quod a teneris annis voces prius memoriæ imprimamus, quam ideam per eas significatam accurate in mente conformemus; immo per longam ab ipsa pueritia consuetudinem habitum quemdam contrahimus, vocabula quædam ideo solum pronunciandi, quod ad linguam veniant, quin umquam de eorum significatione determinanda solliciti simus, quo fit, ut persæpe non tam hominum, quam psittacorum more loquamur. Sed & pertinacia, qua nonnulli opinioni etiam falsæ adhærent, frequenter ipso causa est, ut ejusmodi vocabula excogitentur, tamquam firma desperatæ causæ propugnacula, intra quæ adversariorum telis sese tutos existimant. Sciant certe terminis inanibus multorum, præsertim veterum philosophorum scripta, qui non alio ex fine conficti videntur, quam ut non intelligantur, litesque, ac disputationes,

in quibus fere solis doctrinæ profunditatem reposuerunt, diutius protrahantur.

Sed promptum est huic vitio remedium: prius ideam in mente concipiamus, tum de signo, quo ea exprimatur, solliciti simus; ab ideis enim vocabula dirigi, ac ordinari debent, non vicissim a vocabulis ideæ, quippe ideas ex verbis, non verba ex ideis discimus. Oportet igitur ideas absque vocabulorum adjumento efformare, ita ut menti nostræ repræsentemus id, quod de qualibet re cognoscimus, quin sonus, compositio, aut vocabulorum suavitas quidpiam immutet, addat, aut minuat ex eo, quod antea nitide, ac distincte concepimus. Id porro eo majori cura præstandum erit, quo idea enuncianda magis fuerit complexa: quam multi quotidie vocem *justitia* usurpant, qui tamen rogati, quam idearum collectionem per eam significant, responsi loco tacere coguntur, quod nempe ideas illas partiales, quæ hanc complexam ingrediuntur, numquam clare conceperunt, neque earundem numerum accurate definiverunt.

3.) Cum in continuo sermonis decursu eandem vocem in diversa significatione adhibemus; quod vitium valde pervulgatum est, ac sæpe quidem ex vocabulorum penuria, frequentius tamen ex incuria quadam, aut etiam malitia proficiscitur. Ejusmodi homines. Lockius, qui toto libro tertio *de intellectu humano* præstantissima de vocabulorum usu præcepta tradidit, unde complura huc transtulimus, cum eo comparat, qui, dum rationes quasdam componit, eodem charactere 8. jam septem, jam novem designaret, prout sibi commodius videretur. Talis profecto aut insanix, aut insignis doli notam effugere haud posset.

Sensus igitur vocabulorum in eodem ser-

monis filo constanter idem retineatur. Quod si necessitas quandoque contrarium exigat, præmoneatur auditor, vel lector, nisi id adjuncta manifeste ostendant, quod tamen facile præsumi non debet, cum auditorum mens sensui primum stabilito intenta sæpius ad eadem non reflectat. Præcipue id de terminis æquivocis intelligendum, quibus, ut optandum foret, prorsus abstinere non licet. Non equidem grande erroris periculum est, cum res diversæ per æquivocum terminum indicatæ nullam inter se relationem aut nexum habent; sic nemo propterea confusas ideas concipiet, quod voce *vertex* jam ad extremitatem capitis humani, jam ad montis, aut arboris summitatem denotandam utar; præterquam enim quod hæc, & similia jam fere in vulgus nota sunt, etiam inter caput humanum, & montis summitatem nullus datur nexus. At ubi res illæ inter se nexu quodam copulantur, vel relationem causæ, & effectus habent, tum omnino obscuritatis, & confusionis periculum ingens est. Notum est inter philosophos, quanta fiducia Malebranchius post Cartesium pronunciaverit; *calorem* in nobis esse, contra Peripateticos, qui eundem in igne latere contendebant; notum est pariter, quanta, quamque diuturna inde lis exarserit; & tamen tota dissidii causa alia non fuit, quam terminus æquivocus *calor* diversis rebus inter se tamen connexis attributus. Si Cartesiani ex una parte declarassent, se per terminum *calor* intelligere sensationem illam, quam admoto nostro corpori igne sentimus; & si Aristotelici ex altera præmonuissent, se per *calorem* denotare illam facultatem, quam ignis habet eam in nobis sensationem causandi, lis tota uno pene momento decisa fuisset; tam parum enim quispiam negasset calorem secundum Cartesianorum mentem in

nobis, ac eundem in sensu Aristotelicorum in igne esse, quam parum aliquis de vulgo ignorat, dolorem in nobis, pungendi vero facultatem in acu admota inesse.

4.) Cum obscuritatem de industria affectamus, captantes inde reconditæ cujusdam, ac sublimioris doctrinæ famam. Fit id potissimum vel adhibendo vocabula barbara, ac peregrina feriendæ imaginationi apta, quod alchemistis perfamiliale est; vel utendo terminis receptis in significatione nova, inusitata, ac ad arbitrium privatum instituta; vel introducendo terminos novos, quin ulla declaratio præmittatur; vel denique usitatos etiam terminos præpostere conjungendo, ut sensus ordinarius confundatur, & quædam quasi ænigmata prodeant. Omnes diversæ antiquorum philosophorum, & hæreticorum sectæ obscuritatis hujus affectatæ exempla prope infinita nobis suppeditant. Sed & nunc quoque ea a nonnullis, ut subtilitas quædam, ac nescio, quæ mentis penetrantis vis adoratur, cum tamen aliud in se non sit, quam docta ignorantia.

Utamur igitur vocabulis usitatis, receptaque eorum significatione; etsi enim hæc quoad originem suam arbitraria sit, non tamen propterea cuivis privato eam jam in usum inductam immutare licet. Quis namque te intelligat, si illam belluam, quam *equum* vulgo vocant, *canis* nomine compelles, & vicissim, licet utrumque vocabulum ex æquo indifferens sit ad hanc, vel illam denotandam? Quæ porro sit usitata vocabulorum significatio, a consuetudine vulgi desumendum non est; is enim potissimum non nisi vagas, ac indeterminatas ideas terminis subjicit, nec in retinendo eorum sensu constans esse solet. Illi multo maxime attendendi sunt, qui studio, & labore perfectiores de rebus ideas si-

bi compararunt, & in quorum scriptis; ac sermonibus accuratior vocabulorum usus communi doctorum suffragio elucet. Eam in rem Log. 2.
871. 20. doctissimus P. Buffier suadet, ut consuetudinem cum iis arctiorem colamus; qui distinctas, ac præcisas rerum ideas, quibus imbuti sunt, clavis, nitidisque verbis exponere satagunt; confusio enim idearum; ut ait, est quædam quasi pestis, quæ tacite ab iis, quibus familiaribus utimur, in nos serpit. Sed quamvis sermonis nitor vocabula longo usu comprobata requirat; id tamen rerum, idearumque novitas non semper admittit; cum enim scientiæ novas perpetuo accessiones obtineant, necesse est, ut multa decursu temporis inveniantur, quæ primis linguarum institutoribus prorsus ignota fuerunt, ad quæ proinde significanda antiquitas nullas nobis voces transmisit. In huiusmodi igitur casibus licebit recentibus, ac minus etiam sonantibus vocabulis uti; quin immo si necessitas ita postulet, de novo quoque confingere, si modo ideam, quam communicatam cupimus, accurate antea determinemus. Veniam hanc facit ipse oratorum princeps Tullius: „ Quibus e. D^e fin.
l. 3. c. 26
„ tiam verba parienda sunt, imponendaque
„ nova novis rebus nomina, quod quidem
„ nemo mediocriter doctus mirabitur, cogi-
„ tans in omni arte, cujus usus vulgaris,
„ communisque non fit, multam novitatem
„ nominum esse, cum constituentur earum
„ rerum vocabula, quæ in quaque arte ver-
„ sentur. ” Atque hinc etiam minus recte agunt ii, qui vocabula *artium*, ea intelligo, quæ in quavis arte, ac disciplina jam civitate donata sunt, universim omnia, quod cum debita sermonis elegantia non cohzreant, expuncta volunt; id genus enim voces eo potissimum fine inventæ sunt, ut magno compendio id convenientissime significant, quod

secus non nisi per multas ambages, longasque periphrases explicari posset. Neque vero ex eo, quod termini hi vulgo, aut artis illius imperitis ignoti sunt, ulla ratione conficitur, sermonem nostrum ex merito obscurum dici posse; cum enim ipsa objecta a talibus ignorentur, quid mirum, si terminos quoque, quibus eruditi eadem exprimunt, non intelligant? nolim tamen, ut quis putet, me eorum hic comprobare morem, qui ejusmodi vocabulis utuntur, quin distinctam eis ideam subjiciant, aut eo solum fine, ut ignorantiam suam tegant.

5.) Cum sermo noster tropis, figurisque oratoriis nimium abundat. Hæc equidem ornamenta cum merito adhibentur, cum placere tantum cupimus; at quando instruendus est auditor, quando veritas communicanda, quando judicium corrigendum, eorum usus tolerari non debet; ornatus nimis imaginationem auditorum ferit, attentionem a rebus ipsis avertit, affectionesque vehementiores in eorum animis concitat; unde consequens est, aut veritas minus clare pervideatur, judiciaque perturbatis animi motibus magis, quam rationi congrua efformentur. Sit ergo stilus philosophi planus, nitidus tamen: absterneatur a tropis, & figuris, ceterisque elegantibus, quæ veritati cognoscendæ plurimum obsunt. Caveatur præterea nimia brevitās, & importuna loquacitas; utraque enim est mater obscuritatis; illa omittit multa, sine quibus auditor mentem nostram assequi non potest: hæc nimia verborum copia animos obruit, ac attentionem distrahit.

6.) Cum vocabula accipimus pro rebus ipsis, aut per eadem reales rerum essentias vere exprimi putamus. Termini abstracti huic perissimum periculo subjiciuntur, neque est

ulla philosophorum antiquiorum secta, quæ vocabula quædam abstracta, sibi quæ perquam familiaria pro rebus ipsis reapse existentibus non vendidisset; sic Aristotelici *formas substantiales*, *animas vegetativas*, *horrorem vacui*; sic Platonici *ideas æternas*, *animam mundi*; sic alii denique *genera & species* res esse realiter existentes sibi persuaserunt. Essentiæ deinde reales rerum quàm frequenter nos latent? Quis pro certa definiat, quæ proprietates requisitæ sint; ut quidem ex vero dicatur *aurum*? An sola *gravitas cum colore*? An etiam *ductilitas*? *malleabilitas*? An omnes simul? An sublata una cesset esse aurum, & qua? Et quoties tamen, dum declarationem cujuspiam vocis audimus, ea internam rei ipsius constitutionem exprimi firmissime putamus? Inde vero duo hæc necessario consequuntur, ut primo auctori, qui eodem, quo nos, vocabulo utitur, nostras ideas affingamus, contra monitum (§. 81. cor. 2.): deinde ut rem eam arcto adeo nexu cum determinato vocabulo colligemus, ut quamprimum aliud licet synonymum enunciarī audimus, perturbemur, aliudque objectum designari arbitremur.

Caveamus proinde, ne umquam vocabula ad res ipsas transferamus, autumantes, omnia, quæ in rebus insunt, per eadem accurate denotari; sed illud alte menti infixum hæreat: tantum per vocabula de rebus ipsis significari, quantum loquens de iis cognoscit.

.. C A P U T VI.

DE DEFINITIONE.

LXXXIV. *Definitio* est oratio, qua ideam distinctam (§. 55.), & completam (§. 56.)

* Quid definitio, & definitum?

termino cuidam respondentem explicamus *definitum*, seu *res definita* est *idea* termino illi subiecta, vel *res ipsa* per eam ideam representata: sic *signum ideæ in mente latens articulata voce prolatum* est definitio; *res definita* est *vocabulum*: item *simplex rei representatio in mente facta* est definitio *ideæ*.

COROLL. 1. In definitione igitur debent distincte enumerari notæ objecti, quas *idea* illa representat, & quidem nec plures, nec pauciores, quam quæ sufficiunt objecto ab omnibus aliis semper discernendo.

COROLL. 2. Cum *idea* distincta eadem sit cum *idea* complexa (§. 75. schol.), in definitione per notarum enumerationem nihil aliud fit, quam ordinata idearum partialium, e quibus *idea* complexa definienda coalescit, evolutio: sic *idea* complexa, quæ termino *logica* exprimitur, constat ideis partialibus, 1. *scientia* 2. *quæ facultatem cognoscitivam dirigit*, 3. *propositis explicate legibus* 4. *in cognoscenda veritate*.

COROLL. 3. Hinc *ideæ* confusæ, seu simplices definiri nullo modo possunt (conf. §. 55. sch. & §. 83. schol. n. 1. fin.). Sic *ideæ luminis, coloris, soni, & omnium sensationum* nostrarum definiri nequeunt.

Quo fundamento definitio dividenda?

LXXXV. Plures *ideæ* partiales in unam complexam, quæ definiri debeat, colligatæ vel inter se pugnant, & una consistere nequeunt, ut *ideæ rotunditatis, & quadraturæ*: quo in casu *idea* complexa deceptrix est, ac re ipsa nulla, & proinde etiam ejus definitio inanis sine mente sonus (§. 51. cor. 3. & §. 77. cum schol.), vel vero eæ inter se non opponuntur, ac simul consistere possunt, atque propterea etiam *res ipsa* per ideam complexam representata est possibilis

(§. 51. cor. 1. & 2.) : ut ideæ figuræ , & ro-
tunditatis ; item ideæ animalis , & rationalis . Hanc porro possibilitatem rei , quæ per
 ideam complexam definiendam repræsentatur ,
 vel manifestat ipsa definitio , vel non .

LXXXVI. Definitio nominalis est , qua In nomi-
 nalem, &
 realem?
 solum spectata nondum constat rem eam esse
 possibilem : ut eclipsis lunæ est *defectio*
luminis lunæ plenæ . Circulus est *spatium*
linea curvâ in se redeunte , & undique aqua-
liter a centro distante clausum . Definitio ,
 quæ simul ostendit rem per ideam comple-
 xam exhibitam esse possibilem , dicitur *rea-*
lis vel *genetica* : id vero obtinetur , si caus-
 sa , & modus , quo res illa origi potest , di-
 stincte exponatur : ut eclipsis lunæ est *defe-*
ctio luminis lunæ plenæ , quæ oritur ex um-
bra telluris solem inter , ac lunam interposi-
tæ . Si linea quædam recta in uno puncto fi-
 xa circumducatur , alterum ejus extremum de-
 scribit circulum .

SCHOL. 1. Definitio nominalis quoque in ge- Quomodo
 nomina-
 lis in ge-
 metricam
 conver-
 tenda?
 neticam transit , sive potius geneticæ æqui-
 paratur , quam primum rei per ideam com-
 plexam repræsentatæ possibilitas certis ar-
 gumentis evincitur ; cum enim omnis idea ,
 quæ objectum vel possibile tantum , vel
 reapse existens repræsentat , vera sit , ac
 realis (§. 51. cor. 2.) , hoc ipso quod con-
 stet rem eam esse possibilem , constat
 quoque ideam definitam non esse deceptri-
 cem (conf. §. 85.) . Sic in exemplo defi-
 nitio nominalis Dei , quod sit *ens necessa-*
rium , vel *infinite perfectum* , evadit gene-
 tica , si solide comprobetur ens , quod ne-
 cessitate absoluta ad existendum , aut infi-
 nitis perfectionibus pollet , in se non repu-
 gnare . Contra ubi rei per ideam defini-
 dam exhibitæ repugnantia demonstratur ,
 notum fit eam ideam fallacem esse , ac de-

ceptricem, adeoque reipsa nullam; proinde etiam definitionem ipsam inanem duntaxat sonorum collectionem, atque adeo sine mora repudiandam. Ita definitionis nominalis, qua impius Spinoza Deum ponit *substantiam cogitantem, individuum, ac infinite extensam*, absurditas patet, cum id genus substantiæ pugnantiā involvere demonstratur. Atque inde manifestum fit primo, definitionem eo usque solum permanere *mere* nominalem, quoad nec possibilitas, nec impossibilitas rei evidenter elucet: deinde quā ratione definitiones nominales probandæ sint; id quod in primis philosopho curæ esse debet; nisi in paralogismos, erroresque quam plurimos delabi velit.

SCHOL. 2. Quod ad definitiones reales attinet; eæ nomenclationem hanc propterea solum sortitæ sunt, quod ideam *realem*, id est, *realiter* in mente existentem exprimunt. Qui earum *realitatem* latius extendit, & cum veteribus existimat, per easdem *realem*, seu physicam rei per ideam repræsentatæ naturam, aut essentiam significari, vehementer fallitur. Physica siquidem rerum essentia non in una, vel altera proprietate, quæ ceterarum fons sit, & origo; sed in reali, ac integra omnium proprietatum collectione consistit; quæ nobis ut plurimum incognita est. Definitiones nimirum nostræ non exprimunt nisi naturas rerum *ideales*, hoc est, prout eas mente concipimus, & quantum de iis in idea nostra repræsentatur. Quodsi natura, vel essentia rei idealis eadem sit cum natura, vel essentia rei physica, & reali, tunc omnino ex vero dici potest per definitionem exprimi *realem* rei naturam; sed istud eo solum casu contingit, cum nobis.

ipsis sine attentione ad rerum existentias ex arbitrio ideâs complexas in abstracto efformamus; tum enim objectum ideæ ejusmodi est in se præcise tale, etsi ut tale non existat. Ita agunt geometræ, cum ideam *circuli*, vel *trianguli*, abstrahendo ab illius reali existentia, concipiunt, ac subinde ex ejusdem natura per definitionem cognita, vel potius arbitrarie statuta, diversas deducunt proprietates. Ita quoque res habet in moralibus, cum quis ideâs quasdam parciales, in unam complebant componit, eique terminum attribuit, v. g. *parricidii*, *homicidii*, *justitiæ*, parum sollicitus, an umquam actus talis exstiterit, aut exstiturus sit: id quod primis legum conditoribus frequentius evenit.

LXXXVII. Res per essentialia & attributa semper: per modos vero, & relationes pro aliquo tantum tempore ab aliis discernitur (§. 52.); cum igitur in definitione notæ, per quas res ab omnibus aliis semper differt, enumerandæ sint (§. 84. cor. 1.); evidens est quamlibet definitionem fieri debere vel per essentialia, vel per attributa. Definitio, in qua notæ rei essentialia enumerantur, dicitur *essentialis*, ut homo est *animal ratione præditum*: triangulum est *spatium tribus lineis clausum*. Definitio, in qua attributa rei recensentur, *accidentalis* audit: ut homo est *animal vera eruditionis capax*; triangulum est *figura, quæ habet tres angulos*. Ea vero definitio, in qua modi, & relationes adducuntur, impropria est, & potius *descriptio* compellari meretur: ut est hominis apud Tullium; *animal providum, sagax, multiplex, acutum, memor, plenum rationis, & consilii*, vel si dicam: Venus est *stella, quæ hodie vespere paullo post occasum solis*.

Quid definitio essentialis, accidentalis, & descriptio?

De leg. l. 1. §. 7.

oritur, videturque ex hac fenestra in lineam rectam cum vertice turris S. Stephani.

SCHOL. 1. Ideas generum & specierum definimus, cum illis essentialia, & attributa facile discernamus; contra vero, cum istud in ideis rerum singularium præstare nequeamus, eas describimus. Sic physici plantas, lapides, aliaque corpora naturalia; historici provincias, urbes, & facta particularia; poetæ hortos, palatia &c. longa singularum partium, proprietatum, & affectionum enumeratione depingunt. Judices quoque in litteris accusatoriis, quibus reum fugitivum persequuntur, ejusmodi descriptiones adhibent, cum externum ejus habitum, magnitudinem, faciei conformationem, ceteraque omnia, per quæ discerni possit, enumerant.

Definitio-
nes nomi-
nales quo
sensu, ar-
bitrariæ?

SCHOL. 2. Cum dicunt definitiones nominales esse arbitrarias, id non ita intelligendum est, quasi cæco arbitrio sine ullis legibus termini significatio determinari, aut ideæ cujuslibet definitio concipi possit; sed arbitrariæ sunt, quia cum eadem res vel per essentialia, vel per attributa, eaque diversa definiri queat, quibus horum quis uti velit, optio datur; ut adeo de eadem re plures diversæque definitiones æque bonæ condi possint. Sic definimus Deum vel per *ens, quod sibi omnia cognoscibilia distinctissime representat*; vel per *ens infinitum*, aut *necessarium*, vel per *ens a se, a quo tota rerum universitas in existendo pendet*. Ex his tamen, & similibus definitionibus ea semper deligenda est, quæ methodo, qua in præsentia res tractatur, commodius inseruit; atque in genere ea definitio ceteris præstantior habetur: quæ clarior, fecundior, atque ad finem propositum accommodatior est. Deinde cum vo-

cabula necessariam cum ideis connexionem non habeant (§. 74. sch. fin.), si solum de eo agitur, ut mens mea aliis patefiat, arbitrium utique mihi erit meam ideam per quodcumque vocabulum exprimere, ac denitionem nominalem quamcumque concedere. At si vulgatus termini significatus attendi debeat, uti debet semper, nisi ratio gravissima obstet (§. 83. schöl. n. 4^a), non utique in meo positum est arbitrio, ut terminum sic potius, quam aliter definiam. Nunc quæ ad bonam definitionem requirantur, videamus.

Leges Legitimæ Definitionis.

1.) *Definitio sit clara, & perspicua*; cum enim ea sit quædam declaratio, si obscura sit, finem suum non obtinebit. Fit porro definitio obscura quinque potissimum de causis: 1. si omnibus vocabulis definitionem ingredientibus eadem confusa idea, quæ ipsi termino definito respondeat; ut si dicas: *logica est scientia, quæ tradit regulas logicas*, vel *idea clara est illa, qua mihi aliquid clare represento*. 2. Si adhibeantur termini per se obscuri, æquivoci, improprii, aut prorsus inanes; ejusmodi sunt complures definitiones Aristotelis, ejusque asseclorum, ut *motus, quod sit actus entis in potentia quatenus in potentia*, vel *luminis, quod sit actus transparentis, quatenus transparentis*, vel *animæ, quod sit primus actus corporis physici potentia vitam habentis*. Sic definitur obscurum per obscurum. 3. Si ipsum definitum in definitionis membris recurrat, ut sunt illæ veterum: *quantitas est accidens, a quo res dicitur quanta*, vel *existentia est id, quo res actu existens redditur*. Sic definitur idem per idem. 4. Si in definitione ponatur terminus,

qui iterum per rem prius definitam definiti debeat, ut adeo definitum antea ingrediat definitionem posterioris, & definitum posterius ponatur in definitione anterioris; ut si dicas: naturale est effectus, qui contigit absque miraculo, & miraculum est effectus non naturalis; vel lex est voluntas superioris obligans inferiores; & superior est, qui habet potestatem ferendi legem. Sic committitur circulus vitiosus, qui non in duabus tantum definitionibus, sed in pluribus etiam sibi succedentibus contingere potest. 5. Si recenseantur notæ auditori incognitæ, ut si geometriæ imperito dicas: hypotenusa est illa trianguli rectanguli linea, cuius quadratum requiritur quadratis cathetorum simul sumtis. Est quidem hæc obscuritas solum relativa, quantum tamen fieri potest, evitanda; loquimur enim, ut intelligamur ab iis, qui nos audiunt: definitione utimur, ut in iis, quibuscum agimus, ideam distinctam, & completam, quam ipsi antea concepimus, excitemus. Peccant proinde, qui non accommodate ad auditorum suorum captum loquuntur, & inaniter sibi ipsis sapientes videntur, quod ab iis, ad quos verba faciunt, non intelligantur (conf. §. 83. schol. n. 4.).

2.) *Definitum & definitio sint salva veritate convertibilia*, hoc est: debent sibi posse mutuo substitui, quin sensus mutetur, aut veritas lædatur; cum enim in definitione evolvantur ideæ partiales, ex quibus idea complexa, quæ definitur, constat (§. 84. cor. 2.); totum vero sit æquale omnibus partibus simul sumtis, necesse est, ut idem prorsus obtineatur sensus, seu ipsa idea complexa, id est, definitum, seu illius ideæ partiales simul omnes, hoc est, definitio ponatur: sic idem est, seu dicam, *logicæ operam do*; seu, *scientiæ*, *quæ facultatem cognoscitivam pro-*

positis explicare legibus in veritate cognoscenda, dirigit, operam do. Contra hanc legem duobus fere modis peccari potest. 1. Si definitio sit latior suo definito; id est, si integra definitio etiam rebus a definito diversis conveniat; qualis foret hæc: vocabula sunt signa idearum, quippe etiam suspiria, gemitus, gesticulationes idearum signa esse queunt. Vel hæc: genus est essentialis plurium similitudo, nam hoc quoque de specie cum veritate affirmatur. 2. Si definitio sit angustior suo definito, id est: si definitio non conveniat omnibus, & singulis, quæ sub definito continentur; ut si dicas: homo est animal rationale, & doctrina præditum, excluduntur enim alii homines non docti. Vel idea est representatio distincta notarum objecti, quod non convenit ideæ confusæ. Utrumque porro hoc vitium facile vitiatur, si, quod alioquin idea completa exigat (§. 56.), tot duntaxat notæ recenseantur, quot præcise requiruntur ad hoc, ut res definita ab omni alia discerni possit; quando enim pauciores sunt notæ allatæ, definitio erit deficiens, latiusque patebit; si plures: ea redundabit, ac justo angustior, saltem potissimum, efficietur. Verbo, ut definitio perfecte sit reciproca suo definito, necesse est, ut sit adæquata, hoc est, ut soli, & omni definito conveniat.

3.) Definitio constet genere proximo, & differentia ultima, ut docet Cicero. De partibus 6. 12. Debet enim primum per definitionem declarari definitum, id quod eo facilius præstat, quod ideæ adhibentur clariores; sunt vero universales, qualis quoque est idea generis, clariores singularibus (§. 64. cor. 2.). Accipitur porro genus proximum, quia altiora genera notas sufficientes non continent, quarum proinde defectu definitio evaderet latior, ut pa-

tet, si dicas: homo est *vivens rationale*, quod omni spiritui competit. Debet deinde per definitionem definitum discerni ab omni alia re; unde necesse est, ut differentia, si-ve eæ notæ adferantur, quæ illud discrimen efficiant: sufficit vero, ut illæ notæ recensentur, per quas definitum differt ab omni alia re sub hoc genere proximo contenta, id quod philosophi per *differentiam ultimam* denotare volunt; sic etsi homo per *rationem* non differat a puro spiritu, quia tamen per eam discernitur ab omni eo, quod sub genere proximo *animal* continetur, bonam condēs definitionem dicendo: homo est *animal ratione præditum*. Talis enim differentia conjuncta cum genere proximo jam plenum efficit rei definitæ ab omnibus aliis discrimen; defectu differentiæ ultimæ vitiosæ sunt hæ definitiones: homo est *animal quoddam*; vocabula sunt *signa idearum*.

4.) *Definitio non sit negativa*: hæc enim ratione non declararetur idea termino respondens, sed indicaretur solum, quæ idea termino illi subjecta non sit; unde palam quidem fieret, quid res definita non sit, non vero, quid sit, quod tamen per definitionem consequi cupimus; ut si dicas: *logica non est scientia, quæ tradit regulas honesti*; *templum non est locus aptus pro convivio*. Lex hæc, licet universe obtineat, in duobus tamen casibus exceptionem patitur. 1. Quando affirmativa definitio in potestate non est, ut cum agitur de rebus per se obscuris, aut supra humanæ mentis caput positæ. 2. Quando duo adsunt contradictoriæ sibi opposita; tum enim altero eorum jam affirmative definito, alterum recte negative definitur; & ratio est: quia satis constar, quid res sit, cum oppositi per definitionem præmissam jam cogniti definitio de eadem negatur; sic ubi

impossibile affirmative definitum fuerit dicendo: *esse id, quod in notis essentialibus contradictionem involuit*, facile patebit, quid sit *possibile* priori oppositum, si de eodem prior definitio negetur, dicendo: *esse id, quod in notis essentialibus non involuit contradictionem*; sic pariter postquam definiti compositum esse id, *quod constat ex partibus reipsa inter se diversis*, definitum simplex esse id, *quod ex ejusmodi partibus non constat*.

LXXXVIII. Per definitionem nominalem terminorum significatio figitur; definitio enim generatim ideam distinctam, & completam termino cuidam respondentem significat (§. 84.). Igitur & definitio; sive ut mere nominalis, sive ut jam reali equipollens (§. 86. schol. 1.) spectetur, præsentem termini significatum ita explicat, ut nullus de eo prudenter dubitandi locus auditoribus, sive lectoribus relinquatur; sed hoc est terminorum significationem figere: ergo patet propositum.

Quis usus definitio-
num?

SCHOL. Atque inde est, cur nonnulli cum veteribus definitionem nominalem eam esse putent, quæ significationem termini explicat. Ceterum quanti momenti sit, fixos, & constantes vocabulorum significatus habere, vel ex iis patet, quæ supra (c. 5.) copiose diximus. Sed & alia quoque est definitionum utilitas in omni omnino disciplina latissime patens. Definitiones imprimis nominales primæ præbent ratiocinandi principia, ut inde deducantur, quæ de rebus cognosci possunt; nam ubi natura idealis per definitionem vocabuli statuta est, variæ inde consecutiones deducuntur, ac veritates deteguntur, quarum omnium collectio perfectam, completamque scientiam una hac definitione, tamquam funda-

mento, ignixam constituit: ut v. gr. est geometria, quæ omnis initium ducit a definitione puncti, & lineæ; unde ea tamen ad sublimissimas veritates, quas evidentissime demonstrat, progreditur: idem quodque magna ex parte in metaphysica obtinet, ubi ea, ut oportet, methodo scientifica pertractatur. Id unum tamen cavendum hac in re, ne veritates, quæ ex sola essentia ideali per definitionem expressa profluunt, ad rerum existentias, realesque earum naturas ante transferantur, quam rei non modo possibilitas, sed ipsa quoque existentia demonstretur. Definitiones deinde reales, cum modum, quo res quælibet oriri possit, causasque distincte explicant (§. 86.), ad id conducunt, ut eorum, quæ rei insunt, aut inesse possunt, rationes inveniantur. At vero licet definitiones in quamvis scientia usum præstent maximum, non ideo tamen nimium accumulari debent, ut est ingens ea in re nonnullorum libido; nam præterquam, quod ideæ simplices alioqui definiri nequeant (§. 84. cor. 3.), multa de se eam præferunt claritatem, quæ definitionis ope magis obscurari, quam illustrari possit: & profecto, si non darentur quædam, quæ amplius definiri nec debeant, nec possint, necesse foret, ut absque ulla verum sensum umquam assequendi spe in infinitum progrediamur.

C A P U T VII.

DE DIVISIONE.

Quid di. LXXXIX. *Divisio* est vel ideæ complexæ in suas partiales. (§. 75. schol.), vel ideæ

universalis in sua subjecta (§. 62. cor. 2.) distributio. Idea, quæ distribuitur, *divisum*: illæ vero, in quas ea fit distributio, *membra dividenda* dicuntur. Sic divido *philosophiam* in *theoreticam*, & *præcticam*: *logicam* in *naturalem*, & *artificiosam*.

XC. Idem divisum sub diverso respectu consideratum varie quandoque distribui potest; id si fiat, habentur *condivisiones*, atque membra *condividenda*: sic idea respectu habito ad modum representandi dividitur in *claram*, & *obscuram*: ip relatione vero ad objectum in *universalem*, & *singularem*; item in *abstractam*, & *concretam*. Quid condivisio?

XCI. Quod si membrum dividens rursus in alia distribuatur: oritur *subdivisio*, quæ quandoque diutius continuari potest: sic idea *clara* rursus dividitur in *distinctam*, & *confusam*; *distincta* porro in *adequatam*, & *inadequatam*: item *universalis* in *genericam*, *specificam*, & *differentialem*. Quid subdivisio?

SCHOL. Utilitas divisionis major est, quam a multis existimetur: numquam enim res ipsa melius pernoscitur, quam si singulæ ejusdem partes successiva meditatione perlustrentur. Profecto inde fit, ut mens nostra clare, ac distincte pervideat id in singulis partibus, quod in objecto integro propter nimiam ejus compositionem obscure solum, aut confuse intueri posset. Quid quod, dum objectum ex omni sui parte contemplandum offertur, via præcludatur vitio, in quod homines quotidie fere rueri videmus, cum id, quod non nisi uni, aut alteri parti convenit, ipsi tot attribuant. Universim denique, ut recte cogitemus, aut loquamur, frequentissima divisione utendum est; sermones enim nostri ut plurimum sunt de objectis admodum complexis, quæ multis ex partibus considerari Quæ utilitas divisionis?

De in-
vent. l. 1.

debent, quodque de illis relate ad unam partem cum veritate affirmatur, frequenter falsum est, relate ad aliam partem. Ut porro hæc nobis commoda adferat divisio, certis ea legibus adstringi debet, quas ipse oratorum Princeps præscribit: has ubi re-
tulerò, ad alteram facultatis cognoscitivæ operationem (§. 48.) exponendam gradum faciam.

Leges Legitimæ Divisionis.

1.) *Divisio habeat brevitatem*, quæ vetat, ne ad partes minimas descendatur; sicut enim maxima, ita minima difficulter comprehendimus, nimiaque partium quam plurimarum enumeratio ita repente obruit mentem, ut claritatis loco, quæ unice per divisionem quaeritur, permagna obscuritas, & confusio oriatur.

2.) *Divisio habeat absolutionem*, enumerando nimirum omnia membra, quæ sub diviso continentur, ita ut ea simul sumta exæquent divisum, atque cum eo reciproca sint; finis enim divisionis, qui in eo consistit, ut ope successivæ partialium idearum contemplationis tota idea complexa melius pervideatur, ommissa una, aut altera parte minime attingeretur: sic male dividis *homines in musicos, & poetas*; dantur enim, qui in neutram classem referri possunt; vel *notas objectorum in essentialia, & attributa*, omittis enim *modos & relationes*.

3.) *Divisio habeat paucitatem*, quæ in eo consistit, ut nullum membrorum otiose, ac superflue adducatur; id vero contingit, quando membra dividenda se invicem complectuntur, ut unum de altero affirmari possit. Necesse est igitur, ut ponantur membra, quorum unum non contineatur in altero, secus

cus enim unum bis, adeoque superflue poneretur, nempe una vice explicite, & altera implicite: sic mala est divisio *entis* in *simplex*, *compositum*, & *cogitans*: *cogitans* enim in *simplici* jam continetur. Item si *globum terrestrem* divides in *Europam*, *Germaniam*, *Asiam*, *Africam*, *Americam*; *Europa* quippe continet *Germaniam*. Vitio porro huic facile medemur per subdivisiones (§. 91.): est scilicet distributio primum facienda in membra maxime generalia; tum vero, cum ad quodvis eorum ventum fuerit, evolvenda erunt ea, quæ in illo includuntur: sic dividatur primum *ens* in *simplex*, & *compositum*; tum *simplex* subdividatur in *cogitans*, & *non cogitans*: aut *globus terrestris* in *Europam*, *Asiam*, *Africam*, *Americam*; *Europa* dein in *Germaniam*, *Galliam*, *Italiam* &c. rursum *Germania* &c. in suas *provincias*.

CAPUT VIII.

DE JUDICIO.

XCII. Quodsi duas ideas menti observantes inter se comparamus, & quamdam inter illas convenientiam, aut repugnantiam detegimus, fit persæpe, ut huic convenientiæ, aut repugnantæ mente annuamus, atque convenientes quidem ideas per affirmationem, quæ in ipso hoc annutu consistit, conjungamus, & repugnantes per negationem separemus. Tum vero *judicare* dicimur. *Judicium* proinde est ille actus, quo mens duas ideas in annu convenientiæ visæ præstito per affirmationem conjungit, vel annu repugnantæ risæ præstito per negationem separat. Sic

Quid iudicium?

judico cogitando, *anima humana est spiritus, vel anima humana non est corpus.*

COROLL. 1. Judicium a simplici repræsentatione, sive idea discernitur; hæc enim nihil affirmat, aut negat (§§. 48. 50.).

COROLL. 2. Judicium non est sola perceptio convenientiæ, aut disconvenientiæ duarum idearum, ut vult Lockius, & ejus compilator Clericus; etenim cum mens judicat, quasi decidit perceptam idearum convenientiam, aut repugnantiam reipsa dari, atque ideo per ipsam hanc decisionem aliquid quodam modo addit huic perceptioni: & nonne frequenter, mente ad alia conversa, judicio absinemus, etsi ea idearum inter se relatio nobis clare reluceat?

COROLL. 3. Quodlibet judicium vel affirmativum, vel negativum est.

SCHOL. Quod in primo, & secundo corollario dictum est, nihil quidem difficultatis patitur, ubi negotium est cum ideis simplicibus; aut non admodum complexis; verum in casu opposito incauti facile in errorem inducuntur. Sciendum igitur: quantumcumque idea sit composita, lateque patens; ut si mihi repræsentem *hominem, qui primum rei domestica angustis pressus animum ad litterarum studia applicat, tum factis insigni in iis progressibus egregie doctrinæ famam; ac splendidum in republica munus consequitur*: non propterea ipsa in judicium degenerat, sed manet, quæ fuerat, idea cum nondum aliquid affirmet, aut neget; sed solummodo objectum pluribus adjunctis vestitum repræsentet. Ipsum alterius hominis judicium, quamdiu duntaxat menti meæ repræsentatur, comparate ad me nihil nisi idea est: audio exempli causa ab aliis dici, *dare impios, qui religionem revelatam extinctam cupiunt*,

quamdiu mihi hoc aliorum judicium solum
repræsentò, quin annuam, vel abnuam, ni-
hil in mea mente, nisi idea existit; at ut
primum cogito: *ita est: sunt impii, qui*
religionem revelatam extinctam cupiunt;
judicium ferro. Animadversio hæc cum in
vita civili, tum in morali magni est mo-
menti, servitque ad excludendas animo
anxietates, quibus ii obnoxii sunt, qui,
dum ejusmodi ideas sibi quandoque nec li-
beras in judiciorum loco habent, de ad-
missa culpa frustra anguntur.

XCIII. In judicio duæ idæ vel per affir-
mationem conjunguntur, vel per negationem
separantur, idque visa earum vel convenien-
tia, vel repugnantia (§. præc.): igitur ut
judicium rite formetur, requiritur, ut præter
duas ideas conjungendas, aut separandas,
quarum illa, de qua aliquid affirmatur, vel
negatur *subjeclum*, altera *prædicatum* audit,
non apparenter tantum, sed reipsa adsit,
mentique reluceat earum inter se vel conve-
nientia, vel repugnantia. Sic ut rite judi-
cem, debeo non tantum ideas *animæ humane*,
& *spiritus*, sed earum quoque convenientiam
menti præsentem habere.

SOHL. Atque hinc fluit lex universim in
ferendis judiciis accuratissime observanda;
ut videlicet numquam judicium formentus,
antequam idearum convenientiam, aut re-
pugnantiam intime pervideamus: quare
elegantè Tullius præcipit: „ne incogni-
ta pro incognitis habeamus hisque te-
„mere assentiamus, quod vitium effuge-
„re qui volet, omnes autem velle de-
„bent, adhibebit ad considerandas res &
„tempus, & diligentiam.” Quoties hoc
monitum negligimus, gravissimo errandi
periculo non absque insignis temeritatis
nota exponimur. Est equidem hoc adeo

Quid idea
subjeclæ
& prædi-
cati?

Quæ fe-
rendi ju-
dicii?

De off.
l. 1.



apertum, ut non facile a quopiam in dubium trahatur; pauci tamen interea sunt, qui illud ipso etiam usu comprobent. Ex una nimirum parte magna ad judicandum aviditate rapimur, cum hæc sit species quædam judiciaræ potestatis, ac jurisdictionis, quam amor proprius quam qui maxime exercere ambit; verum quam potestas hæc est scenica, similisque magistratui comico, qui incognita potissimum caussa pronunciat sententiam? Ex altera vero parte naturalis quidam animi torpor, desidia, ac vanitas laboris impatiens nos avocatur a sedula earum rerum contemplatione, de quibus judicare aggredimur. Quid aliud faciunt ii, a quibus novellas, ut ajunt, accipimus? Nonne judicant de negotiis regnorum, provinciarumque gravissimis? De consiliis in aulis Principum occulte agitatissimis? Quid vero de his satis exploratum habent? Quis est enim infima de plebe homo, qui belli tempore, licet artis bellicæ imperitus, adjunctorum præsentium, machinationumque ab hoste susceptarum ignarus, non tamen ausu prorsus temerario de ignavis belliducis tarditate, aut inconsulta præcipitantia, aliisque sententiam ferat? Judicia, quæ in rebus litterariis fiunt, non magis a temeritate quandoque absunt; judicatur enim frequenter ab illis, qui eam scientiam vix supremis degustarunt labiis. Quid jam de illis cogitandum, qui de ipsa religione, de cultu Dei externo, aliisque rebus sacris temeraria, & absurda in vulgus judicia spargunt? Noverit igitur philosophus naturalem hanc ad judicandum propensionem sibi omni vi esse coercendam, si solidum in litteris progressum facere, plurimaque incommoda in civili, ac morali vita a se avertere velit: numquam judicet, nisi con-



venientia, aut repugnantia idearum clare;
ac distincte cognita.

CAPUT IX.

DE ENUNCIATIONE ET EJUSDEM
VARIIS SPECIEBUS.

XCIV. *Enunciatio*, vel *propositio* est oratio, qua judicium mente conceptum aliis significamus; ut si dico: *anima humana est spiritus*. Quid enunciatio?

COROLL. 1. Quælibet enunciatio duos requirit terminos, quorum unus ideam *subjecti*, alter *predicati* exprimit, quique propterea eadem sortiuntur nomina: accedit *copula*, quæ annuntium convenientiæ visæ præstitum denotat. Quid ejus partes?

COROLL. 2. Enunciatio omnis quatenus ad logicam pertinet, tribus solum partibus absolvitur; nimirum *subjecto*, *predicato*, & *copula*; quidquid præterea in eadem occurrit, vel ad *subjectum*, vel ad *predicatum*, ut ejusdem *affectio* refertur, & non nisi ideam eam complexam esse ostendit (§. 75. & schol.): ut si dicas: *mens humana natura sua immortalis est appetens bonorum æternorum, quæ sola ejus desiderium satiare possunt*, in hoc exemplo *mens* est *subjectum*: *humana natura sua immortalis* est *affectio subjecti*, *appetens* vero est ejus *predicatum*, cujus affectionem consistunt omnia ea, quæ sequuntur.

CHOI. Copulam solum verbum substantivum, & quidem in præsentî tantum tempore agere potest; debet enim ea assensum, quem actu mens convenientiæ duarum idearum nunc sibi præsentî præstat, indicare, unde hæc propositio: *hoc marmor fuit ro-*

rotundum, hunc sensum facit, *hoc mar-
mor est illud, quod fuit rotundum*, in
qua verbum *est* copulam agit, *illud præ-
dicatum, quod fuit rotundum*, affectionem
prædicati. Necesse tamen non est, ut co-
pula semper explicite ponatur, sed quan-
doque omissa subintelligitur, quandoque in
apposito verbo adjectivo latet; ut si di-
cam: *mens cogitat*, resolvi debet, *mens
est cogitans*. Idem quoque de subjecto,
& prædicato notandum venit, ut cum di-
co: *cogito*, id est: *ego sum cogitans*.
Nunc diversas propositionum species exa-
minabimus.

Quid e-
nunciatio
simplex,
& compo-
sita?

XCV. *Propositio simplex* est, quæ unicum
subjectum, & prædicatum habet; ut *anima
humana est substantia spiritualis*. *Composita*
vero quæ aut plura subjecta, aut plura præ-
dicata continet; ut *anima humana est spiri-
tualis & immortalis*.

Quid
pura, &
mortalis?

XCVI. *Propositio simplex* vel enunciat si-
mul modum, quo prædicatum conveniat, aut
repugnat subjecto, vel non; in primo casu
modalis; in altero *pura* audit.

SCHOL. Modi, quibus prædicatum subjecti
convenire, aut non convenire possunt, sunt
hi quatuor: *necesse, contingens, possibile,
impossibile*. Erunt igitur propositiones mo-
dales hæ, aut similes: *circulus necessarii
est rotundus: mundus contingenter existit:
possibile est, ut alter mundus existat: im-
possibile est, ut circulus sit quadratus*.
Puræ vero propositiones erunt, *circulus est
rotundus: mundus existit &c.*

Quota-
plex e-
nunciatio
composi-
ta?

XCVII. *Propositio composita*, quatenus
ad usum nostrum pertinet, est quadruplex,
videlicet *conditionalis, causalis, copulativa,
disjunctiva*.

Quid
conditio-
nalis?

XCVIII. *Conditionalis*, vel etiam *hypo-
thetica* propositio ea dicitur, quæ prædicatum

de subjecto sub quadam conditione per particulam *si* expressa affirmat, vel negat; ut cum dico: *si Cajus in litteras sedulo incubuerit, eruditus evadet*; vel *si anima humana est ens simplex, ea est incorruptibilis*.

COROLL. 1. In conditionali propositione duæ sunt partes per particulam *si* conjunctæ, quarum prima *conditio*, vel *hypothesis*, vel *antecedens*; altera *conditionatum*, vel *consequens* appellatur. Quæ ejus partes?

COROLL. 2. Ipsa conditio continet in se rationem, cur in conditionato prædicatum subjecto conveniat, vel repugnet; sic, cur *incorruptibilitas* animæ humanæ competat, ratio est, quia ea est *ens simplex*.

SCHOL. Propositio simplex, quatenus spectatur, ut opposita conditionali, id est, quatenus absolute, & nulla adjecta conditione aliquid affirmat, vel negat, dicitur *absoluta*, sive *categorica*, qualis foret hæc: *anima humana est incorruptibilis*. Igitur eadem propositio simplex sub alio respectu *absoluta*, sub alio *pura* esse potest (conf. §. 96.)

XCIX. *Causalis* propositio ea est, in qua ratio, cur prædicatum subjecto conveniat, vel repugnet, effertur per particulam causalem, quia: ut *anima humana est incorruptibilis, quia non constat ex distinctis partibus*; *Cajus est eruditus, quia egregiam operam litteris impendit*. Quid causalis?

C. *Copulativa*, vel *conjuncta* est propositio; in qua plura subjecta, vel prædicata per particulas copulantes, &, atque, nec, neque conjunguntur; ut: *intellectus, & voluntas sunt attributa animæ humanæ*; vel, *nec intellectus, nec voluntas est attributum animæ belluinæ*. Quid copulativa?

CI. *Disjunctiva* denique, aut *disjuncta* illa dicitur propositio, in qua per particulas Quid disjunctiva?

disjunctivas, *vel, aut, sive*, plura subjecta, aut prædicata colligantur; ut *notæ objectorum vel sunt constantes vel mutabiles, anima humana vel est substantia spiritualis, vel materialis.*

Quid
disjunctio
completa?

SCHOL. Disjunctio est completa, cum omnia membra dividenda enumerantur, ita ut præter allata aliud non sit possibile; ut *anima vel perit cum corpore, vel post mortem corporis est superstes.* In casu opposito est incompleta; ut illa Ciceronis: *vel animus perit cum corpore, vel post mortem corporis est beatus*; potest namque etiam perpetuo infelix esse.

C A P U T X.

DE DIVERSIS ENUNCIATIONUM PROPRIETATIBUS.

Quid e-
nuncia-
tionis
qualitas?

CII. Proprietates enunciationum hic examinandæ sunt *qualitas, quantitas, & oppositio*, de quibus ordine agemus. *Qualitas* propositionis est ejusdem affirmatio, vel negatio; est autem omnis propositio, uti judicium (§. 92. cor. 3.), vel affirmativa, vel negativa, prout videlicet ea judicium affirmans, vel negans significat; ut *anima est spiritus, anima non est corpus.*

Quid e-
nunciatio
negativa?

CIII. In judicio negativo affirmatur repugnantia inter prædicatum & subjectum, sive, quod idem est, negatur convenientia inter prædicatum, & subjectum, ut ex natura judicii (§. 92.) patet: cum igitur copula denotet assensum convenientiæ præstitum (§. 94. cor. 1. & schol.), non potest assensus repugnantiae idearum præstitus aliter indicari, nisi negando copulam: hoc est, ad hoc ut propositio judicium negativum exprimat,

seu sit ipsa revera negativa, requiritur, ut particula negans, vel aperte, vel implicite referatur ad copulam; ut *anima non est corpus: nullus homo est sine defectu*.

COROLL. Propositio igitur, in qua particula Quid infinita? negans non ad copulam, sed vel ad prædicatum; vel ad subjectum pertinet, in negativis haberi non debet; sed speciem habens negativæ reipsa affirmativa est, & a philosophis dici solet *infinita*. Ut si dicam: *judicium potest esse non negativum*; item *homo est non bellua*, vel *non bellua homo*; faciunt enim hunc sensum, *homo est aliquid aliud, quam bellua; aliquid, quod non est bellua, est homo*.

CIV. In omni propositione affirmativa prædicatum non secundum totam suam extensionem, sed solum secundum aliquam ejus partem accipitur; adeoque in omni propositione affirmativa prædicatum denotat ideam particularem (§. 63. schol.). Et ratio est, quia ad hoc ut affirmatio sit vera, non requiritur, ut omnia, & singula, quæ ad extensionem prædicati pertinent, convenient subjecto; sed sufficit omnino, si aliqua sub extensione prædicati contenta connectantur cum subjecto; sic si dicam: *anima humana est spiritus*; vel *temperantia est virtus*, sensus est: *animam esse aliquem spiritum; temperantiam esse aliquam virtutem*. Quantum in enunciatione affirmativa prædicatum?

CV. Contra vero in omni propositione negativa prædicatum sumitur secundum totam suam extensionem; quam habet, ac proinde ideam universalem denotat (§. 63. coroll.). Nam ad hoc, ut prædicatum cum veritate negetur de subjecto, necesse est, ut nullus prorsus inter utrumque nexus sit: id vero tantum contingit, quando nihil eorum, quæ sub extensione prædicati continentur, subjecto convenit; sic cum dico; *otium non*. Quantum in negativa?

est virtus, sensus est, otium esse, nihil eorum, quæ sub prædicato virtus continentur, adeoque nec esse pietatem, neque fortitudinem, neque temperantiam, neque ullam aliam virtutem.

Quæ
lex de
quantita-
te prædi-
cati?

COROLL. Quantitas, igitur, cujuslibet prædicati a qualitate propositionis pender, hancque sine exceptione legem sequitur: *in omni affirmatione prædicatum particulariter; in omni negatione universaliter accipitur.*

Quid e-
nuncia-
tionis
quantitas?

CVI. *Quantitas* propositionis est ejusdem extensio, pendetque constanter ab extensione subjecti. Cum itaque hæc vel *universalis*, vel *particularis*, vel *singularis* esse possit (§§. 75. 63. cor. schol. 64. cor. 1.), omnis quoque propositio ratione suæ quantitatis in hanc triplicem classem distribuitur. *Universalis* ea est, in qua subjectum, quod de se ideam universalem denotat, secundum totam suam extensionem sumitur, ita ut prædicatum singulis individuis sub illo subjecto contentis, etiam seorsum acceptis, conveniat: id quod denotant particule, *omnis, nullus, nemo* subjecto præfixæ, quæ propterea *notæ universalitatis* audiunt; ut *omnis virtus est appetenda, vel nullum vitium est honestum.*

Et quo-
tuplex?

SCHOL. 1. Ejusmodi propositiones dicuntur *complete universales*, ut distinguantur ab iis, in quibus prædicatum non singulis individuis, sed tantum singulis speciebus sub subjecto contentis convenit, quæque propterea *incomplete universales* sunt; ut si dicas: *omne animal fuit in arca Noe; vel omnia munia ab infimo ad summum in re publica a Cajo administrata sunt;*

SCHOL. 2. Sed est & alia propositionum universalitas, nimirum *moralis*, sive *in sensu accommodato*, quando enuncians propositionem ceteroquin vere universalem non ita stricte

intelligi vulr, ut prædicatum singulis prorsus individuis subjecti attribuat, quin unum, vel alterum inde excipi possit, & harum respectu superiores (§. 106.) dici possunt *metaphysice* universales, cum earum universalitas secundum omnem rigorem metaphysicum accipiat. Sic, cum dicimus: *omnes homines sua solum commoda querunt*, non volumus significare nullum prorsus hominum ab hoc vitio immunem esse, sed tantum de plurimis id cum veritate dici posse. Utimur similibus propositionibus per frequenter in vulgari cum hominibus consuetudine, & mos jam ita obtinuit, ut fere, quod plurimis convenit, universim omnibus tribuamus; nemo tamen est, qui propterea mentem nostram minus assequatur, si modo, quid usui tribuendum sit, non ignoret. Quin propositiones ejusmodi sæpius in libris historicis, aut etiam dogmaticis occurrunt: unde necesse est, ut vel ex adjunctis, vel ex collatione aliorum locorum, vel denique adhibitis aliis adjumentis suo loco suppeditandis determinetur, utrum auctoris propositio, quæ universaliter enunciat, *metaphysice*, an *moraliter* accipienda sit.

CVII. *Particularis* propositio ea est, in qua subjectum, quod de se ideam universalem exprimit, secundum partem tantum suæ extensionis sumitur, ita ut prædicatum non omnibus, sed aliquibus solum individuis seorsum acceptis conveniat: id quod denotant particulae adjectæ; *aliquis*, *quidam*, *nonnulli*; quæ ea de causa notæ particularitatis appellantur, ut *quidam homines sunt eruditi*; vel *quidam philosophi doctrina sua ad stabiliendos errores abutuntur*.

CVIII. In propositione particulari vel illa individua subjecti, quibus prædicatum con-

Quid particularis?

Quid particularis determinat?

minata,
& inde-
termina-
ta?

venire asseritur, in se jam determinata sunt; vel non, sed aliqua tantum ex omnibus possibilibus disjunctive accepta intelligi debent. In priori casu propositio est *determinata*, si-
ve ut ajunt, *supponit determinate*; ut est hæc: *aliqui philosophi negant immortalita-
tem anime humane*; aliquis huic edificio *ignoem supposuit*. In posteriori vero est pro-
positio *indeterminata*, seu *vaga*, vel *supponit indeterminate*. Ut aliquis *calamus requiritur ad scribendum*; aliqua *navis est necessaria ad navigandum*.

Quod
ejus indi-
cium?

SCHOL. Quotiescumque prædicatum *actionem*, aut *passionem* quampiam denotat, propositio est determinata; cum enim actio & passio proficisci nequeat, nisi a re actu existente; omnis autem res existens singularis sit, ac individua (§. 59. schol.), necesse est, ut objectum illud, de quo propositio enunciat, in se certum sit, ac omnimode determinatum. Quod si vero prædicatum *necessitatem* aliquam, *exigentiam*, *debitum*, aut *cupiditatem* exprimât, non requiritur, ut objectum illud sit existens, ac in se jam determinatum, sed unum aliquod vage, ac indeterminate sum-
tum ex omnibus omnino possibilibus duntaxat denotabitur, ut patet ex exemplis supra allatis. Id insuper advertendum, aliud esse: objectum *in se* non esse determinatum, & aliud objectum *quoad nos* non esse determinatum; hoc enim posterius toties contingit, quoties nos illud objectum defectu notitiæ determinare, seu potius designare nequimus; sic etsi in se jam determinatus sit ille, qui ædificio ignem supposuit, fieri tamen potest, ut mihi nondum constet, atque adeo ut a me nondum designari queat, non tamen propterea propositio illa erit minus determinata.

CIX. Singularis propositio ea est, quæ in subjecti loco habet terminum singularem (§. 75.) ut *Plato fuit discipulus Socratis*; vel *hoc ædificium est secundum omnes architectonicæ leges extructum*. Quid enunciatio singularis?

SCHOL. Dantur quædam propositiones, quæ speciem quampiam universalium præ se ferunt, reipsa tamen in singularibus habendæ sunt. Nimirum vocula *omnis* vel sumitur *distributive*, si nempe omnia singularem accipienda esse denoret, tumque est nota universalitatis (§. 106.): vel vero *collective*, ut totam omnium summam, si ve collectionem per modum unius individui accipi debere significet: tum vero ea efficit propositionem singularem, ut cum dico: *omnes partes totum efficiunt*; vel *omnes litteræ faciunt alphabetum*; *omnes Apostoli sunt duodecim*: in his vox *omnis* tantum adhibetur ad hoc, ut intelligatur, totam partium, litterarum, & Apostolorum collectionem simul esse accipiendam, ut illis prædicatum cum veritate attribui possit.

CX. Notæ illæ, *omnis*, *nullus*, &c. *aliquis* &c. hic definiunt propositionis quantitatem (§§. 106. 107. 109.); unde propositio, cujus subjecto harum notarum aliqua præfixa est, dicitur *definita*; ut *omnis virtus est appetenda*, *aliquis homo est eruditus*. Cujus vero subjectum tali nota affectum non est, *indefinita* audit; ut *virtus est appetenda*, *homines sunt eruditi*. Quid definita, & indefinita?

SCHOL. Reducuntur hæc tamen ad definitas, & quidem ad universales, si prædicatum sit nota constans (§. 52.) subjecti; ejusmodi enim nota singulis individuis sub subjecto contentis convenit. Ita hæc *virtus est appetenda*, æquiparatur universali: *omnis virtus est appetenda*. Ad particulares vero referuntur, si prædicatum sit nota muta- Quæ lex de dijudicanda quantitate indefinita?

bilis subjecti; nota enim mutabilis numquam in singulis individuis deprehenditur; sic hæc: *homines sunt eruditi*, æquiparatur particulari: *aliqui homines sunt eruditi*.

Quid &
quotuplex
oppositio?

CXI. *Oppositio* propositionum est pugna, sive diversitas duarum propositionum, quarum idem est subjectum, & prædicatum, inter se comparatarum quoad quantitatem, vel qualitatem, vel utramque simul; hinc tres oriuntur oppositionis species.

Quid enun-
ciatio-
nes subal-
ternæ?

CXII. Propositiones, quarum sola quantitas diversa est, dicuntur *subalternæ*, & in specie earum universales *subalternans*; particularis vero *subalternata* audit; ut: *omnis definitio constat genere, & differentia*: *quedam definitio constat genere, & differentia*; vel *nullum vitium est honestum*: *aliquod vitium non est honestum*.

Quid
contra-
riæ, &
subcon-
trariæ?

CXIII. Propositiones, quarum sola qualitas diversa est, sunt vel ambæ universales, & *contrariæ*; ut: *omne vitium est fugiendum*, *nullum vitium est fugiendum*: vel ambæ particulares, & *subcontrariæ* appellantur; ut: *aliquod vitium est fugiendum*, *aliquod vitium non est fugiendum*.

Quid
contradi-
ctoriæ?

CXIV. Propositiones denique, quarum & quantitas, & qualitas diversa est, *contradictoriæ* nuncupantur; ut: *nullum vitium est honestum*; *aliquod vitium est honestum*; vel *omnis virtus est appetenda*, *aliqua virtus non est appetenda*.

Quid
contradi-
ctoriæ?

COROLL. I. Cum id, quod universaliter de quodam subjecto affirmatur, vel negatur, affirmetur hoc ipso, vel negetur de quovis individuo in extensione subjecti contento, ut ex natura propositionis universalis patet (§. 106.); sequitur, per duas propositiones contradictorias idem simul affirmari, & negari, & quidem ita, ut si utraque vera foret, idem simul esset, & non esset. Hinc

contradictio dicitur esse simultanea affirmatio, & negatio ejusdem de eodem sub eodem respectu.

COROLL. 2. Duæ propositiones singulares qualitate pugnantes affirmant idem simul esse, & non esse; igitur merito ad contradictorias referuntur; ut *Cicero est princeps eloquentiæ Romanæ*, *Cicero non est princeps eloquentiæ Romanæ*.

C A P U T XI.

DE ENUNCIATIONIBUS IN METHODO SCIENTIFICA USITATIS.

CXV. *Propositio*, quæ duntaxat nexum subjectum inter, ac prædicatum indicat; *theoretica*: ut *anima humana est immortalis*. Quæ vero aliquid posse, vel debere fieri affirmat, aut postulat: *præctica* cognominatur; ut, *ad beatam immortalitatem consequendam opus est magno virtutum apparatu*. Utraque vel ita per se, & intellectis solum terminis manifesta est, ut nulla prorsus demonstratione egeat, vel non: in primo casu *indemonstrabilis*; in altero *demonstrabilis* dicitur.

Quid e-
nunciatio
theoreti-
ca, &

præctica?

Quid
demon-
strabilis,
& inde-
monstra-
bilis?

CXVI. *Propositio theoretica indemonstrabilis axiomata*: ut, *quod cogitat, existit*; vel *impossibile est idem simul esse, & non esse*. *Præctica vero indemonstrabilis postulatum appellatur*; ut, *excole mentem; cum necessitate noli pugnare. Vel ex puncto dato ad aliud datum ducere lineam rectam*.

Quid
axioma,
& postu-
latum?

SCHOL. Philosophi omnes propositiones, quæ unica nituntur definitione, in axiomatum loco habent; ut si dicam: *qui pollet logica, pollet scientia dirigente facultatem cognoscitivam*. Item illas, quæ oriuntur, si

definitum cum sua definitione per copulam conjungatur, ut: *logica est scientia dirigens facultatem cognoscitivam*. Porro axiomatum usus in omni scientia est amplissimus; id solum magna cura cavendum, ne propositiones dubiæ, aut incertiæ pro axiomatis jactentur, quod merito multis veterum vitio damus. Sed de hoc alias.

Quid
theore-
ma, ejus-
que par-
tes?

CXVII. *Propositio theoretica demonstrabilis theorema* audit, constatque propositione, & demonstratione; ut si sit propositio; *anima humana est immortalis*; si jam adjungatur ejus demonstratio, theorema erit completum. Vel: propositio: *qualibet enunciatio constat duobus terminis, & copula*. Demonstratio: *qualibet enunciatio indicat judicium mente conceptum, in quo due idee de se affirmantur, vel negantur; sed hoc fit, si duo termini per copulam conjungantur: ergo qualibet enunciatio constat duobus terminis & copula. q. e. d.* En theorema integrum.

Quid
proble-
ma, ejus-
que
partes?

CXVIII. *Propositio practica demonstrabilis problema* dicitur, componiturque ex tribus partibus: prima aliquid faciendum postulat; altera modum suppeditat, quo id fieri debeat; tertia hoc modo rem petitam obtineri demonstrat; in exemplo, sit problema: *condere bonam definitionem cujuspiam rei*. Hæc est pars prima, quæ dicitur propositio. *Enumera tot, non plures, rei notas, quot requiruntur, & sufficiunt ad eam rem ab omnibus alijs discernendam*. Hæc est pars secunda, & vocatur resolutio. Tum conditur bona definitio, cum idea distincta, & completa enunciat; sed hoc fit, cum tot, non plures rei notæ enumerantur, quot requiruntur, & sufficiunt ad eam rem ab omnibus alijs discernendam: ergo bona conditur definitio, si tot, non plures, rei notæ enumerantur; quæ:

sufficiunt, & requiruntur ad eam rem ab omnibus aliis discernendam. q. e. f. Hæc est tertia pars, ipsa videlicet demonstratio. En problema absolutum.

CXIX. *Lemma*, vel *porisma* vocatur propositio quæpiam, quæ ex alia scientia, vel scientiæ parte quasi mutuo accipitur, ut illius ope propositio nunc occurrens demonstraretur; sic, ut in jure naturæ demonstraretur hominem esse eo fine conditum, ut perfectiones Dei manifestet, assumitur propositio ex metaphysica: finem toti mundo præfixum esse gloriam Dei externam.

Quid
Lemma?

SCHOL. Hæ vero propositiones lemmaticæ quandoque supponuntur suo loco demonstratæ, vel demonstrandæ; quandoque tamen etiam, si id breviter, & commode fieri possit, ubi assumuntur, demonstrantur; sic physici, & astronomi plurimis propositionibus, quas geometria demonstrat, utuntur ad suas demonstrationes conficiendas.

Quomodo
eo uten-
dum?

CXX. *Corollarium*, vel *consecutarium* est propositio, quæ vel ex definitione quæpiam, vel alia propositione jam demonstrata ita profluit, ut alia demonstratione amplius non indigeat; sic ex hac demonstrata: pietas est ad omnia utilis, sequitur pietatem etiam ad profectum in litteris faciendum multum conferre.

Quid
corollari-
um.

SCHOL. *Scholia* denique cuilibet propositioni, prout res postulat, subjungi possunt, in quibus obscura, aut dubia elucidantur; usus doctrinæ presentis indicatur; aliorum seu veterum, seu recentiorum ea de re opiniones enarrantur; argumenta in oppositum resolvuntur; aut denique quidquid ad præsentem rem commodum, utile, aut non injucundum visum fuerit, adnotatur. Hæc de secundo exercendi facultatem nostram cognoscitivam modo dicta sufficiunt; ad tertium (§. 48.) præinde transgrediamur.

Quid
scholion?

CAPUT XII.

DE RATIOCINATIONE.

Quomodo habitudo idearum inter se investiganda?

CXXI. Cum idearum inter se comparatarum habitudo menti non relucet, iudicium rite formari nequit (§. 93. & schol.); ea proinde convenienter investigari debet: id quod hoc modo præstatur. Assumimus ideam quampiam tertiam, quacum successive duas priores conferimus, ac visa earum convenientia, vel discordia colligimus eas quoque inter se vel convenire, vel non convenire: hoc dum facimus, *rationari* dicimur.

Quid rationatio?

CXXII. *Ratiocinatio* igitur, sive *ratiocinium* est assensus, quem mens convenientiæ, vel repugnantiae duarum idearum præstat propter cognitam earundem cum tertia idea assumpta convenientiam, vel repugnantiam. Sic, ut sciam, num. idea *incorruptibilitatis* conveniat idæ *animæ humanæ*, assumo ideam tertiam *entis simplicis*, & cum hac successive duas priores comparo; deprehendo igitur primum, maximam esse convenientiam inter ideam *entis simplicis*, & ideam *incorruptibilitatis*; dein etiam eandem convenientiam esse inter ideas *entis simplicis*, & *animæ humanæ*: visa igitur utriusque hujus idæ cum tertia assumpta convenientia, affirmo eandem quoque inter ipsas dari, & iudico: igitur *etiam anima humana est incorruptibilis*. Hoc iudicium erit *ratiocinium*.

Quid iudicium intuitivum & discursivum?

COROLL. Igitur *ratiocinium* a simplici iudicio (§. 92.) non differt, nisi in eo, quod iudicium sit assensus præstitus convenientiæ duarum idearum ex sola earum collatione, & quasi ipsa intuitione cognitæ, quare etiam iudicium *intuitivum* dici so-

let; contra vero ratiocinium sit ille assensus, qui præstatur convenientiæ duarum idearum ex earum cum tertia quapiam comparatione cognitæ, unde iudicium *discursivum* appellatur; *ratiocinari* enim, & *discurrere* philosophis idem sonat.

SCHOL. Tertiam illam ideam, quam assumimus, *mediam* posthac ex usu recepto vocabimus, sive quia medio inter utramque loco collocari debet, si naturalem cogitandi modum sequi velimus; sive quia illa mediante in noticiam convenientiæ, vel repugnantæ aliarum duarum pervenimus.

Quid i-
dea me-
dia?

CXXIII. Cum duas ideas inter se vel venire, vel disconvenire colligimus ex comparatione earum cum tertia, ratiocinamur (§. 121.): igitur quodlibet ratiocinium duntaxat tres ideas admittit. Et quia porro hæc comparatio unius ideæ cum altera sine iudicio non fit, tria semper concurrunt iudicia: duo, quibus ideæ illæ seorsum cum media conferuntur, simul sumta efficiunt *antecedens* ratiocinii; tertium, quo ideæ illæ inter se conferuntur, *consequens* dicitur; ac in eo, proprie loquendo, actus ratiocinii consistit (conf. cor. §. præc.).

Quæ ra-
tiocina-
tionis
paries?

CXXIV. Cum in ratiocinio convenientiam, vel discordiam duarum idearum colligamus ex eo, quod eæ cum quapiam tertia conveniant, vel non (§. 121.), necesse est, ut detur connexio inter consequens, & antecedens, illudque ex hoc profluat. Connexio hæc vulgo *consequentia* audit, estque requisitum adeo necessarium, ut absque eo ratiocinatio omnis illegitima, ac nulla sit.

Quid con-
sequen-
tia?

SCHOL. Ratiocinatio, quatenus hæc tria iudicia (§. 123.), & consequentiam (§. 124.) in se complectitur, spectari solet a philosophis, ut quoddam compositum, cuius unam partem, quam *materiam* vocare pla-

cuit, tria judicia absolvunt; alteram vero partem, quæ *forma* cognominatur, consequentia constituit.

Quid
consequens
formale
& materiale?

CXXV. Si consequens verum sit propter antecedens, id est: si ratio, cur consequens verum sit, contineatur in antecedente, nullus potest esse dubio locus, quin detur nexus inter consequens, & antecedens. Paret igitur, in quo *consequentia* consistat, atque inde universim legis instar obtinet: toties habetur in ratiocinio consequentia; adeoque forma, quoties consequens verum est propter antecedens, & tale consequens ajunt esse *verum formaliter*, sive ratione, aut vi *formæ*, quod unicum est legitimum; cum sic v. gr. ratiocinor: *omne ens simplex est incorruptibile, & anima humana est ens simplex: ergo anima humana est incorruptibilis*: datur consequentia, ac consequens est legitimum, id est, formaliter verum; nam anima humana est *ideo* incorruptibilis, quia omne ens simplex, quale quoque anima est, est incorruptibile. Hinc quoque ab opposito, si consequens quidem verum sit, sed non propter antecedens, ratiocinatio carebit sua forma, ac proinde vitiosa erit. Dicitur hoc in casu consequens esse *verum materialiter*, sive ratione *materiae*, quatenus nempe id præcise in se spectatur; ut est aliquod judicium, & aliis de caussis contingit, ut id ita se habeat, quod in eo enunciat: sic hoc ratiocinium nullum est: *anima humana est materia, & omnis materia est substantia, ergo anima humana est substantia*: nam licet verum sit animam humanam esse substantiam, id tamen non propter antecedens, quia nempe omnis materia est substantia, & anima humana est materia, sed aliis de caussis ita esse contingit; est proinde in hoc casu consequens tantum materialiter verum, non vero formaliter.

COROLL. 1. Consequens igitur *formaliter* verum, & *materialiter* falsum, est illud, quod licet in se spectatum falsum sit, tamen cum antecedente connectitur, ut: *omne vitium est fugiendum, & temperantia est vitium: ergo temperantia est fugienda*. Et contra consequens tam *formaliter*, quam *materialiter* falsum est, cum illud neque connectitur cum antecedente, neque ut in se præcise spectatum verum est; ut: *aliquis homo est eruditus; sed Cajus est homo: ergo Cajus est eruditus*, si eruditione caret.

Quid consequens formaliter verum & materialiter falsum? Quid & formaliter, & materialiter falsum?

COROLL. 2. Universim facillime agnoscitur, num consequens sit *formaliter* simul, ac *materialiter* verum, adeoque legitimum, si illud resolvatur in propositionem causalem (§. 99.) quod fit, si ipsum antecedens per particulam *quia* conjungatur cum consequente: quod si tum tota propositio causalis vera fuerit, etiam verum erit consequens tam *formaliter*, quam *materialiter*; sic in superiori ratiocinio tota hæc causalis vera est: *anima humana est incorruptibilis, quia omne ens simplex est incorruptibile, & anima humana est ens simplex: & ideo hoc in casu etiam consequens ratiocinii: anima humana est incorruptibilis: formaliter, & materialiter verum est*; contrarium contingit in altero ratiocinio, in quo, quia falsa ratio assignatur, conclusio est *formaliter* falsa, etsi *materialiter* spectata vera sit. Quod ratio in antecedente inclusa in se falsa quidem sit, attamen, si ex hypothesis interea pro vera assumeretur, legitima foret ratio consequentis, tum ipsum consequens erit *formaliter* verum, sed *veritate materiali* destitueretur; ut: *omne corpus est ens compositum, sed spiritus est corpus: ergo spiri-*

Unde agnoscitur?

tus est ens compositum; ubi resolutio fieri debet: spiritus est ens compositum, quia spiritus est corpus, & omne corpus est ens compositum (§. cit.).

COROLL. 3. Veritas materialis consequentis legitimi nexu perpetuo, ac indissolubili consociatur cum veritate materiali antecedentis, ita ut una absque altera nullo simpliciter in casu dari possit. Istud & inde patet: cum ratio, cur consequens legitimum verum sit, contineatur in antecedente (§. 125.), ipsum quodam modo consequens in antecedente includitur, atque adeo illud ipsum, quod in consequente explicite, ac aperte dicitur, jam prius in antecedente implicite & occulte dictum est, si ratiocinium vitio careat; sic dum dico: *omne ens simplex esse incorruptibile, & animam esse ens simplex*, jam implicite dico, *animam esse incorruptibilem*, quod deinde in consequente aperte enuncio. Jam vero, si aliquid verum, vel falsum sit, dum implicite dicitur, etiam verum, vel falsum esse debet, cum explicite enunciatur. Inde autem profluunt sequentes canones, quorum tam in inquirenda, quam communicanda veritate usus est frequentissimus.

Quæ ratiocinationis leges?

1.) Ex vero antecedente non potest legitime sequi falsum consequens.

2.) Si consequens legitimum falsum sit, antecedens quoque falsum sit, oportet.

3.) Ex falso antecedente non potest legitime sequi verum consequens.

4.) Si consequens legitimum verum sit, antecedens quoque verum sit, oportet.

5.) Quidquid stare potest, aut non potest cum veritate antecedentis, stare etiam potest, aut non potest cum veritate legitimi consequentis, & vicissim.

CXXVI. Quando duas ideas cum tertia conferimus, tres nobis casus, nec plures, nec pauciores, contingere possunt: vel enim Quot in ratiocinando casus?
 1.) utraque idea cum media convenit; vel
 2.) alterutra tantum; vel 3.) neutra. In primo casu concludendum est eas quoque inter se convenire; in altero, eas inter se non convenire; in tertio vero nihil concludi poterit. Hæc porro nituntur propositionibus quibusdam adeo per se clavis, ut in axiomatum loco (§. 116.) tuto haberi possint, suntque sequentes.

1.) Si duo convenient cum uno tertio, ea quoque inter se conveniunt. Quæ axiomata?
2.) Si ex duobus unum conveniat cum tertio, alterum non, ea inter se non conveniunt.
3.) Si ex duobus neutrum conveniat cum tertio, ea possunt inter se vel convenire, vel non convenire.

COROLL. 1. Quando concludimus, proprie ratiocinamur (§. 123.): igitur in duobus tantum primis casibus ratiocinatio est possibilis, in tertio numquam, sed tum oportet aliam ideam mediam exquirere.

COROLL. 2. In primo casu ideæ comparatæ cum media inter se conveniunt, eaque convenientia in conclusione est affirmanda; in secundo eæ inter se non conveniunt, adeoque in conclusione convenientia est neganda: igitur in casu primo conclusio est *affirmativa*, in altero *negativa*.

COROLL. 3. Qualitas ratiocinii desumi debet a qualitate (§. 102.) conclusionis, cum in ea præcipue actus ratiocinii consistat (§. 123.): igitur ipsum etiam ratiocinium in primo casu est *affirmativum*, in altero *negativum*; ac consequenter omne ratiocinium vel *affirmativum*, vel *negativum* est.

COROLL. 4. In duobus tantum casibus ratio-

cinatio fieri potest: igitur omnia ratiocinatio alterutro ex duobus primis axiomatis niti necessario debet; quare duo hæc & requiruntur, & sufficiunt etiam, ea proinde, quæ ab aliis congeruntur, tuto hic negligimus.

SCHOL. Utor vocabulo *conveniunt* in sensu latissimo, ut intelligatur qualiscumque convenientiæ species; sensus proinde est: quocumque modo duo conveniant cum tertio, seu sint *eadem* seu *similia*, seu quacumque ratione vel ad *partem*, vel ad *totum* quampiam relationem habeant, eodem prorsus modo ea inter se quoque convenire. Hæc porro axiomata simili a ponderibus petito tironi fero ad oculum illustrari possunt. Sint duæ massæ, argenti una, auri altera: cupis scire, num argentea in pondere conveniat cum aurea? accipe tertiam quamdam massam cupri noti jam ponderis v. g. duarum librarum. Si jam successive aurum cum cupro, argentum cum cupro ponderes, deprehendasque argentum, & aurum cum cupro convenire, nonne indubitanter concludes argentum quoque cum auro convenire, hoc est: aurum, & argentum inter se convenire quoad pondus, propterea quod quoad idem pondus conveniunt cum tertia massa cupri assumpta? En casum primum, qui in proximo axioma innititur. Pone porro argentum convenire cum cupro, non item aurum, nonne illico inferes, aurum cum argento non convenire, propterea quod unum tantum, non item alterum quoad pondus cum cupro convenit? En casum alterum, qui in secundo axioma innititur. Finge denique, facto examine neque aurum, neque argentum convenire cum cupro, quid jam inferes? aurum quoad pondus convenire cum

cum argento? At hoc non constat, & contrarium est possibile; si enim aurum sit unius, argentum trium librarum, profecto non convenient cum cupro, quod ponitur esse duarum librarum; sed nec tamen inter se convenient. Inferes ne, igitur aurum quoad pondus non convenire cum argento? at neque hoc constat, & contrarium rursus est possibile; sit enim aurum trium, & argentum pariter trium librarum, neutrum cum cupro duarum librarum convenient, convenient tamen inter se. Cum igitur utrumque sit possibile, ac quod eorum sit, ex sola comparatione instituta non elucescat, illatione abstinendum erit. En casum tertium, qui in tertio axioma innititur.

C A P U T XIII.

DE ARGUMENTATIONE, ET NOMINATIM DE SYLLOGISMO SIMPLICI.

CXXVII. *Argumentatio* est omnis ea oratio, qua ratiocinium mente conceptum aliis significamus. Quid argumentatio?

COROLL. Argumentationi igitur omnia ea applicari debent, quæ de ratiocinio dicta sunt, ut quod sit vel *affirmativa*, vel *negativa*; quod constet *antecedente*, *consequente*, & *consequentia* velut forma; quod consequens contineatur in antecedente &c. &c.

SCHOL. Argumentatio est genus quoddam, Quæ ejus species? diversasque sub se species continet, *syllogismus* videlicet, *enthymema*, *epicherema*, *dilemma*, *soriten*, & *inductionem*. Princeps in his locus dari solet syllogismo: igitur de hoc primum, tum de reliquis agemus. *Storchenau Logic.*

Quid &
quotu-
plex syl-
logis-
mus?

CXXVIII. *Syllogismus* est argumentatio ; quæ tria iudicia totidem propositionibus enunciat ; ut : *omne ens simplex est incorruptibile ; sed anima humana est ens simplex : ergo anima humana est incorruptibilis*. Dicitur *simplex*, cum ejus propositiones sunt simplices ; *compositus* vero : quando una ejus propositio est composita : nunc de simplici tantum.

Quæ
partes
syllogis-
mi sim-
plices ?

CXXIX. *Partes* syllogismi simplicis sunt termini, & propositiones præter consequentiam, seu formam, de qua (§§ 124. & 125.) jam satis actum est. Termini ideas in ratione occurrentes (§. 121.) exprimunt, proptereaque non nisi tres esse possunt ; duo, qui ideas duas comparandas cum media denotant, & hi *extremi* : unus, qui mediam illam ideam, quacum reliquæ comparantur, significat, & hic *medius* vocatur. Extremorum unus est *major*, ille videlicet, qui in ultima propositione prædicatum agit : alter *minor*, qui ejusdem propositionis subjectum est.

Quid pro-
positio
major,
minor, &
conclusio?

CXXX. Propositiones, quæ alteram syllogismi partem constituent, pariter non nisi tres esse possunt (§. 128.), variamque sortiuntur denominationem. Ea, in qua terminus major consociatur cum termino medio, *major*, vel *propositio* sine addito : ea, in qua terminus minor cum termino medio conjungitur, *minor*, vel *assumptio* : utraque simul *præmissæ* : ea demum, in qua duo termini extremi inter se copulantur, *consequens*, *conclusio*, vel *complexio* dici solet.

SCHOL. Nimirum cum ex tribus tantum terminis (§. 129.) tres propositiones exurgere debeant, facile patet, quemlibet terminum bis esse ponendum, ut sic tria subiecta, & tria prædicata ad totidem propositiones construendas necessaria obtineant.

tur; id autem consequimur, cum quemlibet terminum extremum seorsum cum medio, & deinde duos illos extremos inter se jungimus; ut si sint tres termini: *anima humana, incorruptibilis, ens simplex*, quorum duo illi sint extremi, hic medius: jungantur igitur primum unus extremus cum medio dicendo: *omne ens simplex est incorruptibile*; tum alter cum eodem medio: *anima humana est ens simplex*: denique illi duo extremi inter se: *anima humana est incorruptibilis*. Hinc petitur regula universalis, cujus ope tiro promptissime in syllogismo quocumque dato terminos dignoscatur: attendenda nimirum est primo loco propositio tertia, sive conclusio; duo termini in ea occurrentes sunt extremi, ita quidem, ut qui prædicatum agit, *major*; qui vero subjectum, *minor* dicatur; tertius deinde, qui in utraque præmissa deprehenditur, erit terminus *medius*. Denique hoc quoque tironem ignorare non oportet: etsi propositio major in sensu stricto ea sit, quæ in se continet terminum majorem, sive conclusionis prædicatum, jam fere tamen usus obtinuit, ut semper sine attentione ad terminum majorem primam in syllogismo propositionem *majorem* vocitemus, etsi ea quandoque reipsa *minor* sit; idque ideo, quia potissimum alias ob majorem cum naturali nostro cogitandi modo convenientiam *major* primo loco profertur.

CXXXI. Syllogismus, cujus conclusio est affirmativa pariter *affirmativus* est; ut: *omne ens simplex est incorruptibile; sed anima humana est ens simplex; ergo anima humana est incorruptibilis*. Cujus vero conclusio est negativa, *negativus* est; ut: *nullus corpus cogitat; sed anima humana cogitat: ergo a-*

Quid
syllogis-
mus affir-
mativus
& nega-
tivus?

nima humana non est corpus. Proinde omnis syllogismus vel affirmativus, vel negativus (conf. §. 126. cor. 3.) est.

SCHOL. Etsi cujuslibet syllogismi bonitas, si-
ve formalis veritas conclusionis ex univer-
sali illa lege (§. 125. cor. 2.) allata sem-
per, & pro omni casu facillime detegatur,
adeoque ea sola omnino & construendo,
& dijudicando syllogismo cuilibet simplici
sufficiat, ne quid tamen tironum commo-
do desit, præcipuas dialecticorum leges
jam adducam. Harum aliæ ad terminos;
aliæ ad propositiones pertinent. Illæ sunt
numero quatuor. Prima terminorum nume-
rum definit; secunda cum tertia terminum
medium; quarta extremos dirigit. Harum
binæ qualitatem; binæ quantitatem propo-
sitionum constituunt.

Leges Syllogismi Simplicis.

1.) *Tres tantum sint termini.* Patet id ex
(§. 129.), & ipsa natura ratiocinii (§. 121.),
cujus explicatio est syllogismus; sicut enim
in ratiocinio tres tantum ideæ, ita hoc ipso
in syllogismo tres tantum possunt esse ter-
mini, cum quælibet idea uno termino de-
notetur. Contra hanc legem peccatur 1.
si clare quatuor termini diversi adhibean-
tur, non tamen si sint synonymi: ut si dice-
res; *omne ens simplex est incorruptibile; sed
anima humana est cogitans: ergo anima hu-
mana est incorruptibilis.* 2. Si terminus quis-
piam significationem mutet; est enim in eo
casu æquivalenter duplex, cum idem sit, seu
duæ ideæ diversæ per unum terminum, seu
per duos significantur; ut: *omne extensum
est corpus; sed omne spatium est extensum:
ergo omne spatium est corpus.* Vox *extensum*
hic mutat sensum; in majori enim significat

extensum in concreto, & in minori extensum in abstracto.

2.) *Terminus medius neque ex toto, neque ex parte ingrediatur conclusionem.* Cum enim in conclusione termini extremi inter se coniungendi sint (§. 130.), locus non erit termino medio; siquidem una quæque propositio præter copulam non nisi duos terminos, subjectum videlicet, & prædicatum admittit (§. 94. cor. 1. & 2.). Contra peccarent hi syllogismi: *omnis virtus est honesta: sed pietas est virtus: ergo aliqua virtus est honesta: omnis habitus honestus est laudandus; sed pietas est habitus honestus: ergo pietas honesta est laudanda.*

3.) *Terminus medius saltem in una præmissarum accipiatur universaliter, & quidem complete.* Nisi enim id fieret, mutaret sensum, adeoque æquivaleret duobus terminis, quod est contra L. 1. Nam si medius terminus in utraque præmissa accipiatur particulariter, in utraque adstringitur ad eum sensum particularem, quem præcise admittit alter extremus, quocum in ea propositione coniungitur; cum igitur duo extremi inter se sint diversi, diversa quoque in termino medio significatio oriatur, necesse est; ut si dicas: *omnis liber est aliquod compositum; sed aliquod compositum est quodvis libri folium: ergo quodvis libri folium est liber.* Debet porro hæc universalitas termini medii esse completa (§. 106. schol.); unde pariter vitiose sic concludo: *omne in republica munus Cajum ornavit; sed consulatus a Titio gestus est aliquod in republica munus: ergo consulatus a Titio gestus Cajum ornavit.* Excipitur tamen ab hac lege terminus medius, si sit singularis; cum enim determinatum semper individuum significet, omne æquivocationis periculum procul abest. Inde

bene sic argumentor: *Plato fuit discipulus Socratis; sed Plato fundavit sectam academicam: ergo aliquis discipulus Socratis fundavit sectam academicam.*

4.) *Terminus extremus non sumatur universaliter in conclusione, quando in præmissis acceptus est particulariter.* Ratio est: quia terminus extremus, qui in præmissis tantum particularis fuit, novum efficeret sensum in conclusione, si ibi acciperetur universaliter, unde quatuor evaderent termini contra L. 1. Quin & plus diceretur in conclusione, quam in præmissis, quod fieri numquam potest, cum conclusio in præmissis contineri debeat (§. 125. cor. 3.), sic vitiosus foret hic syllogismus: *omnis cogitans est existens; sed nullum corpus est cogitans: ergo nullum corpus est existens.* Vel *Epicurus erravit in natura animi definienda; sed Epicurus fuit philosophus: ergo omnis philosophus erravit in natura animi definienda.*

5.) *Ambæ præmissæ non sint negativæ.* Neutra enim idea conveniret cum media, adeoque haberetur casus tertius ratiocinii (§. 126.), in quo secundum axioma tertium (§. citat. schol.) nihil concludi potest: sic nulla est conclusio: si dicam: *nullum corpus cogitat; sed anima humana non est corpus: ergo...*

6.) *Si una præmissarum sit negativa, negativa quoque sit conclusio.* Si enim una præmissarum sit negativa, ex duabus ideis una convenit cum tertia, altera non: habetur proinde casus secundus ratiocinii (§. 126.); in quo per axioma secundum ideæ illæ inter se non conveniunt, atque adeo in consequente convenientia earum neganda est, quod non nisi conclusio negativa præstat; sic cum dicis: *nullum corpus cogitat; sed anima cogitat; inferre debes: ergo anima non est corpus.*

COROLL. Ex hac, & præcedente lege tiro colliget, numquam in syllogismo legitimo unam tantum propositionem, vel omnes tres simul posse esse negativas, sed necesse esse, ut vel omnes tres sint affirmativæ, vel duæ earum negativæ, & una affirmativa.

7.) *Ambæ præmissæ non sint particulares.* Sit enim 1. Syllogismus affirmativus, erunt, igitur duæ præmissæ affirmativæ per L. 6. Si jam duæ præmissæ essent particulares, medius terminus bis acciperetur particulariter contra L. 3. Nam omnes termini harum propositionum sunt particulares; ii duo, qui subjecta agunt, propterea, quia subjectum propositionis particularis semper est particulare (§§. 106. 107.); ii duo, qui prædicata agunt, propterea, quia prædicatum propositionis affirmativæ semper sumitur particulariter (§. 104.); sed inter hos medius terminus bis ponitur (§. 130. & schol.). Igitur & ipse bis particularis erit; ut: *aliqua ira est virtus; sed aliqua virtus est mansuetudo: ergo aliqua mansuetudo est ira.*

Sit 2. Syllogismus negativus, erit igitur una præmissa pariter negativa per L. 6. Jam in hac præmissa negativa medius terminus erit vel subjectum, vel prædicatum. Sit primo subjectum; iterum bis accipietur particulariter contra L. 3. cum enim medius terminus in negativa præmissa, quæ particularis est ex hypothesi, ponatur esse subjectum, erit is quoque ibi particularis (§. 106. 107.). In altera autem præmissa, quæ est particularis affirmativa, idem ille medius terminus semper erit particularis, seu agat subjectum, seu prædicatum (§§. 106. & 104.): igitur bis accipietur particulariter; ut si dicas: *aliqua ira est laudabilis; sed aliqua ira non est approbanda: ergo aliquid laudabile non est.*

approbandum. Sit jam secundo medius terminus in præmissa negativa prædicatum: hoc in casu non orietur quidem hoc vitium, quod jam bis assignamus; cum enim omne prædicatum propositionis negativæ universale sit (§. 105.), medius terminus saltem semel accipietur universaliter, adeoque satisfiet L. 3. sed peccabitur contra L. 4. Videlicet terminus extremus, & quidem major in conclusione erit universalis, qui tamen in præmissis fuit particularis. Nam in hoc casu conclusio est negativa per L. 6. igitur terminus major, qui ibi prædicatum agit (§. 129.); in ea sumitur universaliter (§. 105.): in præmissis vero idem terminus major vel est subjectum præmissæ negativæ (cum ejus prædicatum ex hypothesi sit terminus medius) vel aut subjectum, aut prædicatum alterius præmissæ affirmativæ; quidquid horum sit, semper est particularis; subjectum enim utriusque præmissæ est particulare propter suppositam particularitatem utriusque propositionis (§§. 106. 107.); prædicatum pariter præmissæ affirmativæ est particulare per dicta, & (§. 104.): ergo ubicumque in præmissis in hoc casu ponatur terminus major, semper est particularis; sic v. g. *quidam impius non fuit philosophus; sed quidam Atheus fuit philosophus; ergo quidam Atheus non fuit impius.* Excipiuntur ab hac legeduz propositiones singulares; verum tunc solum, quando ipse terminus singularis agit terminum medium, (conf. L. 3.); sic bene concludis: *Cicero fuit princeps eloquentia; sed Cicero fuit consul Romanus: ergo quidam consul Romanus fuit princeps eloquentia:* non vero sic: *Plato fuit discipulus Socratis: sed etiam Xenophon fuit discipulus Socratis: ergo Plato fuit Xenophon.*

8.) Si una præmissarum particularis sit,

fit, quoque conclusio particularis. Sit enim r. utraque præmissa affirmativa: cum una ex his ponatur esse particularis, uterque terminus extremus in his præmissis erit particularis; nam tres termini harum propositionum sumuntur particulariter, nempe duo prædicata (§. 104.), & subiectum præmissæ particularis; & unicus solum universaliter, qui videlicet subiectum agit in præmissa universalis. Hic vero, qui universaliter sumitur, necessario est terminus medius, qui propter L. 3. semel saltem debet accipi universaliter, ut si dicas: *omnis virtus est honesta; sed aliqua ira est virtus:* igitur in hoc casu uterque extremus in præmissis sumitur particulariter. Jam vero, si conclusio fieret universalis, utique ejus subiectum, nempe terminus minor fieret universalis, quod cum per L. 4. non liceat, necesse est, ut conclusio fiat particularis; igitur inferendum: *ergo aliqua ira est honesta*, non autem: *ergo omnis ira est honesta*. Sit 2. una præmissarum negativa: cum rursus una ponatur esse particularis, duo tantum termini in his præmissis erunt universales; nempe, si universalis sit negativa, hujus negativæ subiectum, & prædicatum; si vero universalis sit affirmativa, subiectum affirmativæ, & prædicatum negativæ; inter quos saltem semel debet esse terminus medius per L. 3. alter vero universalis poterit esse unus ex extremis: proinde unus extremorum certo in præmissis erit particularis; ut si dicas: *omnis virtus est honesta; sed aliqua ira non est virtus:* sive *nulla virtus est fugienda; sed aliqua ira est virtus:* Jam vero, cum in hoc casu conclusio fieri debeat negativa per L. 6. si ea foret universalis, uterque terminus extremus in hac conclusione sumeretur universaliter (§§. 106. 105.); quod cum per L. 4. non li-

ceat, conclusio particularis sit, necesse est; igitur inferendum in primo: *ergo aliqua ira non est honesta*, non autem: *ergo nulla ira est honesta*; & in altero: *ergo aliqua ira non est fugienda*, non autem: *ergo nulla ira est fugienda*.

COROLL. Ex hac, & præcedente lege tiro rursum colliget, nunquam omnino in syllogismo legitimo aut, unam, tantum, aut omnes tres propositiones posse esse particulares; sed necesse generatim esse, ut vel omnes tres sint universales, vel duæ particulares, & una universalis.

C A P U T XIV.

DE SYLLOGISMO COMPOSITO.

Quotuplex syllogismus compositus?

Quid conditio-
nalis?

Quæ ejus
lex?

CXXXII. Syllogismus *compositus* (§. 128.), quatenus attentionem meretur, est triplex: vel *conditionalis*, vel *conjunctivus*, vel *disjunctivus*. De his ordine. Syllogismus *conditionalis*, sive *hypotheticus* est, cum una ejus præmissa est propositio *conditionalis* (§. 98.); ut: *si mundus providentia regitur, Deus est; sed mundus providentia regitur; ergo, Deus est.*

CXXXIII. Syllogismus hic, unica hac lege ordinatur: *affirmata conditione, affirmatur quoque conditionatum; & negato conditionato negatur conditio.* Cum enim in conditione contineatur ratio, cur verum sit conditionatum (§. 98. cor. 2.), quamdiu ratio subsistit, veritas quoque conditionati subsistere debet, & si ab opposito veritas conditionati non detur, neque ejus ratio in conditione dari poterit; sicut: *si anima humana est ens simplex, ea est incorruptibilis; sed anima humana est ens simplex; ergo, anima humana*

est incorruptibilis; vel si anima est corpus, ea est ex partibus composita; sed anima non est ex partibus composita: ergo anima non est corpus.

SCHOL. Si unica ratio, cur conditionatum possit esse verum, illa sit, quæ in conditione exprimitur, vera quoque prodit conclusio, cum negata conditione negatur conditionatum, vel affirmato conditionato affirmatur conditio; ut si dicas: *si otium virtus est, illud est honestum; sed otium non est virtus: ergo otium non est honestum; vel si anima ens simplex est, ea est partium expers; sed est partium expers: ergo est ens simplex.* Contra si præter illam, quam conditio continet, aliæ dentur rationes, cur conditionatum verum esse queat, conclusio hoc modo elicita falsa erit; ut si inferas: *si Cajus homicida est, est improbus; sed Cajus non est homicida: ergo non est improbus; vel: sed est improbus: ergo est homicida.* Vñ ex ipsa hac diversitate satis patet, ejusmodi conclusiones, quando veræ sunt, esse solum ratione materiæ, non vero vi formæ veras, atque adeo hunc Syllogismos hypotheticos construendi modum pro lege generali statui non posse; lex enim, a qua formalis ratiocinii veritas pendet, pro omni absolute materia valere debet.

CXXXIV. Syllogismus *conjunctivus*, sive *copulativus* est, cujus una præmissarum est propositio copulativa (§. 100.), & quidem negativa, cujus membra ita sibi opponuntur, ut simul vera esse nequeant; ut cum dico; *nemo potest simul servire Deo & mundo; sed multi serviunt mundo: ergo multi non serviunt Deo.*

CXXXV. Syllogismus Copulativus hanc sequitur legem: *affirmato membro quocumque*

Quid
conjunctivus?

Quæ
lex?

reliqua negantur; cum enim membra copulativa nequeant simul vera esse (§. præc.), hoc ipso, quod unum affirmando ponatur esse verum, reliqua negando tolli debent; ut: non potest anima simul æternum vivere, & cum corpore perire; sed anima æternum vivit: ergo non perit cum corpore.

SCHOL. Si membra copulata ita inter se pugnent, ut nec falsa simul esse queant, etiam negato uno reliqua cum veritate affirmantur: ut: *non potest aliquod corpus simul moveri, & quiescere; sed hoc corpus non movetur: ergo quiescit.* Sed nimirum hæc conclusio rursus tantum materialiter vera erit; cum id universim non obtineat; nam si omnia membra simul abesse, adeoque falsa esse possint, ex unius negatione haud quaquam vera conclusio ducetur; ut si dicas: *nemo potest simul esse Vienna & Parisiis; sed Cajus non est Vienna: ergo Cajus est Parisiis*, quod falsum est, si sit Pragæ, vel alibi (conf. §. 133. schol.).

Quid disjunctivus?

CXXXVI. Syllogismus *disjunctivus* est, cujus una præmissarum est propositio complete disjunctiva (§. 101. & schol.), cujus proinde omnia disjunctionis membra enumerantur; ut: *aut ver est, aut æstas, aut autumnus, aut hyems; sed ver est: ergo nequa est æstas, neque autumnus, neque hyems.*

Quæ ejus lex?

CXXXVII. Syllogismum disjunctivum hæc lex dirigit: *affirmato membro quocumque, aut pluribus, reliqua negantur; & negatio uno, aut pluribus reliqua affirmantur.* Membra nempe disjunctionis completæ nec simul vera, nec simul falsa esse possunt. Sic: vel *anima humana perit cum corpore, vel post mortem corporis manet superstes; sed anima humana non perit cum corpore: ergo post mortem corporis manet superstes.* Item: *Vienna vel est sita in Europa, vel in Asia, vel in*

Africa, vel in America; sed Vienna sita est in Europa: ergo neque in Asia, neque in Africa, neque in America.

CAPUT XV.

DE RELIQUIS ARGUMENTATIONIS SPECIEBUS.

CXXXVIII. *Enthymema* est Syllogismus, ^{Quid, enthymema?} cujus una præmissa in mente retinetur, propterea quod per se facile a quovis intelligi, ac suppleri potest; ut cum dico: *anima humana est ens simplex: ergo est incorruptibilis. Prior antecedens: altera consequens audit.*

CXXXIX. *Epichereuma* nuncupatur Syllogismus, ^{Quid est epichereuma?} cujus vel alterutri, vel utrique præmissarum sua statim ratio adjungitur, quo adversarius uno velut impetu unilique constringatur; ut: *omne ens simplex est incorruptibile; non enim habet partes, in quas resolvi possit; sed anima humana est ens simplex; nam impossibile est, ut ens compositum cogitet: ergo anima humana est incorruptibilis.*

CXL. *Dilemma* est argumentatio, ^{Quid Dilemma?} in qua ex singulis propositionis cujusdam complete disjunctivæ (§. 101. & schol.) membris aliquid contra adversarium infertur; ut est illud Tertulliani in apologia pro Christianis adversus Trajani Imp. decretum: *vel nocentes sunt Christiani, vel innocentes: si nocentes: cur inquisi prohibes? Si innocentes: cur delatis pœnam irrogas? Vel illud contra Scepticos: de omnibus dubitandum esse vel verum est, vel falsum; si verum: ergo habetur indicium, per quod verum a falso discernatur; si falsum: ergo habetur indicium, per quod falsum a vero discernatur.*

*Leges legitimi Dilemmatis.*L. de
Sanch.

1.) *Disjunctio sit completa*; si enim membra omnia simul falsa esse possent, adversarius negando antecedens vim argumenti eluderet; sic male arguit Tullius mortem non esse timendam ex eo, quod animus vel pereat cum corpore, vel post mortem æternum beatus sit futurus; disjunctio enim deficiente aliquo membro, non est completa. Potest nempe etiam animus post mortem esse perpetuo infelix, ac miser.

2.) *Quod inferitur, ex suo membro legitime profluat*, secus adversarius negando consequentiam elabetur; si sic arguas: *vel anima perit cum corpore, vel post mortem erit superstes*; si perit; mors non est timenda, cum nihil sentiat amplius; si manet superstes, mors iterum timenda non est, cum sit beata futura; utraque illatio negari potest; neque enim in falsa hypothesis, quod anima pereat cum corpore, neque ex eo, quod maneat superstes, sequitur mortem non esse timendam, cum in primo casu possent gravissimi dolores ipsum interitum comitari; in altero, æterna miseria mortem subsequi.

3.) *Non sit ἀντιστοιχον, sive reciprocum*, quod tum contingit, quando adversarius eadem enunciatione disjunctiva uti, atque ex ipsius membris aliquid contra argumentantem inferre potest; sic quispiam probare voluit, munus in republica suscipiendum non esse, usus hoc dilemmate: *vel bene, vel male administrabis munus susceptum*; si bene: offendet homines; si male: Deum. Quod inverti potest hac ratione; *vel bene, vel male administrabis munus susceptum*; si bene: placabis Deo; si male: hominibus. Ejusmodi quoque est pervulgatum illud Protagoræ con-

tra Evathlum in jus vocatum: vel pro me pronuntiabunt iudices, vel pro te: si pro me: mercedem solves ex sententia iudicum; si pro te: eandem solves ex pacto, quod ingeniose Evathlus retorsit; vel pro me pronuntiabunt iudices, vel pro te; si pro me: nihil solvam ex sententia iudicum; si pro te: nihil solvam ex pacto. Protagoras nempe, referente Aulo Gellio, Evathlum in iure instruxit eo pacto, ut ubi primam causam in foro vicerit, alteram mercedis partem dependat; callidus vero discipulus, ut ne ad solvendam mercedem adigeretur, nullius causæ patrociniū suscepit.

Not. Att.
l. 5. c. 10.

CXLI. Sorites est argumentatio, in qua plures propositiones ita copulantur, ut semper prædicatum præcedentis fiat subiectum sequentis, donec formetur conclusio, in qua subiectum primæ conjungitur cum prædicato ultimæ; ut: *anima humana est ens simplex, ens simplex non componitur ex diversis partibus, quod non componitur ex diversis partibus, non est resolvable in partes, quod non est resolvable in partes, est incorruptibile: ergo anima humana est incorruptibilis: Vel: quodlibet corpus est in aliquo loco, potest etiam esse in alio loco, quod potest esse in alio loco, potest mutare locum, quod potest mutare locum, est mobile: ergo quodlibet corpus est mobile.*

Quid
sorites?

COROLL. Naturam hujus argumentationis inspecianti facile patet, plures syllogismos constrictos, ac velut truncatos in ea latere; unde etiam sorites semper in eosdem resolveri potest, & quidem universim in tot, quot sunt præmissæ, una tamen demta; sic superior sorites resolvitur in hos syllogismos: *ens simplex non componitur ex diversis partibus: sed anima est ens simplex: ergo anima non componitur ex diver-*

sis partibus. Quod non componitur ex diversis partibus, non est resolubile in partes; sed anima non componitur ex diversis partibus: ergo anima non est resolubilis in partes. Quod non est resolubile in partes, est incorruptibile, sed anima non est resolubilis in partes: ergo anima est incorruptibilis.

Leges legitimi Soritis.

1.) *Nulla præmissarum dubia sit, aut falsa; cum enim ex falso antecedente non sequatur legitime verum consequens (§. 125. cor. 3.) conclusio in sorite falsa sit, aut dubia, necesse est, si vel una præmissarum talis sit; ita peccat sorites Velleii Epicurei apud Ciceronem. Dii sunt beatissimi, beatus quis non est sine virtute, virtus non est sine ratione, ratio non est, nisi in hominis figura: igitur Dii habent hominis figuram; ostendit vitium Cotta: nempe falsum esse, quod ratio non sit, nisi in hominis figura.*

*De nat. D.
L. 1. c. 18.
L. 1. c. 20.*

2.) *Omnes præmissæ non sint negativæ; talis enim sorites resolveretur in syllogismos, quorum omnes propositiones forent negativæ, quales vitiosi sunt (§. 131. L. 5.). Sic nihil inferres dicendo: anima non est corpus, corpus non cogitat, quod non cogitat, non est necessario ens simplex &c. &c.*

*Cic. de
div. 1. 2.
c. 4.*

SCHOL. *Sorites græce, latine Acervatis veteribus erat ut plurimum captiosa, atque ad fallendum instituta argumentandi ratio, ut nempe minutissimis additionibus, aut subtractionibus ab eo, quod evidenter verum est, ad aliquid aperte falsum adduceretur adversarius: ut si quis asserat, eum auctorem inter antiquos jure habendum esse, qui ante 100. annos scripserit; si jam quartas, quid vero, si ante 99. annos, pari-*

terne antiquus dicendus; an non? Hocque concesso urgeas: quid si ante 98. & sic porro instando ad triennium, vel biennium devenias, quærasque iterum, an is inter antiquos reputandus, an non? Cicero Epicuro hoc vitium vehementer exprobrat. Chrysippum quoque hoc argumentandi genere delectatum fuisse ex Laertio constat.

29. Acad.
l. 4. c. 16.

CXLII. *Inductio* est argumentatio, in qua, quod de singulis sive generibus, sive speciebus, sive individuis affirmatum, vel negatum est, universim de toto genere, aut specie concluditur; ut si dicas: *aurum, argentum, cuprum, plumbum, ferrum, stannum, platina igni injecta liquefiunt: ergo omne metallum igni injectum liquefit. Vel: infans, puer, adolescens, vir, senex suis subiecti sunt vitiis; ergo nulla hominum ætas a vitiis exempta est.*

Quid inductio?

CXLIII. *Inductio* est completa, si omnia individua, aut species, aut genera subjecta enumerentur: *incompleta* vero, si quædam omittantur.

Quotuplex inductio?

SCHOL. *Inductio* completa robur habet invictum; cum fieri simpliciter nequeat, ut id, quod singulis individuis, aut speciebus competit, integræ speciei, aut generi, quod ea sub sua extensione complectitur, non conveniat. Minus firmiter concludit incompleta; magnam tamen, si rite adhibeatur, vim obtinet, itaque rem persæpe conficit, ut non nisi imprudens de veritate per ejusmodi inductionem stabilita dubitare possit; immo quandoque etiam eo pertingit, ut fere absolutæ demonstrationi æquipolleat. Sic per inductionem inducimur; ut putemus, eum, qui nobiscum loquitur, habere animam rationalem, ut nos; vitulum, quem coram vivum intuemur, habere jecur, liem, reliquasque internas partes ita dispo-

Quod robur completæ, & incompletæ?

sitas, prout in dissecto conspiciuntur; & quidem ita hæc tenemus, ut, non obstante absoluta in contrarium possibilitate, absque insanix nota hæc, & similia in dubium vocare nequeamus. Est hæc inductio, quæ etiam frequentius argumentum ab *analogia* petitum denominatur, physicis præcipue in usu, servitque ad investigandas generales corporum proprietates, ac universales naturæ leges constabiliendas, quibus in casibus inductio completa frustra potissimum desideratur. Eam in rem elegantissima monita suppeditat Cl. P. Boscovich, quæ in compendium redacta hic exhibeo.

*Dissert.
de leg.
contin.*

Leges de legitimo Inductionis usu.

1.) Si existentia generalis cujusdam in natura legis per inductionem probanda sit, necesse est, ut ea in omnibus omnino casibus, qui in examen vocari possunt, iisque numero non paucis obtinereprehendatur; sic physici, cum in omnibus corporibus, quæ sub experientiam cadunt, deprehendant unum ab altero loco excludi, hanc proprietatem, quam *impenetrabilitatem* vocant, omnibus omnino corporibus quantumcumque vel ob distantiam, vel ob exiguitatem a sensibus nostris remotis absque hæsitatione attribuunt. Hoc porro in casu non oberit, si quandoque contrarium fieri videatur, si modo illud examine accuratius instituto, reque melius perspecta cum lege stabilita certo quodam modo conciliari possit; sic non obest, quod sæpius unum corpus in alterum, ut aqua in spongiam, olea in marmor, penetrare videatur; cum hæc & similia cum impenetrabilitate generali facile concilientur, dicendo: id ob vacuos corporum poros fieri debere.

2. 2.) Si quæpiam proprietas *absoluta*, quæ videlicet nullum ad sensus nostros respectum habet, universim in majoribus, ac sensibilibus corporum massis deprehendatur, ea quoque insensibilibus, & quantumcumque exiguis corpusculis attribui debet, nisi manifesta ratio obstat; magnitudo siquidem, & parvitas respectu rerum, ut sunt in se, nihil mutant, totumque a nostrorum sensuum acumine pendet. Sic ex eo, quod omnia corpora sensibilia *gravia*, & *impenetrabilia* sint, concludendum est *gravitatem*, & *impenetrabilitatem* minimis quoque earum partibus, ac corpusculis insensibilibus competere.

3.) Proprietas *respectiva*, quæ nempe solum comparate ad sensus nostros talis est, a majoribus corporum massis ad minima corpuscula transferri non debet; id enim magnitudinis discrimen, etsi respectu corporum sit accidentale, non tamen in relatione ad eas proprietates tale est; sic non est inferendum minima corpuscula esse *sensibilia*, *colorata* &c. ex eo, quod id in majoribus corporum massis deprehendatur.

4.) Proprietas pariter, quæ rei cuiuspiam solum ratione totius, aut compositionis convenit, a toto ad partes, a composito ad simplicia, ex quibus illud consurgit, transferri nequit; sic omni toti competit habere partes, sed non propterea quælibet pars suis iterum partibus constat; item de ratione cuiuslibet extensi est, ut habeat partes extra positas, sed non propterea debent in quavis extensi parte rursum plura diversa esse, quorum unum extra aliud positum sit.

CXLIV. *Polysyllogismus*, sive argumentatio polysyllogistica oritur, cum plures syllogismi inter se connectuntur, ac velut concatenantur. Fit id duplici modo: 1.) ut conclusio præcedentis fiat præmissa sequentis,

Quid polysyllogismus?

sic v. g. *omne quod cogitat, est spiritus; sed anima humana cogitat: ergo anima humana est spiritus. Omnis spiritus est ens simplex; sed anima humana est spiritus: ergo anima humana est ens simplex. Omne ens simplex est incorruptibile; sed anima humana est ens simplex: ergo anima humana est incorruptibilis.* 2.) Ut una præmissarum præcedentis fiat conclusio sequentis syllogismi; ut si invertas dicendo: *omne ens simplex est incorruptibile; sed anima humana est ens simplex: ergo anima humana est incorruptibilis. Omnis spiritus est ens simplex; sed anima humana est spiritus: ergo anima humana est ens simplex. Omne, quod cogitat, est spiritus; sed anima humana cogitat: ergo anima humana est spiritus.*

Quid
Sophis-
ma?

CXLV. Argumentatio, quæ vitio laborat, atque adeo forma sua (§. 124.) destituitur, *paralogismus*, vel *sophisma* audit; sic sophista evadit, cum argumentaris: *quod non perdidisti, habes, sed non perdidisti centum aureos: ergo habes centum aureos.*

Leg. 3.
cp. 2.

SCHOL. De variis sophismatum generibus, eorumque resolutionibus copiose antiquiores, ac præsertim Peripatetici ad exemplum ducis sui Aristotelis disseruerunt; vetum fructu perimodico: nec videtur e re discentium esse, eorum memoriam tantæ copia præceptorum, quorum usus in praxi rarissimus est, obruere: præcipue cum, ut erudite observat P. Buffier, generalis omnium fere fallaciarum fons sit æquivocatio, quæ attentæ mentis applicatione non difficulter detegitur. Suppeditavimus quoque (§. 125. cor. 2.) normam universalem, ad quam tiro cujuslibet ratiocinii conclusionem exigere, ejusque cum antecedente nexum detegere possit; quod si tamen plura desideret, hæc observet; cum cujuslibet syllo-

gismi dati vitium, quod quæritur, vel in terminis, vel in propositionibus latere debeat, inspiciat primum terminos, videatque, num plures sint, quam tres? Num medius conclusionem ingrediatur, aut bis particulariter sumatur? Num aliquis extremorum sit universalis in conclusione, qui particularis fuit in præmissis? Tum inspiciat propositiones, videatque, num utraque præmissa sit particularis, aut negativa? Num una præmissarum existente particulari, aut negativa conclusio quoque talis sit? Hæc uti uno veluti intuitu mente percurrere potest; ita quoque uno quasi momento vitium syllogismi cujuslibet dati assignare poterit.

P A R S II.

L O G I C Æ.

DE VERITATE COGNOSCENDA.

§. CXLVI.

Quod argument.
partis secundæ?

Facultas cognoscitiva mentis nostræ per operationes suas veritatem attingere nititur, eaque in re a logica directionem expectat (§. 45.): quare, expositis jam natura, proprietatibus, legibusque universalibus operationum ab ea facultate elicitarum, ordo postulat, ut, quid veritas sit, quibusque ea indiciis ab inimica sibi falsitate dignoscatur, discipiamus (§. 46.). Hæc est summa alterius hujus partis.

C A P U T I.

DE VERITATE, AC FALSITATE IN
GENERE, EARUMQUE DIVERSIS
SPECIEBUS.

Quid
veritas,
& falsitas
logica?

CXLVII. *Veritas*, quatenus ad logicam spectat, est convenientia nostræ cogitationis cum suo objecto; *falsitas* contra est inconvenientia nostræ cogitationis cum suo objecto.

COROLL. 1. Veritas igitur est affectio quædam, sive modus (§. 52.) nostræ cogitationis, ab eaque pendet, nec per se sine ea realiter subsistere potest.

COROLL. 2. Cum porro ipsa cogitatio aliud non sit, quam affectio quæpiam mentis cogitantis, palam est, veritatem realiter extra mentem cogitantem non existere.

COROLL. 3. Falsitas contradictorie opponitur veritati, & consistit in ipsius negatione; cogitatio enim, quæ non convenit objecto, hoc ipso disconvenit.

SCHOL. Neminem latere potest, veritatem hoc modo intellectam solum in abstracto (§§. 70. 71.) considerari, quæ si in concreto accipiat, erit ipsa *cogitatio suo objecto consentanea*. Hæc porro veritas logica compellatur, ut discriminetur ab ea, quam metaphysica, ac illa, quam philosophia moralis in contemplationem vocat. *Veritas metaphysica* in eo consistit, ut res actu existens habeat omnia, quæ ad ejus realem, ac naturalem constitutionem requiruntur; sic enim dicimus *verum esse aurum*, cum res omnia habet, quæ ad realem *auri* naturam per se requiruntur: huic veritati nihil opponitur; nequit enim res non esse id, quod est. *Veritas* deinde *moralis* est convenientia sermonum cum mente, & sensu loquentis; nam *veracem* eum dicimus, qui, ut sentit, loquitur, etsi forte res se aliter habeat: huic adversatur *mendacium*.

Quid
veritas
in con-
creto?

Quid
metaphy-
sica, &
moralis?

CXLVIII. Cogitationes nostræ referuntur vel ad objectum, quod realiter extra nos tale non existit, quale a mente nostra concipitur; vel ad objectum, cui existentia etiam realis extra nos, ac independentem a nostro conceptu competit. (conf. §§. 51. cor. 2. 73.). Oritur hinc duplex veritatis species maximi in recta cogitandi methodo momenti.

Quota-
plex ve-
ritas lo-
gica?

CXLIX. Veritas *interna*, sive *formalis* est convenientia cogitationis nostræ cum objecto, quod realiter extra nos saltem tale non existit, ut cum cogito: *circulus est rotundus*: vera est mea cogitatio, etiamsi nullus existeret circulus; tales sunt veritates omnes pure geometricæ. Veritas *externa*, sive *obje-*

Quid
veritas
interna,
& exter-
na?

*Div*a est convenientia nostræ cogitationis cum objecto, quod realiter extra nos existit; ut, cum cogito: *tellus est minor sole*: datur etiam veritas externa, vel objectiva: at cum cogito: *mons aureus præruptus difficulter scanditur*; hæc cogitatio erit quidem interne, vel formaliter, non vero externe, aut objective vera.

COROLL. Quamdiu veritatem solum internam possidemus, non possumus judicare de existentia reali objecti extra mentem; at per veritatem externam certi reddimur, objectum, quod est in nostra cogitatione, etiam extra eandem realiter ita existere.

SCHOL. Veritas interna est clara, distincta, simulque indefectibilis; clare enim, & distincte discernere possumus, num una idea sit conveniens alteri, cum hæc ideæ sint ipsa mentis nostræ actio, per quam illa intime de se ipsa, ac de suis operationibus judicat. Contingit id in geometria pura, quæ aliud non est, quam systema quoddam, sive collectio veritatum internarum, in qua, remota omni cura, ac sollicitudine de reali objectorum extra nos existentia, ex hypothesi quadam in mente posita deducuntur consecutiones diversissimæ, quæ totidem veritates internas, ac irrefragabiles constituunt; sic demonstramus: *globum etiam integrum terraqueum, si perfectio in æquilibrio constitueretur, in minime acus cuspide sustineri posse*; parum solliciti, num hoc æquilibrium reipsa detur, aut dari possit. At vero veritas externa frequenter admodum obscura, dubia, ac fallibilis est; persæpe enim scire non conceditur, an cogitationes nostræ ipsis objectis, quæ extra nos reapse existunt, convenient. Atque inde est, quod præstantissimi etiam logici, ac geometræ ingentia volumina e-

gre

gre iis quidem veritatibus internis, at simul gravissimis erroribus impleverint; cum enim veritas interna sine externa subsistere possit, facile contingit, ut ea cum falsitate externa, ac objectiva quandoque jungatur. Exemplo sit Cartesius: posito, ut vult, omnem extensionem esse materiam, necesse omnino erit, dari ubique materiam, ubi extensio concipi potest: jam vero, cum impossibile sit, ut extra hunc mundum non concipiatur extensio, extra mundum quoque materia dabitur, atque adeo mundus erit absque limitibus in infinitum extensus: porro cum quoque ante creationem mundi aliquam extensionem concipere queam, oportet, ut materia jam ante creationem mundi exstiterit; quæ, cum extensionem eam absque initio concipiam, nec initium habuit, nec creata fuit, unde sequeretur materiam non a Deo factam, sed a se ipsa exstirisse. En veritates internas cum gravissimis erroribus, ac falsitatibus objectivis copulatas: omnes hæ conclusiones sunt verissimæ, ac irrefragabiles, quamdiu in mente duntaxat considerantur; at falsæ, ac absurdæ, si ad realem materiæ existentiam referantur. Non foret difficile, complura ejusmodi exempla, si res posceret, hic adducere, præsertim si decantata illa Leibnitii, Wolfique principia *rationis sufficientis*, ac *indiscernibilium* in examen paullo accuratius vocare liberet; sed de his alias erit dicendi. locus.

CL. Cum cogitamus, vel ideas tantum, vel iudicia etiam, ac ratiocinia efformamus (§. 48.): igitur, quæ de veritate cogitationum in genere adhuc dicta sunt, jam nominatim ad triplicem hunc cogitandi modum applicari debent.

CAPUT II.

DE VERITATE IDEARUM, JUDICIO-
RUM, AC RATIOCINIORUM.

Quid ve-
ritas i-
deæ in-
terna, &
externa?

CLI. Cum omne idearum objectum vel possibile tantum, vel actu existens sit (§. 51. cor. 2.), istudque vel intra nos, vel extra nos tale esse possit (conf. §. 73.), perspicuum est, ideam ad triplicis generis objecta referri posse. Idea est *interne*, seu *formaliter vera*, quando objecto vel tantum possibili, vel actu intra nos existenti, ad quod refertur, convenit. Idea est *externe*, seu *objective vera*, quando objecto extra nos reapse existenti, ad quod refertur, convenit. Hæc porro convenientia habetur, si notæ, quas idea ut cum objecto conjunctas repræsentat, revera in, & cum objecto conjunctæ sunt; ut idea *solis*, cum *eum magnitudinem*, *eum colorem*, *splendorem*, *motum*, reliquasque notas, quæ in sole insunt, repræsentat. In casu opposito idea *objective falsa* est; nimirum si notæ, quas repræsentat, non sint in objecto reali: ut idea, quæ *rarissimam quadratam* longe distantem, *ut rotundam*, vel *verum aquæ immersum ut curvum* exhibet.

An idea
umquam
interne
falsa?

CLII. *Omnis idea est interne, seu formaliter vera*. Fieri enim absolute nequit, ut idea objecto solum possibili, aut actu intra nos existenti, ad quod refertur, non conveniat; non certe istud: quia non potest id non esse in mente, quod ipsa in se percipit; sed neque illud; nam hoc in casu mens ipsa sibi notas quasdam componit, quæ, quia inter se non opponuntur, in uno, eodemque objecto simul consistere possunt, at-

que adeo ipsa sibi suum objectum simul, & ideam conformat, quæ propterea inter se discrepare minime possunt. Omnis igitur idea, quamdiu non refertur ad objectum externum actu existens, vera est. Tales sunt ideæ *figurarum* a geometris formatæ; ita etiam in moralibus formatur idea *v. gr. parricidii* conjungendo notas, quæ sibi non opponuntur sine attentione, utrum notæ sic conjunctæ umquam exstiterint; sic item primi legislatores ideam pœnæ, qua parricidæ mulctandi essent, conformarunt.

SCHOL. 1. Si quis notas, quæ, quia sibi opponuntur, simul in uno objecto consistere nequeunt, in unam ideam componere tentet, is obtinet ideam deceptricem (§. 77. schol.), quæ, cum reipsa nulla sit (§. cit. & §. 51. cor. 3. cum schol.), nec vera, nec falsa dici potest; quales sunt: *Dei creati; creaturæ infinitæ; circuli quadrati; ligni ferrei* &c.

SCHOL. 2. Est & aliud idearum genus, quas *imaginarias* vocant; cum videlicet ob quampiam similitudinem nobis fingimus, quod non est, ut quasi per imaginem objectum oculis præsens sistamus, ut cum nobis *memoriam* ut *idearum receptaculum* repræsentamus; uti enim in receptaculo quodam reposita alio, quando lubitum fuerit, tempore resumimus, ita quasi ideas in memoria reponimus, & alio iterum tempore resumimus. Patet autem ejusmodi ideas imaginarias, quatenus fingunt, quod non est, falsas: quatenus vero id, quod est, sub aliquo quasi involucro designant, veras esse; unde a Wolfio *vicariæ realium* compellantur: earum usus in metaphysica patebit.

CLIII. Judicium affirmativum *interne*, seu *formaliter verum* est, cum idea prædicati con-

Quid
idea ima-
ginaria,
ejusque
veritas,
ac falsi-
tas?

Quid ve-
ritas, &
falsitas
interna
judicii?

venit ideæ subjecti; ut: *circulus est rotundus*. Negativum: cum idea prædicati non convenit ideæ subjecti; ut: *circulus non est quadratus*. Si oppositum obtineat, utrumque falsum erit; ut: *circulus est quadratus, circulus non est rotundus*.

Quid
conve-
nientia,
aut pugna
idearum
in judi-
cio?

SCHOL. Est videlicet veritas interna iudicii quædam connexio, aut repugnantia unius ideæ cum altera, quarum utraque simul præsens est menti, quæ earum convenientiam, vel repugnantiam percipit, quin necesse sit, ut aliquid extra mentem iudicantem reipsa existat, quod sit realiter tale, quale illud est, quod actu in cogitatione eidem obversatur. Consistit porro hæc convenientia idearum relate ad iudicium affirmativum in eo, ut idea subjecti in se includat ideam prædicati, ita, ut nequeat destrui idea prædicati, quin hoc ipso destruaturs idea subjecti; ut cum iudico: *circulus est rotundus*, idea circuli continet ideam rotunditatis, & si nulla daretur rotunditas, nullus quoque daretur circulus. At falsum est hoc iudicium: *circulus est quadratus*; possum enim destruere ideam quadraturæ, quin destruaturs idea circuli, cum possit dari circulus sine quadratura. Ab opposito, in iudicio negativo requiritur, ut idea subjecti non contineat, sed a se excludat ideam prædicati; sic verum est: *circulus non est quadratus*; falsum contra: *circulus non est rotundus*. Atque hoc universim obtinet, neque circa iudicia, quæ in materia contingente versantur, ulla est exceptio facienda; sit enim hoc iudicium *marmor est rotundum*; videtur quidem idea rotunditatis tolli posse, quin tollatur idea marmoris: at eo momento, quo hoc iudicium formatum verum est, ipsa idea marmoris includit omnia adjuncta, ac notas

marmorum convenientes, atque adeo ipsam quoque rotunditatis ideam, quæ hoc ipso destrui non potest, quin simul destruat ea marmoris idea, quæ tum subiectum agit. Generatim igitur iudicium affirmativum veritate interna gaudet, quoties idea prædicati repræsentat notam vel constantem, vel mutabilem (§. 52.) in idea subiecti tum inclusam; & iudicio negativo eadem veritas competit, quoties idea prædicati repræsentat notam vel constantem, vel mutabilem in idea subiecti tum non contentam.

CLIV. Iudicium *externe*, seu *objective verum* est, cum idea prædicati ita affirmatur, vel negatur de idea subiecti, ut res ipsæ realiter existentes per has ideas repræsentatæ congruunt, vel non congruunt: sic verum est hoc iudicium: *tellus est minor sole*. In casu opposito erit illud *objective falsum*: ut, *tellus est maior sole*.

CLV. *Omne iudicium vel verum est, vel falsum*; cum enim falsitas contradictorie opponatur veritati (§. 147. cor. 3.), fieri nequit, ut aliquod iudicium simul verum sit & falsum, aut nec verum, nec falsum; veritas hujus per se patet, nititurque duobus axiomatibus notissimis: *impossibile est, ut aliquid simul sit, & non sit: quodlibet est, vel non est.*

CLVI. Iudicium est *necessario verum*, si, ut ajunt, in *materia necessaria*, cum ita verum est, ut sine contradictione falsum esse nequeat; ut *circulus est rotundus: Deus existit*. Contra *necessario falsum*, sive in *materia impossibili*, cui veritas pro omni casu repugnat; ut *circulus est quadratus, Deus pendet ab alio*. Cum autem iudicio veritas ita competit, ut tamen pro aliquo casu sine contradictione falsum esse possit, aut

Quid veritas, & falsitas externa iudicii?

An omne iudicium verum aut falsum?

Quid iudicium necessario, vel contingenter verum, aut falsum?

vicissim, erit illud in *materia contingente*, atque *contingenter* verum, ut: *mundus existit*; vel falsum, ut: *tellus est major sole*.

COROLL. Cum propositio iudicium internum enunciaret (§. 94.), quæ de huius veritate, aut falsitate adhuc dicta sunt, ad eam quoque applicari debent.

SCHOL. Non est tamen semper primum tiro-
ni de cujuslibet propositionis veritate, aut falsitate iudicium ferre, quæ in re ne offendat, leges quaspiam suppeditabimus.

*Leges de dijudicanda Propositionum Veritate,
aut Falsitate.*

Quando
proposi-
tio falsa,
aut vera?

1.) *Propositio, quæ non est vera secundum omnes partes, & respectus, quos ex usu recepto affirmare, vel negare intelligitur, simpliciter inter falsas reponi debet.* Inde, falsa

Modalis?

est 1.) *propositio modalis* (§. 96.), si prædicatum non conveniat subjecto eo modo, qui enunciatur, etsi ceteroquin convenientia daretur, ut: *circulus est contingenter rotundus, mundus necessario existit.* 2.) *Propositi-*

Causa-
lis?

propositio causalis falsa est (§. 99.), si vel alterutra pars, vel ipsa ratio allata, falsa sit; ut: *anima humana est substantia, quia est corpus, vel est corruptibilis, quia est corpus*; ut igitur ejusmodi propositio vera sit, requiritur primum, ut utraque pars sit vera, deinde etiam ratio per particulam *quia* prolata debet esse vera, ac legitima ratio, cur in altera parte prædicatum conveniat subjecto; ut: *anima humana est incorruptibilis, quia est ens simplex.* 3.) *Propositio*

Copula-
tiva?

copulativa (§. 100.) falsa est, si vel unum illius membrum falsum sit; ut: *anima humana est spiritualis, & mortalis, vel pietas, castimonia, otium laudes ac præmia merentur*; ejusmodi nempe composita propo-

sitio est quasi aggregatum tot simplicium, quor sunt ejus subjecta, vel prædicata, unde qui compositam dicit veram, affirmat implicite singulas quoque simplices esse veras, quod utique falsum est, si vel una ex iis falsa sit. 4.) Contra vero ad veritatem dis-

Disjunctiva?

junctivæ (§. 101.) propositionis tantum requiritur, ut una disjunctionis pars vera sit, una enim solum disjunctarum partium in ea affirmatur; sic vera est hæc: *vel animus perit cum corpore, vel post mortem corporis est superstes*. Falsa autem erit, si nullum disjunctionis membrum vero sit, quod contingit, cum disjunctio est incompleta (§. cit. schol.); ut: *vel animus perit cum corpore, vel post mortem corporis erit beatus*. 5.) Pariter, ut propositio conditionalis (§. 98.) vera sit, non requiritur, ut id, quod in conditione, & conditionato ponitur, verum sit; sed solum, ut in conditione ratio conditionati contineatur, id est, ut ea detur connexio inter conditionem & conditionatam, ut unius veritas ab alterius veritate pendeat (conf. §. cit. cor. 2.). Ratio est: quia conditionalis propositio eam solum connexionem affirmat, abstrahendo, utrum conditioni, aut conditionato per se veritas competat; sic vera est hæc: *si anima humana est corpus, ea est corruptibilis*; & falsa hæc: *si anima humana est incorruptibilis, ea est spiritus*, nam adhuc posset esse ens simplex materiale.

Conditionalis?

2.) Si vera est propositio subalternans (§. Subalternantes? 112.), vera quoque est ejus subalternata; quod enim universaliter omnibus convenit, necesse est, ut etiam quibusdam sub iis contentis conveniat; ut: *omnis virtus est laude digna, aliqua virtus est laude digna*. Si subalternata falsa sit, subalternans quoque erit falsa; prædicatum enim, quod aliquibus non competit, multo minus omnibus com-

petere potest; ut: *aliquod vitium est honestum, omne vitium est honestum*. In materia contingente (§. 156.) potest subalternans esse falsa, quin ejus subalternata falsa sit; potest enim nota mutabilis convenire aliquibus, quin conveniat omnibus: ut, *homo est eruditus, aliquis homo est eruditus*. Non vero in materia necessaria, vel impossibili; ut: *omne vitium est honestum, aliquod vitium est honestum*. Ob eandem rationem potest in materia contingente vera esse subalternata, quin vera sit ejus subalternans; ut: *aliquis homo virtutem colit, omnis homo virtutem colit*. Non vero in materia necessaria; ut: *aliqua virtus est honesta, omnis virtus est honesta*.

COROLL. In omni igitur materia valet conclusio a veritate subalternantis ad veritatem subalternatæ, & a falsitate subalternatæ ad falsitatem subalternantis: sed a veritate subalternatæ ad veritatem subalternantis, & a falsitate subalternantis ad falsitatem subalternatæ tantum in materia necessaria concludere licet.

Contra-
distoria? 3.) Propositiones contradictorie (§. 114.) neque simul veræ, neque simul falsæ esse possunt; si enim primo simul veræ essent, idem de eodém cum veritate simul affirmaretur, & negaretur, adeoque idem simul esset, & non esset, quod fieri nequit ob axiomata notissima: impossibile est, ut aliquid simul sit, & non sit; sic si utraque vera foret: *omnis virtus est honesta, aliqua virtus non est honesta*, tum aliqua virtus esset simul, & non esset honesta, cum propositio universalis prædicatum affirmet implicite de singulis sub subjecto contentis (§. 106.). Si deinde simul falsæ essent, tum aliquid simul nec esset, nec non esset, quod repugnat axiomatico: quodlibet est, vel non est; sic si

falsa est hæc: *omnis virtus est honesta*, tunc, aliqua virtus non est honesta, & si iterum falsa est hæc: *aliqua virtus non est honesta*, tunc, aliqua virtus non est non honesta, id est, *aliqua virtus nec esset, nec non esset honesta*: idem clarius patet in duabus singularibus, quæ contradictoriis æquipollent (§. cit. cor. 2.); sit enim utraque vera, *Cicero est eloquens*: *Cicero non est eloquens*: erit igitur Cicero simul eloquens, & simul non eloquens: sit jam utraque falsa: erit igitur Cicero nec eloquens, nec non eloquens.

COROLL. 1. In omni igitur casu a veritate unius contradictoriæ ad falsitatem alterius, aut a falsitate unius ad veritatem alterius valet illatio.

COROLL. 2. Ex duabus propositionibus contradictoriis, una semper est determinate, & in se vera, altera determinate, & in se falsa: & quia idem est, seu propositio sit de præsentī, seu de præterito, seu de futuro, datur determinata in se veritas de futuris contingentibus; ut: *Cajus evadet eruditus*, *Cajus non evadet eruditus*, harum alterutra nunc jam, cum enuntiatur, quoad se determinate vera est.

4.) *Propositiones contrariæ* (§. 113.) *numquam possunt simul esse veræ*; si enim veræ forent, tunc, cum sint subalternantes, veræ quoque forent earum subalternatæ per L. 2. Id vero est, quod fieri nequit; nam in hoc casu, cum una subalternata sit alterius subalternantis contradictoria, duæ contradictoriæ fierent simul veræ, quod est contra L. 3. Sic si vera esset utraque contraria, *omnis virtus est honesta*, *nulla virtus est honesta*; veræ etiam forent earum subalternatæ: *aliqua virtus est honesta*, *aliqua virtus non est honesta*; & sic veræ simul forent duæ contradictoriæ; nam prima subalternata opponi-

Contradictoria?

tur contradictorie secundæ subalternanti, & secunda subalternata primæ subalternanti. At vero possunt propositiones contrariæ simul esse falsæ in materia contingente, non tamen in materia necessaria. Ratio primi est: quia, quod contingenter tantum speciei convenit, potest inesse aliquibus individuis, aliis non; unde tam universalis affirmativa, quam universalis negativa simul falsa esse potest; sic reipsa falsæ sunt hæ: *omnis homo est eruditus, nullus homo est eruditus*. Ratio secundi est: quia, quod integræ speciei necessarium est, singulis quoque individuis sub ea contentis competere debet; sic falsæ esse nequeunt hæ duæ: *omnis virtus est honesta, nulla virtus est honesta*.

COROLL. Igitur in materia necessaria rite concluditur ex veritate unius contrariæ ad falsitatem alterius, & a falsitate unius ad veritatem alterius; sed in materia contingente valet quidem illatio a veritate unius ad falsitatem alterius, non tamen vicissim a falsitate unius ad veritatem alterius.

Subcontrariæ? 5.) Propositiones subcontrariæ (§. 113.) numquam possunt esse simul falsæ; nam cum subcontrariæ sint subalternatæ, si eæ simul essent falsæ, falsæ quoque forent earum duæ subalternantes per L. 2. atque adeo duæ contradictoriæ forent simul falsæ, quod est contra L. 3. Sic si hæ duæ forent simul falsæ; *aliquis homo est eruditus, aliquis homo non est eruditus*; etiam simul falsæ essent earum subalternantes: *omnis homo est eruditus, nullus homo est eruditus*; sed inter has quatuor duæ semper sibi contradictorie opponuntur (conf. L. 4.) adeoque duæ contradictoriæ forent simul falsæ. Sed tamen verè possunt simul esse in materia contingente; non vero in materia necessaria. Ratio primi est: quia prædicatum, quod speciei contingenter con-

venit, potest convenire aliquibus individuis, aliis non; sic potest utraque esse vera: *aliquis homo est eruditus, aliquis homo non est eruditus*. Ratio secundi est: quia, quod necessario convenit, vel repugnat toti speciei, necessario etiam convenit, vel repugnat omnibus, & singulis individuis sub illa specie comprehensis; sic nequeunt simul esse veræ hæ duæ: *aliqua virtus est honesta, aliqua virtus non est honesta*.

COROLL. Igitur in propositionibus subcontrariis semper valet illatio a falsitate unius ad veritatem alterius; sed a veritate unius ad falsitatem alterius tantum in materia necessaria, non in contingente legitime concludo.

CLVII. Ratiocinium *interne*, seu *formaliter verum* est, cum conclusio sequitur legitime ex antecedente, id est, cum datur consequentia, seu connexio inter consequens, & antecedens (§. 125.), sive dein antecedens illud verum sit, sive falsum; ut *omne corpus est ens compositum; sed anima humana est corpus: ergo anima humana est ens compositum*. Hac porro consequentia deficiente illud erit formaliter falsum, sive deinde singula judicia vera sint, sive falsa; ut: *aliqua virtus est aestimanda; sed pietas est virtus: ergo pietas est aestimanda*: vel *aliquis homo est eruditus; sed Cajus est aliquis homo: ergo Cajus est eruditus*.

Quid veritas ratiocinii interna?

CLVIII. Ratiocinium *externe* seu *objective verum* est, cum singula ejus judicia objective vera sunt; ut: *nullum ens simplex est corpus; sed anima humana est ens simplex: ergo anima humana non est corpus*.

Quid externa?

COROLL. I. Ratiocinium igitur formaliter simul, & objective verum est, quando & singulorum judiciorum veritas habetur, & consequens legitimo nexu ex antecedente.

profluit, quale est illud (§. præ.) allatum.

COROLL. 2. Conferenti (§. 125. & cor.) parebit toties ratiocinium, aut ejus consequens esse objective verum, quoties illud est materialiter verum, atque adeo hæc duo pro eodem haberi posse.

CLIX. Cum ex vero antecedente falsum consequens legitime non deducatur (§. 125. cor. 3. can. 1. & 2.), necesse est, ut quando consequens ratiocinii est objective, sive materialiter falsum, etiam alterutrum, vel utrumque judicium antecedentis objective falsum sit; sic quia in superiori exemplo (§. 157. consequens): *anima humana est ens compositum*: objective falsum est, falsum quoque est aliquod antecedentis judicium, nempe hoc: *anima humana est corpus*.

COROLL. 1. In omni ergo ratiocinio formaliter vero valet illatio a veritate objectiva consequentis ad veritatem objectivam totius antecedentis, id est, utriusque judicii, quo antecedens constituitur, & vicissim; item a falsitate objectiva consequentis ad falsitatem saltem unius judicii in antecedente, ac vicissim.

COROLL. 2. Inde numquam in ratiocinio legitimo concesso jam antecedente negari potest consequens.

COROLL. 3. Cum argumentatio sit ratiocinatio verbis explicata (§. 127.), adhuc dicta ad eam quoque, & præcipue ad syllogismum, in quo pariter concessis præmissis conclusio negari nequit, extendi debent.

CAPUT III.

157

DE INDICIIS VERITATIS, CERTITUDE, ET EVIDENTIA.

CLX. Veritas cogitationum nostrarum per certa indicia, quæ rationem in se continent, cur ea adesse intelligatur, se manifestare solet; hæc sunt *sufficientia*, si nullo in casu fallant: *insufficientia* vero, si quandoque fallant.

Quid, & quotuplex indicium veritatis?

SCHOL. Cum in inquisitione veritatis, ad quam tironem philosophum præsentī hoc labore aptum efficere cupimus, totum denique negotium eo delabatur, ut iudiciorum nostrorum, sive, quod idem est, propositionum veritatem detegamus, jam fere de hac sola in futurum nobis sermo erit; quæ interea ad veritatem quoque idearum, ac ratiocinorum pertinebunt, facile a quovis dijudicari poterunt.

CLXI. Qui indicia sufficientia, quæ scit nullo in casu fallere, adesse cognoscit, ita iudicat de cogitationis suæ veritate, ut ne suspicionem quidem, etsi vellet, de opposita eidem falsitate prudenter in animum admittere possit, tumque dicitur *certus* esse de veritate; ut cum iudico: *totum majus est sua parte*. Qui indicia solum insufficientia perspicit, habet se modo opposito, estque *incertus* de veritate; ut cum iudico: *dantur in planetis incolæ*. *Certitudo* igitur est affectio quædam, sive status mentis sine omni sollicitudine, aut formidine de opposito veritati per indicia sufficientia cognitæ adhærentis.

Quid, certi u. do.

COROLL. I. Cum fieri possit, ut unus indiciorum, quæ adsunt, sufficientiam perspiciat, alter non; fieri quoque potest, ut de eadem veritate unus certus sit, al-

ier incertus ; sic olim incerti erant de veritate hujus propositionis: *dantur antipodes* ; nos contra jam certissimi sumus :

COROLL. 2. Affectionem meæ mentis præter me nemo cognoscit : igitur præter me nemo certitudinis meæ, neque ego alienæ judex esse possum ; cujuslibet proinde conscientia de sua certitudine judicat .

& quotu-
plex ?

CLXII. Certitudo ex indiciis sufficientibus orta est triplex ; vel enim ea indicia sunt ejusmodi , ut nullo absolute in casu fallere possint ; vel fallere non possunt , quamdiu universales naturæ leges obtinent ; vel denique secundum leges humanæ prudentiæ fallere nequeunt . In primo casu certitudo habetur *metaphysica* , sive *mathematica* ; ut in hac propositione : *circulus est rotundus* : in altero *physica* ; ut in hac : *corpus non suffultum cadit* : in tertio *moralis* ; ut in hac : *Cæsar Gallos devicit* .

SCHOL. Cum communes naturæ leges ab earum auctore Deo immutari possint , ut in metaphysica demonstratur , non est absolute impossibile , ut indicia certitudinem ceteroquin physicam habentia quandoque fallant . Verum non est propterea certitudo hæc minus vera ; adhuc enim omne prudens dubium de opposita falsitate excludit , cum aliunde constet Deum , qui mundum secundum leges universales a se statutas gubernat , non nisi raro , & ex causis gravissimis majestatem suam decentibus miracula patrare , atque illum eo etiam in casu alia suppeditaturum indicia , ex quibus facta legis communis mutatio satis manifeste colligi possit . Profecto tanta est hujus certitudinis firmitas , ut ad eam quotidianas vitæ nostræ actiones indubitanter conformemus , necve contrarium sine maximæ insanis nota agere possimus ;

quis enim, exempli causa dictum sit, ab insania procul abesse eum judicaverit, qui, dum domum quampiam transiens regulam ex recto decidentem, capitique directe imminentem conspicit, loco tamen cedere renuat, hoc ductus principio, non esse metaphysice certum, fore, ut regula lapsum ulterius continuet? Idem cum proportionem de altera, quam moralem diximus, certitudine intelligendum est; neque enim etiam humanæ prudentiæ assensum suadenti prudenter oblectari, aut de veritate dubitare possumus, ut contingit, cum factum quoddam historicum unanimi scriptorum testimonio confirmatur, vel quando rei oppositum rarissime prorsus, & non sine summa difficultate contingere potest; quæ enim raro, & non nisi difficillime eveniunt, ex legibus humanæ prudentiæ ad impossibilia referuntur: sic moraliter certi sumus, nec prudenter dubitamus de actu ponendo ab homine, qui, ubi multis jam annis validissimum ejusdem habitum contraxit, rursus in eam se occasionem immittit, in qua vehementer ad eum actum ponendum allicitur. Utramque vero hanc certitudinem firmitate longe superat metaphysica; quidquid enimingas, etsi ad ipsam confugas Dei efficacissimam potestatem, fieri tamen nequit, ut ejus indicia, ullo modo fallant; sic numquam efficies, *ut circulus non sit rotundus*, foret enim simul, & non foret circulus.

CLXIII. Certitudo (§§. 161. 162.) exposita refertur ad mentem, & vulgo *formalis* nuncupari solet: quod si ea, ut nonnullis placet, ad ipsa judicia, seu propositiones referatur, oritur inde certitudo *objectiva*; quæ tum habetur, cum pro judicii, aut propositionis veritate tales pugnant rationes,

Quid
certitudo
formalis
& objectiva?

quæ, si perspicerentur, indicia præberent sufficientia.

SCHOL. Omnis nimirum propositio indiciiis sufficientibus instructa dicitur *in se* vel *quoad se*, vel *objective* certa. Sed facile pater, hanc certitudinem, nisi cognoscatur, nihil prodesse, cum igitur ejus accedit cognitio, oritur in nobis certitudo *formalis*, quæ solum in vero sensu certitudo est, ac propositio compellatur *quoad nos* vel *subjective*, vel *formaliter* certa; sic propositio illa: *dantur antipodes*: etiam fuit olim *objective* certa, sed ubi instituta navigatione in certam eorum existentia cognitionem pervenimus, effecta est *subjective*, seu *formaliter* certa. Me porro non monente manifestum est, certitudinem quoque *objectivam* in triplicem illam classem distribui posse; est videlicet propositio *metaphysice certa*, cum absque contradictione falsa esse nequit: ut, *rotum est majus sua parte*; *physice certa*, cum secundum naturæ cursum falsa esse haud potest; ut, *globus ex tormento ejectus confriget murum sibi oppositum*; *moraliter certa*: cum secundum humanæ prudentiæ leges falsum subesse non potest: ut *Roma existit*.

Quid evidētia,

CLXIV. Cum indicia veritatis sufficientia clare, & distincte percipiuntur, mens nostra quodam quasi lumine collustratur, quod illi veritatem ita clare proponit, ut eam quasi oculis intueatur, nequeatque ullo modo eidem assensum denegare: lumen illud *evidentiam* voco.

COROLL. I. Evidentia igitur supponit certitudinem, eique suo quasi modo superadditur; atque inde omne iudicium, aut propositio evidens est quoque certa; at non vicissim omnis certa est evidens.

COROLL. 2. Cum evidentia certitudinem comitetur, ea quoque in *metaphysicam*, *physicam*, & *moralem*, ratione ipsius certitudinis habita (§. 161.) distribui debet.

SCHOL. Eadem est Tullii opinio, cum perspicuitatem illud lumen mentis appellat, „quod per se se ea, quæ sint, nobis ita, „ut sint, indicat.” Est nimirum evidentia menti fere id, quod lumen solis est oculis; uti destituti lumine in tenebris versamur, ita sublata evidentia caligo menti offunditur, & sicut apertis oculis objectum a sole illuminatum, atque ante eos positum necessario, modo animus majori ad alia attentione non distrahatur, videmus, nec nisi clausis, aut aversis ab eo oculis id impedire possumus, ita mente ad evidentiam applicata necessario rapimur, neque assensum, nisi intellectu ad alia converso, negare possumus.

CLXV. Cum mens hoc lumine collustrata & quotu-
veritatem perspicit, consequens est, ut ei-
dem convenientia, aut repugnantia prædica-
ti cum subjecto quam clarissime reluceat:
duplici id modo contingit; vel enim ex sola
comparatione, unicoque quasi intuitu pate-
fit ideam prædicati contineri in idea subje-
cti, aut ab ea excludit; ut in his judiciis:
circulus est rotundus; *ens simplex non est*
corruptibile: tumque habetur evidentia im-
mediata: vel in idea subjecti distincte per-
spicitur ratio, ob quam eidem idea prædica-
ti certissime vel conveniat vel repugnet; ut
in hoc judicio: *anima humana est incorru-
ptibilis*; in idea enim animæ humanæ con-
tinetur *simplicitas*, quæ est ratio invicta,
cur rei competat *incorruptibilitas*; tumque
adest evidentia *mediata*.

SCHOL. Inde quoque propositio alia est im-
mediate evidens, cum videlicet intellectus

solum terminis clare, & distincte cognoscitur esse vera, ut sunt omnia axiomata; *e. c. totum est majus sua parte*: alia *mediate* evidens; quæ mediante quadam ratione, sive, ut ajunt, medio termino, evidentiam obtinet: ut hæc: *anima est incorruptibilis*, ubi ejus simplicitas fuerit evicta (conf. §. 115.).

An ea in
proposi-
tionibus
falsis?

CLXVI. *Evidentia non reperitur in propositionibus falsis*: Evidentia non datur, nisi in propositionibus certis (§. 164. cor. 1.); certæ autem propositiones nec sunt, nec umquam possunt esse falsæ (§. 163. schol.): igitur evidentia non reperitur in propositionibus falsis.

Solvitur
dubium.

SCHOL. Veritas hujus theorematis ex eo quoque patet, quod falsitas, cum mera sit veritatis negatio, sive carentia, si ita loqui liceat (§. 147. cor. 2.), nihilum sit; omne autem, quod evidenter perspicitur, necessario sit aliquid. Quid quod, si propositiones evidentes ullo in casu falsæ esse possent, saltem quandoque inter eas repugnantia deprehenderetur, qualis frequentissime inter obscuras occurrit; at vero evidentia evidentibus semper sunt consentanea, hominumque actiones, experimenta, & artium regulæ, quæ evidentia reguntur, constanter rite procedunt, ut quotidiana docet experientia. Brevitatem quidem, ac imbecillitatem mentis nostræ causantur nonnulli, eaque putant effici posse, ut ab ipsa quandoque evidentia in errorem inducamur: verum inde quidem fit, ut non omnia, aut plura simul evidenter percipiamus, non tamen, ut vel prorsus nihil evidenter percipiamus, vel ut ea etiam falsa sint, quæ evidenter percipimus, quemadmodum fere imbecilla oculorum nostrorum acies in causa est, ut

valde distantia, aut minuta nimis objecta non videamus; non vero, ut nihil cernamus, aut ut de iis dubitemus, quæ, cum debitam habeant comparate ad oculum positionem, clare videmus. Cum igitur prælucente evidentiâ numquam erremus, necesse est, ut spurio quodam lumine falsoque splendore deludantur ii, qui, quando quidpiam quam maxime perspicuum esse autemant, in errores tamen prolabuntur. Evidentiâ eo casu solum *apparentem* adesse dicimus, quæ, cum reapse nulla sit, idoneum veritatis testem agere nequaquam potest. Contigit id Malebranchio, qui adeo evidenter se cognovisse putavit, nos omnia in Deo videre, ut asseruerit, malle se vocari sanaticum, quam de sententia decedere; contigit id Cartesio, qui manifestam in vacuo repugnantiam evidenter deprehendisse sibi visus est; contigit Leibnitio, ac Wolfio, dum maximam mundi hujus perfectionem demonstrarunt; contigit id denique compluribus aliis, ceteroquin doctissimis viris, iis præsertim qui vel de quadratura circuli, vel mobili perpetuo ab se perspicue invento gloriati sunt. Verum hæc nos eo abripere non debent, ut in scepticismum delabamur, atque cum Academicis pronunciemus: falsa ita esse finitima veris, ut ne per evidentiâ quidem rite discerni queant. Quin potius eo curæ nostræ dirigantur, oportet, ut certos, constantesque characteres, qui omni in casu evidentiâ *veram* ab *apparente* discernant, detegamus. Hanc in rem sequentes tironi philosopho, suppeditamus.

Quid evidentiâ
apparentis?

Cic. 99.
accid.
l. 2.

Characteres verae Evidentiæ.

1.) *Vera evidentiæ longe vivacius nos afficit, fortiusque in assensum rapit, ac apparet, quacum major perpetuo obscuritas conjuncta est.* Equidem non diffiteor, etiam per evidentiæ veram nos non semper cognoscere objectum omni ea claritate, qua illud in se cognoscibile foret; unde hoc sensu omnem evidentiæ quæpiam obscuritas comitatur. At hoc non efficit, quo minus ipsam prædicatæ cum subjecto convenientiæ clarissime perspiciamus, mensque attenta eo in lumine prorsus conquiescat; haud aliter fere, ac ut nobis objecta diversimode a sole illuminata conspicientibus obtingit; non enim minus vere cernimus objectum sole oriente; quam eo in meridie constituto, licet tum illud minori longe cum claritate nobis repræsentetur. Evidentiæ contra apparet in ipsa idearum convenientiæ exhibenda obscuritatem præse fert, neque umquam menti accurate rem expendenti penitus satisfacit.

2.) *Vera evidentiæ claritas menti tranquilla atque ab affectionibus perpurgatæ semper apparet eadem; fucatus contra evidentiæ apparentis splendor examen sæpius repetitum haud sustinet; mutatur enim, minuitur, ac evanescit etiam, ubi rem frequentius, atque diversa ex parte contemplamur, non secus ac colores illi, qui pro mutato oculi versus objectum situ aut variantur, aut prorsus disparent.*

3.) *Evidentiæ vera eadem quoque est omnibus doctioribus, eaque in arte versatis, si modo attentum præbeant animum.* Haud quidem negavero, posse nonnumquam eandem propositionem uni, non item alteri, esse evidentem; sed id tum solum contingit, cum aut

termini ipsi, aut rationes invictæ defectu attentionis debitæ, quam præpotentes animi affectiones, præjudicia, aliæque causæ sæpius impediunt, non satis perspiciuntur; ubi vero requisita adfuerit attentio, evidentia vera sanum cujusvis intellectum perstringere, atque occulta quadam vi in assensum inclinare debet. Contrarium accidit apparenti solum evidentiae; neque enim vanus splendor compluribus aut potest, aut solet idem videri; id quod tanta discordia, quam in eruditorum circa res nondum evidentes judiciis quotidie experimur, satis comprobatur.

4.) *Evidentia vera numquam præbet fundamentum falsæ conclusionis inde legitime deducendæ*; cum enim evidentia vera non derur, nisi in propositionibus veris (§. 166.); ex vero autem falsum legitime non sequatur (§. 125. cor. 3.), patet propositum. Quare si ex propositione, quæ tibi evidens videtur, nihil absurdi aut a te, aut ab aliis umquam deduci posse clare, & distincte appareat, eam evidentiam verissimam putato.

CLXVII. Veritas est vel interna tantum, vel etiam externa (§. 149.); de utraque certitudinem, ac evidentiam consequi possumus: igitur necesse est, ut dentur utriusque indicia sufficientia. Ea proinde duplicis sunt generis, alia nimirum de mera objecti possibilitate, aut ejusdem etiam intra nos existentia; alia de reali objecti extra nos existentia nos certos efficiunt.

SCHOL. Indicia sufficientia universim omnia, sive, ut aiebant, omne veritatis *criterium* olim sustulerunt Academici, & qui dein errorem hunc ad insaniam usque provexerunt, Pyrrhonicæ, hoc unum hominibus certum esse contendentes: *nihil esse certum*. At vero doctrina hæc adeo per se absurda

Quæ
indicia
veritatis
internæ
& exter-
næ?

est, ut non tam refutatione, quam medico egere videatur; quid enim? si scepticū hoc axioma: *nihil certum est*: indubitanter ut verum assumunt; si aliarum sectarum dogmata ut falsa coarguunt, vel habent criterium quoddam, per quod hic falsitatem a veritate, ibi veritatem a falsitate discernant, vel non? Si primum: tollendo criterium illud stabiliunt, ac propterea manifestæ contradictionis rei tenentur; si alterum: impudentissimæ audaciæ notam haud effugiunt, cum ea præfractè jactitent, quæ adstruendi omni prorsus ratione destituuntur. Historiam scepticismi copiose, ac erudite pertractavit Gassendus. Sed missis his (neque enim logicam inaniter contentiosam ad Stoicorum, aut Peripateticorum normam conscribendi animus est) indicia sufficientia quæcumque ad hæc quatuor verissime reduci autumo; ad *sensum* videlicet *intimum*, *sensum naturæ communem*, *testimonium sensuum externorum*, *auctoritatem* denique *Dei*, *hominūque*, quorum primum veritati internæ; reliqua vero externæ infallibiliter detegendæ inserviunt: de his jam ordine agam, sequarque hac in re mentem Cl. P. Buffier, ex cuius præstantissima de primis veritatibus doctrina in commodum tironum, quorum egregiis hisce principiis solide imbui quam maxime interest, complura desumam. Si quis dissentire velit, atque ad inanes de verbis contentiones deflectere, non morabor, id solum peto, ut pacato animo, ac veritatis unice studioso, positisque omnibus anticipatis opinionibus serio conscientiam suam consulat, dispiciatque attente, quid illud sit, propter quod de aliquorum judiciorum veritate prorsus non dubitet? Næ is semper unum ex his indiciis, ne-

que ullum umquam aliud, quod ad ea reduci nequeat, adesse deprehendet.

C A P U T IV.

DE SENSU INTIMO, ET SENSU NATURÆ COMMUNI.

CLXVIII. *Sensus intimus est indicium sufficiens veritatis internæ*; nequit enim ullo in casu fallere. Per sensum quippe intimum percipimus convenientiam, sive repugnantiam idearum inter se, existentiam, actualesque mentis nostræ affectiones (§. 73.), atque adeo id, quod nobis intime præsens est, & quidem ea evidentiae claritate, ut majoris per naturam nostram ne capaces quidem simus; nihil enim datur, quod nos propius, certius, ac efficacius vincat de convenientia cogitationis nostræ cum suo objecto: ipsum siquidem objectum, nostraque cogitatio, atque sensus hic intimus, quem de ea habemus, aliud reipsa non sunt, quam nosmet ipsi, qui cogitamus, existimus, atque intimum ejus sensum habemus. Jam vero qui fieri quærit, ut in iis fallamur, quæ tanto nobis splendore sese manifestant? Est profecto id ita cujusvis menti impressum, ita per se clarum, ut quidquid in confirmationem adduci posset, non tam ad declarandum, quam ad obscurandum serviret; quærat quispiam rem ipso solis lumine clariorem, næ is densissimis sese tenebris involvet.

Sensus
intimus
quale ve-
ritatis in-
dicium?

COROLL. Per sensum igitur intimum a nobis evidenter cognoscitur veritas propositionum universalium per se evidentium, seu axiomatum abstractorum, quale est illud: *impossibile est idem simul esse, & non esse*; cum in his nihil consideretur

præter convenientiam idearum, id est, actionum nostrarum; eorum item, quæ in anima nostra contingunt, ut eam existere, cogitare, dolere, lætari, libertate polle-
re &c. Et denique eorum, quæ ex his legitima demonstratione deducuntur, ut sunt conclusiones pure geometricæ, ac metaphysicæ; quin in his omnibus ullum respectum ad realem objecti extra mentem nostram existentiam habeamus.

SCHOL. Qui nullam aliam evidentiam, præterquam eam, quæ in sensu intimo fundatur, admittunt, eumque hac de causa unicuique omnis veritatis criterium esse autumant, coguntur, si sibi concordēs esse velint, omnem certitudinem evidentem eorum negare, quæ nec in se experiuntur, nec ex interna experientia legitimo ratiocinio concludunt. Jam vero sunt quam plurima præterea quorum evidentiam nemo ullus, qui quidem sana ratione utatur, in dubium vocare queat. Investiganda igitur nobis sunt indicia sufficientia veritatis externæ, quorum nimirum ope de reali objecti extra nos existentia iudicia certa, ac evidentia conformare liceat, & præcipuo quidem loco de iis, quæ maxime ad nos attingunt, atque ad usum, vitæque nostræ rationes cumprimis necessaria sunt.

Quid
sensus
naturæ
communis?

CLXIX. *Sensus naturæ communis* est quædam animi comparatio ipsius naturæ habitu cunctis hominibus indita, per quam illi rationis usum consecuti circa res quasdam, quæ non sunt objecta sensus intimi, quæque sub omnium captum, atque intelligentiam cadunt, commune; & in universum consentiens, atque a nullo alio principio pendens iudicium ferant; ejusmodi iudicia sunt: *existunt præter me alii homines in mundo: omnes homines non conspirant ad me fallendum,*

ium, & decipiendum, in iis, quæ concordia-
judicio asserunt: ex fortuito partium con-
cursu non potest exurgere totum aliquod ordi-
natum, quod constantes, ac determinatos mo-
tus edat.

CLXX. *Existit sensus naturæ communis*; An ex-
stat?
cum enim, experientia perpetua omnium sæ-
culorum id contestante, deprehendantur inter
homines, ceteroquin ætate, genio, tempera-
mento, educatione, affectionibus, moribus-
que inter se infinitis prope modis discrepan-
tes, judicia quædam constanter consentien-
tia de rebus compluribus, quæ sensu intimo
non percipiunt, etsi reliqua eorum judicia
sint diversissima, necesse prorsus est, ut sit
commune quoddam omnibus principium, in
quo ea innitantur; universim enim quivis ef-
fectus generalis generalem quoque causam
requirit, sicut ab opposito ex diversitate ef-
fectuum diversitatem causarum, & ex diver-
sitate judiciorum diversitatem quoque prin-
cipiorum rite colligimus. Jam vero quod po-
test aliud esse, vel cogitari commune omni-
bus hominibus principium, nisi natura ra-
tionalis, ob quam sunt, & dicuntur homi-
nes? Licet enim naturæ diversorum hominum
in quam plurimis differant, ut fere eorum
facies, semper tamen in essentialibus, quæ
naturam nimirum humanam, & rationalem
constituunt, perfecte conveniunt, ut iterum
diversæ hominum facies in præcipuis parti-
bus haud discrepant: extat igitur principium
quoddam in ipsa natura humana, & ratio-
nali fundatum, id est, quædam animi com-
paratio, seu propensio naturalis, ex qua ejus-
modi judicia omnibus communia profiscun-
tur. Et profecto sine hac potior hominum
pars deficientibus principiis, sive necessariis
adjumentis nullum judicium verum, ac cer-
tum ferre posset de rebus extra se esistenti-

bus, quæ tamen ad vitæ consuetudinem apprimè sunt necessariae; quod qui asserit, asserat quoque, necesse est, maximam hominum rationalium partem ratione, actionumque usu destitui.

SCHOL. Etsi vero hæc naturalis animi pro-
pensio ad rite de objectis quibusdam judi-
candum omnibus hominibus indita est, non
tamen in omnibus incorrupta permanet;
cum enim homines liberrate polleant, fieri
potest, ut quis distortis animi affectionibus
nimium indulgendo contrarios habitus con-
trahat, suamque naturam magnopere de-
pravet; atque inde fit, ut numquam fere
omnes prorsus homines in idem iudicium
conspitent, neque sit opinio quantumcum-
que absurda, quæ non aliquos saltem fau-
tores nacta fuisset. At vero nemo propte-
rea inferat consentiens ceterorum plurium,
atque magis proborum iudicium non esse
naturale; sensus enim hic naturæ, qui nos
ad recte iudicandum impellit, conferri de-
bet cum alio naturæ sensu, qui nos ad a-
mandum, ac desiderandum incitat: profe-
cto quis negaverit naturalem esse parentum
in proles suas amorem? Interea tamen no-
vimus parentes fuisse, in quibus sensus hic
naturalis prorsus suppressus, ac extinctus
fuit. Ita igitur non minus commune quo-
que plurimorum in unum consentiens iudi-
cium inter naturalia reponi debet, tamen-
si nonnulli ab eo dissentiant. Quamvis vi-
delicet natura regulariter, & ordinate in
suis operibus procedere soleat, possunt
tamen ea quandoque deformia, & ex par-
te imperfecta esse; & sicut in corporibus
nonnumquam monstra, & abortus depre-
hendimus, ita pariter monstra subinde, &
animorum abortus inveniuntur, quæ tamen
non tam naturæ tribuenda sunt, quam ipsis

hominibus, qui ob perversum libertatis usum lumen illud a natura insitum extinguunt, ac frena pravis affectionibus laxando propria culpa in monstra degenerant. Porro depravationis hujus præcipuos fontes detegere non erit inutile.

Fontes corrupti Communis nature Sensus.

1.) *Cupiditas quæpiam sciendi inordinata*, ac justos ultra limites prosecta, quæ nos impellit, ut curiosius ea perscrutemur, quæ mentis humanæ captum longe excedunt; unde consequitur, ut tenebris, ac obscuritatibus involuti, omnisque ductu luminis privati in gravissimos errores cæcorum instar prolabamur.

2.) *Vanitas quædam ridicula, inanisque gloriæ studium*, quo fit, ut ab aliis, ac præcipue quidem ab indocto vulgo discerni cupiamus: inde a judiciis communius receptis discessionem facimus, aliterque de rebus omnium captui expositis, quam vulgus soleat, pronunciamus; simul vero, dum elatione animi aliorum sensa rejicimus, communem naturæ sensum repudiamus.

3.) *Insita quædam jam ante menti opinio*, & fortuita quasi adhesio ad sectam quampiam, quæ se novitate, falsoque doctrinæ, ac veritatis splendore aliquo tempore commendat; cujus rei exemplo Academici olim, & Sceptici fuerunt. Cum enim se solos sæculi sui eruditos, ceterorumque magistros jactarent, omnes ab ea doctrina alienos superbe præ se despiciebant, & quasi commiseratione dignos intuebantur, ab iisdem ipsis interea jure merito derisi.

4.) *Studium proprii commodi*, quod frequenter, repudiato communi naturæ sensu, nos reperturos speramus; sunt nimirum ve-

ritates quædam in sensu naturæ fundatæ hominibus voluptatum studiosis per quam molestæ, propterea quod, si iisdem assentirentur, ex earum præscripto vitæ suæ rationes instituere, moresque etiam suos ad eas conformare cogerentur; quare, ut gravissimum hoc ab humeris suis jugum avertant, veritatem etiam clarissimam contra communem omnium fere hominum consensionem agnoscere nolunt. Ita olim Epicureus ille apud Tullium adversus Dei providentiam depugnavit: „Imposuistis in cervicibus nostris sempiternum dominum, quem dies, & noctes timeremus.” Habet quippe voluntas ingens in intellectum imperium, eoque frequenter efficit, ut rejectis veritatibus evidentissimis opiniones quam maxime absurdas, præsertim si suavem sensui voluptatem polliceantur, ambabus quasi ulnis amplectatur.

*De nat.
Deor. l. 1.*

*An um-
quam
fallit?*

CLXXI. *Sensus naturæ communis nunquam fallit*; cum enim hæc animi comparatio, seu propensio ad judicandum de rebus quibusdam, quando ex menti debite proponuntur, fundetur in natura rationali, si ea umquam falleret, ipsa natura rationalis nos per sese in errorem induceret; atqui hoc fieri nequaquam potest: foret quippe eo in casu natura rationalis, eodemque tempore non rationalis, quod contradictionem implicat; rationalis quidem; est namque natura humana, quam qui ratione expoliat, hominem bel-luis æquiparat: non rationalis vero; cum enim error rationi, ratioque errori adversetur, necesse est, ut ea, quæ nos per sese in falsum judicium impellit, natura ratione careat. Est hæc veritas omnium fere antiquorum philosophorum suffragio confirmata; audi Tullium, „Omni autem in re consensus omnium gentium lex naturæ putanda est.” „Multa dare solemus, inquit Seneca, præsumptioni

*Qu. 1. 1. 1.
l. 1. c. 13.
Ep. 17.*

„ omnium hominum: apud nos veritatis argumentum est, aliquid omnibus videri. ”

COROLL. Nullum igitur iudicium, ad quod formandum a sensu communi inducimur, ullo in casu potest esse falsum, atque adeo fieri nequit, ut quis vere iudicet de re, quæ sub omnium intelligentiam æqualiter cadit, quando a communi plurimorum sana ratione utentium iudicio dissentit; aut comprobet, necesse est, in se solum, ac in parvo ipsi similium manipulo residere naturam rationalem, reliquis vero omnibus, ac proinde toti fere generi humano eandem deesse.

SCHOL. I. Profecto ut tanta in diversis hominibus circa res quam plurimas iudiciorum diversitas non potest non esse evidens falsitatis character; ita ab opposito in ipsa hac ingeniorum, affectionumque diversitate perpetuus omnium, aut fere omnium in idem iudicium consensus summa cum ratione pro certissima veritatis nota accipiendus est, quique eam respuit, ab insania procul abesse non potest. Veritati huic, posita jam Dei existentis demonstratione, maximum inde robur accedit, quod hæc naturalis animi comparatio non provenire queat, nisi ab ipso naturæ auctore cujus veriloquio, providentiæ, & bonitati nullo pacto congruit, ut eas nobis facultates naturales indat, quibus etiam bene utentes directe in errorem impellamur; talis enim error in ipsum redundaret, ipseque nos fallere dicendus foret, quod vel cogitare absurdissimum est. Ex his manifeste conficitur, iudicia ex sensu communi profecta non minus certa esse, atque ea, quæ ex sensu intimo feruntur: est tamen inter illa nonnullum evidentiae discrimen, hæc quippe evidentia claritatis maximæ pollent (§.

168.), ut ne umbram quidem dubii admittant, quod de illis ex vero dici nequit; cum enim judicia in sensu communi fundata respiciant, objecta extra nos existentia, non possunt vivacem adeo in nobis impressionem efficere, ut illa, quorum objectum ipsum intra nos existit. Inde tamen nemo inferat, judicia sensus communis non esse vero sensu evidentia: nam æque naturaliter, infallibiter, & necessario intellectum ad consensum determinant, minorque ejusdem luminis vivacitas efficit solum, ut objectum minus clare, non autem, ut minus vere, ac realiter cernatur. Æque proinde insipientium in numero collocari meretur, qui judicia sensus communis serio negare, aut in dubium trahere tentat, atque is, qui judiciis e sensu intimo profectis assensum abnuere præsumit, hoc solum discrimine; quod hic a se ipso quodam modo discedere; ille vero rationi, ipsique naturæ rationali renunciare censendus foret.

Quomodo
objectionibus
occurrendum?

SCHOL. 2. Verum adhuc disputata non omnibus omnino probantur; contendunt enim nonnulli, complura judicia omnibus fere hominibus communia falsa fuisse, ac erronea; cujusmodi fuerunt de polytheismo, in quem omnes olim nationes, excepta solum Judaica, conspirarunt: de motu solis annuo circa tellurem; de non existentia antipodum: & denique, nonne ajunt, commune fere omnium hominum judicium est solis diametrum vix duos pedes æquare, ac nisi a philosophis contrarium evidenter demonstraretur, omnes ad unum homines sibi relictis id firmissime judicarent? At vero hæc, & similia judicia ex sensu naturæ communi profecta esse vehementer nego; nam ut ab eo, quod postremum est, exordiar, hunc

esse sensum communem eorum, qui, ut de magnitudine solis iudicium ferant, idonei sunt, aperte falsum est. Etenim quis est etiam de rudissima plebe, qui hac in re non philosophorum potius, ac astronomorum, quam suorum oculorum testimonio fidem habeat? Quis umquam seria mente affirmavit, solis diametrum sine ratione 2. pedibus majorem haberi? Aut fingamus fuisse talem: an non uno quasi momento errorem dedoceri potuisset provocando ad experientiam, qua certissime constat, objectum quodcumque pro ratione majoris distantiae minus apparere? Profecto vel imperitissimus novit plerumque suis se oculis de vera rerum magnitudine decipi; quare quo tempore absque consideratione censeat solis diametrum duos duntaxat pedes complecti, ita simul comparatus est animo, ut tantilla attentione accedente in contrariam partem judicando abeat, priusque iudicium erroris condemnet: illud igitur primum iudicium non profisciscitur ex sensu naturæ communi, cum evidenter erroris convincatur, per ipsum communem, & puriorem quasi naturæ rationalis sensum, qui per attentionem paullo accuratorem obtinetur. Atque idem sentiendum est de reliquis erroribus popularibus, qui ratiocinii non adeo sublimis, aut notæ alioquin experientiæ ope nullo prorsus negotio refutantur, ut polytheismo contingit, qui longe clariori, ac evidentiori ratione ad rudium etiam captum refelli potest; quamquam & is non ubique receptus fuerit, & ubi viguit, consociatus erat cum aliqua notitia unius, supremi, & præpotentis Dei, Deorum, hominumque parentis, ut suo loco in metaphysica demonstratur.

Addunt deinde axioma pervulgatum, *veritatem non esse in multitudine querendam*, vel cum Cotta quaerunt, num res tantas opinione stultorum placeat judicari? Sed his alio quoque axioma occurri potest, videlicet: *vox populi; vox Dei*. Ut igitur superiori dicto sua constet veritas, id ita accipiendum est, ut intelligatur ea veritas, ad cujus investigationem singularis attentio, major ingenii vis, difficilius ratiocinium, aut exquisita experimenta requiruntur, quæ omnia utique frustra in multitudine desiderantur. At veritas, quæ sola mentis applicatione, absque longiori ratiocinatione cognosci potest, æque in vulgo, si is naturæ ductum sequatur, quam in sapientissimo quovis philosopho residere potest: judicia proinde vulgi in sensu naturæ fundata nequaquam inter stultorum opiniones, ut disputationis gratia contendit Cotta, referri possunt. Denique, ut similibus objectis penitus satisfiat, rite advertendum est, non agi hic de quacumque hominum singularium, sed de ipsa naturæ humanæ, ac rationalis auctoritate, neque hanc per qualemcumque majoris hominum partis in aliquod judicium consensionem, sed per eam solum, quæ ex ipsa naturali propensione omnibus indita proficiscitur, constitui: quare philosophi quam maxime interest, nosse ea, quorum ope duplicem hanc hominum consensionem accurate discernere queat; eum in rem sequentes ei suppeditamus.

Characteres. Consensionis in sensu naturæ fundatæ..

I.) Consensio ex sensu naturæ communi proficiscitur, si nullam habeat aliam originem, quam quæ est ipsius naturæ, ac sponte prorsus, & naturaliter, sine ulla institu-

tionem, ac doctrinam in hominum animis exoritur; sic *Dei existentia, religionisque naturalis* nullam causam, nisi naturam, nullum initium, nisi naturæ originem depredimus: „nec enim id collocutio hominum, *Cic. de*
 „aut consensus efficit, non institutis opinio *tusc. l. x.*
 „est confirmata, non legibus “ contra *poly-*
theismi, divinationis causas, initia, progressus obscure saltem novimus; novimus item, ex quo principio orta sint illa iudicia: *solem motu annuo circa tellurem moveri; non dari antipodes:* illud nempe ex sensuum apparentia, quæ, nisi speciali animi attentione vulgi captum potissimum superante corrigatur, frequenter in errorem inducit; hoc: quod præiudicio quodam abrepti intelligere non potuerint, quomodo homines, qui ob gravitatem suam constanter deorsum tendunt, in inferiore telluris parte hære, & ambulare possint.

2.) Si ea consensio sit universalis, ac per omnes omnino nationes diffusa, non obstante temporum, ac locorum diversitate, ingeniorum, ac morum repugnantia, propriorum etiam commodorum oppositione; unde Cicero: „firmissimum hoc argumentum afferi *L. 6.*
 „videtur, cur Deos esse credamus, quod
 „nulla gens tam fera; nemo omnium tam
 „sit immanis, cuius mentem non imbuerit”
 Deorum opinio. „Item, nulla gens est, ne- *De leg.*
 „que tam immansueta, neque tam fera, quæ *l. i. c. 8.*
 „non, etiamsi ignoret qualem Deum habe-
 „re deceat, tamen habendum sciat.” Id si obtineat, haud oberit, si in quavis etiam natione nonnulli dissentiant, si modo illi, qui reliquos aut doctrinæ præstantia, aut morum probitate antecellunt, præ reliquis quoque eisdem iudicio firmiter adhæreant; quid enim natura doceat, ex ea desumi debet, quæ minimum a naturali sua perfectione recessit.

3.) *Si iudicium communi consensione fuerit receptum, & retentum sine speciali sectæ, cujusdam commodo, neque impugnatum, nisi ab eo, qui palam præjudicatis opinionibus, ac sinistris affectionibus agitur, aut principia alias jam a se stabilita, quibuscumque sumtibus, pertinaciter defendere constituit, opponentibus sese illico omni ex parte melioris notæ sapientibus.*

4.) *Si sensus ille sit connexus cum aliis veritatibus certis, ac ab ipsa natura dictatis, tamque alte animo infixus, ut nulla vel industria, vel violentia prorsus extirpari queat, quin identidem etiam invito redeat, actionesque hominis quotidianas, cessante saltem affectionum tumultu, clam dirigat, ac gubernet.*

5.) *Si sensus ille procedente tempore, crescente litterarum, morumque cultura crescat, roboretur ampliusque inter homines diffunditur; verissimum enim est id, quod ait Tullius „ id nisi cognitum, comprehensumque „ animis haberemus, non tam stabilis opinio „ permaneret, nec confirmaretur diuturnitate „ temporis, nec una cum sæculis, ætatibus „ que hominum inveterare potuisset. Etenim „ videmus ceteras opiniones fictas, atque „ vanas diuturnitate extabuisse; quis enim „ hypocaustum fuisse, aut chimæram putat? opinionum enim commenta delet dies, „ naturæ judicia confirmat. ”*

De nat.
D. I. 3.
c. 3.

An sensus communis indicium veritatis sufficiens?

CLXXII. *Sensus naturæ communis est indicium sufficiens veritatis, externæ. Etenim sensus hic nunquam fallit (§. 171.); ejusmodi vero indicium veritatis est sufficiens (§. 160.): igitur sensus naturæ communis est indicium sufficiens veritatis, non internæ (§§. 168. 169.): ergo externæ (§. 148.).*

Quod obiectum sensus

SGHOL. I. *Sensum naturæ communem dico indicium sufficiens veritatis externæ; non*

enim existentia alicujus objecti extra nos ^{com-} satis demonstratur per solam idearum, quæ ^{nis?} intra nos sunt, convenientiam, sive per nudam existendi possibilitatem sensu intimo cognitam; sed solum legitime concluditur ex sensu, quem natura omnibus hominibus indidit ad formandum tale circa eam judicium. At quæret aliquis: omnesne ergo veritates externæ sensu communi decidendæ erunt? Cui respondemus, videri quidem omnes ultimo ad eum tandem reducendas esse, cum ipsum sensuum externorum testimonium, hominumque auctoritas, de quibus paullo post agetur, omne suum robur, ac pondus ab eo mutuentur; interea tamen illa solum proprie dicuntur *objecta* esse sensus communis, ad quæ nos natura instituit, lumineque suo dijudicanda proxime dirigit. Sunt nimirum veritates quæpiam externæ ita alte animo impressæ, ut citra maximam mentis aberrationem negari a nobis, aut in controversiam vocari nequeant; quæ, licet per sensum intimum non reluceant, adeo tamen obviæ sunt, ut nullo prorsus sublimi ratiocinio egeant, sed prona plane conclusione a quovis etiam rudiori, modo sana utatur ratione, facillime formanda deprehendantur; quæ denique ad humanæ vitæ usum, & consuetudinem, ad morum quoque honestatem vel apprime necessariæ sunt, vel saltem proximam cum iis connexionem habent. Ejusmodi judicia sunt: *dantur præter me in mundo alia entia, & præcipue homines, qualis ergo sum: existit aliquod ens supremum, cujus providentia tota hac rerum universitas sapientissime gubernatur: Numen supremum aliqua religione coli debet: datur post hanc vitam alia, in qua justa erit representatio præmiorum & pœnarum.*

&c. &c. Quæ talia non sunt, quæque, quod sublimiorem exigunt ratiocinationem, inter ea referri nequeunt, ad quæ proxime a natura ordinamur, sensu communi dijudicari non possunt; qualia sunt ea, quæ supra attulimus *de motu, ac magnitudine solis; de incolis in America, & his similia.*

Quomodo
sensus
commu-
nis dete-
gendus?

SCHOL. 2. Restat ad extremum eximendus scrupulus iis, qui sensum naturæ communem de subsellio indiciorum veritatis sufficientium ideo solum deturbant, quod putent, fieri non posse, ut iis umquam certo, ac infallibiliter detegatur; qui enim, ajunt, fieri potest, ut sciamus, quid circa objectum quoddam determinatum omnes homines senserint, cum & sensus iste ipsis internus, & maxima hominum pars extra nostrum commercium posita sit? At vero, etsi omnes homines, eorumque interna sensa non pernoscamus, sine erroris tamen formidine concludimus, eos habere quoque animam rationalem; propriæ felicitatis desiderio teneri; alimentis ad vitam sustentandam secundum naturæ cursum indigere, & quæ sunt similia. Ita prorsus de sensu communi discurrendum: non eget ille anxia inquisitione, ut detegatur, se ipsum cuilibet animum advertenti manifestat; est enim adeo evidens, atque in quovis reperitur homine, ut ii, qui dissentiunt, rationem exuisse videantur. Sunt nempe quædam quasi a natura nobis insculpta, quibus repugnare nequaquam possumus, & quidem eo minus, quo magis constanti experientia confirmantur, quin ea a quopiam sanæ mentis in dubium vocari, aut impugnari intelligamus. Adjumentum igitur præcipuum, latentem circa nonnulla objecta aliorum sensum pernoscendi est ipsa propensio naturalis, cujus nobismet ipsis cog-

scii sumus: examinemus nostram et animi
sensa, & positis omnino præjudiciis videamus,
num quasi occulta quadam naturæ vi
ad idem de hoc, vel illo objecto iudicium
semper ferendum impellamur; hanc animi
comparationem si in nobis deprehenderimus,
jure eam in aliis quoque inesse persuasum
animo habebimus, cum & ii eamdem nobiscum
naturam humanam, & rationalem sortiti sint:
ita desiderium veræ felicitatis, quod in nobis
sentimus, omnibus aliis hominibus, etiam quos
numquam vidimus, de quibus nihil legimus,
absque ulla hæsitatione attribuimus. Aliud non
minus efficax suppeditat ipsa aliorum
vivendi ratio exterius manifestata; sensus
enim naturalis vel invitis nobis actiones
nostras externas moderari solet: inde fit, ut
ii etiam, qui quo demum cumque motivo
impulsi, a communi nonnumquam iudicio
dissentientes videri volunt, factis tamen
suis, ac vitæ rationibus sese eidem ad
ceterorum normam accommodent, quo latentem
in animo sensum, quantumcumque verbis
repugnent, luculenter manifestant; sic olim
sceptici, etsi de existentia corporum sese
incertos esse palam simularent, non tamen
propterea rebus externis minus usi sunt,
ac ii, qui se certissimos de ea esse proficiebantur;
sic illi quoque, qui libertatem humanam
funditus sublatam volunt, non propterea
minus acriter injurias ab aliis sibi illatas
persequuntur, quod facere neutiquam possent,
si vere, serioque intra se judicarent,
actionem illam, quam sibi ut injuriosam
apprehendunt, cum absoluta necessitate
fuisse positam, quam ob rationem
damnum ab amente, aut bruto illatum
inter injurias non reponunt? Denique
nec rejiciendi sunt libri, ac commentarii,

in quibus majores nostri animi sui sensus posteris consignata reliquerunt.

Atque ex his, quæ adhuc copiose allata sunt, cuilibet satis patere arbitror, eum, qui communem naturæ rationalis sensum in sufficientibus veritatis indiciis non numerat, ab impudenti scepticismo, aut fanatismo non procul abesse, quin propemodum monstrum aliquod abortivum naturæ rationalis esse, eoque miseræ devenisse, ut ipsi nullum cum reliquis hominibus iudiciorum commercium esse possit; siquidem sophistarum argutias, vana mentium aberrantium deliria, vulgi commenta, ac dubitationes in sola rerum possibilitate fundatas communi, atque in universum consentienti totius generis humani iudicio anteponit.

C A P U T V.

DE TESTIMONIO SENSUUM: EXTERNORUM.

Quid
sensus
externi?

CLXXIII. *Sensus externi*, sive *organa sensoria* sunt exteriores illæ corporis nostri partes, quarum ope, si nimirum in iis mutatio quæpiam accidat, mens nostra objecta extra se posita percipit; videlicet: *oculi*, *aures*, *nares*, *palatum*, & *fibrillæ* per totum corpus diffusæ, quæ sensum *tactus* constituunt.

SCHOL. In acceptione hujus vocabuli *sensus* prorsus hic non recedo a significatione usitata, nec aliud intelligo, quam quod omnes vulgo intelligunt, cum de *sensibus* loquuntur: quo vero modo fiat, ut sensuum ope mens quidpiam percipiat, explicare non est hujus loci; ea enim res ad psychologiam pertinet.

CLXXIV. *Testimonium sensuum externorum est illa idea*, quæ occasione mutationis in sensibus externis contingentis in mente nostra excitatur.

Quod testimonium sensuum externorum?

SCHOL. Dicuntur nimirum ex usu recepto sensus, quando ab objectis externis varie afficiuntur, nobis aliquid de iisdem renunciare, sive *testari*: testimonium proinde ipsorum ipsa hæc est annunciatio, quæ si accuratius expendatur, non in alio consistit, quam quod vi unionis inter corpus, & animam alio in loco exponendæ cum determinata in sensibus affectione determinata quoque in mente idea coexistat.

CLXXV. *Testimonium sensuum de multis rebus externis nullum datur*; etenim 1.) sensus nobis non annunciant naturam objectorum internam, neque in quo apparentes illæ proprietates, sive qualitates corporum consistant: percipimus quidem evidenter in corporibus exstare quidpiam seu *dispositionem* quampiam, seu *vim* vocare placeat, unde in nobis oriatur *sensatio coloris, caloris, &c. &c.* sed quid illud reapse in se sit, ope sensuum non percipimus. 2.) Sensus nobis non annunciant partes minimas, earumque dispositiones etiam in extima corporum superficie latentes; quin integra quoque objecta vel ob molis suæ exilitatem, vel ob nimiam a nobis distantiam acutissimam etiam sensuum aciem effugiunt. Patet id ex telescopiis, & microscopiis; illorum enim ope objecta remotissima, ut stellas libero oculo haud videndas, solis, lunæque maculas: horum minutissima, ut minimos in liquoribus vermiculos, in speculis etiam politissimis cavitates, ac colliculos deregimus, quarum omnium rerum ne ideam quidem ante habebamus, & quidem non efficere tubi, ac microscopia adhuc perfectiora? 3.) Sensus nos

An de omnibus rebus externis datur?

non docent impressionem, & affectionem, quam eadem objecta in aliorum hominum sensibus efficiunt; idem siquidem pendet ab ipsa organorum conformatione, quæ in diversis hominibus, ut eorum facies, diversissima est. Inde cibus, qui uni sapit, alteri dissipit; idem liquor huic dulcis, alteri amarus; idem odor huic gratus, alteri ingratus accidit: numquam igitur certo mihi constare potest, num alii eandem, quam ego, præsentem quopiam objecto sensationem in se experiantur. 4.) Sensus non referunt veram mutatæ quandoque impressionis causam; cum enim, experientia teste, tam objecta ob perpetuum in partibus minimis motum, quam ipsa sensuum organa varias subeant mutationes, sola sensuum ope definiri nequit, utri horum ea causa, organone videlicet, an objecto externo attribuenda sit.

*Récherch.
de la vé-
rité. liv. I.
ch. 5.*

COROLL. Ex his canon Cl. Malebranchii manifestus fit: de rebus, quales in se sunt, ope sensuum, cave, ne umquam iudices; iis solum utaris, ut cognoscas, quomodo res mutua relatione sibi invicem respondeant.

*L. c.
ch. II.*

SCHOL. Negari tamen nequit errorem hunc esse inter homines pervulgatum, nosque vulgo tribuere, ut advertit laudatus auctor, sensationes nostras objectis, quando ea motu partium oculos effugientium in nos agunt, non vero, quando ipsa, eorumque actio sub visum cadunt. Sic *lucem, colorem, sonum, odorem* in objectis esse putamus, non tamen *dolorem* in acu.

*An quan-
doque du-
bium?*

CLXXVI. *Testimonium sensuum quandoque dubium est;* res enim frequenter non ita se habent, ut sensibus apparent: quo in casu solum eorum testimonium non omne de reali objectorum veritate dubium nobis eximere potest, sed necesse erit, ut certitudo

aliunde petatur; sic cum oculi *rimum inter-*
grum aquæ immersum ut curvum, vel turrim
admodum remotam ut rotundam, cum tamen
quadrata sit, repræsentant, spectato solum
 hoc oculorum testimonio dubium utique re-
 manet de vera, ac reali objecti constitu-
 tione.

CLXXVII. *Testimonium sensuum in rebus* An-
doq
cert
ac c
dens
compluribus est certum, ac evidens. Nam ipsa
 experientia teste, ac unanimi etiam, quod
 in communi naturæ sensu fundatur, iudicio
 testimonium sensuum ita frequenter nobis
 satisfacit, ut non modo omnem animo dubi-
 tationem pellat, sed ea quoque claritate men-
 ti veritatem proponat, ut ea prorsus con-
 quiescat, nec quidquam aliud, quo amplius
 confirmetur, indaget; sic alium quempiam
 de rei cuiusdam veritate penitus convicturi
 dicimus, *nos propriis eam rem oculis usur-*
passe, putamusque efficacissimum, quod iis
 in adjunctis possibile est, veritatis argumen-
 tum a nobis allatum fuisse; neque falli nos
 vel exinde liquido patet, quod alterum re-
 sponsione hac, si modo nos reipsa vidisse
 credat, prorsus tranquillum; nec aliud quid
 requirentem dimittamus. Sed & inductione
 quoque veritas præsentis theorematis demon-
 stratur. 1.) Sensus nos certos reddunt de
 sensatione actuali, de qua dubitare absolute
 impossibile est; qui enim ambigam me per-
 cipere talem colorem, aut talem sonum oc-
 casione hujus corporis, quod nunc meos o-
 culos, aut aures determinato quodam modo
 afficit, dum id re ipsa percipio. 2.) Sensus
 fidelissime semper referunt id, quod ipsis ap-
 paret; cum enim sint instrumenta tantum,
 causæque necessarie, neque vi propria, ne-
 que ex arbitrio agere possunt, sed solum
 eam, quam ab objectis externis recipiunt,
 affectionem, sive impressionem menti renun-

ciaut: hæc proinde renunciatio eidem affectioni nequit non esse conveniens; sic cum nobis, dum provehimur portu, montesque, urbesque recedunt, demonstrant optici, eam reapse in oculis impressionem fieri. 3.) Id, quod sensibus apparet, fere semper congruit veritati objectorum externæ, ac reali, cum agitur de rebus ad vitæ usus, ac consuetudinem necessariis: sic sensus satis ostendunt ea objecta, quæ ad corporis nutrimentum præ reliquis serviunt; quin, quo res sunt nobis magis salubres, aut noxiæ, eo potissimum pluribus obijciuntur sensibus, diversasque in nobis sensationes, quæ ad eas discernendas conducunt, excitant; an non enim testimonio sensuum certissime convincimur, hoc corpus esse liquidum, illud solidum: panem præbere firmum corpori nostro nutrimentum, aqua contra illud dilui; certis quibusdam horis diem, aliis vero noctem, quandoque æstatem, alias autumnum, ver, hyemem esse, & quæ sunt ejusmodi? ea porro, quæ sensuum ope non discernimus, ad vitæ usus nequaquam sunt necessaria; sic adeo necessarium non est, ut minimos in aqua, aceto, vino vermiculos videamus, ut hoc potius in maximum nobis cederet detrimentum. Sensuum igitur munus non est, hæc, & similia referre: quodsi proinde hisce in casibus quandoque decipiamur, nobis ipsis, non sensibus error adscribendus est. Quilibet testis verum duntaxat dicit de eo, quod scientia comprehendit; quod si cogatur de rebus sibi ignotis testimonium ferre, error non ipsi, sed vim inferenti tribuatur, oportet. 4.) Sensus nos certissimos efficiunt de reali diversorum corporum existentia: etenim primum ipso naturæ rationalis ductu impellimur, ut judicemus impulsiones in corpore nostro factas naturalem cum corporibus

extra nos existentibus connexionem habere; deinde sensatio illa, quam sensuum ope acquirimus, non est simplex, quædam, & nuda perceptio intima, sed amplius quid, quædam videlicet mentis modificatio, quæ præter specialem quampiam sensus intimi vivacitatem menti ideam rei cujuspian existentis, quam corpus compellamus, ingenerat; nam ad nosmet ipsos reflectentes ingens deprehendimus discrimen inter ideam rei absentis per solam imaginationem reproductam, & inter eam, quæ dependenter ab actuali sensuum affectione in nobis excitatur; sic quantumcumque mihi vivaciter imaginer, ignem corpori applicari, ea tamen idea semper in immensum differet ab ea sensatione, quam igne reipsa applicato percipio. 5.) Sensus denique evidenter testantur esse quidpiam in corporibus, quod vim vocamus, ac per quod ea in nos agendo sensus nostros hac, vel illa ratione afficiunt, & immutant, etsi neque ejus naturam, neque internam corporum constitutionem nobis annuncient.

COROLL. Numquam igitur, si quod res est, fateamur, sensus nos fallunt: ipsi nos decipimus occasione eorum, quæ illi nobis fideliter annunciant; neque enim a sensibus exigere debet, ut mentem admoneant de eo, quod est, munerique ipsi suo satisfaciunt, si id referant, quod ipsis apparet; mentis porro erit rem ulterius investigare, atque dijudicare; hinc verissime ait Malebranchius: non a sensibus, sed a mente ad judicandum nimis propensa nos decipi.

SCHOL. Veritas hujus theorematis nullo modo infringitur ex eo, quod saltem per absolutam Dei potentiam testimonio sensuum possit subesse falsum; fateor enim lubens, certitudinem hanc, ac evidentiam

Quomodo
objectio-
nibus oc-
curren-
dam?

esse solum in ordine naturali, physicam proinde, non metaphysicam (§. 162. & schol.), neque vero major in objecto certitudo cum ratione desiderari potest, quam ea sit, cujus ipsum per essentiam suam capax est. Sed neque majorem vel natura nostra admittit, vel conditio requirit; cum enim sensus nobis solum dati sint ad præsentis vitæ usus; satis utique serviunt, si nobis res eas, quæ naturæ nostræ vel conveniunt, vel adversantur, certò, & evidenter cognoscendas præbeant: & quis id ab iis fidelissime præstari negabit? an de ignis existentia ambigere poterit, qui jam illius vim quondam expertus est? Est igitur certitudo hæc tanta, ut sit securissima actionum nostrarum regula; tanta, ut nos in acquisitione boni, aut fuga mali, quod a rebus externis in nos derivari potest, optime deducat; tanta denique, quanta voluptas, aut dolor, quem ex earum rerum usu percipimus, atque inde tam parum quis de existentia aliorum entium extra se, quam de ipso illo sensu, quo se ab iis interne affici sentit, serio dubitare potest: ex quo patet veram utrinque, licet non æque vivacem, dari evidentiam. Ceterum etsi Deus in uno vel altero casu per miraculum efficere possit, ut id; quod sensibus apparet, non existat; ut tamen hoc constanter evenire admittat, quin hoc ipsum alia nobis ratione patefaciat, id enim vero illius & bonitati, & sapientiæ, & veriloquio omnino adversum esse dubitari vix potest.

Opponunt hic alii imaginationes phreneticorum, ac furiosorum, qui res, quæ nusquam sunt, tamquam præsentis intuentur, indeque consequi putant, ut prudenter ambigi queat, num sensationibus nostris ob-

jecta reapse existentia respondeant. At vero ejus rei ratio in aperto est, eaque dilucide in psychologia explanatur. Interea, quod pro præsenti efficit, tam clara, tam manifesta est differentia inter ideam ope imaginationis reproductam, & eam, quæ actu ope sensuum in mente excitatur, quam clare sentimus differentiam, quæ inter duas ideas realiter distinctas intercedit. Profecto diversissimas habemus ideas, cum de die solem intuemur, & cum noctu de eo cogitamus; cum rosam odoramus, aut rem quampiam dulcem gustamus, & cum præteriti odoris, aut gustus solum recordamur; neque enim imaginatio tam vivaciter nos afficit, neque voluptas, & dolor, quæ potissimum sensationes nostras comitantur, cum ideis per phantasiam reproductis redeunt. Eleganter hanc in rem ait Lockius „scribens nunc video „me posse hanc chartam varie modifica- „re, atque etiam prædicere, quæ nova „idea occasione earum figurarum, quas „ope calami in eo depinxero, momento subsequente sit in mente excitanda: „profecto si id mihi tantum imaginarer, „hæ figuræ in charta nusquam apparerent. „Igitur non est merus imaginationis lusus, cum deprehendam characteres secundum meam phantasiam prius formatos, jam non amplius ab eadem pendere, neque cessare, quomodocumque mihi imager illos non esse, immo permanere & constanter & regulariter, atque meum, & aliorum, qui legerint, sensum pari ratione affecturos.

Ad somnia confugiunt alii, voluntque evincere; ex vigilantium ideis existentiam rerum actualem nequaquam certo colligi posse; quemadmodum neque ex somniantium

*Essai
phil. con-
cer. l'en-
tend.
hum. l. 4.
ch. 11. §. 7.*

imaginationibus ejus generis conclusio fieri potest. At istis quidem respondere parum refert; si enim res ita se habeant, obijciendo somniant, & si mera sint somnia, nulla existit veritas, nullaque est cognitio; vana proinde sunt omnia ratiocinia; inutilia omnia argumenta, quæ seu ad stabiliendam, seu ad refutandam eam rem adferri posse viderentur. Sed tamen ne nihil dicamus: valet huc primum responsio supra data; differentia enim immensa est inter imaginationem, quam somnians habere possum, me esse in igne, & inter actualem sensationem, quam eo in casu experirer; neque voluptas, aut dolor ea, qua vigilantes solet, vivacitate somniantes unquam afficit. Deinde cum vigilamus, clarissime agnoscimus absurdam, quæ in somniorum phantasmatibus perpetuo occurrit, confusionem; somniantes vero eam non discernimus; denique cum vigilantes de somnio cogitamus, optime perspicimus statum eum magnis esse tenebris involutum; cum vero somniantibus de vigilia forte cogitatio venit, eandem ut statum clariorem, vel saltem æque clarum percipimus.

An testimonium sensuum indicium sufficiens veritatis externæ?

CLXXVIII. *Testimonium sensuum externorum certis argutum limitibus est indicium sufficiens veritatis externæ*; cum enim hoc testimonium de compluribus rebus certum sit, ac evidens (§. 177.), in quibusdam adjunctis numquam fallit (§. 161.), ac proinde iis recurrentibus infallibiliter indicat adesse veritatem: atqui hoc est esse indicium veritatis sufficiens (§. 160.): ergo patet propositum.

SCHOL. Veritatis a^o *externæ*; sensus enim externi nobis nihil annunciant de objectis intra nos existentibus: addo, *certis argu-*

tum limitibus ; cum enim testimonium sensuum quandoque nullum sit, etsi fortassis adesse falso videatur (§. 175.), quandoque vero dubium (§. 176.), patet illud certos intra fines concludi debere. Verbo, ut rem brevissime absolvam; sensuum ope eæ nobis veritales patefunt, quas obtinere possumus de rebus ad vitæ usus, nostrique conservationem necessariis, utilibus, aut noxiis, quo actiones nostras, communisque vitæ societatem regamus, ac tueamur. Deus quippe optimus, uti nobis magnam hac in tellure rerum ubertatem concessit, ita enim iisdem in bonum nostrum nos uti voluit; jam vero si sensus vel prorsus nobis deessent, vel constanter falsum repræsentando nos perpetuo deluderent, omnium harum rerum cognitione, commodisque inde profluentibus destitueremur. Atque inde manifeste consequitur nobis hominibus eo fine a supremo Auctore sensus datos esse, ut iis in examine rerum nobis utilium, aut noxiarum uteremur, neque iis nos constanter decipi posse, nisi summa sapientia sibi ipsi quodam modo adversaretur, utpote quæ vellet, ut iisdem mediis, quæ nobis ad cognoscendas, quibus utimur, res dedisset, in errores inducamur (conf. §. 177. schol.). Verum ut in his ipsis rebus testimonio sensuum absque errandi periculo fidamus, necesse est, ut discamus certum a dubio quovis in casu infallibiliter discernere; id porro ad sequentia attendendo haud difficulter consequemur.

*Adjumenta discernendi testimonium sensuum
certum a dubio.*

1.) Spectandus est *finis*, ad quem sensus

nobis ab Auctore concessi sunt; dati nimirum nobis sunt sensus, ut supra dictum est: primario ad nostri conservationem, ususque vitæ necessarios; non ad comparandas scientias pure theoreticas, quantumvis eæ ad meliorem animi culturam plurimum faciant: huic porro fini aptissime semper sensus congruunt; nam & summa pernecitate, totque modis diversis, dolore videlicet, aut voluptate, jucundis, vel injucundis affectionibus mentem de rebus, quæ ad conservationem vitæ vel necessariæ, vel utiles, vel noxiæ sunt, admonent, & aliorum cum nostro corpore convenientiam, sive discordiam evidenter edocent. Inde quo corpus nobis est propius, eo fortius; quo vero remotius, eo debilius nos afficit; remotiora quippe universim minus prodesse, vel obesse nostri corporis conservationi possunt.

2.) Spectandum est *objectum peculiare* cujuslibet sensus. Quilibet namque sensus ex naturali sua institutione ad res duntaxat aliquas, easque determinatas nobis exhibendas ordinatur; unde decipi nos mirum non est; cum illius ope res alias, ad quas ille directe se non extendit, cognoscere volumus. Multi cum Malebranchio acerrime contendunt, ab oculis nobis perpetuo imponi, atque argumentum ducunt ab eo, quod eorum renunciatio de objectorum magnitudine, ac distantia potissimum falsa sit. At vero, si rem accurate expendamus, deprehendemus utique proprium oculorum objectum solos esse colores, licet, ut consuetudo fert, ex angulo per radios luminis in oculi retina formato de ipsa etiam objecti colorari magnitudine, aut distantia judicare fere soleamus; verum hoc judicium non magis ad visum, quam ad auditum pertinet, si quidem ex diversa quoque soni intensione, aut re-

mis-

missione de magnitudine, & distantia corporis sonori per frequenter judicium ferimus. Quodsi jam ejusmodi judicia falsa esse contingat, nullo jure oculis, aut auribus culpa attribui poterit, cum ea organa simili in casu non suo, sed alieno, tactus nimirum munere fungi propemodum invita cogantur; digiti nempe, pedes, palmi, cubiti, quæ pro rerum mensuris universim adhibentur, sunt partes corporis humani, in quibus sensus tactus præcipue viget, atque ad eas spectat explorare magnitudines, & distantias objectorum, mensurando videlicet per suam propriam extensionem eam, quæ est in objecto, ad quod applicantur. Nisi igitur testimonium oculorum de rei cuiuspiam magnitudine confirmetur per testimonium manus, aut alterius partis mensurabilis, certam fidem non meretur: neque tamen propterea oculi sunt fallaces, aut eorum functio imperfecta, cum ex se ipsis, & ex directa naturæ institutione illi nobis solum concessi sint ad indicandos colores, & solum per accidens ad discernendas magnitudines, & distantias adhiberi possint.

3.) Ipsa ratio consulenda est, quæ velut iudex sensuum externorum renunciationem in examen vocare debet: quodsi ea ex aliis aliunde certis principiis contrarium judicet, testimonium sensuum absque hæsitatione rejiciendum est. Sic cum nobis oculi solem exhibent, ut discum, cujus diameter duos circiter pedes complectatur; hoc visus testimonium nullum obtinet apud nos momentum, quia nempe ratio nostra ex evidentissimis aliunde argumentis invictè colligit solem esse corpus sphericum, & in immensum telure majus.

4.) Spectandum est testimonium sensuum præcedens; quodsi sensatio quæpiam præsens

pugnet cum iis, quæ alias ope sensuum percipimus, gravis adest suspicandi causa, vel objectum non esse debito modo collocatum, vel mutationem quampiam seu in objecto, seu in organo nostro evenisse: est proinde testimonium præsens dubium, atque adeo iudicium eo usque retinendum, donec veritas clarius evolvatur.

5.) Spectandum est *testimonium præsens sensus alterius*; nam si duo testimonia actualia diversorum sensuum inter se opponantur, manifeste patet, alterutrum eorum dubium esse: quod vero illud sit, potissimum ratione objecti habita (n. 2.) decidi poterit. Sic cum oculi remum aqua immersum exhibet curvum, eodem simul tempore tactus eum repræsentat rectum; credimus vero huic præ illo, quia partium in corpore distantias, cohesionem, toriusque magnitudinem explorare proprie ad tactum pertinet; sic quoque infans primum se ipsum in speculo, aut aqua videns alium intus latere iudicat infantem; sed ubi speculum, aut aquam sæpius contigerit, emendat iudicium, & contra oculorum testimonium tactui fidem habet.

6.) Spectandum denique est *testimonium sensuum aliorum hominum*; si etenim aliis plurimis, ac fere omnibus, quos organis æque perfectis instructos esse tuto credere licet, aliud appareat, atque mihi, sana ratio exigit, ut me potius unum præ tot aliis falli iudicem; secus enim natura ipsa potissimam hominum partem per se se in errores induceret, quod sine absurdo ne cogitari quidem potest.

SCHOL. Non attuli hic criterium, quod complures in debita organorum constitutione reponunt, agentes: attendendum esse vel maxime, num sensus nostri valentes, ac

vegeti sint; id siquidem ipsum est, quod fere semper nos latet, neque præter dicta adjumenta ulla datur cætera norma, ad quam nostrum ea de re iudicium exigere possit. Refert P. Buffier fuisse hominem, cui ad annum ætatis fere trigesimum omnia objecta alio, ac ceteris hominibus, colore imbuta apparuerunt, quin tamen id a quocquam animadverteretur: invaletudine eo circiter tempore correpto albuginis quædam species ex oculis decidit, simulque glaucoma, quo adhuc ignorans laborabat, disparuit; ex eo vero tempore longe diversos in iisdem rebus, quas toties ante viderat, colores deprehendit. Jam quæso, potuitne hic ante suam ægrotationem de recta oculorum suorum constitutione certus esse? censuerit id sane, at non sine gravissimo errore: deinde annon idem ipsum, quod homini huic per aliquod temporis intervallum contigit, quodque toto facile vitæ spatio perdurare potuisset, aliis etiam nonnumquam accidet? Patet igitur, quemadmodum, ut testimonium sensuum sit certum, requiritur, ut ii sint rite constituti; ita quoque ad id ipsum in casu quovis singulari discernendum opus esse aliis rursus adminiculis, quæ tandem ad supra allata reducentur.

*Traité
des pré-
mières vé-
rités. p. 1.
ch. 14.
n. 107.*

C A P U T VI.

DE AUCTORITATE.

CLXXIX. *Auctoritas* est testimonium alterius, quatenus nos movet ad aliquod iudicium ferendum; & quia testimonium vel a Deo, vel ab homine proficisci potest, ea duplex est *divina*, & *humana*.

*Quid aucto-
ritas,
& quotu-
plex?*

Quod ejus
constitu-
tivum?

CLXXX. *Auctoritas constituitur per scientiam, & veriloquium testantis*; sic enim a natura comparati sumus, ut ante moveamur, quam firmiter persuasi simus narrantem neque decipi, neque nos decipere velle, illud autem scientia rei, quæ narratur: hoc veriloquium, seu veracitas præstat: igitur auctoritatem quamcumque per scientiam, & veriloquium testantis constitui in aperto est.

COROLL. Quo igitur quis certior est de scientia, & veracitate testantis, eo major comparate ad illum erit alterius auctoritas.

Quam
certa au-
toritas
divina?

CLXXXI. *Auctoritas divina parit certitudinem metaphysicam*; cum enim in Deum nulla cadat imperfectio, ut in theologia naturalii demonstratur, nullo pacto fieri potest, ut is vel rei alicujus scientia, vel veri dicendi voluntate umquam destituatur: quare Dei auctoritas, quæ per hæc constituitur (§. præc.), nullo in casu fallere potest; sed ejusmodi indicium parit certitudinem metaphysicam (§. 162.): igitur auctoritas divina parit certitudinem metaphysicam.

Quando
& quale
indicium
veritatis?

COROLL. Evidens igitur est auctoritatem Dei loquentis esse indicium veritatis omnibus numeris absolutum, in iis videlicet rebus spectandum, quæ per Revelationem Divinam nobis innotescunt, atque assensum ob eandem præstitum metaphysica quoque certitudine pollere.

An aucto-
ritas hu-
mana
nonnum-
quam fal-
libilis?

CLXXXII. *Auctoritas humana in se spectata quandoque fallere potest*; cum enim quilibet homo in se consideratus ob intellectus humani brevitatem errandi periculo expositus sit, fieri potest, ut quis de iis rebus, quas testatur, non sit satis instructus; cum item voluntas humana in malum propendeat, variisque affectionibus, ut spe, metu, commodorum, aut partium studio &c. persæpe agatur, fieri rursum potest, ut quis consulto

etiam falsum pro vero propinando nobis imponat: quare cum ex alterutro horum fonte consequi necesse sit, ut assentientes ejusmodi auctoritati fallamur, manifestum est, auctoritatem humanam in se spectatam quandoque fallere posse.

CLXXXIII. *Auctoritas humana certis in adjunctis est infallibilis, paritque certitudinem, ac evidentiam moralem; etsi enim quilibet homo seorsum acceptus errori obnoxius sit, concurrunt tamen ea quandoque adjuncta, ut nemo eorum testimonio refragari debeat, quin ut id homini sana ratione utenti impossibile evadat: suadetur nempe ea efficacitate veritas, ut de ea nullo modo dubitare possimus, etsi tota, quæ in objecto inest, obscuritas non tollatur; sed hoc ad certitudinem, & evidentiam moralem sufficit (§. 162. & schol.).* Quod si plura requiratur, nã is veritatum, ac judiciorum naturas confundit, aut in vanam lomachiam declinat.

An non-
numquam
infallibi-
lis.

SCHOL. Et profecto si oculorum, aliorumque sensuum testimonio sua constet firmitas, ac certitudo, cur eam testimonio hominum certis in adjunctis denegemus? æqualem enim utrinque ipsa nobis natura quodam modo necessitatem imponit, ut uni æque, ac alteri testimonio veritatem subesse nobis persuadeamus. Indidit nempe natura omnibus hominibus eam animi comparisonem, ut veritatem discernere possint, quando ea ipsorum caprum, ac intelligentiam non excedit, eamque aliis enuncient, nisi prava quadam affectione in transversum agantur, unde fieri nequit, ut omnes simul falsum pro vero accipiant, aut illud malitiose nobis obtrudant. Si quis ad ea, quæ in se experitur, animum advertat, sincerusque esse velit, fateri cogi-

tur, se tam procul ab omni de existentia urbis Romanæ dubitatione abesse, quam parum de existentia solis supra orizontem, dum eam suis intuetur oculis, ambigere potest; profecto sicut fieri omnino non potest, ut serio judicem, omnes cujusdam typographiæ characteres fortuito casu projectis ita feliciter convenire posse, ut inde oratio quæpiam Ciceronis, aut Virgilio æneis prodeat, ita quoque impossibile est, ut serio judicem, omnes homines, cum asserunt Romam existere, simul falli, aut in id, ut me fallant, conspirasse: igitur in hoc casu nullo modo liber sum, ut seria mente unanimi tot hominum testimonio contradicam, aut non assentiar: id quod ad certitudinem, & evidentiam moralem omnino sufficit. Interea tamen fatendum est, evidentix huic non eam inesse vivacitatem, qua metaphysica, aut physica gaudere solet; non tamen propterea minus vere, ac realiter nostrum ea consensum elicit: nempe non sum magis certus solem existere, quando eum video, quam certus sim dari Romam, quando id omnes affirmant; sed tamen prior illa certitudo vivaciorem in me impressionem efficit, atque hæc. Et hinc desumi debet, quem sensum contineat id, quod vulgo dici solet: *magis a nobis credi id, quod videtur: quam quod solum auditur*: sensus videlicet hujus axiomatis est: nos longe vivacius affici eo, quod oculis usurpamus, quam eo, quod solum auditu percipimus, non autem illud præ hoc magis verum nobis videri. At quænam, quæret aliquis, sunt ea adjuncta, in quibus auctoritas humana certa evadit? accipe igitur.

Characteres certe Auctoritatis humane.

1.) *Objectum, circa quod testimonium versatur, sit res facti*; neque enim in rebus scientificis ullum habet auctoritas humana pondus. Sit præterea ejusmodi, ut eorum, qui testantur, captum non superet, quod tum obtinetur, quando iis neque vires intelligentiæ, neque copia indagandi veritatem defuerit.

2.) *Numerus testantium sit tantus, ut iis in adjunctis prudenter major desiderari nequeat*: numerum tamen non faciunt etiam quam plurimi, cum omnes rem ab uno desumunt.

3.) *Non sit locus prudenti suspicioni, an non testimonium ex prava quadam animi affectione proficiscatur*; mens enim ejusmodi motibus agitata vel verum non videt, vel, si videat, occultat.

4.) *Testimonium sit unanime, & non nisi a paucissimis, quales numquam desunt, in dubium vocetur*; quod si neque illi, quorum causa agitur, quorumque proinde id dubium reddi vel maxime interesset, contradicant, maximum veritati pondus accedit.

CLXXXIV. *Auctoritas humana hisce characteribus insignita est indicium sufficiens veritatis externæ*; est enim infallibilis, paritque certitudinem, ac evidentiam moralem (§. 183.): habet igitur ea, quæ ad indicium veritatis sufficiens requiruntur.

An, &
quale in-
dici-
um
veritatis?

SCHOL. Veritatis nimirum *externæ*; *internæ* non esse, patet alioquin; at neque omnis *externæ*, ejus videlicet solum, quam nec sensibus externis, nec sensu naturæ communi, nec ratiocinio ex illis deducto consequi valemus. Verbo, ea nobis auctoritas humana vera esse indubitanter persuadet, quæ

ad facta, ac historias attinent, iisque in suspiciendis consiliis, expediendis negotiis, ac cognoscendis illis, quæ ad vitæ usus requiruntur, dirigimur. Qui in ejusmodi rebus omnem testimonio humano fidem abrogaret, is profecto non modo a ceterorum commercio veluti perversi, ac aberrantis animi homo excludi mereretur, verum etiam sibi ipsi quam maxime noxius foret; ex plerisque enim rebus a Deo hominibus ad usum concessis nullam utilitatem capere, & non nisi infelicem, brevemque in tellure vitam degere posset, cum nemo sit, qui ipse propriis sensibus omnes res ad vitam sibi necessarias explorare queat, proptereaque in compluribus occasionibus aliorum instructione non egeat. Atque exinde patet, Deum optimum voluisse, ut nobis hominum testimonium quandoque serviat ad veritatem certo detegendam, eumque etiam dedisse hominibus facultatem determinandi, quid huic testimonio inesse debeat, ut fidem mereatur. Hæc de auctoritate humana dicta pro hoc loco sufficiunt, plura de eodem argumento dicemus in parte tertia, ubi de fide agendum erit.

P A R S III.

L O G I C Æ.

DE COGNITIONE VERITATIS.

§. CLXXXV.

Cum veritas indiciorum ope detecta menti obversatur, eandem *cognoscere* dicimur; eo vero in casu vel *scimus*, vel *opinamur*, vel *credimus*: triplex inde oritur cognitionis species: *scientia*, *opinio*, ac *fides*, præcipuum ultimæ hujus partis argumentum. Quod argumentum par-
tis ter-
tiæ?

CLXXXVI. Potissimam fere cognitionum nostrarum partem lectioni librorum debemus; quare, cum de cognitione veritatis generatim hoc loco agamus, ea quoque adferantur, oportet, quæ ad evolvendos utili lectione libros, verumque eorum sensum assequendum scitu necessaria sunt.

CLXXXVII. Denique, quando, ut in aperto est, veritatis cognitio cum ignorantia, & errore consistere nequaquam potest, non erit inutile præcipuas utriusque causas, fontesque detegere; his enim intellectis eam facilius dispellemus; hunc vero vitabimus; atque hac ratione cognitionem nostram pro humani intellectus viribus amplius semper, & amplius extendemus. His in rationum commodum, ne quidpiam desit, breve de concertatione litteraria caput subnectemus.

CAPUT I.

DE SCIENTIA, EJUSQUE DIVERSIS SPECIEBUS.

Quid
scientia,
& judi-
cium
scientificum?

CLXXXVIII. Omnis cognitio certa, ac evidens *scientia*; atque judicium, quod dependenter ab ea formatur, *scientificum* appellatur; ut cum judico: *totum est majus sua parte*.

COROLL. Eam igitur propositionem *scio*, cuius veritas mihi evidenter relucet.

SCHOL. Sumo vocabulum *scientia formaliter*, seu *subjective*, quatenus videlicet refertur ad mentem; nam *objective*, sive relate ad objectum, illud notat vel quamvis veritatem evidentem, vel collectionem quampiam, seu systema veritatum demonstratarum, quale est geometria, metaphysica &c. &c. Significat quoque per aliquos scientiæ habitum demonstrandi longiori usu, & exercitio comparatum, atque hoc in sensu ille dicitur pollere scientia metaphysica, vel geometrica, qui facilitatem possidet complura saltem asserta ad geometriam, vel metaphysicam spectantia demonstrandi.

Quotuplex
scientia?

CLXXXIX. Cognitio certa, ac evidens vel ex sola idearum inter se collatione, vel ope ideæ cujusdam mediæ obtinetur; duplex igitur est scientia; *intuitiva*, cum ex sola idearum comparatione earum convenientia, vel repugnantia relucet; sic intuitive scio *me esse*, *cogitare*, *circulum esse rotundum*, *totum esse majus sua parte* &c. *Demonstrativa*, cum ea idearum connexio ope unius, vel plurium etiam aliarum intervenientium detegitur; sic *animam esse incorruptibilem*, *deprehendimus ope ideæ mediæ entis simplicis*.

COROLL. I. Omnes igitur veritates, quæ im-

mediate vel ex sensu intimo, vel ex sensu naturæ communi, vel ex testimonio sensuum externorum, profluunt, *intuitive* scimus.

COROLL. 2. Quando scientiam demonstrativam habemus, præstamus assensum convenientiæ, vel repugnantiae duarum idearum propter visam earundem cum tertia convenientiam aut repugnantiam; at cum hoc facimus, ratiocinamur (§. 121.): igitur scientia demonstrativa involuit ratiocinium; atque inde omnes veritates, quas ex prædictis indiciis legitime ratiocinando deducimus, *demonstrative* scimus.

SCHOL. Dicitur scientia *intuitiva*, quia mens ex solo idearum intuitu, absque ulteriore cura, aut labore veritatem assequitur, eamque infallibiliter dijudicat: ut oculus apertus videt lumen solis, ita in hoc casu veritas sese menti attendenti manifestat, quin ipsi possibile sit de ea aut serio dubitare, aut ampliorem inquisitionem instituere. At vero scientiam *demonstrativam*, etsi eadem certitudo, non tamen eadem claritas, ac evidentia æque vivax comitatur; in hac enim mens non sine magno labore, & attentione per longas quandoque idearum mediarum progressionem ducta tandem convenientiam, aut repugnantiam idearum detegit (conf. §§. 164. & 165. cum schol.). De hoc plura in capite sequente.

GXC. Scientia, quam sensuum externorum ^{Quid experientia,} adjuvamento obtinemus, *experimentalis*, sive *experientia* audit: comparatur igitur attentione ad eas mutationes, quæ in organis sensoriiis ab objectis externis efficiuntur. Dicitur, *externa*, ut discernatur a sensu intimo, qui experientiae *internæ* nomine frequentius venit.

& quotu-
p' ex ?

CXCI. *Experientia compellatur observatio*; ejus vero objectum *phenomenon*, si illud ipsum objectum absque nostro labore tale existat; sic solem mane oriri, vespere occidere *phenomenon est*, quod observamus. Observatio porro vel absque instrumentorum subsidio, vel eorum ope peragitur; in priori casu *vulgaris est*, in altero *artificiosa*; sic *eclipsis luna vel libero oculo cum vulgo, vel cum astronomis adhibito telescopio*, ut initium, finis, ceteraque accuratissime adnotentur, observari potest. Si denique experientiae objectum nostra nobis industria, ac labore praeparemus, *experimentum* instituimus; ut cum quis primo *globum aera plenum, tum eo extracto vacuum bilanci appendit, ut aeris inde gravitatem exploret*.

Quid
vitium
subre-
ptionis ?

CXCII. Quidquid non sentimus, illud per experientiam notum non est; experientia enim est scientia per attentionem ad id, quod in sensibus contingit, hoc est, ad ipsas sensationes comparata (§, 190.): errat igitur gravissime, qui affirmet se quidpiam experiri, quod non sentit; ut si quis dicat, *se expertum fuisse effluvium magneticum, quo ferrum attrahatur*.

SCHOL. Vitium hoc *subreptionis* nuncupari amat, committiturque ab iis, qui vel nimium imaginationi indulgent, vel nescio qua praepudicata opinione acti, falso sibi persuadent se aliquid experiri, quod non est, vel id quod per legitimum ratiocinium ex praecedente experientia deducunt, pro ipsa experientia jactitant. Atque id ipsum quoque ad experientiam internam, sive sensum intimum pertinet; nam & eo in casu facile incauti in id vitium incurrunt. Quam multi ajunt se intime experiri, corpus, ejusque membra ab anima efficienter moveri, cum tamen aliud non sentiant,

quam quod eo quasi momento, quo anima vult, talis in corpore motus contingat; alii autumant diffusionem animæ per totum corpus ab experientia sibi certissimo constare; at miserime hallucinantur, jam enim oppositum obtinere satis notum est inter philosophos.

CXCIII. *Experientia est de rebus duntaxat singularibus*; ea enim tantum experimur, quæ in organa sensoria agunt (§. 190.); hæc vero omnia existunt, quod enim non existit, neque agere potest; porro quidquid existit, individuum, ac singulare est (§. 59. schol.); igitur res duntaxat singulares sub experientia cadunt.

De quibus datur experientia?

COROLL. 1. Quia universalia se experiri asserit, a vitio subreptionis immunis esse nequit.

COROLL. 2. Qui per experientiam quidpiam demonstrare nititur, adferat, necesse est, casum singularem, in quo id expertus sit, nisi is plane obvius, omnibusque per se notus sit.

SCHOL. Etsi vero judicia nostra in experientia fundata de se singularia sunt, facile tamen in universalia commutantur. Si videlicet plures, ac diversi observationum casus inter se conferantur, notenturque ea, quæ omnibus communia sunt, levi negotio inde per abstractionem (§. 61.) propositiones universales efformari, sicque ope experientiæ cognitiones etiam universales obtineri possunt. Plura hic non addo, quæ enim in instituendis experimentis, machinarumque usu observanda sint, in physicæ prolegomenis docere debent.

Quomodo ope experientiæ cognitiones universales obtinentur?

CXCIV, Scientia denique vel *actualis* est, quando eam præsens perceptio convenientiæ, aut repugnantiae idearum comitatur; vel *habitualis*, cum mens nunc quidem actu hanc

Quid scientia actualis & habitualis?

idearum relationem non percipit, ob memoriam tamen ejus perceptionis præteritæ ita est comparata, ut quotiescumque eadem ideæ recurrunt, veritatem indubitanter agnoscat, assensumque, vel dissensum absque omni formidine, aut errandi periculo præstet.

COROLL. Quivis igitur scit omnes veritates, quas in memoria quasi reconditas habet, vi evidentis perceptionis præteritæ, in qua mens, quoties super eas reflectit, cum maxima fiducia innititur.

SCHOL. Neque hoc ullo jure in dubium vocari potest; cum enim intellectus nostri tanta sit brevitās, ut paucissima solum uno eodemque tempore clare, & distincte concipere liceat, profecto magna admodum nostra ignorantia foret, si non sciremus, nisi id, quod actu cogitationum nostrarum objectum agit; quique doctissimus inter homines habetur, ac plurimum scire putatur, vix unam, alteram veritatem, quot videlicet simul in mente complecti posset, reapse sciret.

Quotuplex habitualis?

CXCV. Scientia habitualis rursum duplex est; vel enim ut primum veritates olim perceptæ recurrunt, mens simul mutuam idearum relationem clare & distincte pervidet: vel vero iis recurrentibus mens quidem de iisdem se antea fuisse convictam meminit, nullo tamen modo rationes, argumentaque revocare in memoriam potest.

SCHOL. Primum contingit in omnibus veritatibus, quas intuitive scimus (§. 189.); tum enim uno intuitu idearum recurrentium convenientia, aut repugnantia clarissime perspicitur: alterum vero in iis fere obtinet veritatibus, quas olim demonstrative scivimus; pronissimum enim est, ut iis recurrentibus earum simul demonstratio menti non recurrat; sic, qui certo recor-

datur, se olim demonstrative scivisse: animam esse ens simplex, scit eam veritatem, quories ea in mentem venit, ac nullo modo de ea dubitare potest, etsi demonstrationis amplius non meminerit. Est porro hæc veri nominis scientia; quantumvis enim convenientiam inter ideas animæ, entisque simplicis illarum idearum adjumento, quarum ope eam olim detexi, nunc non perspiciam, subingrediuntur tamen in earum locum aliæ ideæ mediæ, quæ mihi non minus infallibiliter, licet fortassis minus perspicue dictam convenientiam actu ostendunt, quemadmodum impressionem magis vivacem sentio, dum rem actu video, quam cum solum me vidisse recorder: immutabilitas nimirum atque æternitas veritatum universalium efficit, ut mihi evidenter constet, nunc a vero abesse non posse id, quod olim verum fuit. Profecto nisi res se ita haberet, nulla geometrarum demonstratio pro omnibus universim casibus valeret; quælibet enim per se ad singularem circulum, vel triangulum &c. in charta depictum restringitur, neque suam universalitatem aliunde, quam ab immutabili, ac æterna circulorum, vel triangulorum &c. relatione accipit: & quis asserat insignem mathematicum nescire propositiones olim a se in librum congestas, demonstratasque, propterea quod ipsarum demonstrationum jam non meminerit? Id tamen consequens foret, nisi eum defectum immutabilis idearum inter se relatio, quam se aliquando clare, & distincte percepisse certo recordatur, abunde suppleret. Atque hoc memoriæ testimonium ita necessarium est, ut absque eo potior hominum pars aut ad scepticismum declinare, aut singulis fere

momentis sententiam suam mutare cogere-
tur, quoties nimirum quædam opponi au-
dit, quibus plene satisfacere vitio memo-
riæ rationes olim perspectas non suggeren-
tis, extemplo nequit. Dissimulandum ta-
men non est multorum in erroribus perti-
naciam inde potissimum oriri, quod de sen-
tentia semel apud se stabilita decede-
re nolint; verum id non inde provenit;
quod memoriæ confidant in iis rebus, de
quibus rectum alium judicium formarunt,
sed potius, quod antequam eas examinas-
sent, judicium tulerint, qui enim pertina-
cissime suæ sententiæ adhærent, fere ii
tantum sunt, qui nullum umquam serium
examen instituerunt, quique ad tuendam qui-
buscumque sumtibus receptam a se senten-
tiam hac una ratione impelluntur, quod
numquam aliter judicaverint. Quare, ubi
res fuerint majoris momenti, non soli sem-
per memoriæ fidendum; sed rationes etiam
ipsæ de novo in examen vocandæ sunt.
Id quod præcipue usu venit, cum in pro-
babilibus solum versamur; vix enim ullus
umquam certus esse poterit, se omnia ra-
tionum momenta tam pro stabilienda, quam
infringenda opinionis probabilitate sufficien-
ter expendisse.

C A P U T II.

DE PROBATIONE, ET DEMON- STRATIONE.

Quid
probatio,
ejusque
princi-
pia?

GXCVI. Ideæ mediæ, quarum ope conve-
nientia, aut repugnantia duarum idearum de-
tegitur, veritatem *probare* dicuntur; igitur
probatio generatim accepta est talis talium,

idearum mediarum dispositio, ut ejus ope relatio, quam aliæ duæ ideæ ad sese habent, reluceat. Enunciaciones ex illis ideis mediis conformatae, quibus velut totidem fulcris omnis innititur probatio, ejus *principia* nuncupantur.

COROLL. Cum idea media utimur, ratiocinamur (§. 121.); ratiocinium porro per argumentationem cum aliis communicamus (§. 127.): igitur omnis probatio argumentando conficitur.

SCHOL. Utimur fere in probationibus nostris syllogismis, quorum præmissæ ipsa sunt principia, etsi id necesse non foret; quævis enim argumentationis species æque servare posset. Perinde vero est, seu unus, seu plures adhibeantur. Quandoque nimirum rei veritas unico syllogismo conficitur, alias non item; quo in casu polysyllogistica (§. 144.) argumentandi forma in auxilium vocanda est.

CXCVII. Principia probationis vel sunt *certa, ac evidentia*, vel *incerta*, attamen *probabilia*, vel denique solum *precavia*, id est, talia, quæ aut omni ratione destituuntur, aut sine probatione assumuntur: in primo casu habetur *demonstratio*; in altero *probatio probabilis*; in ultimo nulla. *Demonstratio* igitur est probatio ex principiis certis, ac evidentibus ducta. Quotuplex probatio?

COROLL. 1. Demonstrationis principia non sunt, nisi propositiones evidentes, quales sunt definitiones, axiomata, postulata, experientia certæ, ac propositiones jam demonstratæ. Quid demonstratio?

COROLL. 2. Demonstratio impertit veritati evidentiam; cum enim conclusio contineatur in præmissis (§. 125. cor. 3.), nequit illa non esse evidens, si hæ sint; sed in demonstratione præmissæ sunt evidentes:

igitur & conclusio; atque conclusio ipsa est veritas demonstranda: ergo veritas demonstrata sive per demonstrationem fit evidens. Evidentiam porro hanc mediatam esse pater: (conf. §. 165.)

COROLL. 3. Propositio evidens falsa esse nequit (§. 166.); cum igitur propositio demonstrata fiat evidens, ut ea falsa sit, absolute repugnat; ac proinde, si quidpiam, quod a nonnullis demonstratum dicitur, falsum esse subinde detegatur, ea demonstratio illegitima, atque ad paralogismos ableganda erit.

SCHOL. Duplici potissimum ex capite demonstratio illegitima evadit; vel enim vitium formæ, quod quidem rarius contingit, in argumentando admittitur; vel quod longe frequentius est, propositioni dubiæ, precariæ, aut plane falsæ inter principia locus datur. Exempla ejus rei complura tam in veterum, quam recentiorum philosophia prostant, ut cum Wolfius Leibnitii insistentis vestigiis, cumque eo alii plurimi ejusdem sectæ fautores demonstrant mundum hunc esse omnium possibilium absolute optimum; Dei, hominumque voluntatem in actionibus, quas sensus intimus liberas esse testatur, egere ratione sufficiente externa; non dari posse neque per Dei omnipotentiam duo perfecte similia &c. quæ tamen omnia ab aliis solidissimis argumentis refutantur. Opera igitur danda est, ut nullis nisi certis, ac evidentibus principiis utamur; cavendum, ne ex majorum solum instituto, aut aliorum auctoritate, aut longissimi temporis usu axiomatibus adnumeremus ea, quæ vere in se talia non sunt; in constituendis definitionibus nominalibus ab usu vocabulorum recepto non recedendum, ipsaque rei possibilitas clare evin-

cenda (§§. 86. cum schol. §. 87. schol.): in realibus vero solide comprobandis vires omnes impendendæ. Accidit tamen nonnumquam, ut principiis dubiis, aut etiam falsis uti tuto liceat, quando videlicet congregiendum nobis est cum determinato quodam adversario, qui ea in certis, ac evidentibus habet: tum vero Κατ' αὐθόρουν argumentari dicimur; sic veteres Christiani ex libris Trismegisti, Sybillarumque oraculis potissimam partem suppositis idololatricam impugnarunt, quod ad ea veluti genuina, ac prope divinā ipsi gentiles provocarunt.

CXCVIII. Demonstratio est a priori, cum principia, ex quibus ea peritur, rem demonstrandam vel actu, vel saltem cogitatione nostra antecedunt; ut si *ex simplicitate anime humane ejus incorruptibilitatem demonstres*. A posteriori vero, cum principia rem demonstrandam consequuntur, qualis est demonstratio *Dei existentis ex rebus creatis*.

Quotuplex demonstratio?

COROLL. 1. Causa ante effectum, essentialia rei ante attributa, hæc ante reliqua, quæ rei conveniunt, concipiuntur: igitur omnis demonstratio ex his principiis ducta est a priori, quales sunt pure geometricæ, & complures metaphysicæ.

COROLL. 2. Demonstrationem a posteriori habebis, si ab effectu ad causam, vel ab attributis ad essentialia argumentaris, & universim, quoties per experientiam aliquid demonstras; nam experientia non nisi de effectibus datur (§. 193.).

CXCIX. Demonstratio dicitur *directa*, seu *ostensiva* cum ex ipsa idea subjecti evincitur eidem convenire, vel repugnare prædicatum; ut cum sic arguis: *ens necessarium est æternum; sed Deus est ens necessarium: ergo Deus est æternus*.

Quid directæ?

Quomo-
do con-
denda?

SCHOL. Demonstrationem directam conditurus primo ideam distinctam, ac completam tam subjecti, quam prædicati, propositionis demonstrandæ animo informet, eamque per legitimam definitionem exprimat; tum eliciat inde axiomata, aut recepta alioquin, atque ad præsentem materiam accommodata, uti & propositiones, si quibusdam egeat, alias jam demonstratas conquirat: hæc denique omnia in polysyllogismum coordinet. Ita si demonstrandam habeas hanc propositionem: *anima humana est incorruptibilis*: secundum instructionem datam sic progredieris: *quod cogitat, est ens simplex* (propos. demonstr. suo loco.). *Sed anima humana cogitat* (defin. animæ): *ergo anima humana est ens simplex*; *ens simplex non habet partes* (defin.); *sed anima humana est ens simplex* (conclus. præc.); *ergo anima humana non habet partes*; *quod non habet partes, non potest resolvi in partes* (axiom.); *sed anima humana non habet partes* (conclus. præc.); *ergo anima humana non potest resolvi in partes*: *quod non potest resolvi in partes, est incorruptibile* (defin. incorruptibilis); *sed anima humana non potest resolvi in partes* (conclus. præc.): *ergo anima humana est incorruptibilis*, quod erat demonstrandum.

Quid
indirec-
ta, &
quomodo
conden-
da?

CC. Demonstratio indirecta, sive apagogica, vel *deductio ad absurdum* fit, cum contradictoria propositionis demonstrandæ interea ut vera assumitur, atque ex ea legitime argumentando conclusio denique manifeste absurda deducitur; sic sit demonstranda indirecte hæc propositio: *Deus est æternus*; primum ejus contradictoriam pone esse veram: *Deus non est æternus*: tum vide, quæ conclusiones ex hac legitime profluant; igitur

tur Deus non sit æternus; ergo non semper fuit: ergo habuit initium existendi: ergo est productus: ergo vel a se, vel ab alio: utrumque veto est evidenter absurdum; nam si a se est productus, aliquando simul existit, & simul non existit; si ab alio: Deus est creatura.

CCI. Demonstratio indirecta invicte conficit veritatem propositionis demonstrandæ; cum enim conclusio falsa, & absurda legitime deducatur ex contradictoria propositionis demonstrandæ (§. præc.), necesse est, ut ea contradictoria sit falsa (§. 125. cor. 3. can. 2.); porro ex falsitate unius contradictoriæ certo infertur alterius veritas (§. 156. schol. l. 3. cor. 1.): igitur vi demonstrationis indirectæ modo prorsus non fallibili elucet veritas propositionis demonstrandæ.

An invicta?

SCHOL. in eo tamen hæc demonstratio a præstantia directæ deficit, quod intellectum veritatis perspicendiæ avidum non satis illuminet; neque enim ostendit, quare, aut quomodo res sit vera; sed solum falsam non esse irrefragabiliter evincit, atque adversarium eas in angustias conjicit, ut aut evidenter absurda admittere, aut veritatem pertinaciter adhuc negatam fateri cogatur. Atque inde est, quod ejusmodi demonstratione non facile utamur, ubi directæ in promptu est, aut illam cum hac consociemus, ut majus veritati pondus accedat; quando præsertim de rebus majoris momenti quæstio instituitur.

Quod utriusque discrimen?

CCII. Circulus vitiosus, vel circulus in demonstrando committitur, cum una propositio per alteram demonstratur, ita videlicet; una alterius principium agat, & vicissim: ut si quis ex spiritualitate animæ humanæ ejus immortalitatem, & deinde ex immortali-

Quid circulus in demonstrando,

statem ejusdem spiritualitatem demonstrare niteretur.

SCHOL. Cum demonstratio brevis est, hoc vitium facile in omnium oculos incurrit, atque inde grande periculum non est, ut illud præsertim ab eruditioribus committatur; at vero ubi longiori ratiocinio opus est; ubi quæstiones suis in locis separatæ pertractantur, persæpe contingit, ut viri etiam doctiores post multas demonstrationum ambages rursus eo redeant, unde primum exorsi sunt. Quot enim infallibilitatem sensus communis a summa Dei bonitate, veriloquio, ceterisque ejus perfectionibus deducunt, & tamen ubi deinde de ipsa Dei existentia demonstranda agitur, sensu communi tamquam infallibili veritatis argumento utuntur? quis Cartesium ab hoc vitio immunem pronunciet, cum primum ex idea clara, & distincta Deum existere; tum vero ex Dei existentis bonitate ideam claram, & distinctam fallere non posse demonstravit? sed hæc alias: nunc res tironum exigit, ut ea adferantur, quæ ad demonstrationes legitimas condendas scitu sunt necessaria, quæ quidem ejusmodi sunt (uti & ea, quæ adhuc a §. 198. de demonstratione nominatim diximus), ut nullo negotio, paucis solum mutatis, ad quamvis in genere probationem applicari possint.

Leges Demonstrationis.

1.) *Status questionis quam accuratissime determinetur; secus enim in incerto omnis vagabitur oratio. Sapientissime Tullius:*

De off.
1. 1. 9. 2.

„ Omnis enim, quæ a ratione suspicitur de
„ re aliqua institutio debet a definitione

„proficisci, ut intelligatur, quid sit, id, de quo disputetur.” Id vero obtinetur 1. accurata vocabulorum definitione; 2. divisione quæstionis propositæ in suas partes, si quas habeat; 3. resecando ea, quæ aut certo falsa, aut certo vera, aut huc non pertinere, aut prorsus inutilia esse perspiciuntur; 4. his præstitis corrigendo quæstionem propositam, & simplicissimis, quantum fieri potest, terminis exprimendo; 5. subordinando, si plures remaneant, quæstionis partes, ita ut eæ præcedant, quarum demonstratio aliis evincendis inservit, singulæque seorsum, ac suo in ordine pertractentur. Proferamus exemplum: quæritur in metaphysica, *utrum anima humana sit immortalis*: definienda igitur primum *immortalitas*, quod sit perpetua non tantum existentia, sed etiam vitæ duratio; tum dividenda in *essentialem*, *naturalem*, & *gratuitam*. Jam ulterius examinando facileprehendes, *essentialem immortalitatem animæ humanæ certo non competere*; num vero mere gratuita eidem conveniat, ex sola Dei Revelatione certo sciri posse: resecabis igitur has duas partes, illam, ut per se certam; hanc ut ad metaphysicam non pertinentem, ac quæstionem simplicissime sic enunciabis: *utrum anima humana spectatis suis proprietatibus naturalibus sit æternum existitura & victura?* En statum quæstionis, in qua cum duæ adhuc partes remaneant, singulæ seorsum demonstrandæ erunt, & priori quidem loco *existentia perpetua*; tum denique *vita*, quæ absque illa esse non potest. Summi hæc lex momenti est, proptereaque altissime omnium mentibus infingenda; frequentissime enim solum ob ejus neglectiorem ad veritatem non pervenitur, litesque inanes longissimo tempore inter philosophos aluntur. Exemplo est quæ-

stio illa Cartesianos inter, ac Peripateticos tanta animorum, laterumque contentione agitata: *num calor in igne sit, an in nobis* (vid. §. 83. schol. n. 3.).

*De nat.
Deor. I.
n. c. 4.*

2.) *Constituto questionis statu attente expendendum, quid fortassis ipsa in re jam notum sit, atque ab eo inchoandum*; ut enim teste Tuilio: „Admirabilis quædam est continuatio, seriesque rerum, ut alia ex aliis nexa, & omnes inter se aptæ, colligatæ, que esse videantur:” ita veritatum tam arcta est inter se colligatio, ut ex una, etsi prima fronte levissima videatur, complures gravioris momenti successive profluant: quare eorum, quæ in quæstione jam nota sunt, habitudo, relatioque ad incognita diligentissime indaganda est. Præclare hanc in rem moner Cartesius: „Plurimum interest cogitationes nostras certo ordine promoveré, incipiendo scilicet ab iis rebus, quæ cognitu nobis sunt faciliores, atque ex his paulatim, ac veluti per gradus ad difficiliorum, magisque abstrusarum investigationem progrediendo &c. &c.

*De meth.
n. 2.*

3.) *In toto demonstrationis progressu eadem conservetur evidentiæ*; tum enim solum propositio demonstranda evidentiæ consequitur, qui tamen demonstrationis finis est (§. 197. cor. 2.), cum ea ex principiis evidentiis evidenter profluit; id quod fieri nequit, si, antequam ad ultimam conclusionem perveniatur, evidentiæ filum rumpatur. Opera igitur danda, ut mens in quolibet passu, quem ratiocinando facit, simplici intuitu convenientiam, aut repugnantiam ideæ mediæ cum extremis pervideat, quin necesse sit ad novas semper, & novas ideas medias recurrere, ut ea palam fiat. Hoc qui negligunt, in errores gravissimos facile præcipientes eunt; ubi enim evidentiæ securissimum

vix

vix comitem dimiserunt, tenebris involvuntur, & veritas quandoque detecta non tam industriæ, aut ingenio, quam casui fortuito debetur. Id periculi subeunt illi, (ut de iis taceam, qui falsas propositiones subrepere patiuntur) qui nimio verborum ornatu delectari, stiloque copioso, ac prope declamatorio uti solent; fit enim hac ratione, ut mens speciosis verborum phaleris distracta id, quod maxime deberet, non videat, ipsumque ei evidentiae lumen prorsus dispareat. His illud Tullii dictum velim: „Omne, „quod de re bona dilucide dicitur, mihi „præclare dici videtur. Istiusmodi autem „res dicere ornate velle, puerile est; plane „autem, & perspicue expedire posse, docti, & intelligentis viri.

4.) *Demonstratio tentanda non est, ubi successus prudenter sperari nequit*; secus enim oleum perdes, & operam. Accidit ad 1. cum quæstio resolvenda postulat scientias, in quibus quis versatus non est; sic actum agit, qui geometriæ expers ad resolutionem astronomiconum, aut physicorum problematum aggreditur. 2. Cum desunt adjumenta, ac necessaria ratiocinandi principia, ut in rebus physicis, naturalique corporum constitutione investiganda nobis frequenter usuvenit. Atque inde non continuo in falsis habenda sunt, quæ demonstrari nequeunt, neque res ideo duntaxat negari potest, quod modus, quo ea fiat, ignoretur; tenenda potius est in his, ac similibus decantata S. Augustini regula: *tene certum, dimitte incertum*. Quo & illud spectat, ut non exigatur major demonstrationis certitudo, ac evidentia, quam objectum, circa quod ea versatur, admittat; sic utique in rebus naturalibus non oportet certitudinem, ac evidentiam metaphysicam quærere, cum ex res per naturam suam non

sint nisi physicæ capaces. 3. Cum res pertractantur, quæ limitatas humani intellectus vires excedunt, qualia sunt mysteria a Deo nobis revelata, quæ propterea a nobis quidem infallibiliter credi possunt; sciri non possunt: quare insignis temeritatis reum se facit, qui in iis evidentiam, ac demonstrationem postulat. In his, ut rursum sapienter monet S. Augustinus: *tota ratio facti est potentia facientis*, tenendumque certissime, Deum efficere plus posse, quam nos brevi nostro intellectu assequi. Errant proinde gravissime profani illi, qui rationem humanam adæquatam rerum credendarum regulam constituunt, noluntque inter sacrosancta Religionis mysteria locum concedere iis rebus, quas lumine solum naturali investigare, ac perspicere nequeunt.

Quot modis fit demonstratio?

CCIII. Polysyllogismus duplici modo constructur (§. 144.): cum igitur in demonstratione potissimum polysyllogismus adhibeatur (§. 196. schol.), patet eam quoque duplici modo confieri posse.

SCHOL. Nimirum vel propositio demonstranda est conclusio primi syllogismi, ejusque præmissarum una fit conclusio sequentis, idque eo usque continuando, dum denique ad principia universalialia, & per se evidentia perveniatur: vel ab opposito principia illa universalialia primo loco collocantur, eaque fit progressio, ut semper conclusio præcedentis syllogismi fiat præmissa sequentis, donec tandem ipsa propositio demonstranda in conclusione ultimi syllogismi inferatur.

Quid analytica, & synthetica?

CCIV. Demonstratio primo modo confecta propositionem singularem, & compositam, cujus veritas quæritur, resolvit in sua principia, ideoque *analytica*: altera ex principis universalibus, & simplicissimis com-

ponendo descendit ad propositionem compositam, & specialem demonstrandam, ideoque *synthetica* appellatur.

SCHOL. Exemplum demonstrationis syntheticæ habes (§. 199. schol.), quam si inverso ordine legas, obtinebis analyticam. Ceterum res tota eleganter illustrari potest duobus illis mentis actibus, quorum unum abstractionem (§. 61.), alterum compositionem (§. 62.), compellavimus; sicut enim per abstractionem ab idea singulari ad universalem ascendimus, atque hac ratione ideam singularem in suas partiales, ex quibus ea coalescit, resolvimus; & sicut per compositionem vicissim ab idea universali ad singularem descendimus: ita cum proportionem hic circa veritates versamur, progrediendo nimirum a specialibus ad universales per analysisin, & ab his per synthesisin ad illas regrediendo.

CCV. Cum propositio demonstrata falsa esse nequeat (§. 197. cor. 3.), demonstrationis ope & ad veritatem infallibiliter pervenimus, & eandem aliis patefacimus; omnis igitur legitima demonstratio artem cogitationes ita disponendi, ut vel veritas latens detegatur, vel inventa cum aliis communicetur, in se complectitur. Ats hæc vulgo *methodus* nuncupatur. Quid methodus,

CPROLL. Qui callet artem demonstrandi, callet quoque methodum; cumque demonstratio sit vel analytica, vel synthetica (§. 204.), talis quoque est methodus. & quotuplex?

SCHOL. Cum veritatem nondum notam quaerimus, utimur methodo analytica; tum enim investiganda sunt principia evidētia, ex quibus propositio data legitime profluit. Cum vero veritatem jam a nobis inventam cum aliis communicamus, si ve cum alios docemus, synthetica fere in Quis utriusque usus?

usu est, propterea quod principia universalialia, & immediate evidentia nullo negotio a quovis intellectu perspiciuntur; quare dum ab his inchoamus, ac sensim ad veritates magis compositas descendimus, id obtinemus, ut discentem a facilioribus successive ad difficiliora, a simplicibus ad magis composita, quasi per gradus ducamus, efficiamusque, ut iis ea facilitate, ac claritate, qua principiorum veritatem perspexit, specialem quoque illam veritatem, de qua agitur, intime pervideat. Sed facile patet descensum hunc debere esse omnino lentissimum, ut nimirum ex principio non inferatur, nisi id, quod primo loco, & immediate ex eo profluit; ita enim solum conclusionis cujuslibet cum suo antecedente connexio, quanta fieri potest, evidentiae vivacitate discentis mentem afficiet. Qui id in primis curis non habet, quique adeo ex principio assumpto ad conclusionem remotiorem omissis mediis veluti per saltum transvolat, numquam consequetur, ut veritas tota sua luce auditoris intellectum perstringat. Multa sunt præterea, quæ de methodo a philosophis præcipiuntur, sed præcepta accumulare non placet; ego enim sic sentio, quæ præter ea, quæ adhuc de demonstratione condenda copiose dicta sunt, requiruntur, longiori usu, & exercitatione, tum assidua librorum scientificorum lectione, tum & præcipue quidem algebræ, ac geometriæ studio & facillime, & solidissime, quin etiam unice condisci posse.

CAPUT III.

DE PROBABILITATE, ET OPINIONE.

CCVI. Cum indicia veritatis sufficientia non adsunt, aderunt vel insufficientia, vel nulla penitus: qui indicia sufficientia perspicit, *certus* est de veritate; qui insufficientia: *incertus* (§. 161.): qui nulla: eandem prorsus *ignorat*. Quis certus, incertus, & ignorans?

COROLL. Incertitudo igitur est status mentis medius inter certitudinem, ac ignorantiam, atque iisdem extremis veluti limitibus circumscribitur.

SCHOL. Ignorantiam hic solum ut limitem incertitudinis considero, fusius de ea, ejusque causis agetur in capite 610. Nonnullis hanc ignorantiam *dubium negativum*, atque illud, de quo paullo post dicam, *positivum* compellare placet; at hi quidem in suo sensu abundent; neque enim ulli de vocabulo litem movebo: mihi interea, & vocum proprietati, & usui recepto hac nomenclatione magis consuli videtur; etenim licet in hoc casu adsit iudicii retentio, ea tamen propterea tantum necessario fit, quod, quid judicandum sit, ignoretur, & nemo profecto rogatus, quid de stellarum numero sentiat, an par sit, an impar? respondebit se de eo *dubitare*; sed potius quam promptissime reponet, se id *ignorare*.

CCVII. Indicia veritatis insufficientia sunt, quæ quandoque fallunt (§. 160.): jam vero attendenti clarum est, fieri posse, ut vel sæpius non fallant, quam fallant; ut vel ex æquo toties fallant, quam non fallant: vel denique ut sæpius fallant, quam non fallant. Inde triplex oritur incertitudinis status, vi-

delicet in primo casu *probabilis*; in altero *dubius*, in ultimo *improbabilis*.

COROLL. Probabilitas igitur intra certitudinem, & dubium concluditur, atque ab hoc ad illam usque crescit; improbabilitas vero intra dubium, ac ignorantiam continetur, ac pariter ab eo ad hanc continue augetur.

Quid enunciatio probabilis, dubia, & improbabilis?

CCVIII. Ut certitudo ad ipsa judicia, sive propositiones refertur, indeque objectiva compellari solet (§. 163.), ita nihil vetat, quo minus incertitudo quoque in iisdem spectetur: datur igitur propositio *in se*, vel *quoad se*, vel *objective incerta*, eaque vel est *probabilis*, cum videlicet pro ejus veritate adsunt indicia haud quidem sufficientia, attamen talia, quæ sæpius non fallunt, quam fallant; vel *dubia*, cum ejus indicia toties fallunt, quam non, sive quod idem est, cum pro utraque contradictionis parte rationes pugnant æque graves; vel *improbabilis*; quando indicia sæpius fallunt, quam non.

Quomodo probabilitas a veritate; improbabilitas a falsitate distinguitur?

CCIX. *Probabilitas cum veritate; improbabilitas cum falsitate propositionis confundi non debet.* Ad probabilitatem sufficit, ut ea adsint indicia, quæ sæpius non fallunt (§. præc.): Inde vero nequaquam sequitur eadem indicia in præsentem hoc, ac determinato casu non fallere, quod tamen ad propositionis veritatem requiritur, ut per se patet. Vicissim improbabilitas oritur ex indiciis, quæ sæpius fallunt (§. cit.); rursus vero nullo modo necesse est, ut indicia, quæ quidem alias etiam sæpissime fallunt, in determinato hoc quoque casu fallant, quod tamen ad propositionis falsitatem desideratur, ut iterum notum est: aliud igitur est propositionem esse probabilem, aliud esse veram; & aliud propositionem esse improbabilem, aliud eam esse falsam, ac proinde etiam

probabilitas cum veritate, & improbabilitas cum falsitate propositionis confundi non debet.

COROLL. 1. Igitur etiam propositio probabilis potest quandoque esse falsa, & contra improbabilis vera; si nimirum ibi indicia actu fallant; hic actu non fallant.

COROLL. 2. Inde numquam propositioni probabili, ut veræ, adhærendum; neque improbabilis absolute ut falsa respuenda est.

CCX. *Probabilitas, ac improbabilitas admittunt gradus*; cum enim illa a dubio ad certitudinem; hæc a dubio ad ignorantiam usque constanter crescat (§. 207. cor.), evidens est, eo majorem fore probabilitatem, vel improbabilitatem, quo magis ad certitudinem, vel ad ignorantiam acceditur; sed hoc est habere gradus: igitur probabilitas, ac improbabilitas certis gaudent gradibus.

An gradus in probabilitate, & improbabilitate?

COROLL. 1. Dantur ergo propositiones magis, aut minus probabiles, vel improbabiles.

COROLL. 3. Propositio, quæ minimum distat a certa, habet summum probabilitatis gradum.

COROLL. 3. Quo indicia rarius fallunt, eo magis accedunt ad ea, quæ numquam fallunt, id est, ad sufficientia: igitur etiam in genere eo probabilior est propositio, quo rarius fallunt indicia, quæ pro ejus veritate pugnant.

COROLL. 4. Inde etiam ab opposito eo improbabiliior est propositio, quo frequentius ejus indicia fallunt; & supremus improbabilitatis gradus habetur, cum quis quam proxime abest ab ignoratis.

SCHOL. Quo plura, aut firmitiora adsunt veritatis indicia, eo etiam experientia teste rarius fallunt; hinc generatim, ut inter probabiliiores haberi possit propositio, ne-

cesse est, ut vel plura; vel saltem in pari numero firmiora habeat indicia. Recte igitur facimus, dum, ubi ad certitudinem liquidam pervenire non datur, complura ad sententiam propositam stabiliendam argumenta conglobamus, cum hac ratione majorem saltem illi probabilitatem conciliemus. Hujus rei exemplum Tullius nobis præbet tum sæpe alias, tum præcipue in præstantissima illa, quam pro Milone dixit, oratione; quas enim non rationes accumulatur, quibus probabilissime conficiat structas fuisse a Clodio Miloni insidias? Id tamen hac in re probe tenendum, non tam numerum, quam argumentorum pondus attendi debere; non enim infrequens est, ut unicum argumentum tanti sit roboris, ut complura etiam in partem oppositam infringat: pone c. c. *Cajum eam plateam ea hora, qua Titius confessus est, cum gladio cruento percurrisse*; unum profecto hoc adjunctum vim plurium argumentorum, quæ pro ejus innocentia adferri possent, infringet; sed tamen certitudinem non efficiet, cum fieri potuisset, ut Cajus abjectum ab homicida ensem apprehenderit. At vero quomodo hoc argumentorum pondus, & firmitas rite dijudicari possit, leges quidem nonnullas ex criticorum arte desumas paullo post adferam, interea tamen fatendum est, habilitatem quamdam, & singularem mentis variis scientiis, & præcipue quidem mathematicis, ac criticis exultare sagacitatem, tum & cautissimam ad minima quævis adjuncta attentionem hac in re ferre plurimum præstare. P. Buffier jam sæpius a me laudatus hos veræ, magnæque probabilitatis characteres statuit, quos nosse e re tironum erit. 1. Cum id, quod probabile judicamus, summam

habet cum veritatibus aliis evidentibus convenientiam. 2. Cum, etsi primum de propositionis cujusdam veritate dubitemus, ea tamen semper magis, magisque nobis persuadetur, quo nimirum frequentius super eam reflectimus, eamque accuratius examinamus; 3. Cum experientiæ antehac ignoratæ superveniunt iis, ex quibus primum judicium tulimus. 4. Cum majori jam rerum, quas examinamus, usu in dies comparato judicium formamus. 5. Cum judicia jam olim de rebus ejusdem naturæ lata labente tempore vera esse deprehenduntur, quibus addi potest. 6. Cum rationes, ex quibus aliquid probabile judicamus, valde propinquam cum principiis cujuslibet disciplinæ propriis connexionem habere videntur. Hæc de probabilitate. Quod ad improbabilitatem attinet, supremus ejus gradus est nuda rei possibilitas, si enim strictè loquamur, gradus hic differt ab ignorantia plena, quæ & ipsam hanc possibilitatem incertam ponit; interea tamen gradus hic exigui adeo momenti est, ut in praxi sola possibilitatis cognitio, cum de probabilitate, aut improbabilitate agitur, cum ignorantia comparetur. Illud etiam hic monendum est, quandoque in sensu latiori probabilitatem tribui omni propositioni, quæ nec certitudinem attingit, nec etiam prorsus a nobis ignoratur: quo in casu probabilitas hæc latissime accepta ab ignorantia ad certitudinem usque crescit, ejusque infimus gradus, omnique assignabili minor, a quo ea initium ducit, est ipsa rei possibilitas, cum ante omnia constare debeat rem esse possibilem; ut tamen discrimen quodpiam habeatur, quando a dubio ad certitudinem ascenditur, vocant propositionem *verisimilem*, quod.

ea jam magis ad veritatem, quam ad falsitatem accedere videatur. Sed quidquid de hoc sit, cavendum est universim quam maxime, ne propositionem solum possibilem, inter probabiles reponamus, cum fieri possit, ut ea sit possibilis, etsi ejus indicia semper fallerem.

Quomodo
definien-
di?

CCXI. *Gradus probabilitatis in casu speciali definitur, si determinetur, quoties posito certo casuum numero indicia, quæ ad-sunt, non fallant; cum enim eo major sit probabilitas, quo rarius fallunt indicia (§. præc. cor. 3.); eo magis crescit probabilitas, sive quod idem est, eo altior erit probabilitatis gradus, quo plures sunt in determinato numero casus, in quibus illa indicia non fallunt: si ex centum observationibus mihi constaret rubedini calis nocturna nonagesies successisse serenam alterius diei tempestatem, major foret probabilitas, quam si id octogesies tantum intra easdem centum observationes contigisset; si quidem in priori intra centum casus decies tantum, in posteriori vero intra centum vigesies illud indicium sefellisset.*

COROLL. Universim igitur hæc proportio obtinet: *probabilitas est ad certitudinem, ut numerus casuum, in quibus indicia non fallunt, ad numerum casuum omnium: itaque superius primo loco erit probabilitas ad certitudinem, sicut nonaginta ad centum, sive ut novem ad decem, ut norunt arithmetici; in altero: probabilitas ad certitudinem, ut octoginta ad centum; sive ut octo ad decem.*

SCHOL. Nimirum cum incertitudo (§. 206. cor.), sive probabilitas in tota sua latitudine accepta (schol. præc. fin.) concludatur inter ignorantiam, & certitudinem, totum illud spatium conficiendum est, ut

ab ignorantia ad certitudinem perveniat, & quo plus ex illo spatio confecerimus, eo propius ad certitudinem accedemus. Dum igitur probabilitatis gradum determinamus, assignamus partes in illo spatio confectas, quæ quo plures fuerint, eo major erit probabilitatis gradus; erunt autem eo plures, quo plures sunt casus in determinato numero, in quibus indicia non fallunt; si namque indicia nullo in casu fallerent, haberetur certitudo (§. 160.), si-ve totum illud spatium esset confectum: igitur tot gradibus ab ea receditur, quot sunt casus, in quibus indicia fallunt, & tantum, si-ve tot gradibus vicissim ad eam acceditur, quantus est numerus casuum, in quibus ea indicia non fallunt. Unde patet, quemlibet probabilitatis gradum exprimi posse per fractionem, cujus numerator denotet numerum casuum, in quibus indicia non fallunt, denominator vero numerum casuum assumptorum; utimur vero facilioris calculi causa fractionibus decimalibus, ad quas aliæ facile reduci possunt, ut in arithmetica docetur. Si igitur totum hoc, si-ve ipsam certitudinem pro unitate assumptam secemus in decem partes, has obtinebimus fractiones:

$$\frac{10}{10}, \frac{9}{10}, \frac{8}{10}, \frac{7}{10}, \frac{6}{10}, \frac{5}{10}, \frac{4}{10}, \frac{3}{10}, \frac{2}{10}, \frac{1}{10}, \frac{0}{10}$$

In hac serie prima fractio, quæ integræ unitati æquivaleret, denotabit certitudinem; ultima ignorantiam; secunda vero, tertia, quarta, quinta diversos probabilitatis gradus exhibebunt; tum sexta fractio exprimet dubium; reliquæ vero, nempe septima, octava, nona, decima, gradus improbabilitatis varios designabunt. Patet vero ex his etiam, ad hoc, ut propositio vero sensu sit probabilis, necesse esse, ut numera-

tor fractionis sit major dimidio denominatore; quod si idem numerator æquetur dimidio denominatori, indicia toties fallunt, quam non fallunt, quo casu propositio est dubia (§, 208.); adeoque dimidiata certitudo caussat dubium: ubi denique numerator a dimidio denominatore superatur, ultra dubium ad improbabilitatem devenitur, quæ eo magis crescit, quo magis idem numerator minuitur, dumque is fit æqualis Zero, ipsa etiam improbabilitas expirat, ejusque in locum ignorantia succedit.

A priori,
vel po-
steriori?

CCXII. Casus, in quibus indicia non fallunt, determinari possunt vel *a posteriori*, qui per experientiam hucusque cogniti sunt; ut si decies flante austro oclies secuta est pluvia, erit nunc probabilitas pluvie supervenientis eodem spirante, sicut $\frac{8}{10}$. Vel *a priori*, ex dispositione, & præparatione caussarum, ex quibus pronissimum est effectum in data casuum serie sequi, vel non sequi.

SCHOL. Cum de probabilitate eventuum futurorum agitur, in errorem admodum proclives sumus, & res est periculi plena; interea tamen in usibus vitæ quotidianis necessitate quadam frequenter adigimur, ut de eventibus quoque futuris iudicium feramus, pendetque nonnumquam ab eo majus lucrum obtinendum, aut contra damnum evitandum. Eam in rem hæc fere sunt, quæ a criticis percipiuntur, solentque compellari.

Leges. Contingentium.

1.) *Dispiciantur, accurateque examinentur omnia adjuncta, quæ effectus existentiam præcedere solent*, etenim ex iis solum prudenter judicari potest, num effectus futurus sit, an non; „ omnis opinabilis divinatio conjectu-

Cic. de
div. cap.
24.

„ ra nititur, ultra quam progredi non po-
 „ test. Ea fallit fortasse nonnumquam; sed
 „ tamen ad veritatem sæpissime dirigit. Est
 „ enim ab omni æternitate repetita; in qua
 „ cum penz innumerabiles res eodem modo
 „ evenirent, iisdem signis antegressis, ars
 „ est effecta eadem sæpe animadvertendo,
 „ atque notando.

2.) *Quod in certis adjunctis semper acci-
 dit, habendum est pro moraliter certo; quod
 numquam: pro moraliter impossibili; quod
 vero quandoque evenit, quandoque non, prorsus
 contingens est, ejusque probabilitas de-
 terminatur per accuratum casuum, quam
 plurimorum examen (§. 211.); sic depre-
 hendimus admodum probabilem esse crastina
 tempestatis serenitatem posita hodie serotina
 cæli rubedine, quia hoc signum potissimum
 non fallit. Pater vero exindo, probabilita-
 tem futuri eventus non infringi per hoc,
 quod quandoque contrarium acciderit, ac
 proinde etiam attentio habenda non est ad
 unum vel alterum casum præteritum; sic
 probabilitas jactus aleæ, siqua est, non mu-
 tatur ex noto jactu præcedente: quot tamen
 homines sunt, qui ad similia attendentes ita
 secum ratiocinantur: hoc contigit: ergo nunc
 non contingeret; & alii ab opposito dum ne-
 gotium quodpiam successu caruit, illud, aut
 simile quid rursum aggredi recusant ita in-
 ferentes: hoc nuper contigit: igitur nunc ite-
 rum contingeret. Probe igitur, universumque
 tenendum argumentum probabile per exce-
 ptionem casus particularis non infringi: si
 quis mihi asserenti, hodie pluviam esse fu-
 turam, propterea quod mane cælum rubuit,
 contradicat, assertique mei veritatem impu-
 gnet ex eo, quod heri eundem cæli ruborem
 pluvia secuta non sit, nã is insignem im-
 peritiam palam faciet, cum enim ego id*

probabiliter solum affirmem, necesse utique non est, ut nullus detur casus, in quo contrarium accidit, sed id tantummodo requiritur, ut ii longe pauciores sint: hinc contradicentis munus erit ostendere, plures longe esse casus, in quibus hoc indicium fefellerit.

3.) *Contingentia non procedunt aequaliter*, id est, adjuncta, causæque similiter comparatæ ad plures diversosque effectus, modo hunc, modo illum producant; nam cum in ejusmodi causa nulla detur necessaria determinatio ad certum effectum, æqualis est, ut ita dicam, determinabilitas, & consequenter etiam spes ad quemlibet effectum; sic cum alea in se aequaliter sit comparata ad quemlibet ex sex numeris exhibendum, videmus etiam ejus jactu modo hunc, modo illum obtineri. Atque hinc quod potest ex æquo fieri, aut non fieri, in innumeris adjunctis, & occasionibus aliquando fit, aliquando non fit. Ex hac regula ostenditur, nullo modo probabile esse, ut omnes homines contingenter in unum, eundemque errorem conspirent.

4.) *Quando in causis ad plures effectus habetur equalis dispositio, probabilitas pro effectu determinato est sicut unitas ad numerum reliquorum effectuum possibilium*; cum enim contingentia æqualiter non procedant, nullus effectus habet determinationem, ut præ altero frequentius sequatur: sic cum jactus aleæ sit æqualiter comparatus ad omnes sex numeros, erit probabilitas pro uno aliquo determinato sicut unum ad sex, hoc est, fere nulla, & mera solum possibilitas; unde eorum patet dementia, qui aleæ, aliisque id genus lusus lucri, adeo incerti spe impulsæ, at simul cum ingenti jacturæ bonorum periculo operam dant.

5.) *Quando causa ad plures effectus est*

aqualiter comparata, tanto major est unius effectus, præ altero probabilitas, quo sæpius dispositiones ad eundem effectum recurrunt; ponamus Cajum æque comparatum ad verba contumeliosa, mendacia, blasphema proferenda, certe tanto probabilius est, eum frequentius contumeliosis, aut mendacibus usurum præ blasphemis, quo sæpius eorum occasiones sese offerunt; sic quoque cum habentur duæ alex. perfecte æquales, etsi quoad se probabilitas ad quemlibet numerum determinatum ex duodecim demta unitate sit, sicut unum ad undecim, tamen major est probabilitas de iis numeris obtinendis, quorum dispositiones sæpius redeunt intra seriem casuum possibilium, ut sunt numeri 6. 7. 8. quorum dispositiones ter; deinde numeri 4. 5. 9. 10. quorum dispositiones bis recurrunt, quia nempe numerus 6. constituitur per 3 + 3, 5 + 1, 4 + 2; numerus 7. per 6 + 1, 5 + 2, 4 + 3. numerus 8. per 4 + 4, 6 + 2, 5 + 3. Numerus vero 4 tantum constituitur per 2 + 2, & 3 + 1. numerus 5. per 4 + 1, & 3 + 2. Numerus 9. per 6 + 3, & 5 + 4. numerus 10. per 5 + 5, & 6 + 4. hinc minima respective in hoc casu probabilitas est pro numeris 2. 3. 11. 12. cum eorum dispositiones necessariae semel tantum recurrant, nam numerus 2. tantum consurgit ex 1. + 1. numerus 3. ex 2 + 1. numerus 11. ex 5. + 6. & numerus 12. ex 6. + 6.

6.) Denique improbable censendum est fore, ut eventus contingat iis in adjunctis, quibus positæ alias rarissime accidere solet; indicium enim, quod fere semper fallit, nullam parit probabilitatem: sic metus fulminis improbabilis est, cum fortassis ex 200000. hominum sæpe vix unus fulmine tactus pereat. Error hinc eorum corrigi potest, qui

in valetudine sua curanda nimis morosi, & cauti sunt, & nescio quas possibles sibi infirmitates imaginantur: angores quidem hi boni sunt, quam diu hominem in officiis vitæ Christianæ continent, sed ubi ulterius progrediuntur, ingentibus sæpe malis, quin & dementiæ originem præbent.

Quando
probabi-
litas ex-
pirat?

CCXIII. *Probabilitas propositionis prorsus evanescit, ut primum ejusdem veritas, vel falsitas certo detegitur; cum enim indicia sufficientia, vel nulla adesse cognoscuntur, insufficientibus amplius locus non est, atque adeo omnis quoque incertitudo, ac probabilitas, quæ ex his oritur (§§. 206. 207.), exulare debet. Et aliunde, cum probabilis non dicatur propositio nisi, quatenus ponuntur ejus indicia nunc non fallere, propterea quod constat ea frequentius non fefellisse, ea illico suam probabilitatem amittit, quando hæc hypothesis amplius fieri nequit; sed id contingit, cum veritas vel falsitas certo deprehenditur; tum enim patet ea indicia vel actu non fallere, vel actu fallere: quod vero constat vel certo esse, vel certo non esse, illud supponi non potest; nam *præsumptio cedit veritati*, ut habet notum in jure axioma: sic evanuit probabilitas utriusque hujus propositionis; *dantur antipodes, non dantur antipodes*, postquam per experientiam certam illius veritas, hujus falsitas detecta fuit.*

COROLL. 1. Cum ex veritate unius contradictoriæ legitime inferatur falsitas alterius (§. 156. schol. l. 3. cor.), & vicissim, detecta unius contradictoriæ veritate, aut falsitate cessat omnis alterius contradictoriæ probabilitas.

COROLL. 2. Quidquid igitur sententiæ certæ opponitur, nullam habet probabilitatem, atque adeo ea impugnari cum ratione non

potest; sic cum certa sit naturalis animæ humanæ immortalitas, vana sunt deliramenta quæcumque ab hominibus profanis contra accumuluntur.

CCXIV. Propositiones contradictoriæ absolute, & secundum se spectatæ possunt simul esse probabiles; at si eæ inter se conferantur, comparatione instituta major unius partis probabilitas minuitur; minor vero alterius partis probabilitas deficit degenerando ad improbabilitatem. Etenim primo negari haud potest, fieri posse, ut utraque contradictionis pars, quam diu seorum, & secundum se spectatur, polleat iis indiciis, quæ sæpius non fallunt; secus enim nulla umquam posset dari propositio dubia (§. 208.): cum agitur de homicidio a Cajo patrato, dari utique possunt & pro culpa, & pro innocentia Caji ejusmodi indicia; sed id, nec quidpiam amplius ad absolutam utriusque partis probabilitatem requiritur (§. cit.): ergo in aperto est, quod primo loco propositum fuit. Deinde vero in utriusque collatione minui probabilitatem majorem unius per probabilitatem minorem alterius sic ostendo. Probabilitas pro utraque contradictionis parte æqualis in comparatione sese mutuo destruit; oritur enim dubium (§§. 207. & 208.), in quo probabilitas expirat (§. 207. cor.): ergo etiam probabilitas minor in comparatione, saltem æqualem sibi partem in probabilitate majori destruit, atque adeo ii solum relinquuntur gradus, quibus ea ab hac antea excedebatur; sed hoc ipso minuitur probabilitas major: ergo, quod erat alterum. Sit pro culpa Caji probabilitas sicut novem ad decem, seu $\frac{9}{10}$, quæ nimirum uno gradu a certitudine deficiat; sit quoque pro innocentia Caji probabilitas sicut octo ad decem, sive $\frac{8}{10}$, quæ duobus gradibus distet a cer-

Quomodo
duæ con-
tradicto-
riæ simul
probabi-
les s

certitudine : erit illa quatuor graduum ; hæc trium supra dubium : cum igitur inter se conferuntur, *tres gradus hujus elident tres gradus alterius, atque adeo remanebit unicus, & probabilitas respectiva pro culpa Caji erit sicut sex ad decem, $= \frac{4}{10}$* , distans jam a certitudine quatuor gradibus. Denique probabilitatem minorem prorsus evanescere, atque ad improbabilitatem degenerare, quod tertium est, hac fit ratione manifestum : probabilitas major ea sui parte qua minori æquatur, eam jam prorsus elidit, & quasi detruddit ad locum dubii ; nam si esset æqualis alteri, foret dubium (§. 107.) : igitur ea parte, qua minorem excedit, ipsam infra dubium deprimit ; sed infra dubium jam habetur improbabilitas (§. 207. cor.) : ergo in hac collisione minor probabilitas ad improbabilitatem degenerat. Sic in superiori exemplo cum probabilitas major sit quatuor graduum, minor trium ; *tribus gradibus illius tres gradus hujus elidentur, sicque probabilitate minore expirante succedet dubium ; sed remanet adhuc unus gradus probabilitatis majoris, qui cum etiam agat in partem oppositam, uno gradu infra dubium detruddet probabilitatem minorem ; erit adeo probabilitas respectiva pro innocentia Caji, sicut quatuor ad decem, $= \frac{4}{10}$* , distans a certitudine sex gradibus, quæ fractio jam exprimit improbabilitatem (§. 211. schol.).

COROLL. Cum probabilitas minor in concursu cum majore pereat, palam est, actiones nostras secundum eam, quæ majore probabilitate gaudet, partem moderandas esse ; qui enim sequeretur minus probabilem, sequeretur sibi improbabilem, atque adeo imprudenter ageret.

SCHOL. Hæc probabilitatis diminutio universim hac ratione detegitur. Determinetur

primum absoluta probabilitas utriusque partis in fractionibus ejusdem denominatoris, vel ad eundem reducantur; tum distantia a certitudine, id est, defectus numeratoris a denominatore unius fractionis addatur: numeratori alterius fractionis, & vicissim; denique demoninadores sibi invicem addantur: fractiones, quæ inde orientur, determinabunt probabilitatem, quæ propositionibus post institutam comparisonem convenit. Sic probabilitas absoluta Cajum commisisse homicidium $\equiv \frac{2}{9}$, & probabilitas pariter absoluta, Cajum non commisisse homicidium $\equiv \frac{8}{9}$ (si etiam hæc esset $\equiv \frac{2}{9}$ foret dubium, adeoque nulla pro utraque parte probabilitas: assumo igitur maximam, quam fieri potest, probabilitatem pro contradictoria, ut si ista trans-eat ad impossibilitatem, evidenter pateat omnes reliquas, cum minores sint, in simili casu quoque transituras.) Jam defectus numeratoris a denominatore in prima fractione est $\equiv 1$, & in altera $\equiv 2$; addantur ergo vicissim hi defectus, ac denominatoribus additis, prodibunt fractiones $\frac{1}{2} \cdot \frac{1}{9}$ & $\frac{2}{9}$, quæ expriment probabilitatem ex collisione per comparisonem facta residuam; erit nempe probabilitas affirmativæ, seu pro culpa Caji $\equiv \frac{1}{2} \cdot \frac{1}{9}$ uno solum gradu distans a dubio, adeoque octo gradibus imminuta, tot nempe, quot prius habuerat probabilitas minor: & probabilitas negativæ, sive pro innocentia Caji erit $\equiv \frac{2}{9}$ uno gradu depressa infra dubium, quo videlicet antea a majori probabilitate superabatut, ac consequenter vera improbabilitas. Ratio totius operationis hæc est: cum indicia, quæ pugnant pro affirmativa propositione, intra decem casus semel fallant, casus utique iste favebit sententiæ ne-

gativæ; & ab opposito duo casus, in quibus rursus intra decem casus fallunt indicia, quæ pugnant pro negativa, favebunt affirmativæ: hinc indicia pro affirmativa spectari possunt, ac si intra viginti casus undecies non fallant, & indicia pro negativa, ac si intra eosdem viginti casus novies non fallant; cum enim pro duabus propositionibus contradictoriis adferuntur indicia seorsum probabilia, ut $\frac{2}{10}$ & $\frac{8}{10}$, tum pro dijudicanda absoluta veritate proponuntur intellectui viginti casus, videlicet decem casus ex parte affirmativæ, & decem alii diversi ex parte negativæ: pro affirmativa pugnant novem casus ex prioribus decem casibus, & duo ex posterioribus decem casibus; nam cum in posterioribus decem casibus indicia dicantur octies non fallere, bis autem fallere, affirmativa debet intra hos decem posteriores casus bis vera esse. Igitur ex viginti casibus novem, & duo, id est, undecim pugnant pro veritate propositionis affirmativæ, & residui, qui tantum novem esse possunt, stabunt pro veritate negativæ. Id tamen in hac comparatione instituenda notandum, eam fieri haud posse, nisi indicia utriusque partis ejusdem sint rationis, nimirum vel omnia ex ratione, vel omnia ex auctoritate petita; sed de his in sequentibus.

Quando
consequens in
ratiocinio pro-
babile?

CCXV. *Si in legitimo ratiocinio una pars antecedentis sit tantum probabilis, altera certa, etiam consequens erit solum probabile; cum enim consequens includatur in antecedente, atque propter illud verum sit (§. 125. & cor. 3.), fieri nequit, ut consequens majori firmitate polleat, quam totum antecedens; sed in hoc casu toti antecedenti non convenit certitudo: ergo neque consequenti*

ea competere potest, restat igitur, ut illud sit probabile. Et alioquin, quando absolute certum non est duo convenire cum uno tertio, nec certum esse potest ea inter se convenire.

COROLL. 1. Igitur etiam in syllogismo, si una præmissarum sit probabilis, conclusio quoque talis erit.

COROLL. 2. Si in polysyllogismum, quo demonstratio conficitur, irreat vel una propositio solum probabilis, ea vim omnem, ac robur amittit, atque in probationem simpliciter probabilem degenerat (§. 197.).

SCHOL. Eadem rationis conclusione conficitur, gradum probabilitatis in consequente fore plane eundem, qui fuit in una antecedentis parte.

CCXVI. Si in legitimo ratiocinio utraque pars antecedentis sit probabilis; probabilitas consequentis erit tanta, quanta est probabilitas unius partis diminuta per fallibilitatem alterius partis; consequens enim participat de fallibilitate utriusque partis; nam si jam consequens est probabile, etsi una antecedentis pars sit certa (§. præc.), utique existente utraque parte antecedentis tantum probabilitas conclusionis minuetur; atqui utriusque partis fallibilitas obtinetur, cum probabilitas unius per fallibilitatem alterius minuitur: ergo consequenti convenit probabilitas unius partis diminuta per fallibilitatem alterius. Sit probabilitas unius partis $\equiv \frac{2}{1}$, erit fallibilitas illius, sive distantia a certitudine $\equiv 1$. sit alterius partis probabilitas $\equiv \frac{8}{1}$, erit fallibilitas illius $\equiv 2$: & probabilitas unius imminuta per fallibilitatem alterius erit $\equiv \frac{7}{1}$ cuius fallibilitas est $\equiv 3$; est vero etiam summa fallibilitatum utriusque partis in antecedente $\equiv 3$. Igitur si consequens participet, ut fieri debet, fallibili-

tatem utriusque partis, *ejus probabilitas erit*
 $= \frac{2}{10}$.

COROLL. 1. Igitur etiam in syllogismo, conclusio ex duabus præmissis probabilibus deducta, habet probabilitatem unius imminutam per fallibilitatem alterius, sive quod idem est, fallibilitas, vel distantia a certitudine, ejusmodi conclusionis æquatur summæ fallibilitatum, sive distantiarum a certitudine utriusque præmissæ.

COROLL. 2. Quia hæc fallibilitatum summa facile major evadit, ut ex inductione casuum singularium patet, talis conclusio frequentius amittit suam probabilitatem, atque vel dubia, vel prorsus improbabilis evadit.

Quando probabilitate utendum?

SCHOL. Probabilitas supplet defectum veritatis, quam in rebus quamplurimus etiam optimo facultatum naturalium usu detegere non possumus; ubi enim mens nostra veritatem non assequitur, attingit ea nonnumquam magnam verisimilitudinem, atque ibidem, velut in loco veritati maxime vicino, interea conquiescit. Ut vero probabilitate utiliter utatur, hæc sibi tiro servanda sciatur.

1.) In rebus pure *theoreticis* fere retinendum est iudicium, nisi probabilitas quam maxima appareat; cum enim propositio quantumque probabilis possit esse falsa (§. 209. cor.); neque ulla nos in his casibus ad iudicandum necessitas impellat, sana ratio, ac prudentia suadet abstinendum esse iudicio, quo erroris periculum evitetur (conf. §. 93. schol.). Si tamen naturali ad iudicandum propensione satisfacere quis velit, circa id, quod evidens, non vero circa id, quod obscurum est, eam exerceat; iudicet nimirum sententiam esse probabilem, non autem eandem esse veram.

2. In rebus vero *practicis*, cum necessitas agendi, vel non agendi incumbit, probabilioribus cogimur esse contenti, ut veris; nam relate a praxim necesse est, ut agamus; qui indeterminatus hæsiteret, nunquam agerei, quod perniciosissimum foret. Cum deliberamus, nulla cura nimia est; discutenda sunt omnia, ob quæ propositio ad veritatem, & ob quæ eadem ad falsitatem accedere videatur; ipsa rationum momenta accurate ponderanda; examini subjiciendi omnes casus possibiles, in quibus indicia fallunt, aut non fallunt: at vero, ubi determinatio denique facta est, necesse est, ut relate ad actionem animum obfirmemus, ipsamque propositionem, ut veram, intueamur, aversis etiam mentis nostræ oculis ab iis, quæ pro ejus falsitate pugnare viderentur. Id qui renuit, in vitium incostantiæ, & timiditatis incidit: qui genuinus debilis, ignavæque mentis character est. Profecto in miserrimo statu versaretur ille, qui probabilitate majore haud contentus, scientiam in omnibus, ac demonstrationem quæreret; qui enim manducare nollet, nisi ubi demonstrative cognovit cibum hunc esse ad se nutriendum sine nocumento aptum, qui negotia sua tamdiu differtet, donec de felici eorum successu evidenter convincatur, quid haberet reliqui, nisi ut in quiete sua propemodum computrescat, ac brevissimum intra tempus pereat?

3.) Denique cum probabilitas fere omnis pendeat ex inductione casuum similium, aut ex legibus contingentium; raro autem constare possit, an sufficiens ejusmodi inductio facta sit, vel utrum omnia adjuncta ad eventum concurrentia satis expenderit, patet; modeste semper & sentiendum, & loquendum esse, ne nobis ipsis plus, quam oporteat, tribuisse videamur.

Quid
probabi-
litas in-
terna &
externa?

CCXVII. Indicia, quæ propositionem probabilem efficiunt, vel ipsi rei, id est, sub-
jecto, & prædicato insunt, vel non: illa *ca-
ratione*, hæc ab *auctoritate* petuntur. In ca-
su priori probabilitas est *interna*, in poste-
riori *externa*.

Quando
alterutra
attenden-
da?

SCHOL. In disciplinis, quæ probabilitatis in-
ternæ capaces sunt, probabilitas externa in
doctorum auctoritate fundata non attendi-
tur; neque rationi addita auctoritas proba-
bilitatis gradum auget, quamvis ratio ad-
dita rationi id præstet, uti & auctoritas
addita auctoritati externam probabilitatem
majorem efficit. Ubi ergo negotium agi-
tur probabilitatis internæ, sollicitè circum-
spicere, quot auctores pro hac sententia
steterint necesse non est; ingens namque
etiam eorum numerus majus non habebit
pondus, quam ipsa sit ratio, qua impulsī
in eam convenerunt opinionem: ea proin-
de magno studio investiganda erit. Id ta-
men quandoque illis præsertim, qui ratio-
ni internæ indagandæ non satis idonei sunt,
usuvenit, ut prudenter præsumere possint,
auctores, virosque doctos numquam tanto nu-
mero in unam abituros fuisse sententiam, nisi
graves pro ea rationes perspexissent; quo
casu eam quoque amplecti licebit, non tam
propter doctorum auctoritatem, quam pro-
pter rationem internam, quam ipsos per-
vidisse prudens persuadet præsumtio. Hæc
de probabilitate generatim; qui plura de-
siderat, adeat *prin. art. crit.* Eusebii Amort,
vel J. s' Gravesande *introd. ad phil. l. 2.
p. 1. c. 17.*

Quid
opinio,
& judi-
cium opi-
nativum?

CCXVIII. *Opinio* latissime sumta notat
quamvis cognitionem incertam, oriundam ta-
men ex rationibus internis; proprie vero est
cognitio interne probabilis (§. præc.), ju-
diciūque dependenter ab ea formatum vo-
ca-

caratur *opinativum*; is namque *opinari* dicitur, qui propositioni interne probabili assensum præstat, ut si quis cum Pythagoræis iudicet *lunam inhabitari*.

COROLL. 1. *Opinio* igitur late accepta potest esse vel probabilis, vel dubia, vel improbabilis.

COROLL. 2. Cum propositio probabilis possit esse falsa (§. 209. cor. 1.), iudicium *opinativum* nunquam ita firmum est, ut prudentem de latente falsitate metum excludat, in quo a iudicio certo, aut a scientifico præter evidentiam (§. 188.) differt.

Quod discrimen inter iudicium scientificum, & opinativum?

C A P U T IV.

DE FIDE.

CCXIX. *Fides* est cognitio ex loquentis auctoritate obtenta, assensusque ob hoc motivum propositioni cuidam præstitus; *iudicium fidei*; vel etiam frequenter *fides*; ipse vero, qui ita assentitur, *credere* dicitur: sic credimus a Cæstre Gallos devictos esse; Ciceronem consulatum gessisse.

Quid fides, ac iudicium fidei?

COROLL. 1. Cum auctoritas Dei sit, & hominum (§. 199.), pater fidem quoque vel divinam, vel humanam esse.

Quotuplex fides?

CCXX. Auctoritas humana vel sufficienter comprobatur, vel non: si primum, fides humana est *moraliter certa* (§. 183.); si alterum: *incerta*, eaque vel *probabilis*, vel *dubia*, vel *improbabilis* (conf. §. 207.).

Quotuplex fides humana?

COROLL. 1. *Fides* igitur probabilis est assensus præstitus propositioni extrinsece probabilis (§. 217.).

COROLL. 2. Hinc, quæ supra de probabili.

tate in genere dicta sunt, huc quoque applicari debent.

SCHOL. De fide probabili hic solum agam; eam enim, quæ certitudine morali pollet, fusius supra exposui (§. 183. &c.). De Fide quoque Divina, quantum ad logicam pertinet, actum est (§. 181.): reliqua ad theologiam naturalem referri debent.

Quod
ejus ob-
jectum?

CCXXI. Referri possunt vel ea, quæ ad scientias pertinent, vel quæ fiunt, aut facta sunt; in iis auctoritatem non attendimus (§. 217. schol.): agitur fides locum duntaxat habet in rebus *facti*, sive *historicis*; vel, ut ajunt, in *credibilibus*.

COROLL. 1. Facta, quæ eveniunt, singularia sunt (§. 59. schol.): ergo fides est de rebus singularibus, ac proinde universalia non *credimus*: sed vel *scimus*, vel *opinamur*.

Quid
testi ido-
neus?

CCXXII. *Testis* hoc loco est omnis ille, qui nobis aliquod factum seu ore, seu scripto refert, estque *idoneus*, cum habet auctoritatem, cui fides merito adhiberi possit.

COROLL. 1. Quilibet historię scriptor testis nomine venit.

COROLL. 2. Cum auctoritas testantis per scientiam, & veriloquium constituatur (§. 180.), testis idoneus est, qui, quod narrat, scit, & ut scit, narrat, id est, qui rei notitia, & veri dicendi voluntate præditus est.

COROLL. 3. Antequam narrationi fidem habeamus, sollicitè indagandum est, num ea a teste idoneo proficiscatur.

SCHOL. Per se vero patet, requiri præterea, ut testimonium sit clarum, sive ut testis clare, & intelligenter loquatur; qui enim vel probabiliter mihi quidpiam persuadeat auctoritas, si loquentis sensa non assequar? Quare magnopere necesse est, ut tam testis ipse, quam qui ejus relationem exci-

pit, vocabulorum abusus (§§. 82. & seqq.)
relatos omni cura evitare studeat.

CCXXIII. *Quivis testis habendus est verax, dum contrarium probetur; ex lege enim* Quando
testis ve-
rax?
quadam in ipso naturæ sensu fundata nemo præsumendus est malus esse, nisi id satis commonstrari possit; jam vero, qui verax non est, sive, qui deliberato consilio contra mentem, ac propria sensa loquitur, cum id sine animo alios fallendi numquam fieri queat, profecto ab omni malitia immunis esse non potest: igitur tamdiu quivis putandus est verum loqui, quamdiu graves rationes contrarium non evincunt. Et sane licet homines mentiri possint, & per frequenter etiam mentiantur, nihilo minus vel ex eo, quod natura quemdam veritatis amorem omnibus indiderit, merito præsumimus, quemlibet in loquendo naturalem hanc propensionem sequi, nisi oppositum suspicandi gravis adsit ratio. Sunt autem hæc fere.

Rationes dubitandi de veracitate Testis.

1.) Qui sæpius etiam ex imprudentia durtaxat falsum dixisse deprehensus est, aut, quod deterius foret, deliberata mente mentiri consuevit, nullam meretur fidem; mendacium enim vel unicum est signum malitiæ in animo latentis, ex qua plura subinde profiscuntur, fundatque proinde gravem suspicionem contra veritatem cujuscunque testimonii. Atque hoc adeo verum est, ut id genus homini etiam credi non debeat, cum juramento rem confirmat; etsi enim ceteroquin testibus juratis propter jurisjurandi religionem apud omnes gentes maximam, sine hæsitazione fides adhiberi soleat, si quis tamen eo jam audaciæ devenit, ut ipso jurejurando abusus fuerit, gravissima contra il-

Orat. pro
Rabir.

lām præsumptio firmatur, ne hac quoque in re, aut hoc tempore id sacrilegii genus admittat: quare Tullius: „ Si quis semel pe-
„ jeraverit, ei credi postea, etiamsi per plu-
„ res Deos juret, non oportet. “ Ab hac accusatione cum primis immunes sunt viri illustres, in dignitate constituti, atque publica fama celebres; experientia enim teste in ejusmodi viros longe rarius, quam in rudes, ac de plebe homines mendacium cadit, cum illi præ his conservandæ nominis sui gloriæ studiosiores esse soleant: amplitudo igitur nominis, ac viri dignitas non exiguum testimonio robur addit.

2.) Cum res, quæ narrantur, non apte satis inter se cohærent, prudens de occulta quadam repugnantia suspicio exoritur; cum vero res sunt admodum insolitæ, vel propterea, quod rarissime accidunt, creditu difficiles, aut ejus naturæ, ut incautus quisque facile circa eas decipi possit, novo examini subjiciendæ erunt, quin quidpiam interea affirmate decidatur. At ubi relata clare perspiciuntur impossibilia, sine mora inter fabulas releganda sunt.

3.) Proclives sunt maxime homines ad alios decipiendos, quando sua ipsorum res agitur, atque ex veritatis occultatione commodi quidpiam in ipsos redundat, vel quando testimonium dicunt in eorum, a quibus testes esse jubentur, utilitatem; quare in ejusmodi casu fides deneganda est, quam ab opposito vel maxime merentur ii, qui contempto proprio commodo, ac utilitate etiam insutum nocumentum aliquid testantur. Exemplum sunt Apostoli, qui de Salvatore resurgente etiam cum periculo vitæ testimonium liberrime tulerunt. Universim partium studia, adulatio erga principes, immoderatus patriæ, gentisque suæ amor, ac importuna

reliquarum affectionum turba frequentissime in causa sunt, ut ne historici veritatem sincere pandant, efficiuntque, ut vel suorum vitia occultent, vel præclare gesta ultra modum extollant, atque alias gentes præ sua superbe deprimant. Quare dispiciendum sollicitè, utrum in teste harum affectionum una aliqua, & quænam vehementius dominetur, id quod ex ejus moribus, institutione vitæ, scribendi fine, ceterisque similibus adjunctis facile cognoscitur. Sic Cæsar, ac Livius res romanas plus æquo extollunt, quin & Gallorum, Germanorum, & Carthaginiensium facta ultra justos limites evehunt, ut ex relatis de iis victoriis major romano nomini gloria accresceret; veteribus quoque Græcis nullo non tempore id vitio datum est, quod alias præ se nationes superbe despiciant, gloriamque gentis suæ per fas, nefasque amplificare studeant, unde a Latinis Græcia *mendax, garrula, levis* jure dicebatur.

4.) Cum datur testimoniorum conflictus, ac relatio, cum iis non consentit, quæ alias percepimus. Acumina intellectus hoc in casu opus est: atque imprimis res ipsa spectanda, quæ si inter eventa locum habeat, præferimus eos, qui tempori illi, quo ea contigisse fertur, propiores sunt; si vero res ad naturæ observationes pertineat, recentioribus plus tribuimus fidei; extra controversiam enim positum est, nostri temporis physicos majoribus adjumentis ad naturæ phænomena & observanda, & perscrutanda instructos esse: pervidendæ deinde quoque aliæ testium conditiones secundum ea, quæ jam dicta sunt, & porro dicentur. Denique ceteris paribus plurium testium major est auctoritas, numerusque ipse, ubi conspiratio nulla prudenter timeri potest; pondus, ac robur addit: quare in eo casu dispiciendum,

utrum res ejus sit naturæ, ut plures in eam consentire per se ceteroquin arduum foret? utrum nec educatio, nec præjudicata quædam opinio, nec commune affectionum vinculum testes ipsos colligasse videatur; quod si nullum horum vestigium appareat, maximum utique veritati pondus accedet. At vero ubi collusionis prudens est suspicio, vel cum constat, omnes eos unius solum, ea in re auctoritatem secutos fuisse, etiam centum historici non majorem merentur fidem, quam unicus ille, ex quo reliqui id desumserunt. Hac impulsæ ratione nonnulli belli Trojani veritatem in dubium vocant, quod omnes historici id uno ex Homero, vel veteri quodam Syargo, qui, ut Ælianus refert, primus illud bellum cecinisse putatur, accepisse videntur. Dixi autem ceteris paribus numerum esse attendendum, nam fieri utique potest, ut unus aliquis, licet reliquis contraria testetur, iis dotibus polleat, ut compluribus præferri mereatur.

Hist. war. l. 14. c. 21.

5.) Si nimia appareat cura stili, qui enim stilum in scribendo affectant, sæpe non tam de veritate, quam de vocabulorum elegantia solliciti sunt, satisque sibi faciunt, modo res verisimiles conscribant: horum in numero ipse Tullius Xenophontis Cyropædiam reponit. Quare non abs re in historia stilum planum & nitidum requirimus; figuræ enim, tropi, ceteraque oratorum ornamenta veritatem occultant, poetarum vero schemata, fictionesque eandem involvunt. Ex hoc rursum capite maximam merentur libri Evangelici fidem, cum in illis res maxime insolitæ, prodigia prorsus stupenda sine inutili elegantiarum comitatu, stilo propterea simplici enarrentur; unde omnis exaggerationis cujusdam, aut allegoriæ suspicio excluditur. Ut igitur testimonio fides haberi

possit, illud sit claris, planisque verbis conceptum (conf. §. 222. schol.). Sed & aliud quoque est vitium, quo testimonii veritas frequentius labefactatur, quodque præterire hic non oportet. Sic fere sunt homines comparati, ut, quæ sibi ipsis admodum nota, & familiaria sunt, aliis perinde cognita esse existiment; itaque cum factum quodpiam referunt, necessaria quandoque rei adjuncta, locique, ac temporis rationes reticent, non dubitantes, quin ea ab audientibus alioquin intelligantur, ex quo fit, ut quæ eloquuntur, non perfecte congruant cum iis, quæ mente gerunt; cui & istud nonnumquam accedit incommodi, ut de certis quibusdam facti adjunctis rogati, dum, quid quærat, non satis assequuntur, illico in animum inducant de iis quæri, quæ tum ipsi mentevolvunt; præcipue si eorum quædam connexio, aut similitudo, licet exigua, detur: unde consequens est, ut sæpius respondendo affirmant, quod etiam negassent, si quæstionem rite intellexissent.

CCXXIV. *Notitia rei in teste non præsumitur, sed positive probari debet*; quod enim frequenter non fit, illud nequit in casu quovis particulari prudenter supponi factum fuisse, sed omnino necesse est, ut solidis evincatur rationibus; jam vero requisita industria, ac labor, ceteraque, quibus rerum notitia, quæ nemini a natura ingenerata est, comparari debet, persæpe non adhibentur: igitur ea fuisse reapse adhibita, ac proinde etiam, rei notitiam in teste adesse non præsumi, verum probari debet. Sunt autem hæc fere.

Quando testis habet notitiam?

vaci nimirum phantasia laborant, facie se ea abripi sinunt, umbras, falsosque rerum splendores pro rebus ipsis habent, atque excocta suo in cerebro phantasmata pro genuinis veritatibus venditant; vident illi ea, quæ nusquam sunt, audiunt, tangunt, ac ægerime ferunt, si quis contradicere audeant. *Enthusiastas* hoc genus hominum compellamus, eorumque consortio magnopere cavendum est.

3.) Si testis narrationis suæ fontes habeat legitimos; nullam enim meretur fidem, cum documentis dubiis nititur; hoc ex capite Herodotus apud eruditos vapulat, qui non nisi populares rumores sectatus est, iique omnes, qui ex fabulosis Ægyptiorum, Phœnicum, & Rabbīnorum traditionibus congestos de rebus antediluvianis libros nobis reliquerunt, vel qui nostro hoc tempore ex novellis publicis opus quoddam historicum consarcinant. Dispiciendum igitur diligenter tum, quæ documenta, instrumenta, aut monumenta publica, quæ potissimum in inscriptionibus sepulchrorum, columnarum, & nummorum, & in antiquis scripturis, ac picturis consistunt, testis habuerit, & inspexerit; tum etiam, quantum & ipsa fides mereantur: estque hoc præcipuum ipsius testis munus; ut citando fontes scientiæ suæ rationem reddat; id nō faciat, existimandus est vulgi rumores, privata nonnullorum adversaria, & quæ ejusmodi sunt, nullius auctoritatis monumenta secutus fuisse; illud enim præsumitur, quod frequentius fit, quodque adeo factum est prouissimum.

4.) Si testis sit oculatus, cœvus, domesticus; oculatus enim aurito, cœvus recentiori, domesticus, si modo ab omni partium studio remotus sit, externo omni jure præfertur; fama siquidem eundo crescit, aliud

supprimit, aliud addit; unde veritas tandem omnis corrumpitur. Longe igitur majorem immerentur fidem, qui facto præsentibus adfuerunt, remque suis ipsi usurparunt oculis, ac illi, ad quos de ea rumor solum pervenit. Hoc porro indicium tanti est reboris, ut sapius unius cœvi narratione, rejectis plurimorum recentiorum testimoniis; standum sit: neque alia est Tullii mens de animæ immortalitate disserentis, auctoribus viri optimis, possumus; quod in omnibus causis, & debet, & solet valere plurimum, & primum quidem omni antiquitate, quæ quæ propius aberat ab ortu, & divina progenie, hoc melius ea fortasse, quæ erant, vera cernebat. Multo vero utique magis id valebit in iis, quæ antiquis temporibus contingerunt; quare si æquales præsertim plures, ceteroquin vitæ conditione, studiorum ratione, religionis instituto discrepantes, idem testentur, auctoritatem habent maximam, cum omnino incredibile sit, ut complures diversis acti affectionibus in idem mendacium conspirent. Prærogativa hæc rursum præcipuo quodam modo pro scriptoribus Evangelicis pugnat; quæ enim mirabilia de Christo narrant, ea suis fere inspexerunt oculis, aut ab iis, qui præsentibus adfuerunt, proxime acceperunt, neque ullum in iis partium studium suspicari licet, cum ea, quæ retulerunt, in offensionem Principum, totiusque gentis opprobrium cesserint.

At vero, quid de factis antiquis dicemus, quæ, cum nulla jam extent documenta cœva, sola nunc traditione probari possunt? An ea universim rejiciemus? Nequaquam; sed indagandum sollicitè, utrum ea traditio a testibus cœvis, fideque dignis, an vero aliunde ex quodam fonte suspecto ortum ducat? Illud jure arguitur, cum factum adjuncta habet

admodum splendida, ac illustria, solemnitates publicas, caerimonias, ac consuetudines ea occasione introductas; nequit enim profecto eventus ad magnam in vulgo motionem excitandam apertissimus a fraudulento quodam homine promulgari; quin sapientiores contradicant; neque fieri omnino potest, ut tota quæpiam communitas ad tam solemne commentum posteris transmittendum cum circumscriptore conspiret. Dubitare igitur non licet de veritate facti historici, quod quidem ex sola traditione proficiscitur, adeo tamen illustre, publicum, aut ejusmodi est, ut sine ingenti strepitu nec contingere, nec promulgari potuisse videatur; agitur exempli causa de serie summorum Pontificum, Episcoporum, aut Principum aliorum, non possunt proferri documenta coarva, sed catalogi ante tempus memoria antiquius conflati: potest tuto teneri talis traditio; cum nullo modo credibile sit rem adeo publicam, ac in vulgus notam vel prorsus oblivioni datam, vel aliqua decipientium fraude adulteratam fuisse. Contra vero ob solam traditionem credi sine hæsitantia nequit factum, quod in se, vel in suis adjunctis ejusmodi est, ut sub initium a paucis duntaxat cognosci potuerit, qualia sunt privata quandoque prodigia, quæ a muliercula nimis credula, vel ab enthusiastæ primum conficta, sensim denique in vulgus dimanant.

5.) Si factum quoddam memorabilius testes recentiores enarrent, cujus nullus æqualium meminit, jure in dubium vocari potest, ac vero etiam debet, nisi silentii hujus gravis ratio adferri queat. Argumentum hoc a criticis *negativum* compellati solet, ut quæ eo rite utamur, sequentia noranda veniunt, Primum constare debet auctorem certam habuisse facti illius notitiam, pronam-

que ejus referendi occasionem; dubia enim posteris transmitti non debent, neque ea, quorum commentarios scribendi non est occasio: multa ab eruditis nostri temporis, & quidem digniora sciuntur, nec tamen scribuntur, quod videlicet vel occupationes, vel vitæ rationes, vel ipse etiam scopus, quem in elucubrationibus suis viri docti sibi præfigunt, id non admittunt. Porro, occasione non caruisse auctorem ex his fere arguimus: si sit factum valde memorabile, & notatu dignum, ad filum historiæ pertinens, multumque fortasse ad aliorum, quæ in ea pertractantur confirmationem faciens; si auctor habuisset singularia motiva illud adducendi; si ex ejus relatione nullum incommodum in se redundaturum prudenter timere potuisset; primum siquidem est, ut quis veritatem reticeat, eum ex ea offensionem populi, Principis, aut alterius cujusdam, apud quem gratia valere quam maxime ipsis interest, vel aliud quodcumque incommodum prævideat oriturum. His ducti rationibus fidem non habemus Philostrato, qui centum post annis prodigia maxime stupenda ab Apollonio Tyaneo patrata fuisse enarrat, quorum nullus eorum meminit, etsi id ad idololatriæ superstitionem, quam promovere conabantur, confirmandam quam plurimum contulisset. Si jam vero supra dictis opposita obtineant, silentique eorum ratio efficax reddi possit, nullum inde argumentum pro rei a recentioribus relatæ falsitate peti potest; sic hæreticis rationem damus, efficacissimam, cur de sanctissimis Religionis nostræ Sacramentis, eorumque usu non tam multa ac minuta in antiquis primorum Christianorum libris consignata deprehendantur, disciplinam nimirum arcani; quam inter primos Christianos viguisse ex Origene, Ter-

ulliano, aliisque discimus. Atque id multo magis tum observandum est, cum aliis coævis tacentibus alii rem enarrant; tum enim locum habet recepta apud criticos regula: *qui aliquid tacet, id propterea non negat*, esto etiam; quod id historiæ leges exegissent; nam convenientius est judicare, unum illum forassis in historiæ leges peccasse, quam reliquos omnes in fraudis, aut ignorantie suspicionem vocare. Sic veritas Librorum Evangelicorum non infringitur ex eo, quod non omnia a quovis Evangelistarum referantur, sed in uno extent, quæ ab alio prætereuntur. Inde vero sequitur, universim argumento hoc *negativo* admodum caute utendum esse, cum rarissime certo constare possit, an nullus omnino æqualium ejus, de quo quæritur, facti mentionem fecerit, cujus rei ratio est: quod multa veterum monumenta tam hominum incuria, quam temporum iniquitate interierunt.

SCHOL. Indicia duobus his §§. allata tanti sunt roboris, ut si ea omnia simul in tota sua latitudine pugnent pro veritate cujusdam testimonii, eam jam non probabilem, sed omnino moraliter certam efficiant; inde enim constantur characteres (in schol. §. 183.) memorati, qui humanæ auctoritatis infallibilitatem commonstrant. Id cum primis obrinet in Libris Evangelicis; nihil enim omnino est, quod eorum auctoribus, aut veri dicendi voluntatem, aut factorum, quæ narrant, notitiam defuisse, vel minimam prudentis suspicionis umbram movere posset. Quare libri hi, etsi a revelatione abstrahamus, spectata solum ratione naturali fidem, quæ in rebus humanis dari potest, maximam merentur, atque rationem ipsam exuisse censendi sunt, qui, nescio quo malo ge-

nio, aut imprudenti scepticismo acti finem, quam tamen Livio, Curtio, aliisque longe inferioris notæ scriptoribus liberalissime tribuunt, iisdem pertinaciter denegant.

Ad extremum nequeo gravissimum hoc in argumento errorem Lockii, viri ceteroquin acutissimi silentio præterire; maximi enim is est momenti, videturque eo quam proxime tendere, ut traditiones Apostolicas Romanæ Ecclesiæ convellat. Docet Lockius universim cujusvis testimonii probabilitatem ea proportionem imminui, quæ a primo fonte recedit; „vir fide dignus, „inquit, cum testatur rem quampiam sibi esse notam, firmum adfert argumentum; verum cum secundus æque fide dignus idem testatur nixus testimonio prioris, testimonium hoc jam evadit debilius, & testimonium tertii, qui ex ore præcedentium loquitur, est rursum minus attentione dignum; ita uti in veritatibus, quæ nobis via solius traditionis patefunt, quivis gradus remotionis a fonte vires argumenti infringat &c. „&c.” Hujus porro novæ atque absurdæ doctrinæ rationem sibi videtur invenisse in lege per Angliam recepta, vi cujus, etsi exemplum ex instrumento authentico descriptum, ac per legitimos testes comprobatum æqualem adhuc fidem faciat, hujus tamen exempli exemplum, quantumvis summæ auctoritatis testibus confirmaretur, in nullo amplius tribunali legitimæ probationis vim obtinet. Tum conqueritur apud plurimos morem e diametro oppositum invaluisse, atque inde evenire ait, ut opinioniones nonnullæ sæpe solum senescendo novas vires acquirant, ac ea nunc in certissimis, ac indubitatis ob succedentium te-

*Essai
phil.
conc. p
entend.
hum. l. 4.
ch. 16.
§. 10.*

stium, ex primi tamen ore loquentium, auctoritatem habeantur, quæ ante mille annos, & ob testimonium primi ne probabilia quidem videbantur. Miror, vehementer, virum qui in opere tam elegantia ratiocinandi præcepta suppeditat, in patientem adeo paralogismum prolabi potuisse; sed nempe & doctissimus, quisque suos patitur manes. Ut, a postremo ordiar; manifeste deseritur hypothesis assumpta, atque ad aliud, quod in questione prorsus non versatur, excurrit oratio: utrum testimonium mendax, an opinio falsa sola annorum diuturnitate, & suo quasi senio robur obtineat, hic non queritur; id enim fieri haud quaquam posse luce meridiana clarius est, nec quemquam esse mihi persuasero, qui ignoret, commenta procedente tempore adeo non confirmari, ut ea contra deleat dies, aut si neque hoc eveniat, contra veritatem tamen nulla temporum diuturnitate præscribi posse; addo etiam consuetudinem, si qua vigeat, opinionem quampiam eo solum ex capite, quod longo annorum intervallo obtinuerit, inter veras reponendi magnopere improbandam esse. At hæc omnia Lockio parum proderunt; in hypothesis enim ab ipso statuta queritur de testimonio vero a teste primo *fide digno*, per quamplurimos alios sibi ordine succedente *equaliter fide dignos* transmissio; hujus vero auctoritatem longa annorum serie non minui, vel ex eo patet, quod eadem omnia, quæ ad fidem primo testimonio habendam movere poterant, etiam pugnent pro centesimo, vel millesimo, vel pro quocumque alio, cum hypothesis ponat teste omnes subsequentes esse *equaliter fide dignos*, adeoque tales, qui id, quod acceperunt, fideliter

sine omni mutatione, additione, aut subtractione adjunctorum renuncient, quamvis id fatendum sit hypothese rei veritati sæpe non respondere, cum talium testium rarus admodum sit numerus, nisi facta sint publica, & solemnia, taliaque, quorum accuratam memoriam conservare multorum plurimum interest. Quod vero ad legem illam jure Anglicano introductam attinet, quis ignorat præsumptiones juris rerum veritati non obesse, multaque universim a legislatoribus sapientissime constitui non alio ex capite, quam ut hominibus malevolis remotiores quoque alios fraudibus circumveniendi occasiones extorqueantur? Atque unicus etiam hic finis videtur legi huic propositus: exemplum exempli, etsi testibus idoneis confirmatum, non amplius in locum legitimæ probationis admittitur, non quod in casu quodam singulari non possit in se mereri fidem; id enim neque lex exprimit, sed ut universim omnes fraudibus quæ in ejusmodi descriptionibus frequentissimæ sunt, occasiones eripiantur; fere uti certæ personæ, quæ in quibusdam caussarum generibus a jure inter testes non recipiuntur, non tamen propterea mendaces esse declarantur. Patet igitur testimonium etiam longissima annorum serie per testes æque idoneos transmissum nihil de sua firmitate perdere: immo audeo asserere, sæpe traditionem eo magis esse fide dignam, quod est antiquior, non quidem solius antiquitatis ratione habita; sed quod eo annorum decursu viri insigni & ingenii perspicacia, & intellectus acumine pollentes, quorumque imprimis interfuit primi testimonii, unde omnis ea traditio ortum ducit, pondus summa cum ratione investigare, sua

eam auctoritate confirmant. Quodsi a temporis diuturnitate abstrahamus, facile suspicio locum inveniet, an non primo testimonio ex præjudiciis quibusdam, aliisque sinistris motivis fides fuerit adhibita; at cum longam annorum seriem, quam præjudicatæ, falsæque opiniones non sustinent; cum acutissime videntium judicia toties repetita expendimus, in novum quoddam primo testimonio robur accedere videtur, omnisque ille metus evanescit. Nullum tamen id ad ea quoque facta extendi, quæ, cum vel privata, paucisque nota sint, vel quam plurimis, diversisque vestiantur adjunctis, facillime tum ob infidellem hominum memoriam, tum ob naturalem linguarum imperfectionem, tum denique etiam ob imperitiam, aut nonnullorum malitiam corrumpuntur; quare in similibus sola traditio vix ullam auctoritatem habere potest.

C A P U T V.

DE INTERPRETATIONE, ET LECTIONE LIBRORUM.

CCXXV. *Ars Hermeneutica, sive Interpretandi* est ars determinandi sensum, quem auctoris verba, seu scripta, seu ore prolata continent. Quid ars hermeneutica?

COROLL. Qui igitur alterius verba interpretari aggreditur, is mentem auctoris perfectissime assequi debet, ac proinde easdem, quas auctor, cum vocabulis ideas conjungere (§. 81. cor. 2.).

CCXXVI. *Nullus umquam sensus verbis tribuendus est, nisi qui clare probari potest;* Quid ejus principium?
cum enim a posse ad esse non valeat illatio,

ut loquuntur philosophi, ex eo, quod verba possint determinatum aliquem sensum facere, inferri nequit, eum reipsa esse, in casu proposito: igitur quis ex omnibus possibilibus nunc sit determinate vocabulorum sensus, positiva ratione constabilliri debet: Indicia, ex quibus id efficitur, *principia interpretandi* compellantur.

Et quo-
tuplex ?

SCHOL. Indicia hæc ex triplici potissimum fonte petuntur, videlicet vel *usu loquendi recepto*, vel *ex intentione loquentis*, vel denique *ex subjecta materia*. Et profecto nihil magis rationi consentaneum est: primum siquidem prudenter præsumere possumus, verba auctoris eundem sensum continere, quem in usu communi, & vulgari habent; cum nemo, qui quidem ideo loquitur, ut intelligatur, ab eo sine ratione gravi recedere possit (§. 83. schol. n. 4.). Deinde vero, cum, ut frequenter evenit, vocabula etiam ex recepto loquendi usu ad plures sensus sint indifferentia, quomodo citius, faciliusque nodum solvemus, atque respiciendo, & indagando loquentis intentionem, cum a cuiusvis arbitrio pendeat voces ad significationem unam aliquam ex pluribus usitatis determinare? Denique si hisce omnibus nihil proficiamus, quo tandem recurrendum erit? nonne ad subjectam materiam? nisi enim auctor, vel ob imperitiam, vel ob malitiam, quorum neutrum suspicandum est, aliud positive intenderit, necesse est, ut is sit verborum sensus, qui argumento, quod tractatur, quam maxime congruit. Qua porro ratione triplici hoc fonte utendum sit, sequentes te canones docebunt.

Leges Interpretandi.

1.) *Usus loquendi*, exigendus est ad eam ætatem, eamque regionem, in qua auctor librum exaravit, siquidem in aperto est complura vocabula decursu temporis vim, ac potestatem suam permutasse: ineptus sit, oportet, qui, dum in veterum aliquo deprehendit Ægyptios geometriæ admodum peritos fuisse, putet, ea voce scientiam adeo completam, qualis nunc extat, denotari. Ad hoc plurimum conducit diligens morum, gentium, & antiquitatum studium. Eligendus porro tum est sensus maxime naturalis, * is scilicet, quem primum verba nacta sunt, cuique translatus opponitur, nec ab eo, nisi gravi de causa recedendum; qualis foret, si secus significatio aut nulla, aut absurda, aut instituto auctoris parum congrua oriretur. Quod si nonnumquam necessitas cogat, ut ad sensum allegoricum recurratur, id ita fiat, ut una potius enunciatio, quam plures, metaphorice exponatur. Nemo autem est, qui non videat ad hæc ex æquo præstanda requiri præterea perfectam linguæ, qua liber exaratus est, notitiam, atque hæc quoque de causa libros *originales* versionibus præferimus, cum experientia teste frequentissime contingat, ut, qui translationis laborem in se suscipit, exquisita utriusque linguæ cognitione non polleat; quamquam etiam hæc non deficiente ob idiotismos cuivis linguæ proprios omnino arduum sit, quam accuratissime, ut necesse foret, auctoris ideas alieno idiomate exprimere.

2.) *Intentio loquentis* ex definitionibus ab ipso auctore statutis, clarissime elucet: hæc igitur primo omnium loco exquirendæ sunt. Quod si eæ desint, exempla siagularia, quæ

nonnumquam adiunguntur, præsertim si abstractionis ope in universalia transmutentur, planam ad auctoris intentionem detegendam viam sternunt. Deinde, cum diversæ seu in philosophia, seu in religione sectæ, uti & artes fere omnes, etiam non liberales, propria sibi frequenter vocabula habeant; quia vocibus quoque alias receptis in alieno tamen significato sæpius utantur, attendendum magnopere, quam sectam auctor seu in Religione, seu in philosophia profiteatur: sic aliud sonat vocabulum *calor* in ore Cartesiani, aliud in ore Peripatetici & Theologi norunt, quanti ad verum sensum in antiquis SS. PP. monumentis determinandum intersit advertere, eos plerisque omnes philosophia ecclesiastica, in qua tamen Platonis placita dominatum tenuerunt, imbutos fuisse; nec minus hæreticis tam veteribus, quam recentioribus perfamiliale est, ut certis quibusdam vocabulis alienam prorsus significationem substituant, num id ad tegendos paulisper suos errores quandoque faciant, decidere non est hujus loci. Quanti porro hæc animadversio sit momenti vel ex eo patet, quod pronissimum sit, ut quis principia, quibus jam imbutus est, etiam in diversis rebus sequatur, ex iisque nonnulla ubicumque pro data occasione inspergat; regulariter autem illud factum fuisse censi debet, quod factu pronissimum est, ac prudens semper pro illo sensu stat præsumptio, qui facilius auctori occurrit, quique arctius cum principiis, ideis, & objectis ipsi familiari- bus, addamus etiam, educatione, consuetudine, præjudiciis, & affectionibus, quibus agitur, sive bonis, sive malis connectitur. Denique intentio loquentis censeretur respicere ea, quæ ipsi magis obvia sunt, ac nota, id quod cum primis usuveit, cum de signi-

fitatione terminorum relativorum determinanda agitur; sic *magnus* olim in Græcia exercitus nunc omnino parvus foret; audis virum esse *magnæ* doctrinæ; vide, num qui id asserit, sit ex natione culta, an barbara? Utrum eruditorum ex numero, an de ignorantium grege? &c. &c.

3.) *Subjuncta materia* subsidium verum vocabulorum sensum detegendi suppeditat, cum textus sermonis integer, totaque doctrinæ cohæsiō rite expenditur; is enim propositionis, aut termini significatus esse præsumitur, qui reliquæ doctrinæ, integræque rerum connexioni aptius respondet. Necesse igitur cumprimis est, ut antecedentia cum consequentibus conferantur, exquistanturque loca *parallela*, quæ inter se comparata id, quod obscurum est, non parum illustrabunt; verum ea, ubi obiter duntaxat, & per occasionem rei mentio fit, sollicite discernantur ab iis, in quibus auctor copiose, ac dilucide id ipsum vel probandum, vel declarandum, vel etiam refutandum sibi sumpsit, seu in quibus, ut ajunt, *sedes est argumenti*, atque ex his, non vero ex illis sensus verborum definiatur. Hac in re præcipue peccant ii, qui propositionibus ex toto orationis nexu avulsis eum sensum affingunt, quem fortassis seorsum spectatæ continere possent, ut nullo tamen modo reapse continent; cum certum sit auctorem eam, quam tota connexio exigit, significationem intendisse: solemne hoc est hæterodoxis, dum S. Scripturæ effatis ad errores suos confirmandos abutuntur. Quod si, ut nonnumquam evenit, alterius interpretatione standum sit, ea ceteris paribus præferatur aliis, quæ a cœvo, familiari, aut discipulo ipsius auctoris proficiscitur, vel saltem ab eo, qui linguæ, ac argumenti, seu disciplinæ, quæ

pertractatur, majori præ reliquis notitia pollet.

Quid
æquitas
in inter-
pretan-
do?

CCXXVII. *Æquitas in interpretando* est studium verbis auctoris, quantum fieri potest, non nisi verum sensum tribuendi, famæque ipsius, ac honori, quantum licet, per interpretationem consulendi.

Quæ ejus
leges?

SCHOL. Ad æquitatem hanc, cum inter naturæ rationalis officia reponi debeat, quemlibet obligari certum est; interea tamen multis modis in eam peccari solet. Id ne fiat, videamus, quæ ab ipsa exigantur.

1.) *Ut semper mitiorem in partem auctoris verba interpretemur*, sensumque veritati magis congruum, nisi manifeste contrarium pateat, eligamus, etsi fortassis a communi loquendi usu nonnihil recedendum, aut ipsa etiam stabilita definitio paullulum inflectenda foret: idque tum præcipue, cum occurrunt nonnulla, quæ inter se pugnare videntur; tum enim vero cura danda est, ut sibi opposita congrua quadam interpretatione concilientur, nullaque, nisi aperta necessitas cogat, contradictio adsiruatür.

2.) *Ut ne sensum viro prudente indignum exculpamus*: qualis foret 1. ad quem auctor nulla prius data occasione devolveretur; 2. in quo nullum prudentem finem intendere posset; 3. in quo prorsus ad finem propositum inepte, aut inutiliter loqueretur; 4. in quo magno verborum apparatu circa facilem nullius momenti, aut consecutionis rem versaretur; 5. in quo demum expectationi audientium, aut merito causæ & postulationi objecti prorsus non satisfaceret, & quæ sunt similia.

3.) *Ut ne consuetaria absurda ex doctrina profluentia auctori attribuamus*, ipsumque propterea hæreticum, seditiosum, pacisque publicæ perturbatorem pronunciemus, quod

a nonnullis, dum invidentia aguntur, fieri assolet; numquam enim auctor prudenter præsumitur aliam doctrinæ suæ consecutionem intendere, nisi quam actu exprimit, quin ne cogitare quidem putandus est de aliis, nisi quæ ordinariæ sunt, & cuius saltem magis exercitato facile obviæ, cum nihil, nisi quod factu pronum est, præsumatur. Quis adeo perspicax est, ut omnia, quæ ex sententia sua profluunt, continuo pervideat? Profecto optimo cuius quandoque contingere potest, ut opinionem quampiam ex rationibus, ut sibi videntur, efficacissimis propugnet, ex qua tamen nonnulla aut contra Religionem aut adversus reipublicæ statum deduci possunt; quo in casu sententia quidem ea falsa est, auctorque erroris in ejus propugnatione admissi convinci debet, non tamen, nisi agnito subiade errori pertinaciter adhæreat, dici potest omnia ea absurda, quæ inde promanant, docuisse, cum non docuerit, nisi quæ prævidit, ac fortasse hæc non præviderit; sed potius interea iudicandum, eum, si ea consuetaria cognovisset, a sententia sua fuisse recessurum; nemini enim error, aut vitium adscribi debet, nisi clare comprobetur.

4.) *Ut ne invidiam auctori creemus*, quod his fere modis fieri observat Joann. Clericus

1. „ Sententia, quæ oppugnatur, male explicatur.
2. Nominibus invidiosis infamatur.
3. Cum invisorum hominum dogmatibus confertur.
4. Exaggeratur momentum quæstionis.
5. Invisi redduntur boni, quod vocibus inventis uti nolint.
6. Studiose occultantur rationes, quibus refutanda sententia nititur.
7. Tacentur incommoda, quibus præmitur sententia defendenda.
8. Præmittuntur ea, quæ invidiam amoliri possent.
9. Invidiosa conse-

*Distert.
phil. de
arg. rhe-
olog. ab
invid.
dant.*

„Staria deducuntur ex sententia eorum, qui
 „oppugnantur. 10. Malignis suspicionibus
 „præmuntur. 11. Novitas illis obicitur
 „quasi crimen. 12. Miscentur in discepta-
 „tionibus, quæ cum iis habentur, multa,
 „quæ ad rem nihil faciunt, sed quæ invidiæ
 „creandæ apta sunt. 14. In deteriorem par-
 „tem accipiuntur indifferentia. 14. Provo-
 „catio fit a peritis iudicibus ad imperitos.
 „15. Adversarii denique quasi immorigeri-
 „magistratibus infamantur.” Hæc uti præ-
 clare monuit vitanda esse, ita primus eo-
 dem in loco omnium se reum fecit, dum
 S. Hieronymum contra hæresiarchas Vigilant-
 tium, & Jovinianum scribentem horum vi-
 tiorum insinulavit, sed nempe acerrimum
 illud in Romanam Ecclesiam, sanctosque ejus
 Patres odium, quod in omnibus illius scri-
 ptis tam luculenter elucet, philosophi hujus
 mentem obscuravit.

Quotu-
 plices
 libri?

CCXXVIII. Libri potissimum sunt vel
historici, qui facta recensent, adeoque pro-
 positiones singulares continent; vel *dogmati-*
ci, qui dogmata, seu veritates universales
 proponunt; ex his alii veritates, quas ad-
 struunt, simulque accurate demonstrant, &
scientifici nuncupantur; alii propositiones uni-
 versales absque demonstratione, vel in rebus
 fidei divinæ citra probationes, atque argu-
 menta ex theologicis fontibus petita, per
 modum solum historiæ referunt, quare *histo-*
rico-dogmatici audiunt.

SCHOL. Libri historico-dogmatici parum con-
 ducunt ad solidam scientiam comparan-
 dam; ad summum inserviunt ad disponen-
 dos auditorum animos, vel ad compendia-
 riam eorum, quæ jam didicerimus, ana-
 cephaleosin. Væra igitur eruditio ex libris
 scientificis hauriri debet, quorum lectio,
 ut tironi cum fructu cedat, sequentia exigit.

1.) Or-

1.) *Ordinem*, qui requirit, ut non provolumus ad subsequētia; nisi antecedentia rite assecuti; cum enim in libris scientificis subsequens propositio ex antecedente profluat, operam, oleumque perdet, qui propositionem quampiam temere in medio atreptam aggreditur, antequam ea, quæ præcesserint, rite intellexerit. Ordinis hujus defectu tot inanes contra librorum obscuritatem querelæ funduntur ab iis nimirum, qui moræ impatientes primis principiis, quantum necesse foret, expendendis inhærere nolunt, lectionemque libri a medio, aut prorsus a fine inchoant. Obscurus quidem jure optimo habetur liber, si termini accurate non definiantur, vel alieno in sensu usurpentur; si demonstrationum principia reticeantur; si ordo demonstrandi præposterus adhibeatur, aut omissis intermediis, nec suppletis facilibus statim, & quasi per saltum ad conclusiones remotiores transvoletur, & quæ sunt similia: liber, qui ejusmodi vitiis scatet, relinquendus potius, quam tenendus est, nec auctor, qui intelligi noluit, ullam meretur existimationem. Porro ordo, de quo hic loquimur, non solum in uno, eodemque libro pervolvendo, sed etiam in pluribus observandus est, ita ut ii prius legantur, qui aliis intelligendis luminis quidpiam collaturi videntur.

Quid in
librorum
lectione
obser-
vandum?

2.) *Attentionem lentitudini junctam*, sine qua ideas claras, ac distinctas numquam obtinebimus: præcipitantia, cui vividiora ingenia præcipue obnoxia sunt, frequenter prorsus inutilem reddit, quem librorum lectioni impendimus, laborem, hacque ratione fit, ut evoluto etiam integro libro, quid legerimus, ignoremus argumenti ipsius quandoque vix memores. Deinde absque meditatione nullus umquam in scientiis progressus.

sperari potest; omnis autem meditatio moram, ac tempus requirit; quare non qui multos evolvit libros, sed qui pauca seria meditatione in animum demisit, multum legisse censendus est.

3.) *Repetitionem frequentem*; sæpius enim redeundo ad præcedentia res longe clarior evadet, contingetque frequenter, ut tum demum priora rite perspiciamus, quæ tamen optime nos jam penetrasse putabamus: neque hoc mirum; nam & ipsa præcedentium intelligentia semper aliquo modo a subsequentibus pendet. Accedit, quod optatus lectionis fructus hauriri nequeat, nisi quæ legerimus, etiam memoria complectamur, cum Tullio teste, tantum sciamus, quantum memoria tenemus; jam vero quis ignorat repetitionem frequentem ad res ipsas memoriæ imprimendas mirifice, & fere solum conducere, cum perspicuum sit nos eorum facilius recordari, quæ clarius, distinctius, & frequentius percepimus?

4.) *Continuationem moraliter non interruptam*; qui enim longiori tempore lectionem inchoatam intermittit, atque interea aliis seu libris, argumenti præsertim non satis noti, evolvendis, seu negotiis conficiendi operam dat, novis ideis animum imbuat: unde necesse est, ut vel idearum confusio in mente oriatur, vel certe hausta jam principia memoria excidant. Horum quidquid eveniat, nexus ille veritatum pervideri amplius haud potest, in quo tamen perspiciendo præcipuus, qui e lectione libri scientifici capi debet, fructus consistit.

5.) *Applicationem*, quæ postulat, ut demonstrationes universales, quas in auctore legimus, ad casus singulares reducamus, eandem in sua principia resolvamus, ipsique tentemus in re consimili similem demonstra-

tionem conficere: hac certe ratione & argumentorum vim, ac pondus, in quo rei cardo versatur, perspicimus, & habitum demonstrandi nobis denique comparabimus. Quo & illud pertinet, ut, quæ meditati sumus, etiam voce proferre conemur, loquendo vel nobis ipsis, vel amico, quocum sæpe conferre utilissimum, vel saltem ea breviter in chartam conjiciendo; sic fiet, ut pedetentim ideas, mentisque nostræ conceptus in ordinem redigamus, habilesque efficiamur ad ea, quæ didicerimus, cum aliis communicanda, ut, qui litteratiorum laborum finis non ultimus esse debet, utilia reipublicæ membra evadamus.

CAPUT VI.

DE IGNORANTIA, EJUSQUE CAUSSIS.

CCXXIX. Qui nulla veritatis indicia perspicit, sive generatim, qui nihil de re quæpiam cognoscit, eandem *ignorare* dicitur (S. 206.): est proinde *ignorantia* cognitionis defectus, seu si mavis, status mentis cognitione destitutæ; sic *ignoro*, *utrum Deus alium adhuc mundum conditurus sit*.

Quid
ignorantia?

SCHOL. Non est inutile expendere magnitudinem nostræ ignorantie, quæ multis modis cognitionem, qua pollemus, superat; inde enim fiet, ut otiosas disputationes fugiamus, mentemque nostram utilibus solum, ac his, quæ illius captum non excedunt, contemplandis applicemus; verissimum namque est, quod ait Seneca, *necessaria ignoramus, quia superflua discimus*. Neque verò procul petenda sunt argumenta amplitudinem ignorantie nostræ

demonstrantia: quicumque aliud intelligit, intelligit simul adesse sibi domestica perquam multa ignorantiae exempla; non enim res est adeo vulgaris, & prope vix consideratione digna, quæ non multis ex partibus adeo obscura, tenebrisque involuta sit, ut eæ etiam a perspicacissimo intellectu dispelli nequeant. Sed mali hujus originem perscrutemur.

Causæ Ignorantiæ.

1.) *Defectus idearum*; & primum quidem de iis rebus, quæ suapte natura captum nostrum non excedunt; vis certe nostra percipiendi, ac intelligendi capacitas, si cum rerum, quæ sciri possent, numero compareretur, admodum parva est. Ut nihil dicam de illis corporibus, quorum enormis est a nobis distantia, ob quam paucissima, aut prorsus etiam nihil de iis scire possumus, quam multa sunt in hoc, quem inhabitamus, globo, quæ ob exilitatem suam sensus omnes, omnemque proinde cognitionem effugiunt? Ignoramus intimam elementorum, ex quibus corpora coalescunt, naturam, eorum vires, harumque virium diversam plane conspirationem, unde omnes sensibiles corporum qualitates denique oriuntur. Deinde si ad eas res animum advertamus, quæ secundum se præsentem nostram capacitatem excedunt, quantus est numerus eorum, quæ a nobis nesciuntur? Ideas omnes, quas habere possumus, aut sensuum usu, aut mentis operatione nobis comparamus; quis autem non videt, viam hanc ideas obtinendi perquam angustam esse? Quis determinet, quas alias ideas possint habere aliæ creaturæ in aliis universi partibus existentes, quæ aliis sensibus, vel diversis a nobis, vel etiam numero

pluribus, & ampliori intelligendi facultate præditæ forent? Qui gratis hæc dici autumant, similes mihi videntur homini ab incubulis oculorum usu destituto, qui colorum existentiam negare vellet, propterea quod eorum ideam in animo suo informare nequit.

2.) *Impotentia detegendi connexionem idearum, quam habemus*; perspicacitas nempe humani ingenii admodum debilis, ac limitata est. Aliqui vix trium, aut quatuor idearum inter se relationem pervidere possunt; longius si ducantur, in meras tenebras incurrunt: unius hos syllogismi homines cum Lockio compellare licet; alii longiorem aliquantum idearum seriem mente complecti possunt, multa tamen non assequuntur; qui denique perspicacissimi habentur, sæpe hallucinantur. Quamdiu autem idearum, quas habemus, connexionem non perspicimus, minime idonei sumus cognitioni universali obtinendæ; unica tum via restat experientia; at hæc quam arcta, quam angusta? Oritur hoc malum ex defectu idearum mediarum, quæ nobis sensim, & quasi per gradus eam connexionem manifestare deberent. Sic nullam deprehendimus connexionem inter talem in organis sensoriis affectionem, & talem in mente sensationem, atque inde est, quod de sensationibus qualitatatum sensibilibum amplius quid non cognoscamus, quam quod de iisdem per experientiam nobis innotescit.

3.) *Socordia in sequendis ideis, quas habemus*. Inde fit, ut in ignorantia versemur etiam tum, cum ideas distinctas, earumque connexionem cognitam habemus, aut saltem habere facile possumus; sic multi ignorant veritates mathematicas, non ob tardiores ingenii vires, aut incertam rerum naturam, & conditionem, verum ob solum applicationis defectum, cum nolint ullam ope-

ram impendere ideis illis acquirendis, examinandi, atque debito inter se modo comparandis. Contingit id primum ex malo vocabulorum usu, fieri enim nequit, ut, qui cognitiones suas sonis duntaxat, qui de se dubiæ, & incertæ significationis sunt, affigit, umquam concordiam, aut repugnantiam idearum studiose quærat, aut certo detegat. Deinde vero etiam & frequentissime quidem ex ignavia, pro qua multi humanæ mentis imbecillitatem obtendunt; etsi enim multa a nobis sciri nequeant, multa tam etiam sunt, quæ assequi possemus, si modo ignaviam nostram ex naturali corporis inertia oriundam superare vellemus. Hæc porro ignavia in causa est, ut laborem fugiamus, moræque impatientes longius idearum examen horreamus, atque ad ea tantum animum applicemus, quæ sine ingenti dedecore, aut maximo detrimento a nobis penitus ignorari non possunt.

4.) *Memoria*, quæ duplici modo ignorantiae occasionem præbet; 1. *infidelitate*: maximum & commune veræ scientiæ obstaculum est defectus memoriæ; ubi enim elapsa est mente idea præcedens, jam subsequens, quæ cum ea connexionem habent, non rite intelliguntur: memoria vivida, & tenaci opus est, ut, dum secundam ideam contemplari volumus, prima simul menti quam vivacissime repræsentetur, & secunda, cum ad tertiam progredimur, & ita porro; retineri præterea debent scientiarum principia, quæ jam didicimus, quod sine iis animo actu præsentibus ulterius progredi non licet. Sed tamen desperandum non est iis, qui imbecilliores a natura memoriam natæ sunt; potest siquidem ea; ut reliquæ omnes tam corporis, quam mentis facultates, continuo usu augeri, ac roborari: ut

quis de rure homo in dies aptior evadit ad gravius onus ferendum, longioremque viam conficiendam; ita quoque litteratus majorem quotidie habilitatem adipiscitur, plures simul ideas, & cognitiones memoria sua retinendi. Inter complura, quæ memoriæ excolendæ adjumenta præscribi solent, non ultimo loco reponendum est illud, ut ideas, de quibus nobis judicandum est, in chartam conjiciamus; scriptio enim hæc eas rursum oculorum ope menti repræsentat, figit, efficitque, ut ob mutuam connexionem aliæ quoque excitentur. 2. *Nimia præstantia*, cui dum nimium confidunt nonnulli, interea excolere intellectum, seriæ meditationi inhære, resque ipsas perscrutari negligunt, quæ ratione fit, ut multarum rerum ignorance teneantur, quantumvis verba memoriæ infixata ipsis non desint. Vitium hoc pervulgatum esse in ætatis nostræ adolescentibus, longa experientia, & non absque dolore didici; sunt certe, qui longissimas demonstrationes seu metaphysicas, seu mathematicas e memoria recitare norunt, nihil tamen eorum, quæ proloquuntur, intelligunt. Ejusmodi qui sunt, non tantum nulla obtinendæ scientiæ adjumenta sibi comparant, sed potius maxima ponunt impedimenta, ac speciosa ignorantiae fomenta sibi congerunt, atque tandem annis aliquot elapsis, ubi ea, quæ ita memoriæ impresserunt, exciderint, rursum tales evadunt, quales nondum incepto studiorum curriculo fuerunt.

5.) *Confusio studiorum*, quæ ratio est omnino multiplex. Aliqui omne litteraturæ genus simul avidissime arripiunt; cuncta uno, eodemque tempore condiscere volunt; poetas, oratores, philosophos, nummarios, botanicos, chemicos &c. ac imprimis eos, qui de omnibus tractant, legunt, vel indices so-

lum, & librorum præfationes inspiciunt, unde fit, ut supremis aliqua duntaxat labiis degustantes nihil non solide ignorent; mirum tamen, quantum sese ejusmodi efferant, sibi que de docta sua ignorantia plaudant, ac alios vere eruditos, doctosque viros arrogantii supercilio despiciant: & proh quam ferax est id genus *sciolorum* hæc, quam vivimus, ætas! Alias nulla methodo, nullo certo ordine litterarum studia pertractantur: sunt ingenia quædam fervida, quæ faciliora cursim transiliunt, atque ad difficiliora, quæ solum labore suo digna reputant, properant; at paullo post velut ad scopulum adherentes progredi nequeunt, quare? Quod definitio obiter lecta jam mente elapsa est; quod axioma ceteroquin notissimum nunc non occurrit: verbo denique, quod prima principia, quæ nimis facilia videbantur, profunda meditatione in mentem admissa non fuerunt. Ipse Newtonus vir certe insignis se hac in parte deliquisse fatetur, atque ab se operam mathesi daturum Euclidem ut nimis facilem, ac evium spretum fuisse deplorat. Alii contra, qui mediocris sunt ingenii, modica quavis difficultate terrentur, nullamque in ea enodanda operam locant, sed potius ad alia, ea prætermittunt, transvolant, ingenti suo damno; cum enim neque subsequencia penetrant, auctis in dies difficultatibus tandem prorsus animum despondunt. Nonnulli neglectis necessariis, quæ muneris sui ratione scire tenerentur, inutilibus tantum se tradunt; iis unice delectantur, quæ magis curiositatem alunt, quam intellectum perficiunt, aut verum quodpiam commodum adferunt. Denique alieno sæpe tempore arripiuntur studia; non omnia omni ætati æque congruunt; quæ plus memoria nituntur, pueris; quæ solidius requi-

*Hist. de
l'acad.
roy. de
sci. anno
1727.
elog.
New.*

runt judicium, adolescentibus magis accommodata sunt; quare graviter errant parentes, qui filios suos tum primum, cum jam philosophiæ, aut jurisprudentiæ condiscendæ maturi sunt, linguarum, geographiæ, historiæ, aut arithmeticiæ studio occupant. His omnibus ignorantiam nostram soveri in aperto est.

6.) *Defectus subsidiorum externorum*; ex inopia fortunarum ad vitam honeste agendam oritur defectus librorum, reliquæque litterariæ suppellectilis, nec non domesticorum institutorum, sine quibus juvenis magnum in litteris progressum ægre faciet. Numquam illi parentes satis pro merito reprehendi possunt, qui omnem, quem pro prolium eruditione expenderint nummum, in perditis habent, quorumque curæ eo solum tendunt, ut amplum filiis patrimonium relinquant, quod ipsi in stupiditate, ac ignorantia educati paullo post dilapidaturi sunt.

7.) *Libertas philosophandi constriicta*; dum enim non, quod ratio suadet, sed quod aliis placuit, sentire jubemur, non veritas studiose inquiritur, sed aliorum sensa anxie explorantur; non indagantur firmiores rationes, non instituuntur experimenta; sed in eorum locum auctoritas substituitur, argumentaque precaria undique conquiruntur, quibus periclitanti sententiæ, in quam juratum est, quoquo modo succurratur; verbo denique, nihil novi moliminis suscipitur, sed auctorum dicta, pro delphicis oraculis accipiuntur, novitasque ipsa peccatum est. Si priorum temporum, quibus Aristoteles in scholis dominatum tenuit, memoriam recolere velimus, verissima hæc esse haud difficulter comperiemus; sed non liber obductum jam ulcus refricare. Ceterum libertatem

philosophandi dum petimus, eam nequaquam intelligi volumus, qua nonnulli hujus ævi philosophi ad divinarum Scripturarum contemtionem, atque ad ipsa castissimæ Religionis mysteria impugnanda impie abutuntur. Philosophus noster ita secum statuat: omnibus libertatem sentiendi permitti debere in iis, quæ solo rationis lumine investigari possunt; at tolerari eam nullo prorsus modo posse, cum de illis agitur, quæ a divina solum Revelatione proficiscuntur, omnemque in ejusmodi rebus novitatem in gravissimi sceleris loco habendam esse; cum enim Deus loquitur, necesse est, ut ratio naturalis conticescat; ejusque auctoritari humanus sese intellectus summa cum demissione subjiciat.

C A P U T VII.

DE ERRORE, EJUSQUE FÖNTIBUS.

Quid error?

CCXXX. Qui propositioni falsæ assensum, aut veræ dissensum præbet, *errare* dicitur; in ejusmodi igitur assensu, vel dissensu *error* sive *judicium erroneum* consistit; sic errat, qui judicat *animam esse corpus*.

Quid præjudicium?

CCXXXI. *Præjudicium* est anticipata quædam; animoque alte infixæ opinio, ex qua in casu quodam singulari ad erroneum judicium formandum inducimur; sic præjudicium est ea opinio, quæ vulgi animus insidet: *omnia sic esse constituta, prout sensibus apparent*, unde vulgus solem intuenso judicat: *illum esse triun, vel quatuor palmorum discum*.

COROLL. I. Quoties ex præjudicio quodpiam judicium formatur, adest occulta saltem ratiocinatio, cujus partem antecedentem ea ipsa præjudicata opinio agit; sic enim

in proposito exemplo vulgus ratiocinatur: *res ita sunt constitutæ, ut sensibus apparent; sed sol apparet meis sensibus esse discus trium, vel quatuor. palmorum: ergo.*

COROLL. 2. Cum ex vero antecedente non sequatur falsum consequens (§. 125. cor. 3.), necesse est, ut opinio illa anticipata ipsa quoque erronea sit, estque reipsa judicium aliquod non tam actuale, quam habituale.

SCHOL. 1. Opiniones ejusmodi anticipatæ, quibus homines passim abripi videmus, sunt omnino diversissimæ; videntur eæ tamē ad tres præcipue classes reduci posse, quas ignorare philosophum non oportet; sunt vero.

1.) *Præjudicia ætatis*; nulla hominum ætas a singularibus quibusdam erroribus, ac sibi velut propriis exempta est, sed omnium maxime prima hoc morbo laborat. Mens nostra omnium rerum ignara corpus ingreditur, neque in tenera illa ætate ulli ratiocinio, sed sensationi solum, & phantasie locus est; unde quidquid infantes audiunt, in veris habent: ad miseriæ cumulum accedit, quod infantum cura iis fere committatur, quorum omnium cum sint rudissimi, ora non nisi fabellis absurdis de spectris, lemuribus, occultis plantarum, & lapidum viribus, quin & gravissimis circa mores, ac religionem erroribus plena sunt, quod vehementer Tullius deplorat; „ simul atque editi in lucem, & suscepti sumus, in omni continuo pravitare, & in summa opinionum perversitate versamur, ut pene cum lacte nutricis errorem suxisse videamur. Cum vero parentibus redditi, & magistris traditi sumus, tum ita variis imbuimur erroribus, ut vanitati veritas, & opi-

nioni confirmatæ natura ipsa cedat. Ac-
cedunt etiam poetæ, qui cum magnam
doctrinæ, sapientiæque speciem præ se
tulerunt, audiuntur, leguntur, ediscuntur,
& inhærescunt penitus in mentibus. Tum
vero accedit eodem quasi maximus qui-
dam magister populus, atque omnis undi-
que ad vitia consentiens multitudo: tum
plane inficimur opinionum pravitate, a
naturaque ipsa desciscimus. Quare, sed
frustra, optaverat olim Chrysippus, ut pue-
ri a philosophis educarentur. Jam vero quid
inde in reliquam vitam boni sperari possit?
Quæ primum infantium intellectui nondum
re alia prævento, at simul opportunis præ-
cavendi subsidiis destituto immissa sunt, a-
deo profundas subinde radices agunt, præ-
sertim si mala insuper educatio, & longa
consuetudo accedat, ut fere in naturam a-
beant, & quasi impossibile evadat eadem
radicibus tollere, nisi adulti deinde omnia
ad incudem revocent, rigidissimoque exami-
ni subjiciant; at quotus quisque est, qui
hunc arduum sane laborem, prout oportet,
suspiceret? Infinita prope sunt obstacula,
quæ tum a parentum, ac institutorum au-
thoritate, tum ab ingenita ignavia opponun-
tur. Qui ejusmodi opinionibus in infantia
imbuti sunt, cum adolescunt, eas propemo-
dum ut res sacras intuentur, solliciteque ca-
vent, ne fortassis per novam quæstionem su-
per iis institutam profanentur; cum enim
quandoque super illas reflectunt, deprehendunt
eas adeo antiquas esse, ut rem quam-
libet aliam, cujus recordari possunt, nec
advertunt, quando, quave ratione mentem
subjerint, atque vel sola hæc antiquitas sa-
cri quidpiam ipsis spirare videtur; inde fit,
ut iisdem tamquam principiis certissimis, ac
indubitatis utantur, atque ad ea in quæstio-

nibus controversis velut ad infallibilem veritatis regulam provocent; temere & cæcò prorsus impetu admittentes, quidquid ipsis consentaneum: respuentes contra sine ulteriori indagine, quidquid adversum videtur.

2.) *Præjudicia opinionis receptæ, vel propriæ, vel familiæ, nationis, patriæ, vulgi, antiquitatis, novitatis.* Sunt videlicet, qui pro sententia, pro qua semel animum obfirmarunt, velut pro aris, & focis depugnant; hæc totam quasi ipsorum intelligentiæ sphaeram conficit; hic velut constricti hærent, nec facile egrediuntur; audiunt patienter alios, at ut rem aliter habere, ac ut ipsi pridem apud se statuerunt, in animum inducant, nullis rationum momentis promovèri possunt. Sunt; qui communibus amicorum, factionis, patriæ, & provinciæ suæ opinionibus abripiuntur; torrentem hi sequuntur: quære ex illis, cur huc vel illi opinioni firmiter adeo adhæreant? reponent: tot illustres viri ex mea familia, vel natione idem opinati sunt, cur ego ab eorum mente recedam? At num etiam illustres hi viri ex solo, ut decuisset, veritatis amore ejusmodi sententias & docuerint, & propugnaverint, non indagant; puto tamen nos frequenter contrarium experturos, si occulta illa motiva, quibus nonnumquam homines etiam docti, & sapientes, ii præsertim, qui sectarum, factionumque capita esse amant, impelluntur, detegere possemus. Vulgus deinde quot non præjudicia fovet? Seu enim mores, seu vitæ rationes, seu alia quæcumque spectentur, quot ubique errores, aniles fabulæ, sensuum, ac phantasiæ illusiones in evidentissimis veritatibus habentur? Estro vero etiam, subsit quanloque veri quidpiam rumoribus vulgi; plurima certe, ut illud deprehendatur, reseccari debent, ea præcipue,

quæ mirabilitatis magnæ speciem præseferunt; hisce enim rudes animi facillime percelluntur, cumque, neglecta intellectus cultura, vivaci potissimum imaginatione polleant, magnum iis in rebus fingendi campum nanciscuntur. Non est quidem, quod miremur, tam uberem errorum segetem in eorum mentibus excrescere, quos una hæc cura sollicitos tenet, ut sibi, suisque prolibus alimenta procurent; at ingens esse in aliorum animos opinionum vulgi imperium, id enim vero mirum. Quam exiguus eorum numerus est, qui publica judicia contemnere audeant? quam multi cum turba errare malunt, quam cum paucis sapere? Eius rei periculum nunquam est majus, atque cum de iis agitur iudiciis, ad quæ vulgus nationum odio, patriæ amore, lucri cupiditate, aut mali gravioris metu impellitur. His erroribus nullo prorsus negotio sapientiores quoque inficiuntur; cum enim sese partem ejus esse populi considerant, communis etiam commodi inde orituri spe alliciuntur. Sunt denique, qui, cum nimia veteres æstimatione prosequantur, non nisi antiqua probant, aut ab opposito, quibus nihil sapit, nisi quod novum est: illi recentiora quæque solo novitatis titulo rejiciunt; hi omnes sine discrimine veteres, eorumque opera, & labores contemnunt: gravissimo utrique præjudicio laborant; etenim & multa egregia a veteribus præstita sunt, & sæpe tamen etiam hallucinata est antiquitas, atque idem prorsus nostris temporibus commune est, neque semper recentiores ævi auctores, ut oporteret, sapiunt: quare nec sola annorum distantia veritati pondus addere, nec novitas eidem obesse censenda est, duoque hi scopuli philosopho in indagatione veritatis magnopere cavendi veniunt, inconsultus nimirum non

vitatis amor, & cæca antiquitatis servitus.

3.) *Præjudicia auctoritatis*, quæ ex nimia aliorum auctoritatis existimatione oriuntur, qua fit, ut propositionibus universalibus, quæ non credi, verum sciri debent (§. 221. cor.), ob solum eruditorum testimonium assensus præsterur. Nolim equidem auctor esse, ut viro doctrinæ fama, percelebri, temere contradicatur; magis enim convenit, ut nostris potius facultatibus diffidentes nondum omnia ea in re rite nos perspexisse arbitremur: neque tamen propterea illico conquiescendum est, sed veritas sollicitè investiganda, dum re omnimode penetrata, vel cum illo consentiamus, vel ab ejus sententia modeste recedamus. Huic præjudicio omnis quidem, sed cum primis rursum renera ætas subjecta est, unde infinitus prope errorum cumulus in omnem reliquam vitam enascitur; infantes enim, ac pueri cum neque rei, neque ipsius auctoritatis examinandæ capaces sint, simulque submissionem illam, quam in actionibus suis & excipiendis religionis institutionibus aliorum directioni præstare coguntur, ab ea, quæ ad opiniones pertinet, non discernant, auctoritatem quamlibet seu parentum, seu nutricum, seu aliorum institutorum pro unica veritatis regula admittunt, quo fit, ut, quidquid cum ea non pugnat, temere arripiant. Adolescunt equidem, eamque subinde ætatem attingunt, qua propria ratione uti possunt; at quis jam numeret errores, quibus interea eorum mens imbuta fuit? Qua vero se ratione iis exonerabunt? difficillimum est referre, inter falsa, quæ quis longissimo tempore vera esse judicaverit. Ea porro ætate nova, eaque permulta formantur judicia, sed, cum non nisi conclusiones, sint ex anticipatis erroribus dedu-

ætæ, æquæ talis. Succedunt tandem annī,
 quibus disciplinæ severiores seu privatim,
 seu publicè condiscendæ sunt, tum vero
 nova magistrorum auctoritas juvenum ani-
 mos obruit; hæc velut ad saxum hærent, ne-
 fasque putant ab opinione institutoris sui
 vel latum unguem discedere; vidimus id o-
 lim in Pythagoræis, quorum illud pervulga-
 tum *αὐτὸς ἐφ' ἑσέ* satis demonstrat, quam perti-
 naciter magistri sui auctoritati adhæserint;
 vidimus id subinde in Peripateticis, qui er-
 rores quam plurimos per plura sæcula disse-
 minarunt sola Aristotelis auctoritate ducti,
 quem tamquam *humani ingenii finem* vene-
 rabantur; vidimus id recentius in Cartesia-
 nis, qui eruditæ ducis sui fabulas in certis-
 simæ veritatis locum adoptarunt; videre id
 denique & nunc quoque possumus; est enim
 & ætas quoque nostra eorum fertilis, qui
 adeo servili sunt ingenio, ut, quod facilius
 est, credere malint, quam scire, quod ope-
 rosius, quique patentes etiam errores aucto-
 ris cujusdam, cujus placita sequi decreve-
 runt, amplectuntur; sapienter hanc in rem
 Tullius: „ Qui requirunt, quid quaque in
 „ re ipsi sentiamus, curiosius id faciunt,
 „ quam necesse est: non enim tam auctores
 „ in disputando, quam rationis momenta
 „ quærenda sunt. Quin etiam obest plerum-
 „ que iis, qui discere volunt, auctoritas eo-
 „ rum, qui se docere profitentur: desinunt
 „ enim suum judicium adhibere; id habent
 „ ratum, quod ab eo, quem probant, ju-
 „ dicatum vident. Nec vero probare soleo
 „ id, quod de Pythagoricis accepimus, quos
 „ ferunt, si quid affirmarent in disputando,
 „ cum ex iis quæreretur, quare ita esset,
 „ respondere solitos, ipse dixit: ipse autem
 „ erat Pythagoras. Tantum præjudicata opi-
 „ nio poterat, ut etiam sine ratione valeret

De nat.
 Deor.
 l. 1. c. 5.

, auctoritas." Sed neque cum hisce annis auctoritatis imperium terminatur, & viri quoque saepe non ineruditi eidem subjiciuntur; nihil enim est pronius, quam ut ea pro veris habeantur; quæ a doctioribus audiuntur, atque eorum doctrina cum solida veritatis demonstratione confundatur. Atque hæc est ratio, cur rarissime deserantur opiniones jam receptæ; cur multa solo novitatis titulo rejiciantur; cur eæ præferantur sententiæ, quæ provinciæ, in qua degimus, aut familiæ, cui nomen dedimus, communiores sunt; cur in una regione verum videatur, quod in altera ut falsum rejicitur, quasi glebæ adscripta foret veritas.

SCHOL. 2. Verum non præjudiciis modo errores originem suam debent; sed alii quoque sunt, ac fere innomēni eorum fontes: horum præcipuos jam adducam, quo tiro philosophos cautissime incedere condisca.

Fontes Errorum.

1.) *Defectus seriæ voluntatis momenta rationum expendendi*, in iis præcipue, qui ceteroquin & occasionem, & otium, & requisitam mentis perspicaciam nacti sunt. Nempe alii inordinato voluptatum studio trahuntur, quod, cum animum emolliat, eumque objecto voluptatis nimium affigat, attentionem distrahit, mentisque acumen retundit: alii nimia ad negotia sua applicatione; alii aversione quadam a meditatione, librorumque lectione prope generali ita retinentur constricti, ut numquam seriam cogitationem in animum admittant; alii metuant, ne anxia, atque ab omni partium studio remota veritatis inquisitio sibi, suisque anticipatis opinionibus, ac receptæ jam

vivendi rationi minus faveat; unde opiniones, quas sibi commodum allaturas arbitrantur, absque omni indagine accipiunt, si modo ab aliis quoque, quicumque ii fuerint, eas foveri videant. Nonnumquam affectata propriæ imbecillitatis opinio efficit, ut homines animum despondeant, nihilque per se ipsos tentare audeant, sed ea cæce amplectantur, quæ a majoribus tradita acceperunt: id si omnium adhuc philosophantium animis insedisset, etiamnum in antiquis ignorantiae tenebris palparemus; nonnulli denique adeo superstitiose vitæ suæ, ac valetudini conservandi student, ut omnem horam, quam meditationi litterariæ, aut lectioni impendunt, eidem detractam putent; at hi quidem nosse deberent, non tam litterarum studia, quam otium, voluptatesque corporeas, quibus plus æquo indulgent, valetudini obesse: nec desunt virorum doctissimorum exempla, quibus id confirmari potest; Democritus ad centesimum; Plato ad octogesimum primum; S. Hieronymus ad nonagesimum primum; Newtonus ad octogesimum primum inter continuos litterarum labores vitam protraxerunt.

2.) *Affectiones animi dominantes.* Nulla fere argumenta, quæ affectionibus, ac desideriis nostris contraria sunt, aliquod apud nos pondus obrinent; quod volumus, facile credimus: effatum est certissimum. Sæpius quorundam in admittendis veritatibus morali-
bus obstinationem mecum expendens mirari soleo, qui fiat, ut ii ipsi, qui cuivis legitimæ demonstrationi geometricæ absque mora assentiuntur, recusent tamen aliis veritatibus non minus evidenter demonstratis, quales sunt: *existentia unius Numinis, ejusque providentia ad minima quævis sese porrigens, cultus eidem naturaliter debitus, animæ hu-*

manē libertas indifferentiæ, ac naturalis immortalitas, &c. &c. firmum assensum præbere: hujus profecto discriminis ratio non alio ex fonte peti debet, quam ab inordinatis animi affectionibus, quibus illæ nullo pacto: hæc vero quam maxime adversantur. Veritas nimirum tantum theoretica, nullum invenit adversarium, nisi ignorantiam, quam a se dispelli nemo non lubens patitur: at veritas practica in tot incurrit hostes, quot sunt malæ animi affectiones, quotque perverſam vivendi rationem amant, qui propterea omnia malunt, quam in id genus enunciationibus veritatem intueri (conf. §. 170. schol. n. 4.). Tales qui sunt, rationibus etiam evidentissimis non cedunt, semper, quod obmoveant, habent; jam latentem in vocabulis æquivocationem timent; jam in polysyllogismo longiori unam aliquam conclusionem male deductam suspicantur; jam quid in partem oppositam dici possit; se ignorare simulant; quodsi iis arma hæc omnia extorseris, occinent denique; forsitan æqua est utrinque probabilitas, forsitan...; verbo convinci nolunt, tritoque illo utuntur: *non persuadebis, etiamsi persuaseris*. Neque vero hoc mirum est; qui enim affectu quopiam agitur, nihil videt, nisi quod cum eo connexum est; nullas percipit ideas, nisi quæ cum illo viciniorem relationem habent; ad alias nec attendit, neque res ei repræsentantur, ut in se sunt, sed ut ab affectione depinguntur: quare cum ita a natura constituti simus, ut vivacior in nobis impressio omnem ad se attentionem avocet, fieri non potest, ut perdurante affectionis impetu animus veritatis indagationi serio applicetur; sed evenire necesse est, ut quæ primo affectus, non quæ ratio suaserit, in veris habeantur.

Quo de horum veritate amplius convin-
camur, ad particularia paullisper descenda-
mus: qui nimio in alterum amore fertur,
nihil in eo videt, nisi quod laude dignum
sit, ipsaque ei vitia virtutis speciem indue-
re videantur; odium contraria omnia impe-
rat, verbo: in amicis omnia; in inimicis
nihil probamus. Quoties accidit, ut, cum
auctor etiamnum latet, doctrinam ab eo pro-
positam acerrime eandem nominibus onere-
mus? At ubi deinde constiterit fuisse ami-
cum, improvide dicta ingeniose retractamus;
nonnulla leviter carpentes, reliqua justam
habere excusationem censemus: inde oritur
pervulgatum illud partium studium, quod
non modo historicos, sed ipsos etiam philo-
sophos frequentissime corrumpit; inde aliqui
ejus solum auctoris pronunciata dilaudent,
qui ejusdem cum ipsis nationis est, & pa-
triæ, ut in Anglia, Gallia, Germania conti-
gisse novimus, cum plures Newtono, Car-
tesio, Leibnitio ante adhæserunt, quam quid
a viris his præstantissimis doceatur, rite in-
tellexerunt; inde servilis illa apud nonnullos
antiquitatis veneratio; inde immoderatum
novitatis studium; inde eas sæpe sine exa-
mine rejicimus sententias, quæ ab invisio
nobis doctore proficiscuntur, quasi veri nihil
dici possit ab iis, quos odio habemus; cujus
vitii reos olim se fecerunt Cartesianorum
nonnulli, qui sine ulteriori inquisitione eo
solum titulo multa rejecerunt, quod ab Ari-
stotelicis tradita fuerant: auream hac in re
præstituit regulam P. Buffier: *ut cum de a-
mico ratiocinandum est, videamus, quid ex
propositis argumentis concluderemus, si de
inimico augeretur, & vicissim.* Spes, desi-
derium, timor efficiunt, ut facile ea fieri,
aut facta esse credamus, quæ cupimus, aut
timemus, belli tempore id cumprimis videri

potest; cuilibet tum rumori fides habetur, nec raro contingit, ut hodie cæsum doleamus exercitum, quem insignem de hostibus victoriam retulisse heri sine dubitatione credidimus; atque inde omnes fere veterum gentilium superstitiones, illæque de comētis, eclipsibus, aliisque porrentis cælestibus fabulæ ortum traxerunt. Superbia, sive nimius sui, rerumque suarum amor, ubi animum occupavit, in causa est, ut nihil sapiat, nisi quod suum est; hinc ejusmodi homines alios præ se despiciunt, & cum turpe putent ab aliis doceri, malunt absurdissimos errores, si modo singulares sint, amplecti, specialis inde perspicacitatis, ac magnanimæ in quærenda veritate libertatis gloriam aucupantes. Indubitatum mihi prorsus videtur, opiniones aperte adeo absurdas, quas in antiqua Græcorum philosophia complures viguisse novimus, ex hoc præcipue fonte profluxisse, ac hodie etiamnum profluere apud eos, qui magis gloriæ, quam veritatis amore ducuntur; quam multi enim nostra hac ætate ita litterarum studiis animum applicant, ut non tam veritatem quærant, quam gloriolæ auram caprent? Inde illas tantum disciplinas condiscunt, quæ ea in regione, illoque tempore præ aliis celebrantur, atque in his ipsis ea solum seligunt, quibus sese indoctis facilius fucum facturos sperant; inde in scientiam quampiam universalem inquirunt, ex omnibus aliquid addiscunt; at non plus, quam sufficere putent, ut minus expertis a se omnia sciri persuadeant; cumque omnem ignorantæ umbram magna cura fugiant, contemtim loquuntur de iis, quæ ipsi non assequuntur, aut facilioribus neglectis in sublimibus duntaxat velut aquilæ nidos extruunt. Longum foret per reliquam affectionum turmam discurrere; generatim verissi-

De ora-
tion. l. 2.
c. 42.

me pronunciavit Tullius: „plura multo ho-
„ mines judicant odio, aut amore, aut cu-
„ piditate, aut iracundia, aut dolore, aut
„ lætitia, aut spe, aut timore, aut alia
„ permotione mentis; quam veritate.” Phi-
losophus igitur sollicitè caveat, ne umquam
fervente affectionis æstu iudicium ferat, ex-
pectet, donec sedato tumultu sua menti re-
deat serenitas, eamque, quæ de bono affe-
ctionum usu uberius tractat, philosophiæ
partem tam lectione, quam exercitatione si-
bi optime perspectam reddat.

3.) *Naturalis corporis inertia.* Est corpus
nostrum natura sua iners, laboris impatiens,
levique molestia frangitur, quo fit, ut mi-
nuatur attentio, eorumque tædium genere-
tur, quæ longiorem industriam requirunt,
ac mens ipsa meditationi intenta a corpore
retardetur: hinc multa transilimus contenti,
si modo in scientiis sublimioribus non rudes
plane, ac hospites habeamur, nec ulla nos
de doctrinæ soliditate, & perfectione cura
tenet; terremur magnis auctorum volumini-
bus; compendia amamus, eosque præcipue
libellos exquirimus, qui magnificis titulis in-
tegras, difficillimasque scientias paucis sese
paginis complexuros promittunt. Accedit di-
versa ipsius corporis constitutio, a qua in-
genium, intellectus acumen, memoriæ, ac
imaginationis vis, experientia teste, pen-
dent; inde tarditas, confusio, inconstantia,
aliæque consimiles animi miseriæ, quibus
passim homines obnoxios videmus. Morbos
denique sapientiæ studio plurimum obesse
non ignotum esse potest; & sensus quoque
incautis frequentes errorum occasiones præ-
bere diximus (§§. 175. 176.). Sed quid jam
tot inter obstacula ab ipsa natura posita
philosopho agendum? rectam primum sibi
corporis habitudinem tum moderato cibi,

potusque usu, tum interposita nonnumquam animi remissione, tum medicamentis etiam, si necesse sit, procuret: deinde vero paullatim continuata attentione, ac meditatione studendi habitum contrahere conetur; sensim enim difficilis illa cum corporis pondere colluctatio mitior efficitur. Nihil est, verba sunt Senecæ, „ tam difficile, & ar-

De ira
l. 2. c. 12.

„ duum, quod non humana mens vincat,
„ & in familiaritatem perducatur assidua me-
„ ditatio.

4.) *Nimia ingenii, ac prospicacitatis fiducia.* Qui hoc vitio laborant, a solida rationum investigatione abstinere, quavis primo occurrente contenti; statim sibi satisfaciunt, dumque tamen sciendi aviditate tenentur, magis de rerum copia, quam doctrinæ soliditate solliciti sunt. Oritur inde *precipitantia*, amplissimus errorum fons, ac fere majori hominum parti communis, ex quo innumera judicia erronea sive in disciplinis, sive in vita civili originem ducunt; hinc enim fit, ut tam frequenter ex uno vel altero facto singulati illico universim concludamus: contingat, ut quis semel, aut iterum in re quapiam labatur, aut optatum in negotio exitum non consequatur, continuo talis qui est, ad omne vel instituti, vel artis, vel negotii genus tractandum ineptissimus declaratur; hinc fit, ut ab opposito sæpe lapsus occultemus; nec nisi ad id attendamus, quod successu non caruit: sic qui astrologis fidem habent, ad ea solum, licet paucissima, attendunt, quæ casu quodam fortuito prænunciationi responderunt; alia, & quamplurima, in quibus prædictionum vanitas evidenter apparuit, studiosè suppressunt.

5.) *Confusio idearum*, quæ contingit 1. si *relative pro absolutis habeantur*; cum enim

idea relativa nihil extra mentem repræsentet, sed duarum solum aliarum comparatione efficiatur, toties erramus, quoties per talem ideam aliquid reipsa existens exhiberi putamus; sic, cum de rerum magnitudine loquentes, dicimus: *Cajum esse magno ingenio*, id nihil significat, nisi collatio fiat cum aliorum ingeniis: ex hoc fonte fuit eorum impietas, qui majora in hoc universo corpora contemplantur facile quidem adducuntur, ut ea speciali Conditoris providentia administrari credant; at vero ut in insectis quoque opinione hominum vilissimis, in minutissimorum pulverum, ipsarumque atomorum motu, eandem sapientissimam mentem gubernatricem adorent, nulla ratione permoveri possunt, quasi aliquid comparate ad summum Creatorem magnum, aut parvum foret. 2. *Si abstracte pro concretis*; nam & earum quoque objecta extra mentis complexum non existunt (§. 73. schol. l. 2.); quo pertinet quæstio de universali a parte rei tanta olim laterum contentione agitata. 3. *Si clare pro distinctis*, aut *hæc pro adequatis*: quando enim eo pervenimus, ut rem ab omni alia discernamus, neque amplius quidquam in ea cognitione attingere possimus, facile nobis persuademus, nihil reapse aliud, quod cognosci possit, in ea latere; sic aurum distinguimus ab omni alio metallo, multasque ejus proprietates perspicimus; sed quis pro certo asserat nullas præterea in eodem inesse, aut etiam inter aurum unum & alterum nullam prorsus dari differentiam? ideas hac ratione confundunt, qui putant reales substantiarum existentium essentias nobis notas esse. 4. *Si consociate pro complexis*; contingit nimirum, ut in psychologia docetur, ut ideæ, quas uno simul tempore obtinimus, præsertim si vehementer ob vi-

vacem impressionem mentem affecerint, etsi in se diversæ sint, ita copulentur, ut quoties subinde una redit, altera quoque menti recurat, nec facili amplius negotio separari queant; jam vero hic lapis est, in quem incauti frequenter offendunt; dum enim non sufficientem adferunt attentionem, ideas id genus recurrentes non discernunt, easque ut unam complexam, ac ad eandem rem pertinentem intuentur, ex quo innumeros errores, falsaque judicia profluere necesse est. Sic quando infantibus tempore nocturno a nutricibus absurdæ illæ de spectris, & lemuribus fabellæ narrantur, in tenero eorum cerebro *ideæ tenebrarum* cum *ideis spectrorum* ita consociatur, ut deinceps ea recurrente & hæc recurrant, quas cum minime distinguant, in unam confundunt, atque hinc tota sæpe vita vano spectrorum metu in tenebris anguntur, ita ut jam vesperascente cælo soli esse non sustineant. Habet tamen hæc idearum consociatio magnum aliquando usum; inde enim, ut alia taceam, superiorum in subditos imperium maximam accipit firmitatem, quod imperii hujus idea cum ideis reverentiæ, ac timoris arte conjuncta est: ejus rei documentum extat in bello, quod Scythæ olim contra rebellantes servos suscipere coacti sunt; nam perduelles hi, ut post Herodotum Justinus refert, cum a dominis suis armorum ope nulla ratione superari possent, levi prorsus negotio virgis, ac flagellis, usitata scilicet mancipiorum castigatione, sub jugum missi sunt.

L. 2. c. 7.

(6.) *Malus vocabulorum usus.* Ita consuetudo obtinuit, ut in teneriori ætate vocabula memoriæ imprimamus nondum jactis de rebus ipsis, eorumque significatione ideis mente efformatis, quid jam vero inde consequitur? id, ut loquentes vocibus, quibus

utimur, non subjiciamus nisi ideas confusas, obscuras, aut omnino nullas, utque; quoties per reliquam vitam eadem vocabula ab aliis pronunciari audimus, easdem quoque imperfectas ideas in animo excitemus, quæ infinitis prope erroribus occasionem faciunt. Ad hunc errorum fontem obstruendum necesse est, ut; qui philosophari incipiunt, vocabula, ideasque illis adhuc substitutas de novo in examen vocent, vitiaque jam inveterata per seriam idearum quas correctionem emendent; præcipue vero ad id enitantur, ut singulis, quibus utuntur vocabulis, quantum fieri potest, claram, & distinctam ideam subjiciant; nimis enim frequens est, ut putemus nos vocabuli cujusdam potestatem aut nunc perfecte assequi, aut saltem alias assecutos esse; quod nullo tamen modo intelligimus, sed ex longa solum consuetudine enunciamus. Sed de his abunde dictum est (cap. 5. part. 1.); erat tamen res hæc tanti momenti, ut non immerito hic iterum in memoriam revocanda fuerit.

Quid sapiens dubitatio?

CCXXXII. *Sapiens dubitatio est retentio judicii, cum veritas menti non satis relucet, donec ea accuratiori examine melius investigetur.*

An ea errorum remedium?

CCXXXIII. *Sapiens dubitatio est remedium universale contra omnia præjudicia, erroresque alios unde demum cumque oriundos. Qui enim veritate, non satis relucente judicium suspendit, non sequitur in judicando opiniones anticipatas; nec judicium fert, antequam convenientiam, vel repugnantiam prædicati cum subjecto clare pervideat; sed talis rite judicat, atque ab omni errore remotus est. (conf. §. 93. schol.) igitur sapienti dubitatione omnia præjudicia, atque errores certissime declinantur.*

SCHOL. Sapientem dubitationem præscribi-
mus; nam scepticum illud, ac universale
de omnibus veritatibus etiam evidentissi-
mis dubium omnino stultum est, quod
olim magnæ Academicorum parti, tum
etiam Pyrrhoni, ejusque asseclis placuit,
qui de omnibus sine fine, & spe discendi
dubitari voluerunt, & nunc etiam placet
iis, quibus suave Religionis jugum ferri
non posse videtur. Quare sapientissime
monuit Cartesius, philosophiæ studium a
dubitatione inchoandum esse, cum alia
via non appareat, qua tot præjudicatæ
opiniones animo extirpentur; quod ego
ita accipiendum esse existimo, ut primo
dubium istud neque ad certa, & per se
evidentia, in quibus insanum; neque ad
sanctissima Religionis mysteria, in quibus
temerarium foret dubitare, extendatur;
deinde etiam in rebus agendis, ubi ope-
randi necessitas adest, ab eo prudenter
caveamus; in negotiis enim quotidianis,
quæ expediri debent, nec differri possunt,
sola frequenter verisimilitudine contenti
esse cogimur, neque semper rationes o-
mnes ad amussim exigi possunt, modo ne
quid temere, aut præcipitanter statuatur
(conf. §. 216. schol. n. 2.). Igitur phi-
losophiæ tiro medicamento hoc ita utatur,
ut primo omnium loco mentem suam
exuat omnibus, quas antea actæ vitæ con-
suetudine temere arripuit, opinionibus nul-
lamque earum amplius in veris habeat,
nisi maturo prius examine probatam, at-
tentoque ad rationum momenta animo ex-
pensam. Sed hæc quasi per gradus præ-
standa erunt, neque enim mens nostra
omnes simul acquirit vires: satis erit, si
in omnibus occasionibus, ubi rem quam-
piam seria meditatione evolvit, sollici-

te dispiciat, utrum principia, ex quibus præsentēs conclusionēs profluunt, aliquando accurate expenderit; inde fiet, ut non admittat consecutiones, nisi quæ principiis certis, ac evidentibus nituntur. Deinde cum audit contradici ab aliis, impugnarique opiniones, quas adhuc in certissimis habuit, rursum indaget, num umquam argumenta suæ opinionis in examen vocaverit; id si factum non esse deprehendatur, tum fiat, simulque oppositæ sententiæ rationēs ponderentur. Cumprimis vero examen istud instituendum circa opiniones nationis, aut familiæ, quæ nobis quasi domesticæ sunt, quod magna quandoque obstacula perfringenda habet; cum enim sæpe noxium sit a communi opinione recedere, facillime in ejusmodi investigatione labimur, rationesque oppositas levi attentione percurrimus metuentes, ne sententiæ, quam commodi cuiuspiam amore veram esse cupimus, falsitas patefiat; actum agit, qui in veritatis inquisitione timore, aut desiderio agitur.

C A P U T VIII.

DE CONCERTATIONE LITTERARIA.

Quid
convincere,
refellere,
& impugnare?

CCXXXIV. Qui efficit, ut alteri veritas fiat certa, *convincit*; alter vero *convincitur*: qui alterius sententiam demonstrat esse falsam, *refutat*, sive *refellit*; qui vero insufficienter solum propositionis falsitatem probat, *impugnat*: sic atheos, vel deistas *refellimus*; *systema terre motæ a quibusdam impugnatur*.

COROLL. In refutatione convictio; non item in impugnatione locum habet.

CCXXXV. *Concertatio litteraria* fit, cum alter alterius sententiam vel refutat, vel impugnat. *Propositio in quæstionem vocata latinis positio, græcis thesis* nuncupatur.

Quid concertatio litteraria?

COROLL. Concertantium igitur unus negat, quod alter affirmat; ac inde sibi contradicunt; atque hinc tritum illud oritur: *concertantes versantur in terminis contradictionis.*

SCHOL. Plura sunt, quæ generatim in omni concertatione litteraria observari utiliter possunt, ac vero etiam debent: ergo aliqua pro instituto attingam.

Leges generales concertationis litterariæ:

1.) *Concertatio amore duntaxat veritatis vel inveniendæ, vel amplius cognoscendæ instituenda est; abesse proinde procul debet omnis inordinata animi affectio, partium studium, & quæcumque veritatis inventionem impediunt magis, quam promouent; præclare Tullius: „cupio refelli: quid enim la-
„boro, nisi ut veritas in omni quæstione
„explicetur.”* De iis igitur rebus, quarum aliunde jam certa habetur veritas, aut quæ humani ingenii captum superant, non disceptetur.

Q. Tusc.
l. 3. c. 20.

2.) *Status controversiæ primo omnium loco verbis quam usitatissimis, & maxime aptis exponatur, ac prorsus nitide explicetur; quod nisi fiat, prorsus est, ut in partes prorsus contrarias abeant concernantes, nec sese mutuo intelligant, totaque tandem disceptatio in logomachiam sive inutilem de vocabulo litem degeneret (conf. §. 202. schol. l. 1.).* Sed & definito jam concertationis capite: magnopere cavendum, ne in disputationis fervore ab eo recedatur; quique in hoc de-

liquerit, absque mora in viam revocandus est.

3.) *Concertantibus sint quedam principia, in quibus uterque conveniat, communia; cum enim conclusioni majus robur competere nequeat, quam principio, ex quo ea profluit, nisi istud sit adversario certum, numquam is de conclusionis veritate convinci poterit. Universim nempe demonstratio aliud non est, quam series quædam, & colligatio propositionum eo fine facta, ut adversarius admittat consecutionem alicujus principii, aut veritatis a se jam admissæ, ex hoc autem evidenter patet, necesse esse, ut detur principium quodpiam ab ipso admissum, atque adeo utrique concertantium commune. Sic Judæum convincere nequeo ex libris novi testamenti tamquam divinis, cum is eorum divinitatem neget; si quæstio agitur physica, requiritur, ut uterque in hoc consentiat; legitimum sensuum testimonium respici non posse. Atque inde, quantum fieri potest, principia clariora, & notiora obscurioribus præferri debent; utimur tamen quandoque etiam falsis, quæ adversarium in veris habet, si modo causa ex parte nostra vera sit, ac justa; secus enim talium argumentorum usus a fraudulentæ calliditatis nota absolvi nequit: sic licet Mahometanum ex Alcorano de veritate Religionis Christianæ convincere (conf. §. 197. schol.). Patet vero ex his, eo difficiliorem fore concertationem, quo pauciora sunt principia ab adversario admissa; cum iis autem, qui nullum admittunt, disputari nec debere, nec posse: ejusmodi olim erant sceptici, hodie scioli nonnulli, ac profani homines reconditæ doctrinæ laudem inde aucupantes, quod evidentiæ quoque magno verborum, nihil significantium apparatus in dubium, ut illi qui-*

dem sibi persuadent, vocare sciant; qualia sunt, quæ contra demonstratam Dei, providentiæ, religionisque revelatæ existentiam, ac immortalitatem animæ humanæ ore impio effutiant.

4.) *Refutaturus alterius sententiam vel ipsam immediate, vel principia, ex quibus eam adversarius deducit, aggrediatur: primum demonstratione, vel directa, vel indirecta confici poterit, idque versando sive circa ipsam sententiam, sive circa consequentium clare tamen, ac legitime ex ea profluens: alterum vel ipsa principia refellendo, vel iis permissis ostendendo, thesin ex iisdem non legitime sequi; atque adeo formæ vitium admissum fuisse.*

5.) *Qui in concertatione negativam tuetur partem, non tenetur aliam negationis suæ adferre rationem, quam quod adversarii argumenta nihil probent; id vero non obtinetur generalibus, dubiisque responsis, ut aliquibus in more est: forsitan potuit res aliter fieri; fortasse sunt nonnulla, quæ ignoramus &c. &c. sed omnino necesse est, ut ea solide refellantur; sic qui negat ullam dari in compenetratione, & replicatione corporum contradictionem, negationem suam exquisitis rationibus constabilire non tenetur, tenetur tamen resolvere adversariorum argumenta, & planum facere, contradictiones omnes ab ipsis allatas apparentes solum, ac in se nullas esse.*

6.) *Qui propositionem suam veram esse, aut oppositam, quam negat, impossibilem demonstravit, prorsus ad nihil amplius tenetur, nec prudenter cõgi potest, ut respondeat obiectiunculis, quæ a pertinacibus, & scepticis accumulari solent; quæ enim possunt rationes excogitari, quæ propositionem demonstratam falsam esse, aut rem impossibilem.*

re ipsa dari evincant? Sic geometræ solliciti sunt, num^q quid theorematibus ab ipsis demonstratis a rudibus opponi possit; sic metaphysicus, ubi existentiam Dei demonstravit, non tenetur atheorum sopismatibus respondere, nisi polluta ora amplius obtrudere velit.

Quotuplex concertatio?

CCXXXVI. Concertatio litteraria vel inter eruditos, doctosque viros, & quidem potissimum scripto inter absentes instituitur, vel eos inter, qui disciplinis severioribus in publicis collegiis operam navant: hæc inter præsentibus, & ore fit.

COROLL. Inde scripta *polemica*, sive *eristica*, quæ vel de rebus solum scientificis, vel etiam ad religionem pertinentibus tractant, denominantur. Qualia continentur in *Recueil de divers. piéc. per. Mons. Leibnitz, Clarke. Newton, & autr. autr. cel.*

SCHOL. Viris equidem eruditis nullæ videntur leges præscribendæ; quia tamen ne eruditio semper a distortis animi motionibus sejuncta est, quædam hoc loco utiliter monenda veniunt. Atque in primis quidem magnopere caveri debent ea vitia, quæ (§. 227. schol. n. 4.) allata sunt; tum abstinendum est ab iis argumentandi modis, qui ex odio magis, aut invidia, quam sincero veritatis amore proficiscuntur: cujusmodi sunt, ut Lockius observat.

Essai
phil.
conc. l'
entend.
hum. l.
4. ch. 17.
§§. 19.
&c.

1.) *Argumentum ad verecundiam*: cum acervatim congeruntur opiniones aliorum, qui vel ob insignis doctrinæ, magisque ingenii famam, vel ob potentiam, aut muneris, quod sustinent, dignitatem, publicum nomen, existimationem, magnamque auctoritatem, ac quoddam quasi in aliorum animos imperium adepti sunt, ut adversarius

immenso auctoritatis pondere in puncto quasi temporis opprimatur; nec ultra hiscere audeat. Sunt fere homines ita affecti, ut viro in dignitate constituto contradicere, ejusque, quam jam possidet, auctoritatem in dubium vocare nefas esse putent; quare, si quis non continuo omni cum demissione se submittat, sententiisque auctorum, qui ejusmodi publica veneratione digni vulgo censentur, absque maturo examine adstipulari recuset, jam is vanitatis, ignorantiae, & peritinae non tolerandae reus habetur.

2.) *Argumentum ad ignorantiam*, quo utuntur ii, qui ad aliorum assensum vi extorquendum postulant, ut adversarius, cum rationem ab ipsis allatam, admittere nolit, meliorem, firmioremque assignet: quasi vero a me idcirco stet veritas, quod alter argumenta mea dissolvere, aut aptius quidpiam in medium adferre nequeat; quid si artifex a me operis sui commendationem, aut praestantiae confessionem extundere vellet propterea, quod ego nec simile, nec concinnius aliud efficere possim? Non ambulat profecto alius ex eo solum capite rectum tramitem, quod ego meliorem non novi, nec minus iniquus in me foret is, qui eam ob causam eundem tenendi necessitatem mihi imponere vellet, cum fieri possit, ut & alter aberraret, & ego errorem demonstrare, aut melius quid invenire nequeam.

3.) *Argumentum ad hominem male applicatum*; equidem hoc argumentandi genus alias probavimus (§. 197. schol.), id tamen adverti velim; primum: nequaquam nobis eo uti licere, cum ipsi in mala versamur causa; hac enim ratione adversarium non nisi ab uno errore ad alium traduceremus: deinde etsi illud ad convincendum admodum

opportunum sit, non tamen ad constituentum quidpiam per sese ullam habet efficaciam; neque enim ex eo meæ opinioni veritas accedit, quod ea ex adversarii principiis profluat, aut ipsa etiam illius confessione comprobetur, siquidem ego una cum ipso errare possum; neque eadē opera, qua ostendo adversarium errare, simul evinco me ab errore immunem esse.

4.) Denique viri eruditi honori suo haudquaquam consulunt, cum consecraria diversa non tam refutandi, quam calumniandi, odiumque, ac invidiam conciliandi animo ex adversarii doctrina eruunt, eaque ipsi tamquam totidem dogmata ex proposito propugnata attribuunt (conf. §. 227. schol. n. 3.). Id genus homines *consequentarios* appellare solemus, eorumque agendi ratio naturalibus mutue charitatis officiis repugnat.

Quid defendens,
& oppugnans?

CCXXXVII. Concertatio litteraria inter collegiorum auditores sive exercitationis solum, sive speciminis publice dandi causa instituta requirit *defendentem*, seu illum, qui thesis a se propositæ veritatem contra adversariorum objecta apte respondendo vindicat: tum *oppugnantem*, sive eum, qui, dum adversarii partes agit, eandem positionem argumentis aptis vel refellere, vel certe impugnare nititur.

Quid ab
iis observandum?

SCHOL. Sunt nonnulla utrique; alia cuivis nominatim observanda, ut ejusmodi concertatio suo fructu non careat.

1.) *Utrique*. Ne alterutra pars a scopo aberret, aut inania quærat diverticula, adhibeantur perpetuo syllogismi, nisi quando fusiori dictorum explanatione opus est; ne vero inutiles, & ad rem non pertinentes accumulentur, tempus cuilibet argumento præfixum non nimis longum sit. Vitentur deinde jurgia, clamores inconditi, calumniæ;

permittatur suum cuique loquendi spatium; nec unus in alterius dicta inurbane involet, universim denique suo honori mutuo consulant, defendens accommodando responsiones ita, ut argumentum in ordine procedat: oppugnans modeste, neque nimium premendo; prorsus enim indecorum est; nec immerito auditoribus stomachum movet, cum defendens quæcumque præfracte negando eo solum tendit, ut adversarium ex argumento, ut ajunt, ejiciat; & contra oppugnans magna doctrinæ suæ opinione inflatus ea, quæ discentium captum excedunt, importune urgendo defendentem obmutescere cogit.

2.) *Defendentis munus* est: syllogismum quemvis propositum, ad verbum e memoria reddere, atque ad singulas propositiones apte respondere, *negando* falsas; *concedendo* veras; *distinguendo* ambiguas; aut *æquivocas*; *disparem*, ubi opus fuerit, rationem assignando; huc non pertinentia *transmittendo*; tandem etiam, si res postulet, argumentum ipsum in adversarium *retorquendo*. Præcisa hæc responsa fusiori quandoque oratione explananda veniunt, præsertim ubi distinctio adhibita, aut dispar ratio assignata fuerit. Universim vero in omni ejusmodi explanatione sit clarus, brevis, ea solum proferat, quæ ad rem præsentem faciunt, inutilia, aut huc non spectantia omittat; ex his enim manifestum fiet, eum non memoriam solum, sed intellectum quoque excoluisse, neque vocabula tantum, distinctionumque formulas, sed rem ipsam funditus perdidicisse.

3.) *Oppugnantis* est prudentem thesım impugnantæ selectionem facere, nec facile admodum evidentes aggredi; tum paret sibi argumentum ordinatum, quod obtineretur, si primi syllogismi conclusio sit contradictoria.

propositionis oppugnandæ; in consequentibus vero constanter inferatur propositio ultimo ab adversario negata, & sic a minoribus pedetentim ad majores difficultates ordine, & quasi per gradus ascendatur. Sint præterea syllogismi breves, ut commode a defendente *resumi* queant; talia opponat, quæ a defendente sciri & possunt, & debent, quo illius honori consulat, atque ita, quæ objecerit, inter se apte connectat, ut ex altero alterum quodam modo profuatur; absteineat in argumenti decursu a nimio clamore, strepitu, ac ironicis quibusdam urgendi formulis, quæ non serviunt nisi ad bilem movendam, nec videatur velle extorquere ab adversario, ut se victum profiteatur; quin si victoriam ad se inclinare advertat, modesto potius silentio finem disputationi imponat, eo contentus, quod argumenti vim auditori præsentit, ac defendenti ipsi detexerit, judicium ipsis relinquat; denique contra improvisa responsa accurata meditatione sese antea præmuniat, nec facile quid proferat, quod nesciat extemplo probare. Cetera usus docebit.

Hæc porro per decursum hujus capitis allata si observentur, non erit, cur omnes generatim concertationes carpantur: habent eæ profecto utilitatem maximam; nam præter veritatis inventionem, quo quidem potissimum illa eruditorum disceptatio contendit, ingenium acuunt; promptam cogitandi, eloquendi que facultatem conciliant; judicium denique in discernendo vero a falso roborant; cum enim in ipso disputationis fervore in omnem sese partem mens vertere cogatur, ut commodam singulis objectis responsionem depromat, sit frequentissime, ut ea tum occurrant, quæ secus in mentem aut numquam, aut non nisi post diuturnitatem meditationem

De Concertat. Litterar. P. III. C. VIII. 301
venissent. Nimiam tamen disputandi libidinem non probo; ea enim non leve est promovendarum scientiarum impedimentum; homines non tam doctos, quam scepticos efficit, generatque pervicax quoddam contradicendi studium, quo invalescente nulla doctrina adeo absurda, adeo impia est, ut non aliquibus propugnatoribus gloriatur. Id facile patebit, si ad ea mente redeamus tempora, quibus divisum cum Aristotele imperium veterum sophistarum reliquæ tenuerunt; sed hisce non malis eripuit Deus Optimus Maximus, cujus honoribus hunc qualemcumque laborem dicatum volo.

O. A. M. D. G. B. V. S. L. C. H.

F I N I S.

INDEX

CAPITULUM.

<i>Prolegomenon in Philosophiam.</i>	Pag. 3
<i>Prolegomenon in Logicam.</i>	49

P A R S I.

De Facultate Cognoscitiva Mentis Humane.

CAPUT I.	De Ideis, earumque Obje- ctis.	52
CAPUT II.	De Formali Idearum Dif- ferentia.	54
CAPUT III.	De Materiali Idearum Dif- ferentia.	57
CAPUT IV.	De Idearum Signis.	68
CAPUT V.	De Vocabulorum Usu, Abu- su, ejusque Remediis.	74
CAPUT VI.	De Definitione.	83
CAPUT VII.	De Divisione.	94
CAPUT VIII.	De Judicio.	97
CAPUT IX.	De Enunciatione, & ejus- dem Variis Speciebus.	101
CAPUT X.	De Diversis Enunciationum Proprietatibus.	104
CAPUT XI.	De Enunciationibus in Me- thodo Scientifica Usita- tis.	111
CAPUT XII.	De Ratiocinatione.	114
CAPUT XIII.	De Argumentatione, & Nominatim de Syllogismo Simplici.	121
CAPUT XIV.	De Syllogismo Composito.	130
CAPUT XV.	De Reliquis Argumentandi Speciebus.	133